

মাসুদ রানা

আগুন নিয়ে খেলা

প্রথম খণ্ড

কাজী আনোয়ার হোসেন



মাসুদ রানা

আগুন নিয়ে খেলা

প্রথম খণ্ড

কাজী আনোয়ার হোসেন

বৈকালহৃদের অপূর্ব প্রাকৃতিক শোভা উপভোগ করতে
গেছে মাসুদ রানা। তাই বলে পিস্তলটা রাখবে না সাথে?
চিফের বারণ শুনে মস্ত ভুল করেছে ও।

ওখানে জটিল এক বামেলায় জড়িয়ে গেল ওরা।
কারা যেন ডুবিয়ে মারতে চায় রিসার্চ শিপের সবাইকে।
প্রলয়ঙ্কর প্রাকৃতিক দুর্যোগে বিশাল ঢেউ থেকে যাদেরকে
উদ্ধার করল ওরা, তাদেরই ভিতর রয়েছে কালনাগিনী!
ঠিক সময়মত ফণা তুলল সে।

কী করবে নিরস্ত্র রানা? চেষ্টা করেও তো বিজ্ঞানীদের
কিডন্যাপ হওয়া ঠেকানো গেল না। এবার?

বৈকালহৃদ ছেড়ে চলল ও মঙ্গোলিয়ার উলানবাটোরে।
বন্ধু ববি মুরল্যাণ্ডকে নিয়ে ঢুকে পড়ল ভয়ঙ্কর এক উন্মাদের
আস্তানায। চেঙ্গিস খানের সমাধির ভিতর পরিচিত
বিজ্ঞানীর লাশ নীরবে বলল, বাঁচতে চাইলে পালাও, রানা!
এ বিরান মরুভূমিতে কোথায় পালাবে রানা-ববি?
হিংস্র-বর্বর প্রহরীদের আদেশ দিয়েছে জালাইর তেমুজিন:
লাশ চাই আমি ওই লোকদুটোর।



সেবা বই

প্রিয় বই

অবসরের সঙ্গী

সেবা প্রকাশনী

২৪/৪ কাজী মোতাহার হোসেন সড়ক, সেগুনবাগিচা, ঢাকা ১০০০

সেবা প্রকাশনী শো-রুম: ৩৬/১০ বাংলাবাজার, ঢাকা-১১০০

প্রজাপতি প্রকাশন শো-রুম: ৩৮/২ক বাংলাবাজার, ঢাকা-১১০০



www.boiRboi.net

এক

আঁধার ফুঁড়ে দৃষ্টি চালাবার চেষ্টা করছে নারগুই এখতুওয়ায়া। ঘাড় কাত করে শুনছে দাঁড়ের ছন্দোবদ্ধ ছপ্-ছপ্ আওয়াজ। দ্রুত এগিয়ে আসছে শত্রুপক্ষের জলযান। একটু পিছিয়ে গাড় ছায়ায় হাঁটু মুড়ে বসল মঙ্গোলিয়ান কমাণ্ডার—আয়, তোদের ভালমতই অভ্যর্থনা দেব।

অধীনস্থ সৈন্যদের জানা আছে, নারগুই শত্রুদলকে উঠতে দেবে জাহাজে।

জাপানের হাকাটা বে। আগস্টের দশ তারিখ, বারো শ' একাশি খ্রিস্টাব্দ। চারদিক নিকষ অন্ধকার।

দাঁড় বাওয়ার শব্দ থেমে যাওয়ার একটু পরেই ঠক্ করে আওয়াজ হলো। নৌকাটা জাহাজের স্টার্নে ভিড়েছে।

মাঝরাত। চাঁদ নেই, মেঘ-মুক্ত আকাশে ঝিকমিক করছে উজ্জ্বল নক্ষত্রগুলো—পুরো জাহাজে লেপটে আছে আবছা আলো।

এখতুওয়ায়া দেখল, স্টার্নের রেল টপকাচ্ছে কালো একটা ছায়া। তারপর এল ওরা একের পর এক! একমিনিট পার হওয়ার আগেই দেখা গেল, জাহাজের ডেকে উঠে এসেছে মোট বারোজন। রংচঙা রেশমের পোশাক পরনে। ওগুলোর উপর চামড়ার আর্মার ও টিউনিক। নড়াচড়া করলেই খসখস আওয়াজ হচ্ছে, তবে নারগুইয়ের চোখ আটকে গেল ওদের হাতে ধরা ডুয়েলিং তলোয়ারের উপর। কাটানাগুলো ক্ষুরের মত ধারালো। তারার আলোয় থেকে থেকে ঝিকিয়ে উঠছে ওগুলো।

আগুন নিয়ে খেলা-১

মঙ্গোলিয়ান কমাণ্ডারের টোপ গিলেছে শত্রুদল। পাশে বসে থাকা বালকের উদ্দেশে মাথা কাত করল নারগুই এখতুওয়ায়া।

একহাতে শক্ত করে ব্রোঞ্জের ভারী ঘণ্টি ধরল ছেলেটা, আরেক হাতে পুরু ধাতব দণ্ড—দুটোর সংঘর্ষে খানখান হয়ে গেল নীরবতা।

হঠাৎ চমকে উঠে চারপাশ দেখল জাপানি অনুপ্রবেশকারীরা। ততক্ষণে ছায়া থেকে বেরিয়ে এসেছে তিরিশজন চায়নিজ সৈনিক, হাতে উদ্যত বর্শা!

শত্রুর উপর ঝাঁপিয়ে পড়ল তারা।

চামড়ার বর্ম কোনও কাজে লাগল না, সঙ্গে সঙ্গে মারা গেল দু'জন জাপানি। বাকিরা প্রাণপণ লড়ল, কিন্তু প্রতিপক্ষের সংখ্যা অনেক বেশি—বিশ মিনিটের মধ্যেই একে একে প্রাণ দিল বেশিরভাগ। রক্তের স্রোতে ভেসে গেল ডেক। প্রায় সবাই মারা গেছে, ডেকের উপর কাতরাচ্ছে মুমূর্ষু দু'জন—কিন্তু তখনও একাকী লড়াই করছে একজন!

তার পরনে এমব্রয়ডারি করা সিল্কের লাল রোব, টিলা পাতলুনের নীচের অংশ গুঁজে নিয়েছে কাঁচা-চামড়া দিয়ে তৈরি বুটের ভিতর। স্পষ্ট বোঝা গেল, সে সাধারণ সৈনিক নয়। তার নিখুঁত নড়াচড়া যেন বিদ্যুৎ শিখা! তলোয়ার দিয়েই চারপাশের হামলাকারীদের ঠেকিয়ে রেখেছে সে, কিন্তু যখন বুঝল পিছিয়ে নৌকায় ফিরতে পারবে না, প্রাণের পরোয়া না করে সামনে বেড়ে আক্রমণ করল। চায়নিজ বর্শাগুলোকে অনায়াসে ঠেকাল তার তীক্ষ্ণধার তলোয়ার।

লোকটার সামনে তিনজনের একটা গ্রুপ। তারা কেউ বর্শা তাক করবার আগেই পৌঁছে গেল সে, তলোয়ারটা বাতাসে শিস কেটে একপাশ থেকে আরেকপাশে গেল—ওটা যেন স্নেহ রূপালি একটা ঝালক। পরমুহূর্তে মারাত্মক আহত তিন সৈন্য ধড়াস করে ডেকে পড়ল। সব কজনের কণ্ঠনালী কাটা পড়েছে

এক আঘাতে; গল গল করে রক্ত ঝরছে ডেকের উপর।

জাপানি লোকটা যেন কোনও আগুন দিয়ে তৈরি চরকি, চারপাশে ছুটে গিয়ে চায়নিজ সৈন্য খতম করেছে। লাফ দিয়ে উঠে দাঁড়াল নারগুই এখতুওয়ায়া, খাপ থেকে এক টানে তলোয়ার বের করে ছুটল সামনে।

তাকে তেড়ে আসতে দেখেছে জাপানি। এদিকে একপাশ থেকে আসছে আরেক লোক, তার বর্শাটা তলোয়ার দিয়ে সরিয়ে দিল সে। থেমে দাঁড়াতে চাইল চায়নিজ সৈন্য, কিন্তু জাপানি যোদ্ধা দু'পা সামনে বাড়ল—তার রক্তাক্ত তলোয়ার লোকটার পেটের ভিতরে ঢুকে পড়ল চামড়া ছিঁড়ে।

মঙ্গোলিয়ান কমান্ডার তার জীবনে অসংখ্য শত্রুকে খতম করেছে, বুকের কাছে ঘুরন্ত ফলা দেখে সরে গেল সে। তলোয়ারের ডগা তার বাম বুকের এক মিলিমিটার দূর দিয়ে গেল। শত্রুর তলোয়ারটা পার হতেই নিজের তলোয়ার উপরে তুলল এখতুওয়ায়া, লোকটার পাঁজরের একপাশ দিয়ে ঢুকিয়ে দিল ফলা। সঙ্গে সঙ্গে আড়ষ্ট হয়ে গেল জাপানি অফিসার, ফুটো হয়ে গেছে হৃৎপিণ্ড! মনে হলো লোকটা মঙ্গোলিয়ান অফিসারের উদ্দেশে দুর্বল ভঙ্গিতে বাউ করল, তারপর চোখ উল্টে কাত হয়ে ডেকের উপর পড়ল তার লাশ।

লড়াই শেষ। বিজয়ী সৈনিকরা রণ-হুঙ্কার ছাড়ল। সেই আওয়াজে মঙ্গোলিয়ান ফ্লিটের সবাই বুঝল, আজ রাতে আর গেরিলা হামলা হবে না।

নারগুই এখতুওয়ায়া তার সৈন্যদের বলল, 'তোমরা দুর্দান্ত সাহসের সঙ্গে লড়াই করেছ। তোমাদের পুরস্কৃত করা হবে।' হাসি ফুটল চায়নিজ যোদ্ধাদের মুখে। 'এবার আহতদের নিয়ে রাখো সিক বে-তে। জাপানিদের লাশ সাগরে ফেলে দাও। আমাদের যারা মারা গেছে, তাদেরও ফেলতে হবে, তবে প্রার্থনার পর। এরপর জাহাজের ডেক থেকে ধুয়ে ফেলবে রক্ত।

কাজ শেষে বীরের মত গর্ব বুকে নিয়ে ঘুমাতে পারবে তোমরা।’

তার কথা শেষ হতেই উল্লাস প্রকাশ করল সৈনিকরা।

নারগুই এখতুওয়ায়া সামুরাই যোদ্ধার পাশে এক হাঁটু গেড়ে বসল, মৃতের হাত থেকে রক্তাক্ত তলোয়ারটা নিল। জাহাজের লঞ্চনের আলোয় ভাল করে দেখল ওটা। তুলনা নেই তলোয়ারটার। ক্ষুরের মত ধারাল। ভারসাম্য অসাধারণ। উঠে দাঁড়াল এখতুওয়ায়া, রক্ত মুছে তলোয়ারটা নিজের কোমর-বন্ধনীতে পুরে রাখল। ঠোঁটে ফুটে উঠল তৃপ্তির হাসি।

কোনও আনুষ্ঠানিকতা ছাড়াই জাপানি লাশগুলো সাগরে ফেলে দেয়া হলো। এ জাহাজের ক্যাপ্টেন কোরিয়ান এক ত্যাড়া লোক, নাম ইয়ান। নারগুই এখতুওয়ায়ার দিকে এগিয়ে এল সে। কোনও প্রশংসা নেই তার কণ্ঠে, ‘ভাল লড়াই করেছেন। কিন্তু আর কতদিন এভাবে আমার জাহাজে আক্রমণ চলবে?’

নারগুই এখতুওয়ায়া বলল, ‘ইয়াংঘি ফ্লিটের দক্ষিণ অংশ পৌছে গেলেই ডাঙায় নামব আমরা, তারপর শুধু এগিয়ে যাওয়া। জাপানিদের প্রতিরোধ চুরমার করে দেওয়ার পর চোরাগোষ্ঠা হামলা বন্ধ হবে ওদের। আজ আক্রমণ করতে এসে যা ঘটল, সেটা ওদের গায়ে লাগবে। এমনও হতে পারে, এরপর হয়তো আর হামলাই করবে না।’

ইয়ান নাক কুঁচকে বলল, ‘এতদিনে আমার জাহাজ আর ক্রুদের নিয়ে পুসানে ফিরে যাওয়ার কথা। অবস্থাদৃষ্টে তো মনে হচ্ছে আপনাদের পুরো বাহিনী ভেঙে পড়ছে।’

নারগুই এখতুওয়ায়া চিবিয়ে চিবিয়ে বলল, ‘আমাদের এই দুই ফ্লিটের নিজস্ব যোগাযোগ ভাল থাকা উচিত ছিল। তবে নিশ্চিত থাকতে পারেন, ফলাফল আমাদের পক্ষে আসবে। আমরা বিজয়ী হবই।’

দৃঢ় পায়ে জাহাজের আরেকদিকে চলে গেল ক্যাপ্টেন। বিড়বিড় করে কপালকে অভিশাপ দিল এখতুওয়ায়া। এখানে

এসে কোরিয়ান ক্যাপ্টেন, ত্রু আর চায়নিজ সৈন্যদের নিয়ে লড়াই যেন প্রায় অসম্ভব একটা কাজ! ওর মন বলে ও দু'হাত পিঠের সঙ্গে বেঁধে লড়াই করছে! এখন যদি ওর সঙ্গে মঙ্গোল অশ্বারোহী সৈন্য থাকত, এক সপ্তাহের মধ্যে এই দ্বীপ দখল করে নিতে পারত।

কিন্তু আফসোস করে লাভ কী, এখন তুওয়ালা জাহাজের ক্যাপ্টেনের কথাগুলো ভাবতে শুরু করল। লোকটা একেবারে ভুল বলেনি। তাদের এবারের এই হানাদারবাহিনী শুরু থেকেই নড়বড় করেছে। সে যদি কুসংস্কারাচ্ছন্ন লোক হত, নিঃসন্দেহে বলত, তাদের উপর অভিলাপ নেমেছে। চিনের সম্রাট কুবলাই খান, খানদের খান, মঙ্গোলদের নেতা যখন জাপানি শাসকদের জানালেন, এখন থেকে তাঁকে উপহার-সামগ্রী পাঠাতে হবে—তঁরা এক কথায় নাকচ করে দিল। এরপর জাপান আক্রমণ করা ছাড়া আর পথ থাকল না। কিন্তু পাঁচ বছর আগে পাঠানো বাহিনী ছিল অনেক ছোট। তারা জাপান ভূখণ্ডে নামতেই পারেনি, তার আগেই প্রচণ্ড হাওয়ার মাতম শুরু হওয়ায় চোখের নিম্নে সাগরে ডুবে গিয়েছিল মঙ্গোল ফ্লিট। দুর্ভাগ্য আর কাকে বলে!

এখন উনআশি সালে ওই একই ভুল হবে কেন? না, কুবলাই খান এবার বিরাট এক নৌবাহিনী গঠন করেছেন। সঙ্গে দিয়েছেন কোরিয়ান পুং ফ্লিটকে। মূল বাহিনী হিসেবে থাকছে চীনা সৈন্য। ওদের নিয়েই তৈরি হয়েছে দক্ষিণ ইয়াংপি ফ্লিট। চায়নিজ ও মঙ্গোলদের নিয়ে দেড় লাখ সৈন্যের এক বাহিনী গঠন করা হয়েছে। তারা দক্ষিণ থেকে জাপানের কাইউশু দ্বীপ আক্রমণ করবে। জাপানের নেতারা ওখান থেকেই দেশ চালায়। এবার তাদের কান ধরে মাটিতে নামিয়ে দেয়া হবে। কুবলাই খানের যথেষ্ট সৈন্য জাপানের উপকূলে পৌঁছেছে, তারপরও সৈন্য আসছে আরও। পুং ফ্লিট কোরিয়া থেকে আগেই এসেছে। তারা আগুন নিয়ে খেলা-১

সমস্ত সম্মান নিজেরা পেতে চেয়েছিল। কিন্তু হাকাটা বে-তে সৈন্য নামাতে গিয়ে জোর ধাক্কা খেয়েছে। জাপানি প্রতিরক্ষা তাদের দাবড়ি দিয়ে ফিরিয়ে দিয়েছে সাগরে। তখন থেকে এখতুওয়ায়ারা অপেক্ষা করছে, দ্বিতীয় ফ্লিট পৌঁছলে একসঙ্গে আক্রমণ করা হবে।

জাপানিরা এখন আত্মবিশ্বাসী হয়ে উঠছে, মঙ্গোল ফ্লিটে এসে হামলা করছে। রাতের আঁধারে ছোট ছোট নৌকা নিয়ে আসে, নোঙর করা জাহাজে এসে ওঠে। এক দল সামুরাই যোদ্ধা একটু আগে হামলা করেছে। তাদের লাশ সাগরে ভাসিয়ে দেয়া হয়েছে। ওরা যদি জিতে ফিরত, সঙ্গে নিত মৃত যোদ্ধার মাথা—ওগুলো তাদের পুরস্কার। কয়েকবার গেরিলা হামলা হওয়ার পর ফ্লিটের জাহাজগুলো পরস্পরের সঙ্গে বেঁধে রাখা হয়। এতে খানিকটা নিরাপত্তা এসেছে। কিন্তু এখতুওয়ায়া তার জাহাজ ফ্লিট থেকে দূরে রেখেছে, উপসাগরের একপাশে। আশা করেছিল তাদের উপর আক্রমণ আসবে। যা ভেবেছে, তা-ই হয়েছে। জাপানিরা হামলা করতে এসে জান দিয়েছে।

মাকুরাতে এসব হামলা বড় ক্ষতির কারণ হবে না। তবে মানসিক ভাবে দুর্বল তাদের বাহিনী, সবার মনোবল কমবে। এখন সৈনিকরা বাধ্য হয়ে কোরিয়ান জাহাজে ঠায় বসে থাকছে। পুসান ছেড়েছে তারা তিন মাসের বেশি। তাদের পানি ও খাবারের মজুদ প্রায় শেষ। জাহাজগুলোর কাঠ পচতে শুরু করেছে। ফ্লিটে ছড়িয়ে পড়েছে ডিসেণ্ট্রি। এখতুওয়ায়া জানে, ইয়াংঘি ফ্লিটের দক্ষিণ অংশ এলেই পরিস্থিতি বদলাবে। চিনের অভিজ্ঞ চৌকস বাহিনীর আক্রমণে জাপানি সৈন্যরা পরাজিত হবে। একবার শুধু তীরে নামতে যতক্ষণ লাগে, তারপরই... চিনা সেনাবাহিনী আসতে আর বেশি দেরিও নেই।

পরদিন ভোরে আকাশে লালিমা ছড়িয়ে পড়ল, কয়েক মুহূর্ত পর টকটকে লাল সূর্য উঠল। কোথাও কোনও মেঘের চিহ্ন

নেই। দক্ষিণ থেকে হু-হু করে এল জোরাল হাওয়া।

সরবরাহকারী জাহাজ, অর্থাৎ নিজের মূল মুণ্ডনের স্টার্নে দাঁড়িয়েছে নারগুই এখতুওয়ায়া, তার পাশে দাঁড়াল ক্যাপ্টেন ইয়ান। হাকাটা বে-র পানি কমই দেখা যায়, যদিকে চোখ যায়, ভাসছে অসংখ্য কোরিয়ান জাহাজ। এমন শক্তিশালী সেনাবাহিনী সঙ্গে থাকলে যে-কারও গর্ব হবে। ছোট থেকে শুরু করে মস্ত, নানা আকারের নয় শ' জাহাজ গিজগিজ করছে উপসাগরে। বেশিরভাগই শক্তপোক্ত চওড়া জাহাজ। কিন্তু কিছু এত ছোট যে দৈর্ঘ্যে বড়জোর বিশ ফুট। ক্যাপ্টেন ইয়ানের মত ক্যাপ্টেনদের রয়েছে আশি ফুট দৈর্ঘ্যের রণতরী। বেশিরভাগ জাহাজ বানানো হয়েছে শুধু জাপানকে আক্রমণ করতে। তবে এই পূর্ব ফ্লিটকে আর মস্ত জাহাজ বহর বলা চলবে না, শীঘ্রি এর চেয়ে অনেক বড় বহর নিয়ে আসবে ইয়াংঘি ফ্লিট।

দুপুর যখন গড়িয়ে বিকেলের দিকে, সেসময় অনেক দূর থেকে এক প্রহরী চিৎকার করল। ঘণ্টি বাজানোর আওয়াজ ভেসে এল। এর পরপরই বহু মানুষের উত্তেজিত চিৎকার শোনা গেল। চারপাশে যুদ্ধের অসংখ্য ঢাকের দামামা বজ্রপাতের আওয়াজ হয়ে উঠল। প্রথমে সাগরে কালো কালো বিন্দু দেখা গেল, তারপর বোঝা গেল ওগুলো আগ্রাসী দক্ষিণ বহর, জাপান উপকূলের দিকে আসছে। সময় গড়াতে লাগল, তারপর কালো বিন্দুগুলো আরও বাড়ল। দক্ষিণে যদিকে দেখা যায় শুধু কালো কী যেন! আরও পরে বোঝা গেল ওগুলো কালো রঙের কাঠের জাহাজ। সংখ্যায় তিন হাজারেরও বেশি! কোরিয়ান স্ট্রাইট থেকে এসে পড়েছে বাড়তি এক লাখ সৈন্য! আগে কখনও এত সৈন্যের সমাবেশ হয়নি, আবারও হবে সাত শ' বছর পর, শুধু দ্বিতীয় বিশ্বযুদ্ধে—নরম্যাণ্ডি আক্রমণের জন্য!

দিগন্তে বিশাল জাহাজ বহর। ওগুলোর সিল্কের পালগুলো যেন রক্তলাল মেঘ। সারারাত ও পরের সারাটা দিন ধরে একেক আঙুন নিয়ে খেলা-১

ঝাঁকে শত শত চায়নিজ জাহাজ আসতে লাগল জাপান উপকূলে। তিনদিক দিয়ে উপসাগর ও বন্দর ঘিরে ফেলল ওগুলো। দলনেতারা ঠিক করল, তারা হাকাটা বে দিয়ে নামবে। পতাকাবাহী জাহাজের মাস্তুলে সিগনাল ফ্ল্যাগগুলো উড়িয়ে দেয়া হলো। চায়নিজ ও মঙ্গোল সেনাপতিরা আলাপে বসলেন, স্থির হলো কোন দিক দিয়ে কীভাবে আক্রমণ করা যায়।

জাপানি উপকূলে পাথরের দেয়ালের ওপাশ থেকে চেয়ে রইল হতবাক সামুরাই যোদ্ধারা। সামনে যতদূর দেখা গেল হাজার হাজার জাহাজ! যোদ্ধারা জানে কীসের বিরুদ্ধে লড়াই হবে। নিশ্চিত মৃত্যুর জন্য মনে মনে তৈরি হলো তারা, দেবতাদের কাছে প্রার্থনা করতে লাগল, যেন তাঁরা এই মহাবিপদে স্বর্গ থেকে সাহায্য পাঠান। সামুরাইদের মস্ত সাহসী মানুষগুলোও কপালকে মেনে নিল। সবাই পরিষ্কার বুঝল, আগামী ওই লড়াইয়ে কেউ তারা বেঁচে থাকবে না।

কিন্তু ওরা কেউ জানে না, দক্ষিণে, হাজার মাইল দূরে তৈরি হয়েছে এক ভয়াবহ শক্তি—সেটার ক্ষমতা অগ্ৰাসী বাহিনীর চেয়ে ঢের ঢের বেশি! মহা প্রতাপশালী কুবলাই খানের সাধ্য নেই তার বিরুদ্ধে কিছু করে! প্রচণ্ড হাওয়া, সাগরের মাতাল জলরাশি ও প্রবল বৃষ্টি মিলে ঘোঁট পাকিয়ে তুলেছে সেখানে। প্রাকৃতিক শক্তিগুলো দামাল হয়ে উঠতে বেশি সময় নিল না! যেমনটা হয় দক্ষিণ প্রশান্ত মহাসাগরে, ফিলিপিনের কাছে, ওখানে সৃষ্টি হলো এক বিদ্যুৎ-ঝড়ের। উচ্চ-চাপ তৈরি করল ওটা, ফলে শীতল বায়ুর সঙ্গে তপ্ত বায়ুর সংঘর্ষ ঘটল। সে- কারণেই সাগরের বুকে তৈরি হলো প্রকাণ্ড এক চোঙা! ওটার ভিতর খেপে উঠল যেন লক্ষ-কোটি দৈত্য, প্রতিমুহূর্তে ভয়ঙ্কর হয়ে উঠছে। তারপর চলতে শুরু করল। খোলা সাগরে বাধা দেয়ার কিছু নেই, কাজেই গতি বাড়তে লাগল ক্রমে। এরই ফলে তৈরি হলো বিশাল এক দানবীয় টাইফুন—সাগর সমতলে চলতে

চলতে বাড়ছে গতি। এক সময় বাতাসের বেগ উঠল এক শ' আশি মাইলে। আজকাল এই প্রলয়ঙ্কর ঝড়কে বলা হয় সুপার টাইফুন। প্রথমে ওটা রওনা হলো উত্তর দিকে, তারপর কোনও কারণ ছাড়াই, যেন খেয়াল-খুশির বশে, সরতে লাগল উত্তর-পূবে। দ্বিতীয়বার গতিপথ পরিবর্তন না করলে সুপার টাইফুন গিয়ে আছড়ে পড়বে দক্ষিণ জাপানের দ্বীপগুলোর উপর। আর ওখানেই রয়েছে মঙ্গোলিয়ানদের আত্মসী জাহাজের বিশাল বহর।

মঙ্গোল আত্মসী বাহিনী কাইউশু দ্বীপের কাছে পৌঁছে নিজেদের সংগঠিত করে নিল, তাদের চিন্তা: কীভাবে দেশটা দখল করা যায়। সেনাপতিরা পরস্পরের সঙ্গে আলাপ-আলোচনা করে নিজেদের সমন্বিত আক্রমণের পরিকল্পনা গুছিয়ে নিল। কেউ তারা জানে না কী ধেয়ে আসছে তাদের দিকে।

ক্যাপ্টেন ইয়ান পতাকা দিয়ে স্কোয়াড্রনের জাহাজগুলোর সঙ্গে ইঙ্গিত বিনিময় করল, তারপর কমান্ডার নারগুই এখতুওয়ায়াকে জানাল, 'আমাদেরকে দক্ষিণে যেতে বলা হয়েছে। প্রাথমিক ভাবে আমাদের বাহিনী দ্বীপের ওদিকে নেমেছে। ছোট একটা বন্দর দখল করা হয়েছে। ওখান দিয়ে দ্বীপে উঠতে হবে। আমরা এখন হাকাটা বে ছেড়ে ইয়াংঘি ফ্লিটের পিছনে রওনা দেব। প্রয়োজনে যে-কোনও সময়ে সৈন্য নামানোর জন্য তৈরি থাকতে হবে।'

'আমার সৈনিকরা তীরে নামতে পারলে হাঁফ ছেড়ে বাঁচবে,' বলল কমান্ডার এখতুওয়ায়া। বেশির ভাগ মঙ্গোলদের মত সে-ও শুকনো জমিতে ঘোড়া দাবড়ে লড়াই করতে অভ্যস্ত। মঙ্গোলদের কাছে জাহাজ থেকে লড়াই করার ব্যাপারটা গল্পের কাহিনির মত। মাত্র কিছুদিন হলো সম্রাট কুবলাই খান কোরিয়া আর দক্ষিণ চীনকে হাতের মুঠোয় রাখতে জাহাজ ও নৌবাহিনী কাজে লাগিয়েছেন।

‘শীঘ্রি মাটিতে নেমে লড়তে পারবেন,’ বলল ক্যাপ্টেন ইয়ান। তার নির্দেশে ভারী পাথরের তৈরি নোঙরগুলো জাহাজে তুলে নেয়া হলো।

হাকাটা বে থেকে বেরিয়ে ফ্লিটের পিছনে চলল জাহাজ দক্ষিণে। ক্যাপ্টেন ইয়ান একবার চিন্তিত চেহারায় আকাশ দেখল। দিগন্তে কালো মেঘ জমছে। আরও পরে মনে হলো মেঘটা আকাশ ঢেকে ছড়িয়ে পড়ছে। অন্ধকার নামবার পর দমকা হাওয়া ছাড়ল। শুরু হলো ঝমঝম বৃষ্টি। জাহাজের ডেক ভেসে গেল। কোরিয়ান ক্যাপ্টেনদের অনেকে বুঝল, সামনে ভয়ানক ঝড় আসছে। তারা জাহাজ নিয়ে তীর থেকে সরে গেল। চায়নিজ নাবিকরা উন্মুক্ত সাগরে অভ্যস্ত নয়, তারা তীরের কাছ থেকে সরল না।

বাঙ্ক বারবার কাত হচ্ছে, অস্বস্তির মধ্যে পড়ে গেল নারগুই এখতুওয়ায়া, বিরক্ত হয়ে ডেকে উঠে এল। সৈন্যদের অবস্থা দেখে বুক শুকিয়ে গেল তার—আঠারোজন লোক রেল আঁকড়ে ধরে হড়-হড় করে বমি করছে। সবাই আক্রান্ত হয়েছে সি-সিকনেসে। সাগর যেন খেপে উঠেছে। চারপাশে কিছু আলো দেখা গেল, টেউয়ের সঙ্গে নাচছে—লণ্ঠনের মধ্যে জ্বলতে থাকা মোমবাতি ওগুলো। চারপাশে ফ্লিটের জাহাজ। বেশ কিছু এখনও একইসঙ্গে দড়িতে বাঁধা। এখতুওয়ায়া বড় একটা টেউ আসতে দেখল, ওটার সঙ্গে কিছু মোমবাতি উঠছে-নামছে।

তীব্র হাওয়া ছাপিয়ে চিৎকার করে জানাল ক্যাপ্টেন ইয়ান, ‘কমান্ডার এখতুওয়ায়া, এই অবস্থায় আপনার সৈনিকদের তীরে নামাতে পারব না আমি। ঝড় আরও বাড়বে। তার আগেই খোলা সাগরে বেরিয়ে যেতে হবে, নইলে তীরের পাথরে আছড়ে পড়বে জাহাজ।’

কোনও প্রতিবাদ করল না এখতুওয়ায়া, বদলে শুধু মাথা দোলাল। এই মুহূর্তে মনে মনে চাইছে সৈনিকদের নিয়ে জাহাজ

থেকে নেমে যেতে। কিন্তু জানে, বাস্তবে তা সম্ভব নয়। ক্যাপ্টেন ইয়ান ঠিকই বলেছে। ভাবতে যত খারাপই লাগুক, এই উন্মত্ত সাগরেই ঝড়ের সঙ্গে লড়াই করে টিকবার চেষ্টা করতে হবে।

ক্যাপ্টেন ইয়ান সামনের মাস্তুলের চারকোনা পাল তুলবার নির্দেশ দিল, জাহাজের গলুই পশ্চিম দিকে তাক করল। বড় বড় ঢেউ শক্তপোক্ত জাহাজটাকে নিয়ে অনায়াসে ছিনিমিনি খেলছে। তারই মধ্য দিয়ে তীর থেকে সরছে জাহাজ, খোলা সাগরে বেরুবে।

ক্যাপ্টেন ইয়ানের রণতরীর চারপাশে ফ্লিটের অন্যান্য জাহাজ, কী করা উচিত যেন বুঝতে পারছে না। ঝড়ের মধ্যেই কয়েকটা চায়নিজ জাহাজ তীরে সৈন্য নামাতে চাইল। তারা এখনও তীর থেকে খানিকটা দূরে নোঙর ফেলে রেখেছে। চারপাশে ছড়িয়ে থাকা জাহাজ পূর্ব ফ্লিটের, তাদের বেশিরভাগই ক্যাপ্টেন ইয়ানকে অনুসরণ করল। ফ্লিটের অনেকে ধারণা করল, এটা নিশ্চয়ই বারো শ' চুয়াত্তরের মত অত ভয়ঙ্কর টাইফুন হবে না। কিন্তু কয়েক ঘণ্টার মধ্যেই ওরা টের পাবে, কতখানি ভুল সে ধারণা।

ওরা জানে না সুপার টাইফুনের শক্তি আরও বাড়ছে, ক্রমেই কাছে চলে আসছে। বাড়ছে তুমুল হাওয়া আর প্রবল বৃষ্টি। ভোর হওয়ার পর আকাশ আরও কালো হলো, তারপর শুরু হলো আসল তাণ্ডব। দিগন্ত থেকে কাত হয়ে এল প্রচণ্ড বৃষ্টির ছাঁট, ফোঁটাগুলো এত তীব্র বেগে এল যে জাহাজের পালগুলো সব ছিন্নভিন্ন হয়ে গেল। মস্ত ওই ফ্লিট মত্ত সাগরে নাকানি-চুবানি খেতে লাগল। প্রকাণ্ড সবু ঢেউ উপকূলে গিয়ে আছড়ে পড়ছে, সে আওয়াজ এক মাইল দূর থেকেও শোনা যাচ্ছে পরিষ্কার। শৌ-শৌ হাওয়ার গতি এত বাড়ল যে ঝড়টা হয়ে উঠল ক্যাটাগরি ফোর হারিকেনের সমান। তারপর কাইউশু দ্বীপের উপর এসে ঝাঁপিয়ে পড়ল ওটা।

উপকূলে জাপানি প্রতিরক্ষা বাহিনীর উপর আছড়ে পড়ল বিশ ফুট উঁচু জলোচ্ছ্বাস, ভাসিয়ে নিল হাজারো বাড়িঘর, ডুবিয়ে দিল গ্রামের পর গ্রাম। পানিতে ডুবে মারা গেল শত শত মানুষ। মত্ত হাওয়া উড়িয়ে নিল অনেকগুলো হাজার বছর বয়সী বিশাল গাছ, সঙ্গে উড়াল দিল হাজারো জিনিস—সাঁই সাঁই ছুটছে দিগবিদিক, সব যেন আধুনিক মিসাইল! কয়েক ঘণ্টার বৃষ্টিতে দ্বীপের মাঝে গলা সমান পানি জমল। বন্যা শুরু হলো গোটা উপত্যকায়। ভেসে গেল নদীগুলোর তীর। শুরু হলো ফ্লাশ ফ্লাড। সঙ্গে থাকল ভূমিধসও। এর ফলে যত মানুষ পানিতে ভেসে গেল, মাটি চাপা পড়ল তারও বেশি। কোথাও কোথাও আস্ত শহর-গ্রাম-জনপদ মুহূর্তে তলিয়ে গেল কাদায়।

কাইউশু দ্বীপবাসীরা মঙ্গোল ফ্লিটের লোকগুলোর চেয়ে অনেক সৌভাগ্যবান। মঙ্গোল, চায়নিজ, কোরিয়ান—কেউ কিছু বুঝবার আগেই মহাবিপদ এসেছে। এখন লড়ছে প্রচণ্ড হাওয়া, ভয়ঙ্কর জলোচ্ছ্বাস আর একের পর এক বিশাল ঢেউয়ের সঙ্গে। হাজির হয়েছে পাল ছিঁড়ে-খুঁড়ে দেওয়া বাতাস ও তেরচা বৃষ্টি। আত্মসী মঙ্গোল ফ্লিটকে নিয়ে মহানন্দে খেলতে লাগল প্রকৃতি। একেকটা ঢেউ এল ত্রিশ ফুটের বেশি উচ্চতা নিয়ে। শত শত জাহাজ ডুবল, আরও অনেক বেশি ধ্বংস হলো পরস্পরকে ধাক্কা দিয়ে। যেসব জাহাজ পাথুরে তীরের কাছে নোঙর করেছিল, সেগুলো পাথরে আছড়ে পড়ে টুকরো হলো। ফুটতে থাকা সাগরে প্রবল ঢেউগুলো জাহাজের তক্তা ও বীম ভাঙল, বহু জাহাজ আচমকা ছিন্নভিন্ন হলো—থাকল না কিছুই! হাকাটা বে-তে যেসব জাহাজ একসঙ্গে বেঁধে রাখা ছিল, সেগুলোর একটা ডুবলে সঙ্গে নিল অন্যগুলোকেও। ভয়ার্ত নাবিক ও সৈন্যরা মুহূর্তে চলে গেল পানির নীচে। তবে ক্ষুর সাগর কিছু মানুষকে ছেড়ে দিল, তারা তীরে উঠে খুন হলো সামুরাই যোদ্ধাদের হাতে।

নারগুই এখতুওয়ায়া ও তার দল অনেক কষ্টে টিকে থাকল কোরিয়ান জাহাজে। তারা যেন চালু ওয়াশিং মেশিনের পানির তোড়ে ছোট্ট একটা চিনাবাদামের খোসা! অসাধারণ দক্ষতার সঙ্গে ঝড়ের বিরুদ্ধে লড়াই করছে ক্যাপ্টেন ইয়ান, জাহাজটাকে বারবার তাক করছে ডেউয়ের মুখে। তারপরেও কয়েকবার এমনভাবে কাত হলো যে এখতুওয়ায়ার মনে হলো, এখুনি সাঁৎ করে পানির নীচে চলে যাবে গোটা জাহাজ। প্রকৃতির বিরুদ্ধে বীরের মত লড়াই করছে ক্যাপ্টেন ইয়ান, একবারও জাহাজের নিয়ন্ত্রণ ছাড়ল না। দু'হাতে হাল ধরেছে সে, ঠোঁটে তিক্ত হাসি, বিরাট ডেউয়ের মধ্য দিয়ে তরতরিয়ে এগিয়ে চলেছে জাহাজ। সব ভালই চলছিল, কিন্তু হঠাৎ অন্ধকার সাগর থেকে চল্লিশ ফুট উঁচু এক ডেউ ছুটে এল! ওটা দেখে রক্তশূন্য ফ্যাকাসে হয়ে গেল ইয়ানের চেহারা।

পানির বিশাল প্রাচীর বজ্রপাতের আওয়াজ তুলে নামল। মুহূর্তে তলিয়ে গেল জাহাজ, চারপাশে থাকল শুধু সাগর ও ফেনা। যারা ডেকের তলে ছিল, তারা পেটের ভিতর বিচিত্র অনুভূতি হচ্ছে দেখে টের পেল নীচের দিকে নামছে। চারপাশ হঠাৎ স্তব্ধ হলো। শোঁ-শোঁ হাওয়ার আওয়াজ থাকল না! সব কিছু অন্ধকার! কাঠের জাহাজ ডেউয়ের ধাক্কায় চূরমার হতে পারত, কিন্তু হলো না। বিশাল ডেউ সরে যেতেই আবারও মাথা তুলল ওটা। চারপাশের সাগর যেন টগবগ করে ফুটছে!

ডেকের উপর দিয়ে ডেউ বয়ে যাওয়ার সময় এখতুওয়ায়া একটা দড়ির মইয়ের ধাপ ধরেছিল, জাহাজ ভেসে উঠতেই শ্বাস নিল সে। তখনই দেখল ওই ডেউ মাস্তুলগুলো ভেঙে নিয়ে গেছে। স্টার্নের কাছ থেকে একটা তীক্ষ্ণ চিৎকার শুনল। ওদিকে চেয়ে দেখল সর্বনাশ হয়ে গেছে, ক্যাপ্টেন ইয়ান ও তার পাঁচ সি-ম্যান ভেসে গেছে সাগরে! সঙ্গে গেছে কয়েকজন সৈন্য! মুহূর্তের জন্য মানুষগুলোর আতর্জিৎকার কানে এল, তারপর

হাওয়ার গর্জন ছাড়া কিছুই থাকল না। খানিকটা দূরে ক্যাপ্টেন ও কয়েকজনকে ভেসে উঠতে দেখল এখতুওয়ায়া, কিন্তু তাদেরকে সাহায্য করার উপায় দেখতে পেল না। কোনও পথ নেই! বিস্ফারিত চোখে চেয়ে রইল সে, তারপর আরেকটা বড় ঢেউয়ের নীচে তলিয়ে গেল তারা।

মাস্তুল নেই, নাবিক নেই, কাজেই জাহাজ এবার পুরোপুরি বাতাস আর ঢেউয়ের কবলে। বিক্ষুব্ধ সাগরে টলমল করতে থাকল ওটা, একের পর এক উঁচু ঢেউ এল। জাহাজটাকে নিয়ে যেন নিষ্ঠুর খেলায় মেতেছে। বার বার ডুবতে গিয়েও ভেসে উঠছে বটে, কিন্তু ক্রমেই স্পষ্ট হচ্ছে, কোনও পথ নেই, এখন যে- কোনও মুহূর্তে ডুবে যাবে। কোরিয়ান জাহাজ খুবই শক্ত-পোক্ত ভাবে বানানো হয়েছে, এতকিছুর পরেও ভেসেই রইল। কমাণ্ডার চেয়ে চেয়ে দেখল চারপাশে একের পর এক ডুবছে চায়নিজ জাহাজ।

এখতুওয়ায়ার জাহাজ মুমূর্ষু অবস্থায় কয়েক ঘণ্টা ঢেউয়ের মাথায় নাচার পর ধীরে ধীরে কমে এল বাতাসের বেগ। বিদায় নিল তুমুল বৃষ্টি। ক্ষণিকের জন্য সূর্যও দেখা দিল। এখতুওয়ায়া ভাবল ঝড় শেষ বুঝি। কিন্তু বাস্তবে তারা তখন রয়েছে ঝড়ের চোখে, ঠিক কেন্দ্রবিন্দুতে। এই নীরবতা শুধু অল্প সময়ের জন্য, তারপর আবারও শুরু হবে তুফান! এখতুওয়ায়া ডেকের নীচে গিয়ে দেখল দু'জন কোরিয়ান এখনও বেঁচে। বৈঠা বাওয়ার জন্য দলের সবার সঙ্গে তাদেরও কাজে লাগিয়ে দিল সে। এরপর থমথমে নীরবতা শেষ হলো, আবারও ছাড়ল জোর হাওয়া, সঙ্গে প্রবল বৃষ্টি! দুই নাবিক ও এখতুওয়ায়া পালা করে হাল ধরল, ঢেউয়ের বিরুদ্ধে অসম লড়াই করতে থাকল।

তারা কেউ জানে না কোথায় রয়েছে, জানে না কোথায় চলেছে! সাহসী মানুষগুলো শুধু বুঝল, জাহাজটা ভাসিয়ে রাখতে হবে। ওরা জানে না এখন ঘুরে গেছে ঝড়ের গতিপথ, উল্টো

দিক থেকে বাতাস আসছে। ঝড় এবার বইছে উত্তরদিক থেকে! পাগলা হাওয়ার দাবড়ি খেয়ে দক্ষিণে ছুটল জাহাজ। ঝড়টা নিজের ক্ষমতার বেশিরভাগ শেষ করেছে কাইউশু দ্বীপের উপর, পরের মাতম অনেকটা কম। তারপরও জোর হাওয়ার দাপট চলল নব্বুই মাইল বেগে। মাতালের মত টলতে টলতে এগিয়ে চলেছে জাহাজ। বৃষ্টির পর্দার কারণে সামনে কিছু দেখা যায় না। এখতুওয়ায়া জানে না কোথায় চলেছে। কয়েকবার আবছা ভাবে জমি দেখল, মনে হলো জাহাজ ওখানে গিয়ে আছড়ে পড়বে। দ্বীপ বা পাথুরে টিলা। ওগুলো কীভাবে এড়িয়ে গেল জাহাজ, তা শুধু বিধাতাই জানেন। মানুষগুলো জানল না ক'বার মৃত্যুর হাত থেকে বেঁচেছে।

পুরো একদিন একরাত চলল টাইফুন, তারপর একটু একটু করে মিলিয়ে গেল। দমকা হাওয়া থামল, বৃষ্টি পড়তে লাগল ঝিরঝির করে। ওই সুপার টাইফুন সাধ্যমত ক্ষতি করতে চেয়েছে, তারপরও ক্ষত-বিক্ষত কোরিয়ান মুগুন টিকে রইল, গর্বিতা রাজহংসী যেন। যদিও খোলে পানি জমতে শুরু করেছে, ওটার ক্যাপ্টেন-ক্রুরা আর নেই। জাহাজটা আসলে প্রায় বিধ্বস্ত। কিন্তু কপালের জোরে কিছু মানুষ বেঁচেই রইল। চারপাশের সাগর এখন দ্রুত শান্ত হয়ে আসছে।

নারগুই এখতুওয়ায়া ও তার দলের কয়েকজন সৌভাগ্যবান। তবে মঙ্গোল আগ্রাসী জাহাজ-বহরে খুব কম লোকই ভাগ্যের সাহায্য পেল। ওই খুনি সুপার টাইফুন প্রায় পুরো ইয়াংঘি ফ্লিট ধ্বংস করেছে। বেশিরভাগ জাহাজ পাথুরে উপকূলে আছড়ে পড়ে চূরমার হয়েছে, অথবা খেপা সাগরের নীচে হারিয়ে গেছে। উপসাগরে এখন ডুবছে-ভাসছে বিশাল সব ভাঙা চায়নিজ জাহাজ, বিধ্বস্ত কোরিয়ান যুদ্ধ-জাহাজ কিংবা দাঁড় বাওয়া বার্জ। চেউয়ের ধাক্কায় তীরের কাছে গিয়ে দোল খাচ্ছে।

পাগলা হাওয়া যতক্ষণ ছিল এদিক-ওদিক থেকে আগুন নিয়ে খেলা-১

মৃত্যুপথযাত্রী সৈনিকদের আতঙ্কিত চিৎকার শোনা গেছে। যাদের পরনে চামড়ার ভারী আর্মার ছিল, সহজেই ডুবেছে তারা। লাশগুলো পরে সৈকতে গিয়ে পচবে। যারা কাঠের টুকরো বা আর কিছু ধরে ভেসে থাকতে পেরেছে, তাদের নিয়ে নিষ্ঠুর খেলা খেলেছে বড় বড় ঢেউ—টেনে নিয়ে গেছে দূর-দূরান্তরে। ওরা মরল ধীরে ধীরে। কিছু লোক কপালের জোরে তীরে পৌঁছল, কিন্তু নৃশংস ভাবে খুন হলো তারাও। উপকূল-গ্রহরী সামুরাই যোদ্ধারা কাউকে ছাড়ল না। ঝড় পুরোপুরি থেমে যাওয়ার পর অসংখ্য লাশ কাঠের গুঁড়ির মত পড়ে থাকল সৈকতে। কাইউগুর তীরে এত পরিমাণ ভাঙা জাহাজ পড়ে থাকল যে স্থানীয় লোকজন বলাবলি করল, আর কয়েকটা থাকলে তারা পা না ভিজিয়ে ইমারি গালফ পেরুতে পারত।

অবশিষ্ট অল্প কিছু জাহাজ খুঁড়িয়ে খুঁড়িয়ে কোনও মতে কোরিয়া ও চিনে ফিরল। সেনাপতিরা সম্রাটকে জানাল, সর্বনাশ হয়ে গেছে—গতবারের মত এবারও বিরূপ প্রকৃতি তাদের নিয়ে ছিনিমিনি খেলেছে, ব্যর্থ হয়েছে জাপান জয়ের পরিকল্পনা। সম্রাট কুবলাই খান বাধ্য হয়ে পরাজয় মেনে নিলেন। সেই চেস্টিস খানের আমল থেকে শুরু করে বর্তমান কাল পর্যন্ত মঙ্গোলরা কখনও এভাবে পরাজিত হয়নি। আর সেজন্যই পুরো দুনিয়া জানল, মঙ্গোলদের ওই বিশাল রাজ্য আর বিপুল শক্তিকেও কাঁচকলা দেখানো সম্ভব।

জাপানিদের জন্য ওই খুনি টাইফুন ছিল স্রেফ সৌভাগ্য। ঝড়ে কাইউগুর অনেক ক্ষতি হলো, কিন্তু সামুরাই যোদ্ধারা শত্রুদের কাছে হারল না। অনেকে বলল, লড়াই বাধবার আগে তারা রাজকীয় ইসের মন্দিরে সূর্য-দেবীর কাছে প্রার্থনা করেছিল, তাই রক্ষা পেয়েছে। স্বর্গীয় সাহায্যই হোক বা আর কিছু হোক, জাপান এরপর থেকে মুক্ত থাকল। কোনও আগ্রাসী রাজকীয় শক্তি তাকে দমন করতে পারল না। ক্যামিকাজি বা স্বর্গীয়

বাতাসের কথা এমনভাবে প্রচারিত হলো যে, শত শত বছর পর আজও তা ঘুরছে লোকের মুখে মুখে। এই কারণে দ্বিতীয় বিশ্বযুদ্ধের সময় জাপানের আত্মঘাতী পাইলটদের নাম দেয়া হয়েছিল—ক্যামিকাজি।

কোরিয়ান যুদ্ধ-জাহাজের নারগুই এখতুওয়ায়া ও তার সঙ্গীরা জানতে পারল না, তাদের বিশাল জাহাজ-বহরের কী হয়েছে। তারা ধারণা করল, ঝড়ের পর ফ্লিট আবারও একত্রিত হবে, সবাই মিলে আক্রমণ করবে জাপান।

‘বহরের সবাইকে খুঁজে বের করতে হবে,’ এখতুওয়ায়া লোকদের বলল। ‘সম্রাট বিজয় আশা করছেন, নিজেদের দায়িত্ব আমাদের পালন করতে হবে।’

তবে সামনে বড় একটা সমস্যা হয়ে দাঁড়াল, জানা নেই, ওরা এখন আছে কোথায়। তিনদিন দুর্যোগ সহ্য করেছে তারা মাস্তুল ও পাল ছাড়াই। আবহাওয়া পরিষ্কার হয়েছে, কিন্তু চারপাশে দ্বিতীয় কোনও জাহাজ দেখা গেল না। আরও খারাপ সংবাদ, তাদের জাহাজে এমন কেউ নেই যে সাগরে দিক নির্দেশ দিতে পারে। টিকে যাওয়া কোরিয়ানদের একজন বাবুর্চি, অন্যজন জাহাজের ছুতোর। সাগরে কোনদিকে যাওয়া উচিত, তারা জানে না।

‘জাপান দেশটা আমাদের পূবে পড়বে,’ এখতুওয়ায়া কোরিয়ান ছুতোরের সঙ্গে আলাপ করল। ‘তুমি ভাল একটা মাস্তুল তৈরি করো, পালও বানাতে হবে। তারপর সূর্য আর নক্ষত্র দেখে পূবে রওনা হব আমরা। আমাদের জাহাজ-বহর মনে হয়, ওই দিকেই থাকবে।’

বুড়ো ছুতোর আপত্তি করে বলল, এ নড়বড়ে জাহাজ সাগরে চালানো অসম্ভব। ‘এটার আয়ু শেষ। এখানে-ওখানে ভেঙে গেছে, পানিও উঠছে। আমাদের উত্তর-পশ্চিম দিকে যাওয়া আগুন নিয়ে খেলা-১

উচিত । কোরিয়া ওদিকে, ওদিকে গেলে বাঁচব ।’

এখতুওয়ায়া লোকটার মতামত পাত্তাও দিল না । তার নির্দেশে তাড়াহুড়ো করে একটা মাস্তুল তৈরি হলো, ছেঁড়া কাপড় দিয়ে বানানো হলো পাল । এরপর যোদ্ধা থেকে নাবিক হয়ে ওঠা এখতুওয়ায়া নতুন উদ্যমে রওনা হলো জাহাজ নিয়ে । চলল তারা পূর্ব দিগন্ত লক্ষ্য করে । আশা করল, তীরে পৌছবে শীঘ্রি, অংশ নেবে যুদ্ধে ।

দীর্ঘ দুটো দিন পেরিয়ে গেল, এখতুওয়ায়া ও তার লোকজন দেখল, চারপাশে শুধু গাঢ় নীল সাগর । জাপান-উপকূল দেখা গেল না । ওরা যে দিক পরিবর্তন করবে, সে পথও রইল না । এবার দক্ষিণ-পশ্চিম থেকে এল আরেকটা ঝড় । এবারেরটা ভয়ঙ্কর ভাবে এল না, গতিবেগও থাকল কম । পাঁচ দিন জোর হাওয়া ও তুমুল বৃষ্টির বিরুদ্ধে লড়াই করল জাহাজ । সবাই ধারণা করল এ জাহাজ আর টিকবে না । মানুষগুলো হাওয়ার দাপটে দ্বিতীয়বারের মত হারাল মাস্তুল ও পাল । বুড়ো ছুতোর প্রায় সারাক্ষণ জাহাজের খোল মেরামত করল । আরও দুর্ভাগ্য: আস্ত হালটা খসে পড়ল জাহাজ থেকে । ওটার সঙ্গে গেল এখতুওয়ায়ার দু’জন সৈনিক । চোখের সামনে হারিয়ে গেল তারা ।

সবাই যখন পুরোপুরি হাল ছেড়ে দিয়েছে, দ্বিতীয় ঝড় ধীরে ধীরে থেমে গেল । কিন্তু ততদিনে মানুষগুলো পুরোপুরি হতাশ । সাত দিনের বেশি হলো মাটির দেখা নেই । পানি ও খাবার প্রায় শেষ । সৈনিকরা সবাই মিলে এখতুওয়ায়াকে অনুরোধ করল, সে যেন চিনির দিকে ঘুরিয়ে নেয় জাহাজ ।

কিন্তু এ কাজে বাধা হয়ে দাঁড়াল বিরিঝিরি বাতাস ও মৃদু স্রোত । জাহাজের বেহাল অবস্থায় দিক ঠিক করা সম্ভব হলো না । একাকী জাহাজ শান্ত সাগরে ভেসে গেল স্রোতের টানে ।

কেউ জানে না কোথায় চলেছে।

এরইমধ্যে সময় জ্ঞান হারিয়েছে এখতুওয়ায়া, ঘণ্টাগুলো এক এক করে পেরিয়ে আরেকটা দিন এল। এদিকে রসদ ফুরিয়ে গেছে। দুর্বল সৈনিকরা যখন সুযোগ পেল মাছ ধরল, তৃষ্ণা মেটাতে বৃষ্টির পানি সংগ্রহ করল। এদিকে আবহাওয়া আরও পরিষ্কার হতে লাগল, কয়েকদিন পর বলমলে সূর্যের দেখা মিলল। বাতাস প্রায় থেমে যাওয়ার পর তাপমাত্রা বাড়ল। সৈনিকদের মনে হলো জাহাজটা একই জায়গায় স্থির রয়েছে। তবে মাঝে মাঝে হালকা হাওয়া এলে শান্ত সাগরে জাহাজ একটু এগোল। ওদিকে অসহায় মানুষগুলোর উপর চোখ পড়েছে যমের। প্রতি রাতে একজন দু'জন করে মরতে শুরু করল। অনাহারক্লিষ্ট মানুষগুলো মরছে একে একে।

এখতুওয়ায়া নিজের শীর্ণ সৈনিকদের দিকে চেয়ে থাকে, আর ভাবে, এভাবে না খেয়ে মরে যাওয়া অপমানজনক। ওরা তো এসেছিল যুদ্ধ করতে, মারতে বা মরতে, কিন্তু এখন দেশ থেকে তারা অনেক দূরে অথৈ সাগরে ভেসে অনর্থক মৃত্যু বরণ করছে!

মৃত-প্রায় সৈনিকরা এখতুওয়ায়ার চারপাশে বসে বিমাচ্ছে, এমনসময় হঠাৎ পোর্ট-সাইডে ঘণ্টি বাজানোর আওয়াজ হলো!

‘ওই যে পাখি দেখা যায়!’ কে যেন চৈঁচিয়ে উঠল, ‘কেউ একজন মারো ওটাকে!’

এখতুওয়ায়া থড়বড় করে উঠে দাঁড়াল, সামনে বেড়ে দেখল তিনজন সৈনিক আটকাতে চাইছে বড় এক কালো ঠোঁটওয়ালা সি-গালকে। ওটা খুব সতর্ক, সবার মাথার উপর ঘুরছে, চোখে সন্দেহ। সৈনিকদের একজন ওটার দিকে একটা কাঠের হাতুড়ি ছুঁড়ল। সবাই আশা নিয়ে চেয়ে রইল, হাতুড়ি যদি লক্ষ্যভেদ করে! তাজা মাংস পাওয়া যাবে! সি-গাল চট করে হাতুড়ির কাছ থেকে সরে গেল, জোরালো একটা চিৎকার দিয়ে অলস ভঙ্গিতে আগুন নিয়ে খেলা-১

আরও উপরের দিকে উঠল। চলেছে আরেকদিকে!

হতাশ মানুষগুলো অভিষাপ দিল। তা ছাড়া আর কী করবে? এখতুওয়ায়া চেয়ে রইল সি-গালের দিকে, দেখতে চাইল ওটা কোনদিকে যায়। সাদা পাখিটা দক্ষিণে চলেছে। কিছুক্ষণ পর দিগন্তে মিলিয়ে গেল। জুঁকাকে নীল দিগন্তের দিকে চেয়ে রইল এখতুওয়ায়া, আকাশ ওখানে সাগরের সঙ্গে মিশেছে। কিছুক্ষণ একদৃষ্টে চেয়ে রইল সে, তারপর চোখ মিট মিট করে আবার তাকাল—তারপর নিশ্চিত হলো, সত্যিই দিগন্তে ছোট্ট একটা টিবিমত দেখা যাচ্ছে! এবার তার মনে হলো নাকে কীসের যেন ঘ্রাণ! আসলেই হাওয়া বদলের গন্ধ পেয়েছে সে। শুধু নোনা হাওয়া নয়, সঙ্গে আরেকটা সুবাস! সেটা বোধহয় গাছপালা ও ফুলের! বড় করে শ্বাস নিল এখতুওয়ায়া, গলা পরিষ্কার করে বলল, ‘আমাদের সামনে মাটি!’ সি-গাল যেদিকে গেছে সেদিকে আঙুল তাক করল সে। ‘তোমরা যারা এখনও নড়তে পারো, এসো! জাহাজটা ওই দ্বীপের দিকে নিতে হবে!’

ক্লান্ত অনাহারী মানুষগুলো এখতুওয়ায়ার কথা শুনে নড়ে উঠল, সবাই বুঝেছে সামনে বাঁচার উপায় দেখতে পেয়েছে কমাগুর! সত্যিই কী তা-ই? দিগন্তে চাইল সবাই। দূরে সবুজের চিহ্ন দেখে শরীরে বল চলে এল সবার, নেমে পড়ল কাজে। সবাই মিলে করাত দিয়ে ডেকের বিরাট এক কাঠের আড়া কাটল। কাঠটা দড়ি দিয়ে স্টার্নের সঙ্গে বাঁধা হলো। ওটা হবে হাল। তিনজন করে লোক সবসময় ওই হাল ধরে রাখল। আর সবাই যে যা পেল তা-ই নিয়ে পানি কেটে এগিয়ে যেতে চাইল। ঝাড়ু, তক্তা, এমন কী তলোয়ার দিয়েও বৈঠা বাওয়া হলো। অসহায় মানুষগুলো চাইল, জাহাজটা যেভাবে হোক সামনের দিকে নিয়ে যেতে।

একসময় অনেক দূরের জায়গাটা স্পষ্ট হলো। ঝকঝক এক সবুজ দ্বীপ ওটা! মাঝখানে আকাশ ছুঁয়েছে এক পর্বত-চূড়া!

উপকূলের আরও কাছে যাওয়ার পর দেখা গেল তীরভূমি খুবই পাথুরে। উঁচু দেয়ালের পায়ের কাছে আছড়ে পড়ছে ঢেউগুলো। পাথর-প্রাচীর খাড়া ভাবে অনেক উপরে উঠেছে। ঠিক তখনই আড়াআড়ি ভাবে এল এক স্রোত। ওটার ভিতর পড়ল জাহাজ। ভয়ে সবার বুক কেঁপে উঠল। সরাসরি সামনে গভীর একটা খাঁড়ি, কিন্তু ওটাকে তিনদিক থেকে ঘিরেছে পাথুরে প্রাচীর!

জাহাজের বুড়ো ছুতোর চেষ্টায়ে উঠল, 'সামনে পাথরের দেয়াল!'

তাদের জাহাজের বো সোজা ওদিকে চলেছে!

এখতুওয়ায়া চেষ্টাল, 'সবাই জাহাজের বামদিকে যাও!' ডানদিকে কালো পাথরের দেয়াল কাছে চলে এল। জাহাজের স্টার-বোর্ডের মাথা মুহূর্তে দেয়ালের সামনে পৌঁছল! পিছনে থাকা ছ'জন সৈনিক ক্রল করে পোর্ট-সাইডে পৌঁছল, হাতের কাছে যা পেল, বৈঠার মত পানিতে চালাতে লাগল। হঠাৎ সবাই পোর্টে চলে যাওয়ায় বো-টা পাথুরে-দেয়ালের নাকের কাছ থেকে সরল। শিউরে উঠল সবাই, আটকে গেল শ্বাস—পোর্ট-সাইডের খোল এদিকের দেয়ালে ঘষা দিল! পানির নীচে ডুবো-পাথর! পায়ের নীচে ককর্শ আওয়াজ হলো, তারপর হঠাৎই থেমে গেল শব্দটা। সবাই শ্বাস ফেলে ভাবল, আরেকবার টিকল জাহাজ।

চিৎকার করে জানাল ছুতোর, 'এদিকে নামার কোনও জায়গা নেই! সাগরের দিকে জাহাজ ঘুরিয়ে নিন!'

এখতুওয়ায়া মাথা তুলে দেখল তীরে আকাশ-ছোঁয়া পাথুরে-প্রাচীর! রুক্ষ, কালো, ধূসর—সামনে শুধু পাথরের দেয়াল! জাহাজের পোর্ট বো বরাবর দূরে একটা ডিম্বাকৃতি গুহা দেখা গেল, পানি সমতলের ঠিক উপরে। কিন্তু জাহাজ থেকে ওখানে নামা সম্ভব নয়।

এখতুওয়ায়া নির্দেশ দিল, 'জাহাজের গলুই ঘুরিয়ে নাও! জলদি! বৈঠা চালাও! থামবে না কেউ!'

আগুন নিয়ে খেলা-১

মানুষগুলোর শক্তি নিঃশেষিত, তবুও বাঁচার আশায় বৈঠা বাইতে লাগল। জোরালো স্রোত পাথুরে তীরের দিকে নিতে চাইল, কিন্তু সবার সম্মিলিত চেষ্টায় জাহাজ ঘুরল। উল্টো স্রোত ওটাকে খোলা সাগরের দিকে নিয়ে গেল। জাহাজ নিয়ে খাঁড়ি থেকে বেরিয়ে তীরের পাশ দিয়ে এগোল এখতুওয়ায়া। অনেকক্ষণ পর একপাশের দেয়াল নিচু হলো। বুড়ো ছুতোর জানাল, ওদিকের তীরে জাহাজ ভেড়ানো যাবে। বিস্তৃত এক খাঁড়ির দিকে আঙুল তাক করল সে, ‘জাহাজ ওখানে থামলে আমরা নামতে পারব।’

এখতুওয়ায়া মাথা দোলাল, অধীনস্থদের নির্দেশ দিল। সবাই টের পেল, নতুন করে জীবন ফিরে পেয়েছে তারা। জাহাজ নিয়ে খাঁড়িতে ঢুকে পড়ল ওরা। সামনে রূপালি বালুকা-বেলা। তার ওপাশে সবুজ অরণ্য। আরও খানিক এগোলে জাহাজের তলা ঘঁষাস করে আটকে গেল বালিতে—তীর তখন মাত্র পাঁচ ফুট দূরে!

জাহাজ থেকে নামতে গিয়ে সবাই টের পেল, ক্লান্তিতে ভেঙে পড়ছে দেহ! মিষ্টি পানি আর খাবারের খোঁজে পাঁচজন সৈনিক নিয়ে নামল এখতুওয়ায়া, হাতে তলোয়ার। খানিক দূর থেকে জলপ্রপাতের আওয়াজ পাওয়া গেল। সামনে পড়ল লম্বা লম্বা ফার্নের জঙ্গল। খানিক ভিতরে ঢুকবার পর মিষ্টি পানির একটা লেগুন পাওয়া গেল। ওখানে পাহাড় থেকে জলধারা নেমে এসেছে। আওয়াজটা ওটারই।

সবার মনে হলো আনন্দে হাসে। লেগুনে নামল ওরা, শীতল পানি দিয়ে তৃষ্ণা মেটাল।

কিন্তু ওদের আনন্দের ক্ষণটুকু স্থায়ী হলো। হঠাৎ বেজে উঠল ঢাকের দামামা! আওয়াজটা কোরিয়ান যুদ্ধ-জাহাজে রাখা ঢাকের! ওভাবে রণ-বাজনা বাজানো হয়! এখতুওয়ায়া লাফ দিয়ে লেগুন থেকে উঠল, সঙ্গীদের নির্দেশ দিল, ‘জাহাজের

দিকে ছোটো! জলদি!’

অন্যরা পিছনে এল কি না সেদিকে খেয়াল নেই তার, ঝেড়ে দৌড় দিল। থাকুক সারা শরীরে ব্যথা বা দুর্বলতা, জলপ্রপাতের তলা দিয়ে ছুটল এখতুওয়ায়া, যুদ্ধে যোগ দেয়ার জন্য উত্তেজিত স্নায়ু। ঘন জঙ্গলের ভিতর দিয়ে সৈকতের দিকে চলল, শুনতে পেল, ঢাকের আওয়াজ আরও উঁচু পর্দায় উঠছে! আরও খানিকটা যাওয়ার পর কয়েকটা পাম গাছের আড়াল থেকে বেরিয়ে এল সে, সামনেই পড়ল বালুকাবেলা।

এখতুওয়ায়ার চোখ তিন দিকের সাগর দেখল। নজর আটকে গেল একটা জায়গায়। বিপদ ওখান থেকে আসছে। পাল তোলা সরু ক্যানু, ওটার উপর অর্ধ উলঙ্গ ছ’জন লোক, কাঠের বৈঠা মেরে তীরের দিকে ছুটে আসছে! সবার চোখ আটকা পড়া জাহাজের উপর!

এখতুওয়ায়া লক্ষ করল তাদের গায়ের রং তামাটে, চুলগুলো ছোট করে কাটা। তাদের গলায় বাঁকা হাড় দিয়ে তৈরি বড়সড় নকলেস দেখা যাচ্ছে।

অতি দুর্বল এক সৈন্য ঢাক বাজাচ্ছিল, দামামা বন্ধ করে জিজ্ঞেস করল, ‘আপনি কী করতে বলেন, কমাগার?’

জবাব দেওয়ার আগে ইতস্তত করল এখতুওয়ায়া, ভাল করে জানে এই অবস্থায় লড়াই করবার সাধ্য তাদের নেই। ‘হাতে বর্শা তুলে নাও,’ শান্ত স্বরে বলল সে। ‘সবাই আমার পিছনে এসে দাঁড়াও।’

মানুষগুলো টলতে টলতে জাহাজ থেকে নেমে এল, জঙ্গল থেকে বেরিয়ে আসা লোকগুলো তাদের পিছনে এসে দাঁড়াল। সবার কাছে বর্শা নেই, হারিয়েছে আগেই। লড়াই করবার সাধ্যও তাদের নেই। তবে দরকার পড়লে সবাই এখতুওয়ায়ার নির্দেশ পালন করবে। জাপানি সামুরাইয়ের তলোয়ারটা এক হাতে স্পর্শ করল এখতুওয়ায়া, ভাবল লড়াই করে মরতে পারবে কি না।

আগুন নিয়ে খেলা-১

তখন তার হাতে এই তলোয়ার থাকবে কি?

সৈকতে দাঁড়ানো সৈনিকদের দিকে সরাসরি এল ক্যানু, লোকগুলো নিঃশব্দে বৈঠা বাইছে। ক্যানুর গলুই সৈকতের প্রান্তে এসে থামল। লোকগুলো লাফ দিয়ে নামল, ক্যানুটা সৈকতে তুলল। কাজটা শেষ হতেই পাথরের মত দাঁড়িয়ে পড়ল। দু'দল মানুষ পরস্পরকে সন্দেহ নিয়ে দেখল। তারপর নতুন মানুষগুলোর দিকে পা বাড়াল আদিবাসীদের নেতা। এখতুওয়ায়ার সামনে এসে দাঁড়াল সে। ছোটখাটো মানুষ সে, লম্বায় বড়জোর পাঁচ ফুট। দলে সবচেয়ে বয়স্ক সে, চুলগুলো পাকা, ঘোড়ার লেজের মত করে বেঁধেছে। বুকের কাছে ঝুলছে হাঙরের মালা, হাতে মোচড়ানো একটা কাঠ। বাদামি চোখ দুটো খোলাখুলি প্রশংসা করছে। মঙ্গোল নেতার দিকে চওড়া হাসি দিল সে। দেখা গেল সাদা বাঁকাচোরা দাঁতগুলো। মিষ্টি সুরে কথা বলে উঠল বুড়ো, দ্রুত কী সব বলে চলেছে। মনে হলো না কোনও হুমকি দিচ্ছে, স্রেফ অভ্যর্থনা। জবাবে সামান্য মাথা দোলাল এখতুওয়ায়া, কিন্তু ক্যানুর পাশে দাঁড়ানো লোকগুলোর উপর থেকে চোখ সরাল না। বুড়ো লোকটা মিনিটখানেক বলে গেল, তারপর হালকা পায়ে ক্যানুর কাছে ফিরল।

এখতুওয়ায়া শক্ত হাতে জাপানি তলোয়ারের হাতল ধরল, চোখের ইশারায় দলের সবাইকে সাবধান করল। একমুহূর্ত পর শরীর টিল দিল সে, বুড়ো ক্যানুর ভিতর থেকে তিরিশ পাউণ্ডের পেট-মোটা এক টিউনা বের করেছে! তার সঙ্গীরা নানা ধরনের মাছ হাতে তুলে নিল। একজনের হাতে থাকল লতা দিয়ে তৈরি ঝুড়ি, ভিতরে অসংখ্য শেলফিশ। সব নিয়ে এসে নামিয়ে দিল এখতুওয়ায়ার পায়ের কাছে। ক্ষুধার্ত সৈনিকরা অপেক্ষা করল, এখতুওয়ায়া অনুমতি দিতেই ঝাঁপিয়ে পড়ল খাবারের উপর। খাওয়ার ফাঁকে হাসল তারা, আদিবাসীদের ধন্যবাদ জানাল। এখতুওয়ায়ার সামনে গিয়ে দাঁড়াল বুড়ো লোক, শুয়োরের চামড়া

দিয়ে তৈরি মশক বাড়িয়ে দিল। ভিতরে টলমল করছে পানি।

পারস্পরিক বিশ্বাস আসতে আদিবাসীরা আঙুল তাক করে জঙ্গল দেখাল। তাদের পিছু নিতে বলছে। দ্বিধার মধ্যে পড়ে গেল এখতুওয়ায়া, জাহাজ ছেড়ে যাবে কি না বুঝতে পারছে না। তারপর সিদ্ধান্ত নিল, সৈনিকদের নিয়ে আদিবাসীদের পিছু নিল। জঙ্গলের ভিতর দিয়ে এগোল তারা, মাইলখানেক পেরিয়ে যাওয়ার পর গোল একটা ফাঁকা জায়গা পাওয়া গেল। ওখানে বিশটা কুঁড়েঘর, খড় ও বড় পাতা দিয়ে ছাওয়া। একদিকে বেড়া দিয়ে খোঁয়াড় করা হয়েছে। বাচ্চা ছেলেমেয়েরা ওখানে গুয়েরগুলোর সঙ্গে খেলছে। উল্টোদিকে বড় একটা ঘর, ওটার ছাদ অন্য কুঁড়ের চেয়ে উঁচু। ওটাই গ্রামের মোড়লের বাড়ি। একটু পর এখতুওয়ায়া আবিষ্কার করল, পাকাচুলো বুড়ো আসলে গ্রামের সর্দার!

গ্রামের সবাই বড়বড় চোখে সৈনিকদের দেখল, তারপর তাড়াহুড়ো করে ভোজের আয়োজন শুরু করল। শীঘ্রি তারা নতুন মানুষগুলোকে সম্মানের সঙ্গে গ্রহণ করল। ওই জাহাজ, আলাদা পোশাক ও অস্ত্র বলল, নতুন মানুষগুলো অনেক জ্ঞান রাখে। তারচেয়ে বড় কথা, তারা শত্রুদের ঠেকাতে সাহায্য করবে। এদিকে চায়নিজ সৈন্য ও কোরিয়ানরা ভাবল, তারা বেঁচে আছে সেটাই বেশি, বাড়তি পেয়েছে খাবার ও আশ্রয়।

কয়েকদিনের মধ্যে আগন্তুকরা টের পেল, গ্রামবাসীরা শুধু যে বন্ধুত্বের হাত বাড়িয়ে দিয়েছে তা নয়, তাদের মেয়েদের সঙ্গে মিশতেও কোনও বাধা দিচ্ছে না। কারণটা বোঝা কঠিন কিছু নয়, এখানে মেয়েদের সংখ্যা পুরুষদের প্রায় দ্বিগুণ। সৈনিকরা অবাক হলেও খুশি হলো। শুধু এখতুওয়ায়া এসব থেকে দূরে থাকল। মোড়লের সঙ্গে বসে ভাড়া এক অ্যাভালনের টুকরো চিবায় আর ভাবে: তার দলের সবাই অনেকদিন পর আনন্দে আছে। মনে মনে নিজেকে জিজ্ঞেস করে, 'আর কখনও কি আগুন নিয়ে খেলা-১

নিজের দেশে ফিরব?’

মঙ্গোল বাহিনী পরের কয়েক সপ্তাহে গ্রামে বাড়ি তৈরি করল। ধীরে ধীরে সবাই মিশে গেল ওদের সমাজের সঙ্গে। এখতুওয়ায়া প্রথমে গ্রামে থাকতে চায়নি, প্রতিরাতে পচে যাওয়া জাহাজে কাটিয়েছে। কিন্তু একদিন জাহাজের আড়াগুলো খুলে গেল, তক্তাগুলো পানির নীচে তলিয়ে গেল। এরপর থেকে বাধ্য হয়ে সে গ্রামেই আবাস নিল।

প্রতিদিন তাকে বিদ্ব করে স্ত্রী ও চার সন্তানের স্মৃতি, কষ্ট দেয়। তবে জাহাজ যখন নেই, বাধ্য হয়ে অদৃষ্টকে মেনে নিল সে। বুঝে নিল, আর কোনও দিন নিজ দেশে ফেরা হবে না। তার লোকজন নতুন জীবনটা আনন্দের সঙ্গে গ্রহণ করেছে। তাদের ভাবটা এমন, তারা মঙ্গোল সম্রাটের নির্দেশ পালন করতে গিয়েই এই দূর দেশে এসে পড়ে আছে। তবে মনে মনে সবাই জানে, সম্রাটের অধীনে সৈনিক-জীবন কাটানোর চেয়ে তারা এখন অনেক ভাল আছে। শুধু এখতুওয়ায়া মানুষগুলোর ধ্যান-ধারণা কিছুতে মানতে পারল না। সে কুবলাই খানের কর্তব্য-নিষ্ঠ সৈনিক, সবসময় তার মন বলতে লাগল, তার দায়িত্ব প্রথম সুযোগেই ফিরে গিয়ে কাঁজে যোগ দেয়া। কিন্তু তার জাহাজ তলিয়ে গেছে খাঁড়ির পানির নীচে। দেশে ফেরার আর পথ নেই। বছরের পর বছর কেটে যাচ্ছে, এখতুওয়ায়াও ধীরে ধীরে একদিন বাস্তবতাকে মেনে নিল। তবে সংসারে জড়াল না—সে যেন সমাজে বাস করেও আলাদা জগতের মানুষ।

বছরগুলো ধীরে ধীরে গড়াতে লাগল। এখতুওয়ায়া এখন আর সেই কঠোর সৈনিক নেই, মানসিক ভাবে অনেক নরম হয়েছে। এরইমধ্যে অনেক সময় পেরিয়ে গেছে, সে ও তার দলবল শিখে

নিয়েছে এ দেশের মানুষের ভাষা। এখতুওয়ায়া রোমাঞ্চকর কাহিনি শুনতে ভালবাসে, তাই খুব খাতির হয়েছে বুড়ো সর্দারের সঙ্গে। মানুষটার নাম থাছ, অন্তত সবাই তাকে ওই নামেই ডাকে। মাঝে মাঝে সে এখতুওয়ায়াকে শোনায় এক অভিযানের কাহিনি। বহু কাল আগে তার পূর্বপুরুষ ওই মস্ত সাগরে এক অভিযানে বেরোয়। তখন তাদের সঙ্গে ছিল বিশাল সব জাহাজ। থাছ ভাল করে বোঝাতে গিয়ে একদিন বলল, একটা দ্বীপ এখানে খুব আওয়াজ করছিল। সেটা শুনেই ওদের দাদা-পরদাদারা বুঝল, তাদের ডাকা হচ্ছে। দেবতারা বলছে, ওই এলাকাটা গড়ে তুলতে হবে। তারপর দেবতারা আকাশ থেকে তাদের দিকে চেয়ে হেসেছে। সবসময় আবহাওয়া ভাল থেকেছে, পাওয়া গেছে প্রচুর ফলমূল ও পানি।

বর্ণনা শুনে হাসল এখতুওয়ায়া, ভাবল আদিবাসীরা বড়জোর ছোট ক্যানু নিয়ে আশপাশের দ্বীপগুলোতে গেছে। অথচ কল্পনা করে তাদের পূর্ব-পুরুষ মহাসাগর পাড়ি দিয়েছে!

এখতুওয়ায়া একদিন টিটকারির হাসি হেসে বলল, ‘আমি তোমাদের ওরকম একটা বিরাট জাহাজ দেখতে চাই।’

অপমান হজম করে বলল বুড়ো, ‘একটার কাছে তোমাকে নিয়ে যাব একদিন, তখন নিজের চোখে দেখবে।’

কথাটা থাছ দৃঢ়তার সঙ্গে বলছে দেখে খানিকটা অবাক হলো এখতুওয়ায়া। বুড়ো ওকে নিয়ে কোথায় যাবে? সঙ্গে যেতে রাজি হয়ে গেল সে। বেশ কিছুদিন পর দু’দিনের পথ হেঁটে তারা দ্বীপের আরেক প্রান্তে হাজির হলো। জঙ্গল পথে এত দূর হাঁটতে হাঁটতে এখতুওয়ায়ার আফসোস হলো অনর্থক পণ্ডশ্রম হচ্ছে বলে। আরও খানিক পথ এগোবার পর জঙ্গল থেকে বেরিয়ে এল দু’জন। সামনে ছোট একটা সৈকত। এখতুওয়ায়া বালুকাবেলায় পা ফেলে থমকে গেল। বুড়ো থাছ হাত তুলে সৈকতের আরেকটা দিক দেখাচ্ছে।

জিনিসটা প্রথমে চিনতে পারল না এখতুওয়ায়া। সামনে সৈকত, তার উপর পড়ে আছে গাছের বড় দুটো কাণ্ড। ফাঁকা সৈকতে আর কিছু নেই। পড়ে থাকা গুঁড়িদুটোর উপর চোখ আটকে গেল। এবার এখতুওয়ায়া বুঝল, ওই দুই গাছ ঝড়ের তাণ্ডবে উপড়ে আসেনি, ওগুলো আসলে বিশাল কোনও জাহাজের বিম! বালির নীচে তলিয়ে গেছে!

এখতুওয়ায়া নিজের চোখকে বিশ্বাস করতে পারল না, পা বাড়াল জাহাজের দিকে। প্রতি পা ফেলতে গিয়ে আরও বিস্মিত হলো। প্রাচীন জাহাজ সৈকতে বহুকাল ধরে রয়েছে, হয়তো এক-দেড়শ বছর ধরেই, কিন্তু এখনও পুরোটা জাহাজ আন্ত রয়েছে। ওটার জোড়া খোল একটার সঙ্গে আরেকটা আটকানো। উপরে চওড়া ডেক, দুটো পোক্ত গুঁড়ি দিয়ে আটকানো। দৈর্ঘ্যে জাহাজটা ষাট ফুটের বেশি, তবে মাস্তুল মাত্র একটা। পচে একেবারে নষ্ট হয়ে গেছে। ডেকের তক্তাগুলোও। তবে জাহাজের কাঠামোর কোনও ক্ষতি হয়নি। দেখলে মনে হয় বিম-কলামগুলো মাত্র কয়েকদিন আগে তৈরি করা হয়েছে। এখতুওয়ায়ার মনে আর সন্দেহ থাকল না, এ জাহাজ বানিয়েছিল কেউ সাগরে চলবার জন্যই! থাছ মিথ্যে গল্প করেনি! জাহাজের অবশিষ্ট দেখে উত্তেজিত হয়ে উঠল এখতুওয়ায়া, এই তো পাওয়া গেছে দ্বীপ থেকে বেরিয়ে যাওয়ার নৌযান!

‘তুমি আমাকে আমার দেশ আর সম্রাটের কাছে পৌঁছে দেবে,’ বিড়বিড় করে বলল সে প্রাচীন জাহাজটাকে।

এখতুওয়ায়ার নির্দেশে কয়েকদিন পর আদিবাসীরা সৈকতে এসে হাজির হলো। কোরিয়ান ছুতোর তাদের দেখিয়ে দিল কীভাবে জাহাজ মেরামত করতে হয়। জঙ্গল কাছেই, ফলে ডেকের জন্য তক্তা পেতে অসুবিধা হলো না। শক্ত একটা গাছ থেকে পাওয়া গেল মাস্তুল। নারকেলের ছোবা দিয়ে তৈরি হলো দড়ি। জাহাজের খোল ও আড়াগুলো দড়ি দিয়ে ভালভাবে বাঁধা

হলো। লতা পাকিয়ে হলো পাল।

এসব কাজ শেষ হতে তিন সপ্তাহের বেশি লাগল না, তারপর টেনে নামানো হলো জাহাজটাকে সাগরে। ভাসছে ওটা, আবারও ডেউয়ের সঙ্গে লড়াই করতে তৈরি।

এখতুওয়ায়া দলের সবাইকে নির্দেশ দিতে পারত তার সঙ্গে যেতে, কিন্তু তা করল না। তার মন বলল, মানুষগুলোকে আবারও মৃত্যুর মুখে ডাকবে কী করে? সৈনিকদের বেশিরভাগই বিয়ে-থা করেছে, দীপে তাদের সন্তান রয়েছে। এখতুওয়ায়া কয়েকজন স্বেচ্ছাসেবক চাইলে মাত্র তিনজন লোক এগিয়ে এল। তাদের সঙ্গে থাকল বুড়ো খাহ। এখতুওয়ায়া আর কাউকে অনুরোধ করল না। ঠিক করল, যারা যেতে চাইছে তাদের নিয়েই বেরিয়ে পড়বে অভিযানে। এত কম লোক নিয়ে জাহাজ চালানো কঠিন। কিন্তু আর উপায়ই বা কী? যারা রয়ে গেল তাদের জোর করে সঙ্গে নেয়া ঠিক হতো না।

শুরু হলো অভিযানের জন্য নানা ধরনের রসদ জোগাড় করা। এতে লাগল কয়েক সপ্তাহের বেশি। তারপর একদিন খাহ জানাল, এবার বেরিয়ে পড়বার সময় হয়েছে। বাতাস এখন ঠিক দিকে চলছে। এক ভোরে সে এখতুওয়ায়াকে বলল, ‘দেবী হিনা এবার আমাদের পশ্চিমের পথে নেবেন। চলুন, রওনা হওয়া যাক।’

সৈকতে সবাই উপস্থিত হলো, এখতুওয়ায়া দলের লোকদের উদ্দেশ্যে বলল, ‘আমি সম্রাটকে জানাব তোমরা এই বহুদূর দেশে উপনিবেশ গড়েছ। তোমরা ভাল আছ।’ কথা শেষে ছোট দলটা নিয়ে জাহাজে উঠে পড়ল সে। মৃদুমন্দ হাওয়া পশ্চিম দিকে বয়ে চলেছে। ঝিরঝিরে বাতাসে জাহাজ ছাড়া হলো, দীপ পিছিয়ে যেতে লাগল। সঙ্গে রয়েছে পর্যাপ্ত পানি, শুকনো মাছ ও ফলমূল। অনায়াসে এ দিয়ে কয়েক সপ্তাহ চলবে তাদের।

ধীরে ধীরে হারিয়ে গেল সবুজ দীপ। ক্যাটামারানের উপর

দাঁড়ানো মানুষগুলো চুপ হয়ে গেল, ভাবল—এত বড় অনিশ্চয়তা নিয়ে বিপদে পা বাড়ানো কি উচিত হলো? মন বলল, মস্ত ভুল হয়েছে। তারা ভাবতে লাগল, বহু যুগ আগে তাদের পূর্বপুরুষরা এমনই ঝুঁকি নিয়ে খেপা সাগরের বিরুদ্ধে লড়াই করেছিল। সেবার সাহায্য পাওয়া গিয়েছিল ভাগ্যদেবীর, এবারও কি তার সহায়তা পাওয়া যাবে?

এখতুওয়ায়ার বুক ভরে আছে আত্মবিশ্বাসে। সে বুড়ো থাছর উপর পুরোপুরি নির্ভর করছে। এটা ঠিক, আদিবাসী সর্দার জাহাজ চালাতে পারে না, তবে নক্ষত্রগুলো চেনে সে, বোঝে সূর্য ও মেঘ কোনদিকে যায়, সাগরের পানি কেন ফুলে ওঠে। সে জানে, হেমন্তে হাওয়া কোনদিক থেকে কোনদিকে যায়, সেই টানা হাওয়া কী ভাবে ধরতে হয় পালে। সেটাই সবাইকে বাড়ির দিকে নেবে। শুধু থাছই জানে, কী করে হাড়ের বড়শি দিয়ে টিউনা মাছ ধরা যায়। এই দীর্ঘ অভিযানে আর কিছু না হোক ওই কৌশল পারবে সবাইকে বাঁচিয়ে রাখতে।

অনভিজ্ঞ নাবিকরা দ্বীপ থেকে সরে যাওয়ার পর অনুভব করল, জাহাজ চালানো খুব কঠিন নয়। আকাশ থাকল পরিষ্কার, সাগর থাকল শান্ত। দু'সপ্তাহ ধরে টানা বাতাস তাদের এগিয়ে নিল। মাঝে দু'একবার হালকা ঝড়-বৃষ্টি এসে জাহাজের দৃঢ়তা পরীক্ষা করে গেল, কিন্তু নাবিকরা সেই সুযোগে আরও পানি সংগ্রহ করল। থাছ জাহাজের দায়িত্বে থাকল, নাবিকদের জানাল কী ভাবে সূর্য ও নক্ষত্র দেখে এগোতে হবে। কয়েকদিন পর দক্ষিণ-পশ্চিম দিগন্তে অস্বাভাবিক মেঘ দেখল থাছ। এখতুওয়ায়াকে বলল, 'দক্ষিণে দু'দিন এগোলে মাটি।'

সামনে জমি আছে শুনে উত্তেজিত হয়ে উঠল সবাই, স্বস্তি পেল। কিন্তু তারা রয়েছে কোথায়? কোন্ দেশের জমি ওটা?

পরদিন সকালে দিগন্তে ছোট্ট একটা ফোঁটা দেখা দিল। আস্তে আস্তে ওটা বড় হলো। আরও পরে দেখা গেল জিনিসটা

আসলে জমি নয়, আরেকটা জাহাজ! দুই জলযান কাছাকাছি এলে এখতুওয়ায়া দেখল জাহাজটার পিছন দিকটা বেশ নিচু। মাস্তুলে ত্রিকোণ পাল, বাতাসে ফুলে রয়েছে। মন খারাপ হয়ে গেল সবার। ওই জলযান চায়নিজদের নয়, সম্ভবত আরবদের বাণিজ্য-তরী। জাহাজ পাল নামিয়ে ফেলল, এখতুওয়ায়াদের পাশাপাশি হলো। এবার দেখা গেল কালো চামড়ার মানুষগুলো রংচঙা জোব্বা পরেছে। রেইলের পাশে এসে স্বাগত জানাল তারা। এখতুওয়ায়া সতর্ক হয়ে উঠল, কিন্তু কিছুক্ষণ পর বুঝল, লোকগুলো তাদের উপর হামলা করবে না। ছোট জাহাজের ডেকে উঠল সে।

এই বাণিজ্য-তরী এসেছে সেই সুদূর জাঞ্জিবার থেকে। ক্যাপ্টেন এক হাসিখুশি মুসলিম, অভিজ্ঞ ব্যবসায়ী। আগেও সে মঙ্গোল রাজ-দরবারে নানান সামগ্রী বিক্রি করেছে। এখন শাংহাইয়ে চলেছে হাতির দাঁত, সোনা ও মসলা নিয়ে। বদলে কিনবে চায়নিজ পোর্সেলিন ও রেশমি কাপড়। এখতুওয়ায়ার ছোট দলটাকে জাহাজে আমন্ত্রণ করল ক্যাপ্টেন। দু'দলের আলাপ শেষে দ্বীপ থেকে পাওয়া জোড়া খোলওয়ালা শক্ত-পোক্ত জাহাজটা ত্যাগ করা হলো, ওটা ভেসে গেল প্রশান্ত মহাসাগরে।

মুসলিম ক্যাপ্টেন বুঝেছে একজন মঙ্গোল কমান্ডারকে শাংহাইয়ে পৌঁছে দিলে নানা দিক থেকে সুবিধা মিলবে। সত্যিই কিছুদিনের মধ্যে তার জাহাজ শাংহাইয়ে পৌঁছল। তেরো বছর পর সৈনিকরা ফিরেছে খবরটা আগুনের মত ছড়াল শহরে। এর ফলে রাজ-দরবারে আলোড়ন সৃষ্টি হলো। সৈনিকদের ওই দলের সঙ্গে বাণিজ্য জাহাজের ক্যাপ্টেনকেও দরবারে আমন্ত্রণ করা হলো। সরকারী কর্মকর্তারা সবাইকে রাজধানী তা-তুতে নিয়ে গেলেন, সেখানে সম্রাট কুবলাই খান সবার সঙ্গে সাক্ষাৎ করলেন। আরব ক্যাপ্টেনকে সেখানে প্রচুর উপহার-সামগ্রী, ও বিভিন্ন ধরনের সুবিধা দেয়া হলো। এখতুওয়াওয়া রাজধানীতে আগুন নিয়ে খেলা-১

যাওয়ার পথে দেশের বর্তমান হালচাল সম্পর্কে অনেক কিছুই জেনে নিল।

মন ছোট হয়ে গেল এখতুওয়ায়ার, জানল জাপান আক্রমণ সম্পূর্ণ ব্যর্থ হয়েছে, ওই টাইফুন দু'হাজারও বেশি জাহাজ ডুবিয়েছে। সঙ্গে গেছে প্রায় এক লাখ সৈনিক! এখতুওয়ায়ার কমান্ডার-ইন-চিফ ও সঙ্গীরা আর অবশিষ্ট বহরের সঙ্গে ফেরেনি। আরও কষ্টের কথা যে জাপান এখনও অজয়! সম্রাট কুবলাই খান অবশ্য আরেকবার আক্রমণ করার ইচ্ছা প্রকাশ করেছিলেন, কিন্তু তাঁর পরামর্শদাতারা তাঁকে বিরত করেছেন।

গত তেরো বছরে বহু কিছু বদলেছে। পুরো চিন যেন টুকরো টুকরো হয়ে যাবে, এমনি অবস্থা! জাপানকে আক্রমণে ব্যর্থ হওয়ার পর ভিয়েতনামকে শান্ত করা যায়নি। ওদিকে চাং-তুর গ্র্যাণ্ড ক্যানাল বিস্তৃত করতে গিয়ে সর্বনাশ হয়েছে। দেশের পুরো অর্থনীতি মুখ থুবড়ে পড়েছে। সম্রাট কুবলাই খানের স্বাস্থ্য ভেঙে পড়েছে, উত্তরসূরীরা চাইছে দ্রুত বিদায় হোন তিনি। এদিকে সাধারণ জনতা খেপে উঠছে, তারা চায় না এখনও কোনও মঙ্গোল এই ওয়াইউয়ান সাম্রাজ্য শাসন করুক। সবাই এখন এ নিয়ে কথা তুলছে। বারো শ' উনআশিতে সং ডাইনেসিটর পতনের পর কুবলাই খান পুরো দেশ একত্রিত করেন, কিন্তু সেই সাম্রাজ্যও এখন তলিয়ে যাচ্ছে।

রাজধানী তা-তুতে পৌছে এখতুওয়ায়া ও তার লোকদের শহরের কেন্দ্রে সম্রাজ্ঞীর ভবনে নিয়ে যাওয়া হলো। সেখানে সম্রাটের সঙ্গে তাদের সাক্ষাতের ব্যবস্থা হলো। এখতুওয়ায়া অতীতে বহুবার কুবলাই খানকে দেখেছে, কিন্তু এবার তাঁকে দেখে চমকে গেল। মানুষটা কোনওমতে একটা গদিওয়ালা চেয়ারে বসে আছেন, পরনে রেশমের পোশাক। অনেক মোটা হয়েছেন তিনি, কিন্তু কালো চোখদুটো অক্ষিকোটরে ঢুকে গেছে। সবচেয়ে প্রিয় স্ত্রী ও দ্বিতীয় ছেলের মৃত্যুতে একেবারে ভেঙে

পড়েছেন তিনি, শোক কাটাতে গিয়ে অতিরিক্ত মদ্যপান করছেন সর্বক্ষণ। কিছুদিন আগে তাঁর আশি বছর পূর্ণ হলো, হয়তো আরও অনেকদিন বাঁচতেন, কিন্তু অনিয়ম তাঁকে কুরে কুরে খাচ্ছে। এখনুওয়ায়া দেখল সম্রাট এক পা নিচু একটা গদির উপর রেখেছেন। পা-টা ফুলে ঢোল। একপাশে রেখেছেন একটা জগ, একটু পর পর ওটা থেকে গাধার ফারমেটেড দুধ দিয়ে তৈরি কড়া মদ পান করছেন।

‘কমাগুর এখনুওয়ায়া, তুমি বহুদিন অনুপস্থিত ছিলে, তবে আবারও দায়িত্ব গ্রহণ করেছে,’ খসখসে স্বরে বললেন সম্রাট।

‘আমার সম্রাটের নির্দেশে,’ কুর্নিশ করল এখনুওয়ায়া।

‘তুমি তোমার অভিযানের কথা বলো, এখনুওয়ায়া। বলো সেই রহস্যময় দেশের কথা, যেখানে তোমাদের জাহাজ-ডুবি হয়েছিল।’

সম্রাটের কথা শেষ হওয়ার আগেই কারুকার্য খচিত চেয়ার হাজির করা হয়েছে। মঙ্গোল কমাগুর বসে পড়ল, শুরু করল তার কাহিনি। সেই ঝড় থেকে শুরু করে সাগরে ভেসে যাওয়া, সবুজ দ্বীপে আশ্রয় নেয়া ও পরে জাহাজ নিয়ে সাগরে বেরিয়ে পড়া—সবই বলল সে। সঙ্গে চলল মদ্যপান। থাহুর সঙ্গে সম্রাটকে পরিচয় করিয়ে দিল সে।

‘অসাধারণ এক অভিযান,’ জোর দিয়ে বললেন কুবলাই খান। ‘তোমরা যে দেশে পৌছাও, সেটা উর্বর ছিল? সম্পদশালী ছিল?’

‘জী। মাটি ছিল রসাল। আবহাওয়া ছিল নাতিশীতোষ্ণ। ওখানে প্রচুর বৃষ্টি হয়। চারপাশে রয়েছে জঙ্গল। হাজারো রকমের ফলমূল আর জীব-জন্তু-মাছের অভাব নেই। মাটি সহজেই চাষবাস করা যায়।’

‘আমাদের মহান সম্রাটের জন্য আমরা ধন্য,’ কোঁচকানো চেহারার এক পাকাচুল বুড়ো বলল। পাকা উপদেষ্টা সে, তবে আগুন নিয়ে খেলা-১

কাহিনিটা শুনে খুব একটা আমল দেয়নি। ‘আপনি আবারও দুনিয়ার আরেকটা অংশ জয় করেছেন, সম্রাট!’

‘এখতুওয়ায়া, এটা তো ঠিক, তুমি সত্যিই আমাদের সৈন্য ওখানে রেখে এসেছ?’ জানতে চাইলেন খান। ‘ওই দেশ এখন মঙ্গোল সাম্রাজ্যের অংশ?’

মনে মনে কনফিউজিয়ান বুড়ো উপদেষ্টাকে গালি দিল এখতুওয়ায়া, ব্যাটা এমনভাবে সম্রাটকে ফুলিয়ে তুলেছে যে বিপদে পড়ে গেছে সে নিজে। যেসব লোক সে রেখে এসেছে তারা অনেক আগেই হাত থেকে তলোয়ার নামিয়ে রেখেছে, এখন চাষবাস করে। মানুষগুলো সাগরে হারিয়ে যাওয়ার আগেই আনুগত্য নিয়ে প্রশ্ন তোলা যেত, আর এখন তো নতুন করে এ প্রশ্ন তোলাই যায় না।

‘জী, মহামান্য সম্রাট,’ মিথ্যে বলল এখতুওয়ায়া। ‘ছোট একটা দল আপনার নামে ওই দেশ চালায়।’ লজ্জায় থাছুর দিকে চাইল না সে। থাছু এমনভাবে মাথা দোলাল, যেন কিছুই বোঝেনি। এ-ধরনের রাজনীতি তার জানা আছে।

কুবলাই খানের চোখ মানুষগুলোর উপর থেকে সরে গেল, চলে গেল যেন বহুদূরে। এখতুওয়ায়া ভাবল, মদের নেশা বোধহয় সম্রাটকে ভাল ভাবে ধরেছে।

কুবলাই খান ফিসফিস করে বললেন, ‘ওই অপূর্ব দেশ আমি দেখতে চাই, কমাণ্ডার। এই সাম্রাজ্যের শুরু ওখানে, ওখান থেকে সূর্য ওঠে।’

‘ও দেশ সত্যিই যেন দুনিয়ার মাঝে স্বর্গ। সাম্রাজ্যের সেরা জায়গা,’ বলল উপদেষ্টা।

‘এখতুওয়ায়া, তুমি কি জানো কীভাবে ওখানে যেতে হয়?’

‘সাগরে চলার নিয়ম আমি জানি না, মহামান্য সম্রাট, কিন্তু থাছু সূর্য আর নক্ষত্র চেনে—আমার মনে হয় সে ওই দেশে আবার ফিরতে পারবে।’

‘তুমি সাম্রাজ্যকে অনেক সহায়তা করেছ, এখন তুমিও যাওয়া, আমরা তোমাকে পুরস্কৃত করব,’ বললেন কুবলাই খান। মদে চুমুক দিয়ে আরও কিছু বলতে গেলেন, কিন্তু তরলটা কুলকুচি হয়ে বেরিয়ে এল, পড়ল তাঁর সিন্ধের টিউনিকে।

এখন তুমিও যাওয়া কর্ণিশ করে বলল, ‘অনেক ধন্যবাদ, আমার প্রিয় সম্রাট!’

বাস, সাক্ষাৎকার শেষ। দু’জন প্রহরী এসে হাজির হলো, এখন তুমিও যাওয়া থেকে প্রাসাদ থেকে বের করে আনল।

বেরিয়ে এসে খারাপই লাগল এখন তুমিও যাওয়ার, কোথায় গেল প্রবল প্রতাপশালী সেই মহান নেতা! কুবলাই খান যেন ক্লান্ত একটা প্রাচীন শামুক! মানুষটা একসময় দুনিয়ার সবচেয়ে বিশাল, সবচেয়ে সমৃদ্ধ, সবচেয়ে ক্ষমতাসালী রাজ্য শাসন করতেন! তাঁর রক্তলিপ্সু দাদুর মত তিনিও ছিলেন নিষ্ঠুর ও প্রতিভাবান শাসক। তিনি হাজারো মানুষকে দুনিয়ার বিভিন্ন এলাকা থেকে আসতে দিয়েছেন, যেন মানুষ কোনও ধর্ম নিয়ে বাড়াবাড়ি করতে না পারে সেজন্য কঠোর আইন করেছেন। ভূগোল, মহাকাশ ও চিকিৎসা বিজ্ঞানের উন্নতির জন্য সবসময় উৎসাহ দিয়েছেন। ওই মানুষ এখন মৃত্যুর কাছাকাছি চলে এসেছেন, এবার শুধু হেরে যাওয়ার পালা। সাম্রাজ্য, ক্ষমতা তাঁকে সাহায্য করতে পারবে না। আরেকটা দেশ দখল করা গেল কি না, এখন আর তা নিয়ে তাঁর তেমন আগ্রহী হওয়ার কোনও কারণ নেই।

বিশাল প্রাসাদ ও বাগান থেকে বেরিয়ে এসে হঠাৎ এখন তুমিও যাওয়া দেখল, থাঙ্ক তুমি পাশে নেই। এবার বুঝতে পারল বুড়ো সর্দার এখনও প্রাসাদের ভিতরে, সম্রাটের কক্ষে রয়ে গেছে। এখন তুমিও যাওয়া তার জন্য অপেক্ষা করল, কিন্তু কয়েক ঘণ্টা পর হাল ছেড়ে দিল। আর কিছু করার নেই, কাজেই রাজধানী ছেড়ে বেরিয়ে পড়ল সে—রওনা হলো গ্রামের পথে। ওখানে আগুন নিয়ে খেলা-১

রয়েছে তার পরিবার। আর কখনও বুড়ো খাহ্নর সঙ্গে তার দেখা হয়নি। মাঝে মাঝে সে ভেবেছে, গেল কোথায় তার সেই বিদেশি বন্ধু?

মাত্র দু'মাস পর খবর পাওয়া গেল, মহান সম্রাট মৃত্যু-বরণ করেছেন। পরিণত বয়স ও অতিরিক্ত মদ্যপান তাঁকে ওপারে নিয়ে গেছে। সম্রাটকে সম্মান দেখিয়ে রাজধানী তা-তুতে দীর্ঘ এক শোকানুষ্ঠান হলো। তাঁর মরদেহ রাখার জন্য কিছুদিন পরে শহরের দক্ষিণে একটা সৌধ তৈরি হয়েছিল। জায়গাটাকে এখন বলা হয় বেইজিং শহর। ওই সৌধ এখনও রয়েছে ওখানে।

সমস্ত অনুষ্ঠান শেষে কারুকার্যময় কফিনটা শহর থেকে সরিয়ে নেয়া হলো, পিছনে চলল এক হাজার ঘোড়সওয়ার। এই বিশাল দলটি গেল উত্তরে, সম্রাটের নিজ দেশ মঙ্গোলিয়ার দিকে। কুবলাই খানের জন্য ওখানে খেনতি পর্বতে গোপনে একটা সমাধি প্রস্তুত করা হলো। কুবলাই খানের সঙ্গে দেয়া হলো তাঁর প্রিয় প্রাণী, নারী ও বিপুল সম্পদ। আশা করা হলো, ওসব তাঁকে পরজগতে আনন্দে রাখবে। সমাধিস্থল লুকিয়ে ফেলা হলো। হাজারো ঘোড়া দিয়ে জমিটা দুরমুজ করা হলো। যারা সমাধি তৈরি করেছে, তাদের খুন করা হলো। সম্রাটের সঙ্গে যেসব সেনাপতি গেছে, তারা শপথ নিল, কেউ মুখ খুলবে না। যদি খোলে, তাকে খুন করা হবে। মাত্র কয়েক বছর পর কেউ মনে রাখল না মঙ্গোল নেতার সমাধি কোথায়। সময় পেরোতে লাগল, সবুজ ওই পর্বতের ঢালে বাতাস যেমন বয়ে যায়, সেভাবে কুবলাই খানের প্রসঙ্গও একদিন মিলিয়ে গেল।

কিন্তু হাজার মাইল দক্ষিণে বিরাট একটা চায়নিজ জাঙ্ক শাংহাইয়ের ডক ছেড়ে গেল। তখন মাত্র ভোর। জাহাজটা হলুদ নদী পেরিয়ে প্রশান্ত মহাসাগরের দিকে চলেছে। সম্রাটের

জাহাজ-বহরে সাগরগামী নৌযান কমই রয়েছে, কিন্তু এই জাহাজটা দৈর্ঘ্যে দুশো ফুটের বেশি। ওটার চার মাস্তুলে ফুলে উঠল বারোটা পাল। ওয়াইউয়ান সাম্রাজ্য তখনও শোক পালন করছে, কাজেই জাহাজের মাস্তুলে রাজকীয় পতাকা দেখা গেল না। কিন্তু কোনও ধরনের পতাকা নেই, সেটা অবাক করবার মতই একটা ব্যাপার!

তীরে দাঁড়ানো কয়েকজন বিস্মিত হলো। জাহাজটা বন্দর ছেড়ে এত ভরে চলেছে কোথায়? দু'একজন খেয়াল করল, ওই জাহাজ অস্বাভাবিক ভাবে যাত্রা শুরু করেছে। সাধারণত কোনও জাহাজ ডক ছেড়ে রওনা হলে হৈ-হল্লা হয়, আমোদ করা হয়। মাত্র অর্ধেক নাবিক নিয়ে চলেছে ওটা। মাত্র একজন খেয়াল করল, জাহাজের হালে ক্যাপ্টেনের পাশে দাঁড়িয়েছে এক চুলদাড়ি পাকা বাদামি লোক—ক্যাপ্টেনকে সে মেঘ ও উদীয়মান সূর্য দেখাচ্ছে। ভাষা তার অদ্ভুত।

জাহাজটা দেখতে দেখতে লোকালয় পেরিয়ে গেল। সামনে পড়ল সুবিস্তৃত নীল প্রশান্ত মহাসাগর। চলেছে ওই জাহাজ এক অজানা দেশের উদ্দেশে!

দুই

আবছা ভাবে উপজাতীয়দের ড্রামের আওয়াজ আসছে। প্রথমে ধুম করে আওয়াজ হচ্ছে, কিছুক্ষণ পর ধুপ্। অলস ভঙ্গিতে বেজে চলেছে। মন বলে, শব্দগুলো থামবে। কিন্তু বাতাসে ভাসছে আরেকটা আওয়াজ! ওই শব্দ বুক দমিয়ে দেয়। ওটা আশুন নিয়ে খেলা-১

শেষ হওয়ার পর পরই আরেকটা আওয়াজ! মাটিতে কিছু আছড়ে পড়ছে!

ট্রেঞ্চের ভিতর থেকে বেরিয়ে এলেন হার্ভে পোলার্ড। কয়েকদিন আগে ওখানে ট্রেঞ্চটা খোঁড়া হয়েছে। হাতের ট্রাওয়েলটা পাশের কাঁচা মাটির দেয়ালের উপর রাখলেন তিনি, আড়মোড়া ভাঙলেন। চোখ চলে গেল আকাশের দিকে। মানুষটি অক্সফোর্ডে লেখাপড়া করেছেন, এখানে কাজ করছেন ব্রিটিশ মিউজিয়ামের পক্ষ হয়ে—ফিল্ড আর্কিওলজিস্ট। এই পেশার সঙ্গে মানানসই লম্বা খাকি প্যান্ট ও ডুয়াল-পকেট শার্ট পরেছেন। পোশাকে লেগে রয়েছে মিহি ধুলো ও ঘাম। বেশিরভাগ আর্কিওলজিস্টের মত মাথায় ক্লাসিক পিচ্ হেলমেট নেই, পরেছেন তোবড়ানো এক ফেডোরা। গ্রীষ্মের রোদ থেকে মাথা বাঁচানোর জন্য এই ব্যবস্থা। ক্লান্ত নীল চোখ দুটো পুৰদিক দেখছে। চওড়া উপত্যকার ওপারে দিগন্ত দেখলেন তিনি। বজ্রপাতের মত আওয়াজটা ওখান থেকে আসছে। সকালের রোদে প্রথমবারের মত ওদিকে ধোঁয়া দেখলেন আজ।

হার্ভে পোলার্ড ট্রেঞ্চ দাঁড়ানো লোকটার উদ্দেশে বললেন, ‘বেসুদাইর, খেয়াল করেছ, আর্টিলারি আমাদের দিকে আসছে।’

হালকা-পাতলা এক লোক নীরবে ট্রেঞ্চ থেকে উঠে এল। পরনে উলের শার্ট, কোমরে লাল সোয়েটার বেঁধেছে। ট্রেঞ্চ তার পিছনে কাজ করছে চায়নিজ শ্রমিকরা, শুকনো মাটি খুঁড়ছে। কারও হাতে ট্রাওয়েল, আবার কারও হাতে কোদাল। এইমাত্র ট্রেঞ্চ থেকে যে বেরিয়ে এসেছে, সে চায়নিজ শ্রমিক নয়। তার কাঁধ অতিরিক্ত চওড়া, চোখ দুটো প্রায় গোল। রোদে কাজ করে মুখটা কালচে। যে-কোনও চায়নিজ একনজর তাকিয়েই বলবে, এ লোক চিনা নয়, মঙ্গোলিয়ান।

মাইলখানেক দূরে সরু, কাঁচা রাস্তা। ওটার দিকে আঙুল তাক করল সে। ‘পিকিঙের পতন হবে, স্যর। লোকজন

এরইমধ্যে পালাতে শুরু করেছে।' ষাঁড় টানা ছ'সাতটা ওয়্যাগন ধুলোর মধ্য দিয়ে এগিয়ে চলেছে। চায়নিজ পরিবারগুলো যা পেরেছে, সঙ্গে নিয়েছে। 'এবার আমাদের খোঁড়াখুঁড়ি বন্ধ করতে হবে, স্যর। যে-কোনও সময়ে জাপানিরা হাজির হয়ে যাবে।'

চুপ করে দাঁড়িয়ে আছেন পোলার্ড, অজান্তে একবার কোমরে হাত চলে গেল—ওখানে পয়েন্ট ফোর-ফাইভ-ফাইভ ওয়েবলি ফসবেরি অটোমেটিক পিস্তল ঝুলছে। দু'দিন আগে একদল ডাকাত আর্টিফ্যাক্ট কেড়ে নিতে এসেছিল। দলটিকে গুলি করে তাড়িয়েছেন তিনি। মহাচিনের সমস্ত নিয়ম-নীতি ধসে পড়ছে এখন। দেশ ভরে গেছে চোর-ডাকাতে। কপাল ভাল যে এদের বেশিরভাগই নিরস্ত্র। কিন্তু জাপানিজ ইমপিরিয়াল আর্মি অন্য জিনিস। তাদের ফাঁকি দিয়ে বেরিয়ে যাওয়া অসম্ভব।

জাপান আর্মি এ দেশের বুকের উপর চেপে বসে সব ছিন্তিভিন্ন করছে। উনিশ শ' একত্রিশে জাপানিজ কোয়ার্টাং আর্মি মাঞ্চুরিয়া দখল করল, তার পরপরই তাদের চোখ পড়ল দেশটার উপর। তারা পর্যুদস্ত কোরিয়া যেমন করে দখল করেছে, তেমনি করে মহাচিনকেও উপনিবেশ বানাতে চায়। ছ'বছর ধরে ভীতি প্রদর্শন, গুপ্তহত্যা ও হামলা চলছে। তারপর উনিশ শ' সাঁইত্রিশের গ্রীষ্মে এসে জাপানিজ ইমপিরিয়াল আর্মি উত্তর চিন দখল করল। আর না-এগোবার যুক্তি, চিয়াং কাই-শেকের জাতীয়তাবাদী দলটি অনেক বেশি শক্তিশালী হয়ে উঠেছে।

সংখ্যার দিক দিয়ে জাপানিজ আর্মি সত্যি চিন সেনাবাহিনীর তুলনায় কিছুই নয়। কিন্তু জাপানিদের রয়েছে আধুনিক অস্ত্র, উন্নত ট্রেইনিং ও নিয়ম-শৃঙ্খলা। সেরা সৈনিকদের নামিয়েছে তারা মাঠে। চিয়াং কাই-শেক জাপানকে ঠেকাতে নিজের সাধ্যমত বাহিনী নামিয়েছে। দিনের বেলায় তারা জাপানি দানবদের ঠেকাতে চেষ্টা করে, রাতের আঁধারে পিছিয়ে আসে। কিছুদিন হলো এ-ই চলছে।

এগিয়ে আসা জাপানি আর্টিলারির আওয়াজ কান পেতে শুনলেন পোলার্ড। গোলাবর্ষণ বলছে, পিকিং শহর শেষ। চায়নিজরা এবার আরও দ্রুত পিছাতে থাকবে। এরপর পতন হবে রাজধানী নানকিনের। চিয়াং কাই-শেকের সেনাবাহিনী আরও পশ্চিমে পিছাতে বাধ্য হবে।

হার্ভে পোলার্ডের মনে হলো, তিনি নিজেও হেরে গেছেন। একবার বেসুদাইরের দিকে তাকালেন, তারপর হাতঘড়ি দেখে নিয়ে বললেন, ‘আজ দুপুরে কুলিদের খোঁড়াখুঁড়ি বন্ধ করতে বলবে। আজই আর্টিফ্যাক্টগুলোর ডকুমেন্টেশন শেষ করব। তারপর বিকালে ওই ক্যারাতানগুলোর সঙ্গে রওনা হবো।’

রাস্তাটার দিকে চাইলেন তিনি। ওখানে চায়নিজ জাতীয়তাবাদী সৈনিকদের ভিড়। দলে দলে পিছিয়ে আসছে তারা, চলেছে পশ্চিম দিকে।

‘আগামীকাল বিমান ধরে নানকিনে যাবেন?’ জিজ্ঞেস করল বেসুদাইর।

‘প্লেন যদি আসে। তবে নানকিনে নয়। ওখানে বিপদ হতে পারে। জরুরি আর্টিফ্যাক্টগুলো উত্তরদিকে, উলানবাটোরে নেব। এদিকে অন্য আর্টিফ্যাক্ট ও রসদ-পত্র গুছিয়ে নেবে তুমি, প্যাক-ট্রেইনের সঙ্গে এগোবে। দুঃখিত, তোমার আসতে কয়েক সপ্তাহ লাগবে। উলানবাটোরে তোমার জন্য অপেক্ষা করব। ওখান থেকে ট্রান্স-সাইবেরিয়ান রেলওয়ে ধরে সোজা পশ্চিমে, তারপর ব্রিটেন।’

‘আপনি ভাল সিদ্ধান্ত নিয়েছেন, স্যর। চায়নিজরা আক্রমণ ঠেকাতে পারবে না।’

মাথা দোলালেন আর্কিওলজিস্ট। ‘জাপানিজ আর্মির কাছে ইনার মঙ্গোলিয়ার কোনও স্ট্র্যাটেজিক গুরুত্ব নেই। ধরে নেয়া যায় জায়গাটা দখল করবে না ওরা। পিকিংয়ের সৈনিকদের তাড়া করবে।’ দূরের দিগন্ত আবারও দেখলেন, জাপানিজ

সেনাবাহিনীর আর্টিলারি ওদিকে রয়েছে। ‘ওরা দু’চারদিন বিশ্রাম নেবে, তারপর আবারও বেরিয়ে পড়বে পিকিং থেকে। ততদিনে আমরা সরে পড়েছি।’

বেসুদাইর চারপাশের ট্রেঞ্চগুলো দেখল। দেখলে মনে হয় ওখানে যুদ্ধ হয়েছে। ‘এরকম একটা সময়ে কাজ বন্ধ করতে হচ্ছে বলে খারাপ লাগছে। আমরা তো প্রায় প্যাভিলিয়ান অভ গ্রেট হারমোনির কাছে পৌঁছে গেছি।’

‘সত্যিই লজ্জাজনক,’ মাথা দোলালেন পোলার্ড। কণ্ঠে রাগ প্রকাশ পেল, ‘তবে আমরা প্রমাণ পেয়েছি এখানে লুটপাট করা হয়েছে।’

সামনে পড়ে থাকা কিছু মার্বেলের উপর লাথি দিয়ে রাগ বাড়লেন আর্কিওলজিস্ট। ওগুলোর উপর নতুন করে ধুলো নেমে এল। বিশ্বাস করা যায় না এক সময়ে এ জায়গা ছিল দেখবার মত সুন্দর। চারপাশে ছিল রাজকীয় ভবন। দীর্ঘশ্বাস ফেললেন পোলার্ড। তাঁর কলিগরা যখন চিনের হাজার হাজার বছরের পুরনো সমাধি ও বোজ্জ আর্টিফ্যাক্ট খুঁজছেন, তিনি নজর দিয়েছেন ঐতিহাসিক ওয়াইউয়ান ডাইন্যাস্টির দিকে। গত তিনবছর ধরে শাং-তু এলাকায় আর্টিফ্যাক্ট খুঁজছেন তিনি। ইতিহাস বলে, এই এলাকায় সম্রাটের গ্রীষ্মকালীন প্রাসাদ ছিল। বারো শ’ ষাট সালে ওটা তৈরি হয়। পাহাড়ি এলাকাটার উপর চোখ চলে গেল তাঁর। এখানে-ওখানে মাটি খুঁড়ে রেখেছেন। স্তূপ হয়ে আছে সব। বিশ্বাস করা কঠিন, প্রায় সাত শ’ বছর আগে এখানে ছিল পশ্চিমে ভূমধ্যসাগর থেকে পূবে কোরিয়া পর্যন্ত বিস্তৃত বিশাল সাম্রাজ্যের অধিপতি সম্রাট কুবলাই খানের প্রাসাদ। চারপাশে ছিল অপূর্ব সুন্দর রাজকীয় বাগান।

চায়নিজ হিস্টোরিকাল রেকর্ডে তথ্য খুব কমই পাওয়া গেছে। মার্কো পোলো তেরো শ’ শতাব্দীতে তাঁর দ্য ট্র্যাভেলস বইয়ে যা লিখেছেন, তা থেকে সিল্ক রোডের কথা জানা যায়।
আগুন নিয়ে খেলা-১

ওখানে তিনি শাং-তুর অসাধারণ বর্ণনা দিয়েছেন। চওড়া এক উপত্যকার মাঝখানে বড় এক টিবির উপর তৈরি হয় প্রাচীর দিয়ে ঘেরা ওই শহর। বিভিন্ন এলাকা থেকে নিয়ে আসা হয় গাছ, তৈরি করা হয় এক অনন্য অরণ্য। মাঝখান দিয়ে ছিল ল্যাপিস লাজুলি পাথরের ফুটপাথ। নীল পাথরগুলোর কারণে মনে হতো শহরটা যেন স্বর্গ। চারপাশে ছিল দেখবার মত বাগিচা। এখানে-ওখানে ছিল পরিকল্পিত ফোয়ারা। সরকারী ভবনগুলোর মাঝখানে ছিল তা-আন কো বা প্যাভিলিয়ন অভ গ্রেট হারমোনি। ছিল সম্রাজ্ঞীর প্রাসাদ—সবুজ মার্বেল, মূল্যবান পাথর ও সোনা দিয়ে তৈরি! ভিতরে ছিল দেখবার মত টাইলস্। চিনের সেরা চিত্রকরদের স্বাসরুদ্ধকর চিত্রশিল্প দিয়ে সাজানো ছিল প্রাসাদের অভ্যন্তর। প্রথম দিকে ওই প্রাসাদ সম্রাটের গ্রীষ্মকালীন ভবন ছিল, পিকিং শহর থেকে পালিয়ে আসতেন তিনি। কিন্তু কিছু দিনের মধ্যেই শাং-তু হয়ে উঠল সেরা বিজ্ঞানী ও সাংস্কৃতিক ব্যক্তিত্বদের রাজধানী। এখানে স্থাপন করা হলো মেডিকেল সেন্টার ও অ্যাস্ট্রোনমিকাল অভজারভেটরি। এই শহর হয়ে উঠল দেশি ও বিদেশি তাপসদের স্বর্গভূমি। টিলা থেকে ভেসে আসা শীতল হাওয়া সর্বক্ষণ সম্রাট ও তাঁর অতিথিদের প্রাণ জুড়িয়ে দিত।

সম্রাটের প্রাসাদের কাহিনি আরও বেশি ছড়িয়ে পড়ল চারপাশের অরণ্যটির কারণে। ওখানে সম্রাট ও তাঁর অতিথিদের জন্য সংরক্ষণ করা হতো হরিণ, গুয়ার ও অন্যান্য প্রাণী—তাঁরা আয়েশ করে শিকার করতেন। এই এলাকা হয়ে উঠল পার্কের মত, চারপাশে বর্না, হাজারো গাছ, মোলায়েম ঘাসের গালিচা... কী ছিল না ওখানে! শিকারিদের পায়ে যেন পানি না লাগে, সেজন্য ওই অরণ্য ঘিরে তৈরি করা হয় উঁচু পথ। যেসব ট্যাপেস্ট্রি পাওয়া গেছে, সেগুলোতে দেখা যায় সম্রাট তাঁর প্রিয় ঘোড়ার পিঠে চড়ে শিকার করছেন, সঙ্গে রয়েছে পোষা চিতা।

যোলো বর্গমাইল নিয়ে তৈরি এক অদ্ভুত সুন্দর স্থাপত্য। কিন্তু বছরের পর বছর অবহেলা ও লুটপাট ওটাকে নিঃশ্ব করেছে। এখন রয়েছে শুধু অসংখ্য ভাঙা পাথর! এখন আর কেউ জানে না শত শত বছর আগে শহরটা কেমন ছিল, কেমন ছিল সেই অরণ্য, স্ফটিকের ফোয়ারা, বার্না বা বাগান! এখন দীর্ঘ ঘাস ছাড়া চারপাশে আর কোনও গাছপালা নেই। আছে শুধু চওড়া উপত্যকা, বাদামি রুক্ষ টিলা। উদ্ভাস্ত মানুষ আর পলাতক সৈনিক ছাড়া যедিকে চোখ যায়, কোনও প্রাণী নেই। ওই হারিয়ে যাওয়া শাং-তুর অতীত কাহিনি শুধু ঘাসের কাছে ফিসফিস করে বলে বেদনাতুর হাওয়া। স্বাপ্নিক কবি স্যামুয়েল টেইলর কোলরিজ ভালবেসে শাং-তুর নাম দিয়েছিলেন—যানাডু।

চায়নিজ জাতীয়তাবাদী সরকার আর্কিওলজিস্ট হার্ভে পোলার্ডকে এই উপত্যকা খুঁজে দেখবার অনুমতি দেয়। তারপর তিনটি বছর পেরিয়ে গেছে। প্যালেস অভ গ্রেট হারমোনি এক এক ট্রাওয়েল করে আবিষ্কার করেছেন পোলার্ড, ইঞ্চি ইঞ্চি করে নতুন করে গড়েছেন সব। গ্র্যাণ্ড হল, কিচেন, ডাইনিংরুম... তিনি যেসব ব্রোঞ্জ ও পোর্সেলিন আর্টিফ্যাক্ট পেয়েছেন, সেগুলো দেখে আন্দাজ করা যায় অতীতে এ প্রাসাদে সবার জীবন কেমন কাটত। কিন্তু পোলার্ডের কপাল খারাপ যে অনেক খুঁজেও কোনও টেরাকোটা আর্মি বা মিং ভাস পাওয়া যায়নি। বলতে গেলে দেখবার মত কোনও আর্টিফ্যাক্টই পাননি তিনি। এদিকের কাজও প্রায় শেষ, বাকি শুধু রয়্যাল বেডরুম খুঁজে বের করা। তাঁর কলিগরা এরইমধ্যে গৃহযুদ্ধ বা জাপানি আগ্রাসন থেকে পালানোর জন্য পূর্বচিন ত্যাগ করেছে। পোলার্ড এতে বিকৃত আনন্দ পেয়েছেন, ভেবেছেন ব্যাটারা উত্তর-পশ্চিম চিন বা মাঞ্চুরিয়া ছেড়ে দূরে গিয়ে মরুক! ভেবেছিলেন আর কয়েকটা দিন, তারপর দেখবার মত সব আর্টিফ্যাক্ট পাবেন। সেসব হবে আগুন নিয়ে খেলা-১

এমন কিছু, যে চারদিকে হইচই পড়ে যাবে—কিন্তু যুদ্ধের জন্য কিছুই হলো না!

পোলার্ড জানেন, তিনি সানাডু থেকে যেসব আর্টিফ্যাক্ট পেয়েছেন তাতেই ব্রিটিশ মিউজিয়াম যার-পর-নাই সন্তুষ্ট হবে। জাপানি আর্মি এ দেশটা আক্রমণ করায় তিনি খুশিই হয়েছেন, ভেবেছেন গোলমеле পরিস্থিতির সুযোগে আর্টিফ্যাক্টগুলো সরিয়ে নেবেন। স্থানীয় পুলিশ এ এলাকা ছেড়ে আগেই পালিয়েছে। এক সপ্তাহ হলো সরকারী প্রত্নতত্ত্ব অধিদপ্তর থেকে কেউ আসেনি। পোলার্ড চিন্তা করে দেখেছেন, এবার এ দেশ থেকে আর্টিফ্যাক্টগুলো সরিয়ে নেয়া সহজ হবে। অবশ্য তিনি নিজে এ দেশ থেকে বেরিয়ে যেতে পারলে তবেই।

‘অনেকদিন হলো তোমাকে তোমার পরিবারের কাছ থেকে সরিয়ে রেখেছি, বেসুদাইর,’ বললেন পোলার্ড। ‘আমার মনে হয় না রাশানরা মঙ্গোলিয়ায় জাপানিদের পা রাখতে দেবে, কাজেই তুমিও ওখানে ভাল থাকবে।’

‘আমি দেশে ফিরলে আমার বউ খুব খুশি হবে,’ বেসুদাইর চওড়া হাসি দিতেই চোখা-চোখা হলদেটে দাঁতগুলো বেরিয়ে এল।

হালকা একটা গোঙানির আওয়াজ দূর থেকে ভেসে এল। আলাপ থামিয়ে আকাশের দিকে চাইল দু’জন। দক্ষিণ আকাশে ছোট্ট এক ধূসর আকৃতি, পূর্বের দিকে চলেছে।

‘জাপানিজ রিকনিস্যান্স প্লেন,’ বললেন পোলার্ড। ‘জাপানিরা যদি আকাশ দখল করে, জাতীয়তাবাদী চায়নিজদের জন্য সেটা খারাপ খবর।’ পকেট থেকে রেড লায়ন সিগারেটের প্যাকেট বের করলেন তিনি, একটা জ্বলে বেসুদাইয়েরের দিকে চাইলেন।

নার্ভাস ভঙ্গিতে বিমানটার দিকে চেয়ে আছে মঙ্গোলিয়ান। ‘আমাদের বোধহয় তাড়াতাড়ি রওনা হওয়া উচিত,’ বলল সে।

দু'জনের পিছনে হঠাৎ হই-চইয়ের আওয়াজ শুরু হলো। কোনও ট্রেন থেকে আসছে। ওদিকের একটা গর্ত থেকে মাথা উঁচু করল এক চায়নিজ মজুর, দ্রুত গতিতে কী যেন বলে চলেছে।

ঠোট থেকে সিগারেট নামিয়ে জানতে চাইলেন পোলার্ড, 'কী হয়েছে?'

'বলছে বার্নিশ করা একটা কাঠের বাক্স পেয়েছে,' ট্রেনের দিকে পা বাড়াল বেসুদাইর।

দ্রুতপায়ে ট্রেনের পাশে চলে গেল দু'জন। চায়নিজ মজুর উত্তেজিত কণ্ঠে কথা বলে চলেছে, হাতের ট্রাওয়েলটা মাটির দিকে তাক করা। অন্যান্য মজুর প্রায় ঘিরে ফেলেছে তাকে। মাঝখানের ধুলোর মধ্যে চৌকো কী যেন দেখা গেল। জিনিসটা হলদেটে, ছোট একটা ট্রের সমান।

'বেসুদাইর, তুমি ওটা তোলা,' নির্দেশ দিলেন পোলার্ড। হাতের ইশারায় মজুরদের সরে যেতে বললেন।

ট্রেনে লাফিয়ে নামল মঙ্গোলিয়ান, সাবধানে ট্রাওয়েল ও ব্রাশ দিয়ে বাক্সের চারপাশে ধুলো সরাতে লাগল। নোটবুক ও পেন্সিল নিয়ে তৈরি পোলার্ড। একটা পাতায় এদিকের ট্রেনগুলোর স্কেচ আছে, ওটা বের করলেন তিনি। এই জিনিস কোথায় পাওয়া গেল সেটা টুকে নিলেন। এরপর নতুন একটা পাতা খুলে আর্টিফ্যাক্টের স্কেচ আঁকতে লাগলেন। বেসুদাইর ধীরে ধীরে বালির ভিতর থেকে বাক্সটা তুলছে।

ধুলোবালি সরে যেতেই পোলার্ড দেখলেন, জিনিসটা সত্যিই বার্নিশ দেয়া কাঠের বাক্স। গায়ে বিচিত্র রঙে ছবি আঁকা। পুরো বাক্সে মাদার অভ পার্লের অদ্ভুত সূক্ষ্ম কারুকার্য, খোদাই করা হয়েছে বিভিন্ন প্রাণী ও গাছের প্রতিকৃতি। ঢাকনিটা কৌতূহল নিয়ে দেখলেন পোলার্ড। ওখানে একটা হাতি আঁকা হয়েছে। বেসুদাইর খুব সতর্কতার সঙ্গে ট্রাওয়েল দিয়ে বাক্সের তলা ঝাড়ু

দিল। মাটি থেকে জিনিসটা পুরোপুরি আলাগা হলে আশ্তে করে তুলে নিল, সাবধানে ট্রেঞ্জের বাইরের দেয়ালের উপর নামিয়ে রাখল।

চায়নিজ মজুররা তাদের খোঁড়ার কাজ খামিয়ে দিয়েছে, সবাই অদ্ভুত বাক্সের চারপাশে এসে ভিড় করল। আজ পর্যন্ত শুধু ভাঙা পোর্সেলিন বা জেড-এর কারুকার্য খচিত ডিজাইন পাওয়া গেছে। সন্দেহ নেই গত তিনবছর কাজ করার পর এখন যেটা পাওয়া গেল, সেটাই সব কিছুর মধ্যে সেরা।

বাক্সটা খুব মনোযোগ দিয়ে দেখলেন পোলার্ড, হাতে তুলে নিলেন। ভিতরে ভারী কিছু আছে। বাক্স একটু উঁচু-নিচু করে দেখলেন, ভিতরের জিনিসটা নড়ছে। বাক্সের দু'অংশ সম্ভবত আলাদা করা যায়। হাত বুলিয়ে দেখলেন, তারপর দুই বুড়ো আঙুল দিয়ে ঢাকনি তুলতে চাইলেন। প্রায় আট শতক আগের বাক্স প্রথমে আপত্তি তুলল, তারপর ধীরে খুলতে লাগল। কিন্তু যদি ভেঙে যায়? জোরাজুরি করতে গেলেন না পোলার্ড, আশ্তে করে ওটা নামিয়ে রাখলেন। খুব সাবধানে দু'হাতে ঢাকনি তুলতে চাইলেন। কয়েক মুহূর্ত ঘসা খাওয়ার আওয়াজ হলো, তারপর খুলে গেল ঢাকনি। বেসুদাইর ও মজুররা চারপাশে এসে দাঁড়িয়েছে, যেন বিশ্বকাপ ফুটবলের ফাইনাল দেখছে—বাক্সের উপর থেকে চোখ সরাল না কেউ।

ভিতরে দুটো জিনিস, সবাইকে দেখানোর জন্য ওগুলো তুলে ধরলেন পোলার্ড। একটা সম্ভবত চিতাবাঘ বা চিতার চামড়া দিয়ে তৈরি। গোল করে মুড়িয়ে চামড়ার ফিতা দিয়ে বাঁধা। দ্বিতীয় জিনিসটা ব্রোঞ্জের একটা টিউব। এক দিক বন্ধ, আরেক মুখে ক্যাপ লাগানো। খোলা যায়। জিনিস দুটো দেখে হেসে ফেলল চায়নিজ মজুররা, জানে না ওগুলোর কোনও গুরুত্ব আছে কি না। তবে আন্দাজ করল, নিশ্চয়ই কোনও কাজে লাগবে।

চিতার চামড়াটা নামিয়ে রাখলেন পোলার্ড, ব্রোঞ্জের ভারী

টিউব ভাল ভাবে দেখলেন। জিনিসটা বয়সের কারণে গাঢ় সবুজ রং ধরেছে। তা-ও বোঝা যায়, টিউবের উপর ড্রাগন আঁকা ছিল। ড্রাগনের লেজ পেঁচিয়ে ধরেছে টিউবের এক দিক, পুরো দেহটা টিউবকে মুড়িয়ে এগিয়েছে, তারপর মাথাটা খেমেছে ঢাকনির উপর।

‘ওটা খুলুন, স্যার, দেখি কী আছে,’ অধৈর্য স্বরে বলল বেসুদাইর।

ক্যাপটা সহজেই খুলতে পারলেন পোলার্ড, টিউব চোখের সামনে নিয়ে গেলেন। ভিতরে কী যেন! টিউবের খোলা অংশ মাটির দিকে তাক করলেন, বামহাত নীচে পাতলেন। কয়েকবার ঝাঁকি দিতেই ভিতরের জিনিসটা সর-সর করে বেরিয়ে এল।

জিনিসটা ডাই করা সিল্ক, ভাঁজ করা। রং ফ্যাকাসে নীল। বেসুদাইর একটা পরিষ্কার কন্ডল এনে পোলার্ডের পায়ে কাছ পেতে দিল। ধুলো থিতু হওয়ার পর কন্ডলের উপর হাঁটু গেড়ে বসলেন পোলার্ড, সাবধানে মোড়ানো সিল্কের ভাঁজ খুলতে শুরু করলেন। প্রস্থে ছোট হলেও দৈর্ঘ্যে জিনিসটা পাঁচ ফুট। বেসুদাইর জানে পোলার্ডের হাত কখনও কাঁপে না, কিন্তু এখন সে খেয়াল করল, কাপড়টা নিভাঁজ করতে গিয়ে তাঁর হাত থরথর করে কাঁপছে।

সিল্কের উপর প্রাকৃতিক দৃশ্য। দক্ষতার সঙ্গে আঁকা হয়েছে অদ্ভুত এক পর্বত। রয়েছে গভীর উপত্যকা, খাদ ও ঝর্না। পরিষ্কার বোঝা যায়, সিল্কে সাধারণ কোনও প্রাকৃতিক ছবি আঁকা হয়নি। সিল্কের বাম সীমানা বরাবর উইঘুর স্ক্রিপ্ট দেখতে পেলেন পোলার্ড। সুদূর অতীতে মঙ্গোলিয়ানরা এই অক্ষরগুলো তুর্কিদের কাছ থেকে শেখে। সিল্কের ডান সীমানায় বেশ কিছু খুদে ছবি। সেগুলোর একটায় দেখা গেল কোনও হারেমে নারীরা আরাম-আয়েস করছে। এসব ছবিতে এ ছাড়াও রয়েছে ঘোড়া, উট ও অন্যান্য প্রাণীর পাল। একদল সশস্ত্র সৈন্য কিছু কাঠের সিন্দুক আগুন নিয়ে খেলা-১

পাহারা দিচ্ছে। সিল্কে আঁকা প্রাকৃতিক দৃশ্যে আর কোনও জন্তু-জানোয়ার নেই, কিন্তু ঠিক মাঝখানে একটা আকৃতি—ছোট এক পর্বতের চূড়ায় দাঁড়িয়েছে এক ব্যাকট্রিয়ান উট। ওটার পিঠে স্যাডল পরিয়ে রাখা। ছবির উট কোনও কারণে কাঁদছে। চোখ থেকে অশ্রুভাবিক বড় অশ্রু ঝরছে। নীচে মাত্র দুটো শব্দ লেখা।

সিল্কের ছবি ভালমত বুঝতে গিয়ে যেমে উঠলেন পোলার্ড, টের পেলেন তাঁর বুক ধড়ফড় করছে। কয়েকবার বড় করে শ্বাস নিলেন। মনে মনে বললেন, এ হতেই পারে না!

‘বেসুদাইর... বেসুদাইর,’ প্রায় বিড়বিড় করে বললেন। জিজ্ঞেস করতে ভয় পেলেন, কিন্তু কণ্ঠ শান্ত রেখে বললেন, ‘অক্ষরগুলো উইঘুর স্ক্রিপ্ট। তুমি পড়তে পারো?’

ওই উটের কী অর্থ জানে মঙ্গোলিয়ান সহকারী, চোখ বিস্ফারিত হলো তার। পড়তে গিয়ে তোতলাচ্ছে।

‘বামদিকের অক্ষরগুলো ছবির পাহাড়ী এলাকা বর্ণনা করছে। “পর্বত খেনতির উপর বারখান খালদুন চূড়ার উপর ঘুমিয়ে আছেন আমাদের সম্রাট। ভ্যালি অভ দ্য ড্রুম্‌ড্‌-এর ভিতর দিয়ে বয়ে চলেছে অনোন নদী, প্রতিনিয়ত ওটা সম্রাটের তৃষ্ণা মেটায়।”’

ফিসফিস করে বললেন পোলার্ড, ‘আর উটের ব্যাপারে কী লিখেছে?’ সিল্কের মাঝখানের ছবিটা কাঁপা আঙুলে দেখালেন।

ভয় পেল বেসুদাইর, পরম ভক্তির সঙ্গে বিড়বিড় করে উচ্চারণ করল, ‘তেমুজিন খাগান!’ চারপাশটা দেখে নিল সে।

‘তেমুজিন,’ ঘোরের মধ্যে কথাটা উচ্চারণ করলেন পোলার্ড। চায়নিজ মজুররা তাঁর কথা শুনল কিন্তু কিছুই বুঝল না। কিন্তু পোলার্ড বুঝলেন, বেসুদাইরও পরিষ্কার বুঝল, তারা যা পেয়েছে সেটার কোনও তুলনা পৃথিবীতে নেই। এই ছবি কী দিতে পারে টের পেয়ে থরথর করে কেঁপে উঠলেন পোলার্ড। নিজেকে জিজ্ঞেস করলেন, এর অর্থ কী? এখানে যা বলা হয়েছে সেটা

সত্যি হলে স্রেফ পাগলই হয়ে যাবেন তিনি। ক্রন্দনরত উট, দু'দিকের লেখা, চারপাশের প্রাকৃতিক দৃশ্য... আরও আছে, উটের উপর ওই লেখা: তেমুজিন। এই নাম এক উপজাতীয় বালকের, যে পরে হয়ে উঠেছিল দুনিয়ার সবচেয়ে দুর্ধর্ষ, পরাক্রমশালী ব্যক্তি; একের পর এক দেশ দখল করে গড়ে তুলেছিল বিশাল এক সাম্রাজ্য! ইতিহাসের পাতায় স্বর্ণাক্ষরে লেখা রয়েছে তার নাম—সম্রাট চেঙ্গিস খান!

তাদের সামনে পড়ে থাকা এই সিল্কের ছবি নীরবে চেঙ্গিস খানের বিপুল ধনরত্নের হদিশ দিচ্ছে! মাথা ঘুরে পড়তে পড়তে সামলে নিলেন পোলাড। সারাটা জীবন আর্কিওলজিস্টরা যেসব সমাধি খুঁজে পাওয়ার স্বপ্ন দেখেন, সেগুলোর মধ্যে চেঙ্গিস খানেরটা সেরা। এই মানুষটার অদ্ভুত কাহিনি যেন কল্পনাকেও হার মানায়। চেঙ্গিস খান মঙ্গোল উপজাতিগুলোকে একত্রিত করেন, এবং যুদ্ধ করে একের পর এক রাজ্য দখল করতে থাকেন। তিনি তাঁর ভবঘুরে সৈনিকদের নিয়ে বারো শ' ছয় থেকে শুরু করে বারো শ' তেইশ সাল পর্যন্ত বিশাল ভূ-খণ্ড জয় করে নেন। পশ্চিমে মিশর থেকে শুরু করে উত্তরদিকে লিথুনিয়া পর্যন্ত তাঁর রাজত্ব ছিল! চেঙ্গিস খান ক্ষমতার চূড়ায় আরোহণ করে বারো শ' সাতাশ সালে মৃত্যুবরণ করেন। অনেকে ধারণা করেন, তাঁকে জন্মস্থানে মঙ্গোলিয়ার খেনতি পর্বতে সমাহিত করা হয়। মঙ্গোলদের নিয়ম অনুযায়ী তাঁর সঙ্গে দেয়া হয় চল্লিশজন নারী ও বিপুল সম্পদ। এই বিশাল সৌধ লুকিয়ে ফেলার পর সাধারণ সৈনিকদের হত্যা করা হয়। সেনাপতিরা শপথ নেয়, তাদের কেউ মুখ খুললে তাকেও হত্যা করা হবে।

এসব সেনাপতি পরেও তাদের মুখ বন্ধ রাখে। কখনও জানা যায়নি সমাধিস্থলটা কোথায় ছিল। কিন্তু বলা হয়, এক দশক পর ওই গোপন সৌধের রহস্য ফাঁস করে দেয় এক ব্যাকট্রিয়ান উট। সম্রাট চেঙ্গিস খানের সমাধিস্থলে ঢুকে পড়ে ওটা। চোখ থেকে আগুন নিয়ে খেলা-১

তার অশ্রু ঝরছিল। বুঝতে পেরেছিল, তার এক সন্তানকে ওই মাটিতে কবর দেয়া হয়েছে। খুঁজতে খুঁজতে ওটার মালিক সৌধে ঢোকে, তখনই বুঝতে পারে সম্রাটকে কোথায় কবর দেয়া হয়েছে। কাহিনিটা আর এগোয়নি, ধারণা করা হয় ওই রাখাল সৌধের তথ্য চেপে যায়। কেউ চেঙ্গিস খানের কবর লুট করেনি।

ওই কাহিনি বোধহয় সত্যি, ভাবলেন পোলার্ড। চোখের সামনে সিক্কটা দেখছেন তিনি।

‘এই সমাধি দুনিয়ার সেরা,’ ফিসফিস করে বলল বেসুদাইর। ‘এই সিক্ক আমাদেরকে মহান খানের সমাধিতে নিয়ে যাবে।’ শিউরে উঠল সে, ভয় করছে তার। এই তথ্য চেপে রাখতে পারবে তো সে?

‘তা-ই আসলে,’ চিন্তা করতে গিয়ে হাঁফিয়ে উঠলেন পোলার্ড। তিনি যদি সত্যিই চেঙ্গিস খানের কবর খুঁজে পান, তাঁকে নিয়ে মহা হই-চই পড়ে যাবে। তাঁকে একবাক্যে জগতের সেরা আর্কিওলজিস্ট হিসাবে মেনে নেয়া হবে!

হঠাৎ ভয় পেলেন পোলার্ড, সিক্কটা খুলে রেখে ভুল করছেন তিনি। হয়তো চায়নিজ মজুরদের কেউ আত্মীয়-স্বজনদেরকে এটার কথা বলবে। তার পরিবারে ডাকাত থাকতে পারে। সিক্কটা তাড়াতাড়ি গুটিয়ে নিলেন তিনি, টিউবের মধ্যে রেখে বাক্সে তুলে রাখলেন। চিতার চামড়া ওটার পাশে স্থান পেল। কাপড় দিয়ে বাক্সটা মুড়িয়ে নিয়ে চামড়ার বড় খলির মধ্যে রাখলেন। দিনের অবশিষ্ট সময় ওটা বাম বগলে নিয়ে ঘুরলেন।

বাক্স যেখানে পাওয়া গেছে, ট্রাওয়েল দিয়ে সেখানে আরও খোঁজা হলো, কিন্তু আর কোনও আর্টিফ্যাক্ট পাওয়া গেল না। শেষে বাধ্য হয়ে পোলার্ড দিনের কাজ বন্ধ করতে বললেন। মজুররা নীরবে তাদের শাবল, কোদাল ও ব্রাশ কাঠের কাটে রেখে মজুরির জন্য লাইন দিয়ে দাঁড়াল। পারিশ্রমিক হিসাবে

তাদের এক পেনি করে দেয়া হলো। যে প্রচণ্ড পরিশ্রম করতে হয় তাতে অনেকে অসুস্থ হয়ে পড়ে, কিন্তু এই কাজ না পেলে তাদের সপরিবারে না খেয়ে মরতে হবে। চিনের তখন দুঃসময়, সাধারণ মানুষ যেন খুঁকছে!

তিনটে কার্টে সরঞ্জাম ও আর্টিফ্যাক্ট তোলা শেষ হতেই মজুরদের বিদায় দেয়া হলো। সন্ধ্যা নামলে বেসুদাইরের সঙ্গে ডিনার সেরে নিলেন পোলার্ড, খাওয়ার পর জিনিসপত্র গুছিয়ে নেবেন বলে নিজের তাঁবুতে ঢুকে পড়লেন। কাজ শেষে ডায়েরি লিখতে বসে মন খুঁতখুঁত করতে লাগল। সারাদিন যেসব কাজ করেছেন, তা লিখে রাখেন রোজ। আজ লিখলেন কাজ শেষ করবার ঠিক আগে মহামূল্যবান এক আর্টিফ্যাক্ট পেয়েছেন। স্বর্ণনা দিতে গিয়ে আরও সচেতন হয়ে উঠলেন। মনে হলো, যে-কোনও সময়ে চারপাশ থেকে বিপদ আসতে পারে।

ডাকাত-লুটেরাদের দল শানসি প্রভিন্সের সাইটগুলোতে হামলা করেছে। তিন হাজার বছরের পুরানো ব্রোঞ্জের মূর্তির জন্য এক আর্কিওলজিস্টকে প্রচণ্ড মারধর করেছে, পিস্তলের বাঁট দিয়ে মেরে মাথা ফাটিয়ে দিয়েছে। এদিকে জাপানি সেনাবাহিনী দ্রুত এগিয়ে আসছে। তারা হয়তো কোনও ব্রিটিশ নাগরিকের ক্ষতি করবে না। কিন্তু যদি আর্টিফ্যাক্টগুলো কেড়ে নেয়, তখন কী হবে? এত খেটে-পিটে চেঙ্গিস খানের সমাধি আবিষ্কার করেও কোথাও স্বীকৃতি পাবেন না তিনি। লর্ড কার্নারভন আর তাঁর লোকজন রাজা টাটের সমাধি আবিষ্কার করার পর কী হয়েছিল? স্বীকৃতি মেলেনি। কয়েকজন আবিষ্কর্তা জুটে গেল। তাদের প্রত্যেকের দাবি, এই আবিষ্কার শুধু সে করেছে, আর কেউ না!

খলিটা চৌকির নীচে রেখে রাতের মত শুয়ে পড়লেন পোলার্ড। ভাঙা ভাঙা ঘুম হলো। বারবার ছেঁড়া-ছেঁড়া স্বপ্ন দেখলেন। প্রায় সারারাত শৌ-শৌ করে বইল হাওয়া। থামল আগুন নিয়ে খেলা-১

ভোর হওয়ার পর। তার কিছুক্ষণ পর পোলার্ডের ঘুম ভেঙে গেল, থলিটা চৌকির নীচে দেখে স্বস্তির শ্বাস ফেললেন। বাইরে উঁকি দিলেন। জাপানি সেনাবাহিনী এখনও এদিকে আসেনি। মনে মনে বললেন, যাক, বাঁচা গেল!

বেসুদাইরের ঘুম আগেই ভেঙেছে, আঙুন জেলেছে সে। চায়নিজ দুই যমজ কিশোর তাকে সাহায্য করছে। আঙুনের উপর ছাগলের মাংস ঝলসানো হচ্ছে, সঙ্গে কেতলিতে চা।

পোলার্ড তাঁরু থেকে বেরিয়ে এলেন।

‘গুড মর্নিং, স্যার,’ হেসে বলল বেসুদাইর। ‘গরমা-গরম চা, স্যার?’ আর্কিওলজিস্টের দিকে এক কাপ এগিয়ে দিল সে। ‘আমাদের সমস্ত যন্ত্রপাতি গোছানো শেষ, খচ্চরগুলো কাটের সঙ্গে জুতে দিয়েছি। আপনি চাইলে এখনি রওনা হতে পারি।’

‘গুড,’ কাঠের একটা বাক্সের উপর বসলেন পোলার্ড। চায়ে চুমুক দিয়ে সূর্যোদয় দেখতে দেখতে বললেন, ‘এবার তা হলে তাঁরু গুটিয়ে ফেলো। আমার চৌকির নীচে একটা থলি পাবে, ওটা সাবধানে রেখো।’

একঘণ্টা পর প্রথমবারের মত আর্টিলারির আওয়াজ ভেসে এল। ততক্ষণে শাং-তু সাইটের এক্সকেভেশন পার্টি তিন খচ্চর টানা ওয়্যাগন নিয়ে রওনা হয়ে গেছে। উপত্যকার উপর দিয়ে বয়ে যাওয়া হাওয়া শৌ-শৌ করছে। মাত্র একমাইল এগোতেই পড়ল শাংকুই গ্রাম। ওটাকে ছোট কোনও শহরও বলা যায়। এই দলের সঙ্গে যোগ দিল আরও কয়েকটা ওয়্যাগন। সবাই পশ্চিমে চলেছে।

দুপুরে এক্সকেভেশন দলটি দুওলৌং শহরে পৌঁছল। খাওয়ার জন্য রাস্তার পাশে থামল ওরা। মাছি পড়া স্বাদহীন মাংসের সুপ ও নুডল দিয়ে খাওয়া শেষ করেই আবার রওনা হলো। শহরের বাইরে এসে চওড়া এক মালভূমিতে পৌঁছল তারা। কিছুক্ষণের জন্য যাত্রা বিরতি।

ওয়াগনে বসে আকাশের ছেঁড়া মেঘগুলো দেখলেন অপেক্ষারত পোলার্ড। ঘণ্টাখানেক পর হালকা একটা গুঞ্জনের আওয়াজ শুনলেন। আকাশের দিকে চাইলেন তিনি, কিছুক্ষণ পর মেঘের পাশে রূপালি ঝিলিক দেখলেন। সোজা রানওয়ের দিকে আসছে বিমান। আরও কিছুক্ষণ পর আরও কাছে এল প্লেনটা। পকেট থেকে রুমাল বের করে একটা লাঠির মাথায় বেঁধে নিলেন পোলার্ড। লাঠিটা মাটিতে পুঁতে দেয়া হলো। ওই রুমাল পাইলটকে বলে দেবে, হাওয়া কোন্দিকে বইছে।

কিছুক্ষণ পর নামল বিমান, খানিকটা ছুটে গিয়ে থামল। পাইলট ইঞ্জিন বন্ধ করল না, বিমান নিয়ে ঘুরে এগিয়ে এল। উড়োজাহাজটা ফোকার এফ সেভেন বি ট্রাইমোটর, দেখে স্বস্তি পেলেন পোলার্ড। নিরাপদ বাহন হিসাবে এর সুনাম আছে। ফ্যুয়েল থাকলে পাড়ি দিতে পারে বহুদূরের পাল্লা।

ইঞ্জিনগুলো বন্ধ হওয়ার আধ মিনিট পর ফিউজেলাজের দরজা খোলা হলো, চামড়ার জ্যাকেট পরা দুই যুবক লাফিয়ে নামল নীচে।

‘পোলার্ড?’ জানতে চাইল লম্বা যুবক। উচ্চারণ আমেরিকান। চেহারা হাসি হাসি। ‘আমি রিচার্ড স্মিথ। আর এ আমার ছোট ভাই, বার্নি। আমরা আপনাকে নানকিনে নিয়ে যেতে এসেছি। চুক্তি অন্তত তা-ই বলছে...’ জ্যাকেটের পকেট থেকে মাথা বের করে আছে একটা কাগজ, ওটার উপর চাপড় দিল সে।

‘এই মড়ার দেশে দুই আমেরিকান...’ হালকা স্বরে বললেন পোলার্ড।

‘পেনসিলভেনিয়ায়’ জাহাজের ইয়ার্ডে কাজ করার চে এই কাজ অনেক ভাল,’ বার্নি স্মিথ চওড়া হাসি দিল। বড় ভাইয়ের মত সে-ও হাসি-খুশি মানুষ, রসিকতা করার সুযোগ পেলে ছাড়েনা।

‘আমরা চায়নিজ মিনিস্ট্রি অভ রেলরোডস-এর হয়ে কাজ করতাম,’ নাক কুঁচকে বলল রিচার্ড। ‘নিশ্চয়ই জানেন জাপান আর্মির হামলার কারণে এখন পিকিং-শাংহাই লাইন বসানো বন্ধ? কাজেই আমাদের চাকরি নেই।’

‘আমার গন্তব্য খানিকটা বদলে নিয়েছি আমি,’ বললেন পোলার্ড। আপত্তি উঠতে পারে বুঝে দ্রুত বলে গেলেন, ‘আমি চাই আপনারা আমাকে উলানবাটোরে পৌঁছে দেবেন।’

‘মঙ্গোলিয়া?’ খসখস করে দাড়ি চুলকাল বার্নি। ‘আমরা যতক্ষণ প্রতিবেশী নিপ্লন আর্মির কাছ থেকে দূরে থাকছি, অসুবিধে নেই! ...তুমি কী বলো, রিচি?’

‘ঠিক,’ বলল রিচার্ড। ‘আগে দেখি রেঞ্জ কাভার করতে পারি কি না।’ হেসে ফেলল সে, প্লেনের দিকে রওনা হলো। ‘ওখানে পৌঁছলে গ্যাস-স্টেশন পাব?’

বার্নির সহায়তায় গুরুত্বপূর্ণ আর্টিফ্যাক্ট ও সরঞ্জাম বিমানে তুলতে লাগলেন পোলার্ড। আধঘণ্টা পর মালামালে ফোকারের ফিউজেলাজ প্রায় ভরে উঠল। নিজে সামনের সিটে বসলেন পোলার্ড, কাঠের বাক্স ভরা থলিটা সযত্নে পাশে রাখলেন।

‘উলানবাটোরে গেলে নানকিনের চেয়ে দেড় শ’ মাইল কম যেতে হবে,’ বলল বার্নি। ‘কিন্তু ওখান থেকে যাত্রী পাব না। খালি ফিরতে হবে। তাতে বাড়তি তেল খরচ হবে। ব্রিটিশ মিউজিয়ামের কর্তারা আমাদের সঙ্গে যে চুক্তি করেছে, তাতে পোষাতে পারব না।’ একটা ক্রেটের উপর মানচিত্র বিছিয়ে দেখছে সে। মঙ্গোলিয়ার রাজধানী উলানবাটোর মানচিত্রে অনেক উত্তরদিকে। ওখান থেকে চিন সীমান্ত চার শ’ মাইলেরও বেশি।

‘আপনাদের একটা লিখিত চুক্তিপত্র দেব আমি,’ বললেন পোলার্ড। একটা কাগজে লিখলেন, তিনিই যাত্রাপথ বদলে নিয়েছেন। লেখা শেষে বললেন, ‘এটা দেখলে ব্রিটিশ মিউজিয়াম কর্তৃপক্ষ সমস্ত টাকা পরিশোধ করবে।’

‘করবে তো বটেই,’ হেসে ফেলল বার্নি। ‘ওরা তো আর চাইবে না ওদের জিনিস টোকিও মিউজিয়ামে শোভা পাক।’ কাগজটা বুক-পকেটে রেখে দিল সে। ‘রিচি বোধহয় উলানবাটোরের রাস্তা ঠিক করে ফেলেছে, কপাল ভাল হলে মাঝপথে নামতে হবে না। আমরা তো যাব গোবি মরুভূমির ওপর দিয়ে। তেলের টান্ধিও ভরা। আপনি বললে আমরা রওনা দিতে পারি।’

বিমান থেকে নেমে পড়লেন পোলার্ড। খচ্চরগুলো এখনও দুটো কার্ট ভরা ইকুইপমেন্ট ও আর্টিফ্যাক্ট নিয়ে দাঁড়িয়ে। সামনের জন্তুটার রাশ ধরে দাঁড়িয়ে আছে বেসুদাইর, খচ্চরের কান চুলকে দিচ্ছে।

‘বেসুদাইর, এই সাইটে আমরা একসঙ্গে অনেক সমস্যার মোকাবিলা করেছি, আবার অনেক কিছু পেয়েওছি,’ বললেন পোলার্ড। ‘এই এক্সপিডিশন সফল করার জন্য তুমি অত্যন্ত গুরুত্বপূর্ণ ভূমিকা রেখেছ।’

‘মুদু হাসল বেসুদাইর। ‘এক্সপিডিশনে অংশ নিতে পেরে সম্মানিত বোধ করেছি আমি। আপনি আমার দেশ ও দেশের ইতিহাস তুলে ধরেছেন বলে ধন্যবাদ। আমার উত্তরপুরুষ আপনার কাছে কৃতজ্ঞ হয়ে রইল।’

‘আর যেসব ইকুইপমেন্ট ও আর্টিফ্যাক্ট রয়ে গেল, সেগুলো শিযিয়াযুআঙ্গে নিয়ে যেয়ো। ওখান থেকে রেলগাড়ি ধরে নানকিঙে পৌঁছবে। ব্রিটিশ মিউজিয়ামের এক কর্মকর্তা ওখানে সব বুঝে নেবে, লগুনে পাঠানোর ব্যবস্থা করবে। আমি তোমার জন্য উলানবাটোরে অপেক্ষা করব। আমরা যে শেষ আর্টিফ্যাক্টটা পেয়েছি, সেটার সূত্র ধরে এগোব দু’জন।’

‘আমাদের পরবর্তী অভিযান সফল হোক সেই কামনা করি। গভীর আগ্রহ নিয়ে অপেক্ষা করব আমি,’ বলল বেসুদাইর। আর্কিওলজিস্টের হাত ধরে ঝাঁকিয়ে দিল সে।

আগুন নিয়ে খেলা-১

‘ভাল থেকে, বন্ধু,’ বললেন পোলার্ড, ঘুরে দাঁড়িয়ে সোজা বিমানে গিয়ে উঠলেন। ফোকারের দুই শ’ বিশ হর্সপাওয়ারের রাইট ওয়ার্ল্ড-উইণ্ড রেডিয়াল ইঞ্জিন তার আগেই গর্জে উঠেছে।

বেসুদাইর কার্টের পাশে দাঁড়িয়ে দেখল রিচার্ড স্মিথ সরাসরি বাতাসের দিকে ঘুরিয়ে নিল বিমানটা। থ্রটলগুলো পুরোপুরি খুলে দেয়া হয়েছে। ইঞ্জিনগুলোর আওয়াজে কান ঝালাপালা হলো, মালভূমির উপর দিয়ে ছুটল বিমান—মনে হলো কয়েকবার লাফ দিল ওটা, তারপর খুব ধীরে ভেসে উঠল বাতাসে। মাঠের খানিকটা উপর দিয়ে এগোল, তারপর অলস ভঙ্গিতে বাঁক নিল—উত্তর-পশ্চিমে চলেছে। মঙ্গোলিয়ান সীমান্ত ওদিকে। বিমানটা ক্রমে আরও উপরে উঠল।

মালভূমিতে দাঁড়িয়ে ওটা দূর থেকে আরও দূরে চলে যেতে দেখল বেসুদাইর। ইঞ্জিনের আওয়াজ মিলিয়ে গেল। খানিক পর বিমানটো হারিয়ে গেল দিগন্তে। দীর্ঘশ্বাস ফেলে কোটের ভেস্ট পকেট হাতড়ে দেখল বেসুদাইর। যা চেয়েছে, তা পেয়েছে। সিক্কের কাপড়টা গতকাল রাতের প্রথম প্রহর থেকে তার পকেটে!

দুই ঘণ্টা একটানা উড়ে যাওয়ার পর থলির দিকে হাত বাড়ালেন পোলার্ড, ভিতর থেকে বের করলেন বাস্কেটা। দীর্ঘ যাত্রার ক্লান্তি তাঁকে পেয়ে বসেছে, সিক্কের কাপড়টা পাওয়ার উত্তেজনাও খুব কাহিল করেছে তাঁকে—মনে হলো আরেকবার সিক্কটা ছুঁয়ে দেখবেন। বাস্কের ওজনটা একবার হাত দিয়ে অনুভব করলেন। ব্রোঞ্জের টিউবটা ভিতরে নড়াচড়া করেছে। কিন্তু তারপরও একটু যেন অন্যরকম! তাঁর মন কেমন কু ডাকল। ওজন যেন ঠিক নেই! দেরি না করে ঢাকনি খুললেন। একপাশে চিতার চামড়াটা মুড়িয়ে রাখা। পাশেই টিউব। ঠিক যেমন ছিল আগেও। টিউব তুলে নিলেন তিনি, খেয়াল করলেন ওজনটা বেশি লাগছে।

পোলার্ডের হাত কাঁপতে লাগল, একটানে ক্যাপ খুললেন। টিউবের ভিতর থেকে শুধু বালু পড়তে লাগল! কোলে এসে পড়ছে! শেষ কণাও বেরিয়ে গেল। টিউবের ভিতরে চোখ রাখলেন, সিল্কের কাপড়টা উধাও!

চোখ দুটো বিস্ফারিত হয়ে উঠল তাঁর, কী ঘটেছে বুঝতে পেরেছেন। শ্বাস আটকে ফেললেন। ঠকানো হয়েছে! নির্মম ভাবে ঠকানো হয়েছে তাঁকে! রাগে রক্ত চড়ে গেল মাথায়। কথা বলবার ক্ষমতা ফিরতে চেষ্টা করে উঠলেন, 'পাইলট! পাইলট! প্লেন ঘুরিয়ে নিন! আমাদের এখনই ফিরতে হবে!'

দুই পাইলটের কেউ কোনও জবাব দিল না। ককপিটে তারা অত্যন্ত জরুরি কিছু নিয়ে ব্যস্ত!

পশ্চিমা-বিশ্ব মিটসুবিশি জিপ্রিএম বম্বারের নাম দিয়েছে, নেল—কিন্তু ওটা এখন কোনও বম্বিং মিশন নিয়ে বের হয়নি। নয় হাজার ফুট উপর দিয়ে এগিয়ে চলেছে। টুইন-ইঞ্জিন এয়ারক্রাফট রিকনিস্যান্সের কাজ করছে। জাপানি গুপ্তচর সংস্থা জানিয়েছে, রাশা ঢুকে পড়েছে মঙ্গোলিয়ার জমিতে।

জাপান আর্মি খুব সহজেই মাঞ্চুরিয়া ও উত্তর চীন দখল করে নিয়েছে, এখন সাইবেরিয়ার বন্দর ও উত্তরদিকের কয়লা খনিগুলোর দিকে চোখ দিয়েছে। প্রথম সুযোগে ওসব দখল করে নেবে জাপান।

রাশাও জানে জাপানের উদ্দেশ্য কী। তারা তাদের সেনাবাহিনী সাইবেরিয়াতে আরও সংহত করেছে। এরইমধ্যে মঙ্গোলিয়ার সঙ্গে প্রতিরক্ষা চুক্তিও হয়েছে। এর ফলে রাশা যে-কোনও সময়ে মঙ্গোলিয়ায় সেনাবাহিনী ও বিমানবহর পাঠাতে পারবে।

জাপান এখন গুরুত্বপূর্ণ তথ্য জোগাড় করছে। এদিকে সেনাবাহিনী সম্পূর্ণ তৈরি। বারবার সীমান্ত পেরিয়ে আগুন নিয়ে খেলা-১

শত্রুবাহিনীকে পরখ করা হচ্ছে। নিপ্পন বাহিনী যে-কোনও সময়ে উত্তর-পূব সাইবেরিয়ার দিকে অগ্রসর হবে।

মিটসুবিশি জিথ্রিএম বম্বার পূব মঙ্গোলিয়া ঘুরে দেখেছে, ওদিকে কোনও সেনাবাহিনী মোতায়েন করা হয়নি। ওদিকে রাশার কোনও এয়ারক্র্যাফট ছিল না। নতুন কোনও মিলিটারি ভবনও নির্মাণ করা হয়নি। জাপানি পাইলট সিদ্ধান্তে পৌঁছল, রাশানরা যদি মঙ্গোলিয়ায় ঢুকে থাকে, আরও উত্তর দিকে রয়েছে। এত উপর থেকে কিছু দেখা যায় না! নীচে নামলে কখনও কখনও ভবঘুরে উপজাতিগুলোর হৃদিশ পাওয়া যায়, উটের কাফেলা নিয়ে গোবি মরুভূমির বুক চিরে এগিয়ে চলেছে।

‘এদিকে বালি ছাড়া আর কিছু নেই,’ হাই তুলে বলল নেলের তরুণ কো-পাইলট, লেফটেন্যান্ট সুকুরুচি। ‘আমার মাথায় ঢোকে না উইং কমান্ডার কেন এই বিরান-প্রান্তর নিয়ে মাথা গরম করছেন।’

‘এই জায়গা না পেরুলে এর চেয়ে হাজার গুণ গুরুত্বপূর্ণ উত্তরদিকের এলাকা দখল করা যাবে না, সেটাই বোধহয় কারণ,’ বলল ক্যাপ্টেন নাকিনা হাসিমা। ‘আমি শুধু স্রষ্টার কাছে প্রার্থনা করছি, আমরা যখন উত্তরদিক আক্রমণ করব, তখন যেন সামনের দিকে থাকতে পারি। আমরা শাংহাই আর পিকিংয়ের পুরো মজাটা মিস করেছি।’

বহু নীচের মরুভূমির দিকে চেয়ে রয়েছে সুকুরুচি, হঠাৎ চোখের কোণে কীসের যেন ঝলকানি লাগল। দিগন্তের দিকে চাইল সে। সূর্যের আলোয় ধূসর পাতটা আবারও দেখা গেল।

‘স্যর, আমাদের সামনে একটা এয়ারক্র্যাফট, অনেকটা নীচে,’ বলল সে। গ্লাভস্ পরা হাতটা দিক নির্দেশ করল।

ক্যাপ্টেন হাসিমা দ্রুত সামনেটা দেখে নিল। নীচের ওই বিমান রূপালি কোনও ফোকার ট্রাইমোটর, উত্তর-পশ্চিমে উলানবাটোরের দিকে চলেছে।

‘ওটা তো ঠিক আমাদের নাকের কাছ দিয়ে যাবে,’ ক্যাপ্টেনের কণ্ঠে উত্তেজনা। ‘যাক, শেষপর্যন্ত লড়াই করার একটা সুযোগ মিলল!’

‘কিন্তু, স্যর, ওটা তো যুদ্ধ-বিমান না,’ বলল সুকুরুটি। ‘আমার মনে হয় ওটা কোনও চায়নিজ প্লেনও না।’ ফোকারের মার্কিংগুলো দেখছে সে। ‘আমাদেরকে শুধু চায়নিজ যুদ্ধ-বিমান আক্রমণ করতে বলা হয়েছে।’

‘যে কোনও বিমান আকাশে উড়লেই ঝুঁকি থাকে,’ জ্ঞান দিল হাসিমা। ‘তা ছাড়া, লেফটেন্যান্ট, ওটা আমাদের প্র্যাকটিসের জন্য চমৎকার একটা টার্গেট হতে পারে।’ ক্যাপ্টেন ভাল করেই জানে, চিনে আসবার পর জাপানি সেনাবাহিনী এখন পর্যন্ত কঠিন প্রতিরোধের মুখে পড়েনি। বম্বার পাইলট হিসাবে সে একটা চায়নিজ বিমান ভূপাতিত করবে, তা বোধহয় হওয়ার নয়। কিন্তু হঠাৎ সামনে যে সুযোগ মিলেছে, সেটা কিছুতেই ছাড়া যায় না।

‘গানার, তোমরা স্টেশনে থাকো,’ ক্যাপ্টেন ইন্টারকমে কড়া নির্দেশ দিল। ‘এয়ার টু এয়ার অ্যাকশনের জন্য তৈরি হও।’

বম্বারের পাঁচ সৈনিক যার যার কাজে ব্যস্ত হয়ে উঠল। এসব বম্বারের ক্রুরা সাধারণত খুদে ও দ্রুতগামী ফাইটারগুলোর আক্রমণের শিকার হয়। কিন্তু এই মুহূর্তে তারা হয়ে উঠেছে শিকারি। ক্যাপ্টেন হাসিমা হিসাব কষে ট্রাইমোটরের গতিপথ বের করল, তারপর আয়েস করে থ্রটল পিছিয়ে নিল। বম্বার বাঁকা একটা পথে ডানদিকে এগোল। ফোকার অনেক নীচ দিয়ে চলেছে। হাসিমা বাঁক শেষে নেমে এল। এই মুহূর্তে বম্বারটা রূপালি ট্রাইমোটরের পিছনে হাজির।

থ্রটলগুলো সামনে ঠেলে দিল হাসিমা। মিটসুবিশি বম্বারের টপ স্পিড প্রতি ঘণ্টায় দু’শ’ ঘোঁলো মাইল, ফোকারের তুলনায় প্রায় দ্বিগুণ। জাপানি ক্রুরা দু’মিনিট পার হওয়ার আগেই সামনে ফোকারটা দেখল।

হাসিমা নির্দেশ দিল, 'সামনের মেশিনগানগুলো তৈরি রাখো।'

অস্ত্রহীন বিমানটা গান-সাইটে বিরাট মনে হলো।

ট্রাইমোটরের পাইলট পাখির মত মরতে রাজি নয়। রিচার্ড স্মিথ বম্বারটাই আগেই দেখেছে। তাদের বিমানের লেজের কাছে হাজির হয়েছে ওটা। দুই ভাই প্রথমে ভেবেছে, ওটা কোনও ক্ষতি করবে না, পাশ কাটাবে। কিন্তু বম্বার ওদের ঠিক পিছনে অবস্থান নিতেই যা বোঝার বুঝে নিয়েছে। তাদের সাধ্য নেই ওটাকে দৌড়ে হারায়, কাজেই দ্বিতীয় সেরা পন্থা বেছে নিল।

বম্বারের টারেট গানার প্রথমবারের মত এক পশলা গুলি-বর্ষণ করল। ৭.৭ এমএম বুলেট ট্রাইমোটরের দিকে ছুটল। কিন্তু মন্তুরগতি বিমান আগেই বামে বাঁক নিয়েছে, আকাশে যেন ঠিক স্থির হয়ে ভাসছে। বুলেটগুলো আকাশ চিরে চলে গেল। পিছন পিছন ছুটল বম্বার। ফোকার অনেক পিছনে পড়ল।

ফোকারের পাইলট ওভাবে বাঁক নেবে, সেটা ভাবেনি হাসিমা, বিড়বিড় করে নিজেকে গাল দিল। বম্বার নিয়ে বামে বাঁক নিল সে। কিছুক্ষণ পর আবারও ফোকারের পাশে হাজির হলো। পাশের গানার ফোকারের দিকে টানা গুলি-বর্ষণ করল। সে আওয়াজে বম্বারের ফিউজেলাজ প্রকম্পিত হলো।

ফোকারের ভিতর পাইলটের উদ্দেশে চিৎকার করতে লাগলেন আর্কিওলজিস্ট। আর্টিফ্যাক্ট ভরা ক্রেটগুলো হুড়মুড় করে পড়ছে। জোরাল শব্দে বোঝা গেল এইমাত্র এক ক্রেট ভরা পোর্সেলিনের বাউল চুরমার হলো। বিমান বারবার কাঁপছে, হঠাৎ ডানে বাঁক নিয়ে ছুটল। পোলার্ড পাশের জানালা দিয়ে জাপানিজ বম্বারটা দেখতে পেলেন। এবার বুঝলেন কী ঘটছে।

ককপিটে রিচার্ড ও বার্নি নানান কৌশল করছে। মনে মনে প্রার্থনা করছে—বম্বার নিজের পথে চলে যাক।

কিন্তু বোকা বনে প্রচণ্ড রেগেছে জাপানি পাইলট। ফোকারটা

বারবার ফাঁকি দেয়ার চেষ্টা করছে। বম্বারের সামনে না থাকবার জন্য এদিক-ওদিক বাঁক নিচ্ছে, গতি কমিয়ে পিছিয়ে যেতে চাইছে। ফলে বম্বার নিয়ে বারবার ঘুরে আসতে হচ্ছে। ক্যাপ্টেন হাসিমা ঠিক করেছে, এর শেষ দেখে ছাড়বে।

পাঁচ মিনিট পার হয়নি, ফোকারকে আবারও পাশে পেয়ে গেল সে। একদিকের গানার এবার লক্ষ্যভেদ করল।

অসংখ্য গুলি ফোকারের পিছনের স্ট্যাবিলাইজার ছিন্নভিন্ন করল। দেখে হেসে ফেলল ক্যাপ্টেন হাসিমা। স্ট্যাবিলাইজার না থাকায় বিমান আর ডানে-বামে সরবে না। বম্বার নিয়ে ফোকারের আরও কাছে চলে গেল সে, এবার খেলা শেষ করবে। গানার আরেক পশলা গুলি-বর্ষণ করল। ফোকারের ডান উইঙের ইঞ্জিন ছিঁড়েখুঁড়ে গেল। ধোঁয়ার বিরাট স্তূপ গ্রাস করল ওটাকে।

মোটরে আগুন ধরবার আগেই ফিউয়েল লাইন বন্ধ করেছে রিচার্ড। এখনও দুটো ইঞ্জিন চালু, দু'ভাই সেগুলোর সাহায্যে বিমানটা ভাসিয়ে রাখতে চাইল। কিন্তু ভাগ্য তাদের সহায়তা করল না, মিটসুবিশির উপরদিকের গানার পিছন থেকে গুলি-বর্ষণ করল। মুহূর্তে ফোকারের এলিভেটর কন্ট্রোল খতম হলো। এখন চাইলেও বিমান সোজা রাখা যাবে না। নীচের দিকে পড়তে লাগল ফোকার।

রিচার্ড ও বার্নি ককপিট থেকে নীচের দিকে চেয়ে রইল। অনেক নীচে ধূলিময় জমিন! তবে অবাক কাণ্ড, বিমানটা তখনও ভারসাম্য বজায় রেখে নেমে চলেছে! নাকটা একটু নীচের দিকে তাক হলো। মনে হলো দ্রুত বিমানের দিকে তেড়ে আসছে মরুভূমির ধুলোবালি! ইঞ্জিনদুটো বন্ধ করল রিচার্ড। তার কয়েক সেকেন্ড পর টের পেল, বামদিকের ডানাটা মাটিতে আছড়ে পড়ল। বিধ্বস্ত বিমানটা ছিটকে গিয়ে পড়ল আরেকদিকে।

জাপানি বম্বারের ত্রুঁরা চেয়ে রইল, একটু হতাশ। বিমানটা মাটিতে পড়বার পর বারবার আছাড় খেলে দারুণ একটা

বিস্ফোরণ হতো, লেলিহান আগুন দেখে মজা লাগত। কিন্তু ফোকারটা মাত্র দুবার ডিগবাজি খেয়ে থেমে গেছে।

বেসামরিক বিমানটাকে আকাশ থেকে ফেলতে নানারকমের অসুবিধা হয়েছে, তবুও সবাই হই-হই করে উঠল।

ক্যাপ্টেন হাসিমা হেসে বলল, 'ভাল দেখিয়েছ তোমরা, তবে পরেরবার আরও ভাল করতে হবে।' বিমান ঘুরিয়ে নিল সে, মাঞ্চুরিয়ার বেজের দিকে চলেছে।

ফোকার প্রথমবার আছড়ে পড়তেই মারা গেছে রিচার্ড ও বার্নি। তবে আর্কিওলজিস্ট পোলার্ড বেঁচে গেছেন। কিন্তু সেই বেঁচে থাকা মৃত্যুর চেয়ে অনেক বেশি কষ্টের! কোমরের কাছে মেরুদণ্ড ভেঙে গেছে তাঁর, বাম উরু প্রায় ছিঁড়ে পড়েছে!

পরের পুরো দুটো দিন জ্ঞান থাকল তাঁর। একবার শরীরে খানিকটা শক্তি পেলেন, সম্রাট কুবলাই খানের সেই বাস্‌কট বুকের উপর রাখলেন—ভাবলেন, কী করণ ভাবে মরছেন তিনি!

তৃতীয়দিন ধীরে ধীরে মারা গেলেন পোলার্ড। জানলেন না, তাঁর বুকের উপর যে বাস্‌কট রেখেছেন, সেটায় রয়েছে দুনিয়ার অন্যতম সেরা গুপ্তধনের খবর!

তিন

সাইবেরিয়া, বৈকাল।

দুনিয়ার সবচেয়ে গভীর হ্রদ এখন পুরোপুরি শান্ত। বিপুল সুনীল জলরাশি যেন পালিশ দেয়া বহুমূল্য নীলকান্ত মণি। ধূলিকণাহীন প্রাচীন ঝর্নাগুলো এই হ্রদ পূর্ণ করেছে। বেশিরভাগ

মিষ্টি পানির হ্রদে অ্যালজি ও প্ল্যাঙ্কটন থাকে, কিন্তু বৈকালে অতি খুদে এক ধরনের আর্থোপড* ওগুলো খেয়ে ঝাড়ে বংশে খতম করে। জলরাশি তাই আয়নার মত স্বচ্ছ। শান্ত দিনে রূপালি একটা কয়েন ফেললে, এক শ' ফুট নীচেও দেখা যায় পরিষ্কার।

এখানে, সাইবেরিয়ার দক্ষিণ অংশে, প্রকৃতি অত্যন্ত নিষ্ঠুর। বৈকালের উত্তরে রয়েছে আকাশ-ছোঁয়া বরফমোড়া পর্বত, দক্ষিণে বার্চ, লার্চ ও পাইনের গভীর বনভূমি, টাইগা। তারই মাঝে বৈকাল দক্ষিণ থেকে গুরু করে উত্তরদিক পর্যন্ত চার শ' মাইল জায়গা জুড়ে বাঁকা হয়ে পড়ে রয়েছে, ঠিক যেন প্রকাণ্ড এক নীলরঙা কাস্তে। তার একটু দক্ষিণেই মঙ্গোলিয়ার সীমান্ত।

মস্ত এ হ্রদের গভীরতা কোনও কোনও জায়গায় এক মাইলের বেশি। পৃথিবীর সমস্ত মিষ্টি পানির পাঁচ ভাগের এক ভাগ রয়েছে এই বৈকালে। এই মস্ত হ্রদের তীরে বেশিরভাগ জায়গায় জেলে-গ্রাম ছাড়া আর কোনও স্থাপনা নেই। তবে দক্ষিণ-প্রান্তে গড়ে উঠেছে উরকুতস্ক শহর। ওখানে পাঁচ লাখ মানুষ বাস করে। এ ছাড়াও পূর্বের তীরে রয়েছে প্রাচীন শহর, উলান-উদে।

হ্রদের তীর থেকে আকাশ ছুঁয়েছে ভায়োলেট ও খয়েরি পর্বত। ল্যাপটপ কম্পিউটার থেকে চোখ তুলে পর্বতটা দেখল গ্রেসি মুলার, মুগ্ধ। আকাশে পেঁজা তুলোর মত মেঘের ভেলা পর্বত-চূড়া ছুঁয়ে দূরে কোথায় হারিয়ে যাচ্ছে। রয়্যাল ডাচ অয়েল কোম্পানির জিওফিসিস্ট দীর্ঘশ্বাস ফেলল। আমস্টারডামের পরিবেশ যদি এমন সুন্দর হতো!

দূর-দূরান্তে বেড়াতে ভালবাসে গ্রেসি। পেট্রোলিয়াম ইঞ্জিনিয়ার হিসেবে দুনিয়ার কোথায় না গেছে ও? অনেকে বলে

* শামুক, কিনুক, কাঁকড়া বা চিহঁড়ির মত খোলসাচ্ছাদিত খুদে প্রাণী।

এ পেশা পুরুষদের, নারীদের এখানে স্থান নেই। কিন্তু নিজ যোগ্যতা দিয়ে ও প্রমাণ করেছে, কারও চেয়ে কম যায় না সে, যে-কোনও বিপদ মোকাবিলা করতে পারে। ওর মিষ্টি হাসি, সরস কথাবার্তা আর জীবনকে সহজ ভাবে নেয়ার দর্শন ওকে অনন্য করে তুলেছে। যারা আগে ওকে দেখেনি, তারা প্রথম পরিচয়েই বিস্মিত হয়—মেয়েটি এত সহজ ভাবে সব গ্রহণ করে কী করে? আর মানুষ এত সুন্দরই বা হয় কী করে? ওই অপরূপ অঙ্গসৌষ্ঠব, ডিম্বাকৃতি মিষ্টি মুখ, গভীর কালো চোখ, দীর্ঘ সোনালী চুল—সব মিলে মনে হয় এইমাত্র ধরাধামে নেমেছে কোনও দেবী!

‘দিনটা চমৎকার, তা-ই না?’ বলোন্মা তেমুজিন ইংরেজিতে বলল, কিন্তু মনে হলো যেন রাশান বলছে। ফ্যাসফেসে কণ্ঠে কোনও ভাবাবেগ নেই। বেশিরভাগ সময় শুধু ব্যবসা নিয়ে আলাপ করে। যে-কেউ মনে করবে বলোন্মা স্থানীয় বুরাইট, কিন্তু আসলে সে মঙ্গোলিয়ান। তার কালো কেশ কোমর ছাড়িয়ে নেমেছে, কোমল ত্বক দুধের মত সাদা; খয়েরি, স্বচ্ছ চোখদুটোতে সাগরের গভীরতা। কিন্তু অপূর্ব সুন্দর মুখটা একেবারে কাঠখোঁট্টা, নিষ্পৃহ, যেন দুনিয়ার সমস্ত খারাপ খবর তার জানা শেষ।

‘আমি জানতাম না সাইবেরিয়া এত সুন্দর,’ বলল থ্রেসি। ‘মন ভরে না, মনে হয় আরও দেখি। এত শান্ত! চারপাশ এত নীরব!’

‘বৈকাল আপাতত শান্ত, কিন্তু যে-কোনও সময়ে শয়তানি শুরু করতে পারে,’ বলল বলোন্মা। ‘হঠাৎ উত্তর-পশ্চিম থেকে আসে সার্মা। ওই হাওয়া বৈকালে আসে সাইক্লোনের মত। যেসব জেলে এই হ্রদের খামখেয়ালি আচরণকে পাল্লা দেয়নি, তারা এখন হয় গোরস্তানে, নয় তো পানির নীচে।’

শিরশিরে একটা অনুভূতি নামল থ্রেসির মেরুদণ্ড বেয়ে।

কীসের কথা বলছে! স্থানীয়রা প্রায়ই অদ্ভুত এক অশরীরীর ব্যাপারে আভাস দেয়, বলে ওটাই নাকি বৈকালের আত্মা। সেটা? সাইবেরিয়ানরা শীতল এই জলাধার নিয়ে গর্বিত, যে-কোনও ধরনের বর্জ্য থেকে একে রক্ষা করার চেষ্টা করে। রাশান সরকার পঞ্চাশ বছর আগে হুদের তীরে কাঠ-সেল্যুলোয়-প্রসেসিং প্লান্ট করতে চেয়েছিল, কিন্তু স্থানীয়দের আপত্তির মুখে কাজ বন্ধ করতে বাধ্য হয়। আর এখন তো গোটা পৃথিবীর মানুষই প্রকৃতিকে কলুষমুক্ত রাখার আন্দোলনে সোচ্চার। গ্রেসি মনে মনে জানে, ওর কাজটা ভাল চোখে দেখবে না গ্রিন-পিস বা এ ধরনের সংস্থা। বলা যায় না, হয়তো হঠাৎ দেখা যাবে একদল লোক একগাদা রাবারের নৌকা নিয়ে হাজির হয়েছে প্রতিবাদ জানাতে।

রয়্যাল ডাচ শেল কোম্পানির কাজ নিয়ে এসেছে ও এখানে। তারা আবার কাজটা পেয়েছে বরজিন অয়েল কনসোর্টিয়ামের কাছ থেকে। তারা নাকি শুনেছে বৈকাল হুদের নীচ থেকে চুইয়ে তেল বেরোচ্ছে। উৎসটা যদি খুঁজে বের করা যায়, তা হলে চুজির জন্য প্রস্তাব দেবে রাশান সরকারের কাছে। গ্রেসি যতদূর জানে, এখানে কখনও কূপ খনন করার অনুমতি দেয়া হবে না। যা-ই হোক সেটা ওদের মাথাব্যথা—ওর কাজটুকু ও করে দেবে।

সাইবেরিয়ায় আসবার আগে কখনও বরজিন অয়েল কনসোর্টিয়ামের নাম শোনেনি গ্রেসি, তবে জানত রাশান মার্কেটে এখন অসংখ্য অয়েল কোম্পানি ভিড় করেছে। কিছু সরকারী কোম্পানি আছে, যেমন ওয়াইকোস বা গ্যাসপ্রোম, ওগুলোর খবর পত্রিকার পাতায় আসে—তারা তেল তোলে। তবে কেকের টুকরো পেয়েছে কিছু বেসরকারী কোম্পানিও। কিন্তু ও যতদূর জানে, বরজিন অয়েল কনসোর্টিয়াম তাদের মধ্যে নেই।

সার্ভে বোটে উঠবার সময় দুই কলিগকে বলেছে গ্রেসি, 'এরা আগুন নিয়ে খেলা-১

ক্রুড অয়েল খুঁজে পাবে না। অতএব এদের কাছ থেকে কিছুই পাবে না রয়্যাল ডাচ অয়েল কোম্পানি।’

থ্রেসির কলিগ আর্কানসওর জিওফিসিস্ট বিল উইলসন চওড়া হেসেছেন, চোখ পাকিয়ে বলেছেন, ‘পাবে, পাবে! ওরা খোঁজ খবর নিয়েই সার্ভে করাচ্ছে। দেখছ না, আমাদের ছদ্মবেশে কাজ করতে হচ্ছে! সেজন্যই ভাঙা নৌকার মত করে এই বোট সাজানো হয়েছে।’

বোটটা আদতে বড়সড় একটা জেলে নৌকা। অনেক আগেই এটার বৃদ্ধাবস্থা পেরিয়ে গেছে, এখন ধুকছে মৃত্যুশয্যায় শুয়ে। বাইরের দিকের রং এখানে-ওখানে খসে পড়েছে, জায়গায় জায়গায় পচে গেছে কাঠও—বোটে উঠবার পর থেকে পচা মাছের গন্ধে নাক কুঁচকে উঠছে। ওটার মালিক জীবনে কোনদিন যত্ন নেয়নি এর। বোট ধোয়ার কাজটি করে প্রকৃতির দান বৃষ্টি। পঁচা পাটাতনে উঠে থ্রেসি দেখেছে, বিল্জ্ পাম্প চলছে সর্বক্ষণ—পেট থেকে পানি সঁচে ফেলা হচ্ছে হ্রদে। তখন থেকেই অস্বস্তি নিয়ে ওটা দেখছে ও। কখন যে বোট ডুববে, কেউ জানে না!

‘আমাদের নিজেদের সাগরগামী কোনও জাহাজ নেই,’ কোন দুঃখ প্রকাশ নয়, সাফ কথা বলোয়ার। শেল সার্ভে দলের সঙ্গে বরজিন অয়েল কনসোর্টিয়ামের একমাত্র রিপ্রেজেন্টেটিভ সে-ই।

‘তাতে কোনও সমস্যা নেই,’ হেসে উঠলেন বিল উইলসন। ‘সমস্যা হলো এত কম জায়গায় নড়ানড়া করাটা।’

তার কলিগ এডি গ্রিন বলল, ‘তা হোক, মাছের গন্ধ পাচ্ছি যখন, বোটে নিশ্চয় কোথাও না কোথাও ক্যাভিয়ার পাব।’ সাইসমিক ইঞ্জিনিয়ার সে, মৃদু ভাষী। শুনেছে বৈকাল হ্রদে প্রকাণ্ড সব স্টারজিয়ন পাওয়া যায়, একেকটার পেটে বিশ পাউণ্ডের বেশি ক্যাভিয়ার থাকে।

এডি গ্রিন ও বিল উইলসনকে সাইসমিক মনিটর, কেবল,

টো-ফিশ ইত্যাদি বোটে তুলতে সাহায্য করেছে বলোর্মার। আটাশ ফুটি বোটে গিজগিজ করেছে ইকুইপমেন্ট, পা ফেলা যায় না।

আস্তে করে বলল গ্রেসি, 'এডি, তুমি পানির মত ঢক-ঢক করে যে পরিমাণ বিয়ার এস্টেমাল করো, তার সঙ্গে আবার ক্যাভিয়ার?'

'দুটো মিলে দারুণ জমে ওঠে,' কপট গান্ধীর্ষ নিয়ে বলল গ্রিন। 'ক্যাভিয়ারের ভিতরের সোডিয়াম তেষ্ঠা বাড়িয়ে দেয়, আর সেই তেষ্ঠা মেটায় মল্ট দেয়া বিয়ার। আহা!'

'তো সোজা কথা, তুমি আরও বেশি বেশি বিয়ার টানবে।'

'বিয়ার পান নিয়ে আবার কার আপত্তি?' কড়া গলায় জানতে চাইলেন উইলসন।

'আমি হার মেনে নিলাম,' হেসে ফেলল গ্রেসি। 'আমি এত বোকা নই যে পাক্সা দুই বিয়ার খোরের সঙ্গে তর্ক করব।'

বলোর্মার মন্তব্য না করে চুপচাপ শুনল সব, তারপর বোটে ইকুইপমেন্ট তোলা হলে জেলে-নৌকার মালিকের উদ্দেশে হাত নাড়ল। মালিকটা তিজু চেহারার এক লোক, নিজের পরিচয় দেয়: বোটের ক্যাপ্টেন। মাথায় লটকে আছে চেক কাপড়ের টুপি। বড়সড় টকটকে লাল নাকটা বৈদ্যুতিক বালবের মত। লোকটা স্রেফ ভোদকার উপর টিকে আছে। বলোর্মার ইশারা পেতেই খুদে হুইল-হাউজে ঢুকল, ইঞ্জিনটা গর্জে উঠে প্রচুর ধোঁয়া তৈরি করল। ডক থেকে রশি ছাড়িয়ে নিতেই ধুকতে ধুকতে রওনা হলো বোট। পিছিয়ে যাচ্ছে লিস্ত্ভিয়াস্কা গ্রাম। পর্যটকরা বৈকালের দক্ষিণ প্রান্তের এই গ্রামের মোটেলগুলোতে ওঠে।

হৃদের একটা মানচিত্র বের করেছে বলোর্মার, নির্দিষ্ট জায়গায় আঙুল তাক করে জানিয়ে দিল ওরা গ্রাম থেকে উত্তরদিকে, চল্লিশ মাইল দূরে যাবে।

'আমরা পেশচানায় বে-তে সার্ভে করব,' জিওলজিস্টদের আগুন নিয়ে খেলা-১

বলল সে। ‘ওই এলাকায় স্থানীয় জেলেরা পানিতে তেল ভাসতে দেখেছে। আন্দাজ করা হচ্ছে ওখানে কোথাও হাইড্রোকার্বন সিপেজ ঘটছে।’

‘আপনি নিশ্চয়ই এই বোটে করে আমাদের গভীর পানির দিকে নেবেন না, বলোমার্মা?’ জানতে চেয়েছেন উইলসন।

‘আমরা জানি আপনাদের সব ইকুইপমেন্ট নেই,’ বলল বলোমার্মা। ‘তবে শোনা গেছে হৃদের মাঝখানেও সিপেজ রয়েছে। ওখানে পানির গভীরতা বেশি, আমরা ওটাকে বাদ রাখব। শুধু বৈকালের দক্ষিণের চারটে জায়গা দেখব। ওগুলো তীরের কাছে, কাজেই আশা করা যায় পানির গভীরতা ওখানে কম থাকবে।’

‘তা হলে আর সমস্যা নেই,’ মাথা ঝাঁকাল এডি। তিনফুটি টো-ফিশের সঙ্গে ওয়াটারপ্রুফ ডেটা কেইবল যুক্ত করেছে সে। সাইড স্ক্যানার তলদেশের আওয়াজ ধারণ করবে, ইমেজ পাঠাবে। টো-ফিশ টেনে নিয়ে যাওয়ার সময় চারপাশের গভীরতা বোঝা যাবে।

‘চারটে সাইট কি পশ্চিম তীরেই?’ জানতে চাইল থ্রেসি।

‘না, শুধু একটা পেশচানায়া বে-তে। বাকি তিনটে সিপেজ দেখতে হলে বৈকাল পেরুতে হবে। ওগুলো পূব তীরে।’

প্রাচীন বোট ধীর গতিতে লিস্তুভিয়াস্কার ডকগুলো পেরিয়ে এসেছে। বন্দরের পাশে একটা হাইড্রোফয়েল ফেরি দেখা গেল। কিছুক্ষণ আগে ওটা হৃদের উল্টোদিকের পোর্ট বৈকাল থেকে ফিরেছে, গাড়ি ও মানুষ নামিয়ে দিয়ে অপেক্ষা করছে। বন্দরের চারপাশে গিজগিজ করছে পুরানো জেলে-নৌকা। চকচকে নীল প্যাসেঞ্জার ফেরি ওখানে বেমানান লাগছে।

বন্দরটা পিছনে ফেলে পশ্চিম তীরের পাশ দিয়ে এগিয়ে উত্তরদিকে রওনা হয়েছে থ্রেসিদের বোট। লিস্তুভিয়াস্কা আড়ালে পড়ে যেতেই শুরু হয়েছে টাইগা বনভূমি। পানির ধারে এসে থেমেছে সবুজ অরণ্য। জঙ্গল কখনও উঁচুনিচু মাঠকে জায়গা

ছেড়েছে। সেখানে জন্মেছে ঘন ঘাস। দূরে বরফমোড়া পর্বত। পশ্চিম তীরের নৈসর্গিক দৃশ্য, আর উল্টোদিকে উজ্জ্বল নীল হ্রদ—সবমিলে যত দেখছে, ততই মুগ্ধ হচ্ছে গ্রেসি। যদি জানা না থাকত, কখনও বিশ্বাস করত না এই অদ্ভুত সুন্দর এলাকা শীত আসলেই ভয়ঙ্কর হয়ে ওঠে। তখন সবুজ বনভূমি তুষারের চাদরে হারিয়ে যায়, বিশাল এই হ্রদ চার ফুট উঁচু বরফের নীচে চাপা পড়ে।

শিউরে উঠল গ্রেসি, মনে মনে বলল, ‘বছরের এই সময়ে দিন এখনও লম্বা, শীত আসতে অনেক দেরি।’

আড়াই ঘণ্টা পর ওদের বোট লিস্ত্ভিয়াস্কা গ্রাম থেকে চল্লিশ মাইল দূরে পেশচানায়া বে-তে ঢুকল। পশ্চিম তীরে বালির সরু সৈকত মিলল। বোটের ক্যাপ্টেন ওদিকে গেল না, তাকে আগেই থামতে বলা হয়েছে। গ্রেসিকে বলল বলোর্ম্যা, ‘আমরা এখান থেকে কাজ শুরু করব।’

বোট একটু একটু দুলছে, এডি ও উইলসন স্টার্ন দিয়ে সাইড-স্ক্যান সোনার টো-ফিশ পানিতে নামিয়ে দিল। গ্রেসি পাশের রেইলের কাছে একটা জিপিএস অ্যাণ্টেনা উঁচু করল, সোনারের কম্পিউটারের সঙ্গে প্লাগ লাগাল। হুইল-হাউজের গায়ে একটা ফ্যাদোমিটার ঝুলছে, ওটা দেখে নিয়ে বলোর্ম্যা বলল, ‘ডেপথ্ থার্টি মিটার।’

‘অনেক গভীর নয়, ভালই হলো,’ মৃদু কণ্ঠে বলল গ্রেসি। বোট সামনে বাড়ল। সোনারটা এক শ’ ফুট পিছনে রেখে এগিয়ে চলেছে। একটা রঙিন মনিটর টো-ফিশের কাছ থেকে ছবি পেল। হ্রদের তলদেশ ও চারপাশের আওয়াজও আসছে।

‘আমরা পঞ্চাশ মিটার গভীর পর্যন্ত সব পেয়ে যাব,’ বললেন উইলসন। ‘কিন্তু তারপর নতুন কেবল দিতে হলে এর চেয়ে বড় বোট লাগবে।’

‘ক্যাভিয়ারও বেশি লাগবে,’ ক্ষুধার্ত চেহারা করল এডি।

আগুন নিয়ে খেলা-১

ওদের বোট ধীরে ধীরে বে ধরে এগিয়ে চলেছে, ডানে-বামে সরছে। ক্যাপ্টেন মাঝে মাঝে তার হুইল একহাতে ঘুরিয়ে এদিক-ওদিক নিয়ে চলেছে। স্টার্নে চারজন ঝুঁকে পড়ে সোনার মনিটর দেখছে। জমির অস্বাভাবিক জিওলজিকাল আকৃতি ডায়েরিতে লিখে নেয়া হলো। সার্ভেয়াররা মনিটরে ভাল করে দেখল হ্রদের তলদেশে হাইড্রোকার্বন সিপ আছে কি না। তবে তেল সত্যিই চুষে উঠছে কি না, সেটা সঠিক ভাবে জানতে হলে মাটির নমুনা লাগবে, পানির জিওকেমিক্যাল অ্যানালাইসিস করতে হবে। অবশ্য সাইড-স্ক্যানার সার্ভেয়ারদের বলবে ঠিক কোন্‌খানে সিপেজ ঘটছে। জিওলজিকাল বিষয়গুলো নিয়ে পরে গবেষণা করা হবে।

একসময় ওরা বে-র উত্তর প্রান্তে পৌঁছল, ক্যাপ্টেন একটু আগের সার্ভে লাইন থেকে বোট সরিয়ে নিল। এবার পরের লাইনের শুরু হবে কাজ। মনিটর থেকে সরে দাঁড়াল থ্রেসি, সোজা হয়ে আঙমোড়া ভাঙল। চোখ চলে গেল হ্রদের মাঝখানে। ধূসর রঙের এক জাহাজ উত্তরদিকে চলেছে। মনে হয় কোনও রিসার্চ ভেসেল। স্টার্নে পুরানো আমলের একটা হেলিকপ্টার। পাখাগুলো ঘুরছে, যে-কোনও সময় উড়াল দেবে। ব্রিজের দিকে চাইল থ্রেসি, ওখানে একইসঙ্গে রাশা ও আমেরিকার পতাকা দেখে অবাক হলো। দুই দেশের কোনও সায়েন্টিফিক প্রজেক্ট বোধহয়, মনে মনে বলল। পড়েছে, আজকাল পশ্চিমা বিজ্ঞানীরা বৈকাল হ্রদ নিয়ে খুবই মাতামাতি করছেন। বিশেষ করে এনভায়রনমেন্ট সায়েন্টিস্ট, জিওফিজিসিস্ট আর মাইক্রোবায়োলজিস্টরা এ হ্রদের বিশুদ্ধ পানি নিয়ে জটিল সব গবেষণা চালাচ্ছেন।

‘আমরা পাশের লাইনে পৌঁচেছি,’ গলা উঁচিয়ে বলল এডি।

চারপাশে চৌকো ঘরের মত এলাকা খোঁজার পর বিশ মিনিট একটানা চলে বে’র দক্ষিণ প্রান্তে পৌঁছে গেল বোট। সোনারে

তিনটে এলাকা মার্ক করেছে গ্রেসি, ওখানে পরে আরও পরীক্ষা করতে হবে।

‘আজকের মত এদিকটায় আমাদের কাজ শেষ,’ বললেন উইলসন। ‘এবার কোথায়?’

বলোয়ারি সরু আঙুল মানচিত্রের উপর চঞ্চল হয়ে উঠল। একটা জায়গা তাক করল। ‘এরপর হ্রদ পেরিয়ে এইখানে। দক্ষিণ-পূবে, পঁয়ত্রিশ কিলোমিটার।’

‘সোনার পানিতে থাকুক,’ বলল গ্রেসি। ‘আমাদের বোট তো সার্ভে স্পিডের চেয়ে জোরে এগোবে না, যাওয়ার পথে বরং মিনিটরে চোখ রাখব। নতুন কিছু পেতেও পারি।’

‘কোনও সমস্যা নেই,’ বললেন উইলসন। ডেকের এক পাশে সরে পা দুটো ছড়িয়ে বসলেন। মাঝে মাঝে মিনিটর দেখছেন। কিন্তু কিছুক্ষণ পর হঠাৎ তাঁর চোখে কীসের যেন ছায়া পড়ল। বিড়বিড় করে বললেন, ‘এ তো হওয়ার কথা নয়!’

মিনিটরের উপর ঝুঁকে এল এডি। হঠাৎ করেই হ্রদের তলা অতি ব্যস্ত হয়ে উঠেছে। স্কিনে একের পর এক পেরেকের মত লাইন দেখা যাচ্ছে! ওগুলো উঁচু-নিচু হচ্ছে। হ্রদ-রোগীদের মিনিটরে যেমন রেখা ওঠে-নামে, সেরকম!

‘মাটির সঙ্গে টো-ফিশের ঘসা লেগেছে?’ জানতে চাইল এডি।

‘না,’ উইলসন ডেপথ দেখলেন। ‘ওটা মাটির চল্লিশ ফুট ওপরে।’

আরও কয়েক সেকেন্ড মিনিটরে পাগলামি ধরা পড়ল। তারপর হঠাৎ সব থেমে গেল। হ্রদের তলদেশ আগের মতই টেউ খেলানো। মিনিটরে পরিষ্কার ইমেজ মিলল।

উইলসন রসিকতা করতে চাইলেন, ‘কোনও দানব স্টারজিয়ন আমাদের টো-ফিশ কেড়ে নিতে চেয়েছে।’ মিনিটর ও ইকুইপমেন্ট ঠিক আছে দেখে হাঁফ ছেড়েছেন তিনি। কিন্তু ঠিক আগুন নিয়ে খেলা-১

তখনই পানি ছুঁয়ে এল গম্ভীর একটা আওয়াজ। অনেক দূরে যেন বজ্রপাত হলো। কিন্তু তা-ই বা কী করে হয়? আওয়াজটা একটানা চলছে!

আধ মিনিট পর থামল শব্দ। সবার চোখ উত্তরদিকে। শব্দটা ওদিক থেকেই এসেছে। কিন্তু চোখে পড়ল না কিছুই!

‘কোনও নির্মাণাধীন বাড়ি ধসে পড়ল?’ বলল থ্রেসি, জবাবটা মনের ভিতর খুঁজছে।

‘হয়তো,’ বলল এডি। ‘কিন্তু তার শব্দ এত দূর থেকে এত জোরে শোনা যাবে?’ মনিটরের দিকে চেয়ে ক্ষণিকের জন্য থমকে গেল। শব্দের গ্রাফে সামান্য পরিবর্তন, তারপর সব আগের মত রইল। হৃদের তলা পরিষ্কার দেখা গেল।

উইলসন গম্ভীর স্বরে বললেন, ‘ওটা যা-ই হোক, আমাদের ইকুইপমেন্ট নষ্ট না করলেই হলো।’

চার

দশ মাইল উত্তরে এগিয়ে চলেছে ধূসর রঙা রাশান রিসার্চ ভেসেল, দ্যানিয়া। ধীর পায়ে ব্রিজ উইণ্ডে এলেন জোসেফ কার্ক, মুখ তুলে উজ্জ্বল নীলাকাশ দেখলেন। হর্ণ-রিম্‌ড্ চশমাটা সাবধানে খুলে কাঁচ দুটো পরিষ্কার করে নিয়ে আবার নাকের উপর বসালেন। আবারও আকাশ দেখলেন। আফসোস করে মাথা নাড়লেন, ব্রিজে ঢুকে বিড়বিড় করে বললেন, ‘গুনে মনে হলো বজ্রপাত, কিন্তু আকাশে মেঘ কই!’

তার কথায় হেসে উঠল এক লোক। এলোমেলো চুলগুলো

তার কুচকুচে কালো, গালে চাপ দাড়ি। ডক্টর পাভেল রেদোরভকে দেখলে মনে হয় সার্কাসের ভালুক! বিশালদেহী মানুষ, ঠোঁটে সারাক্ষণ লেগে আছে হাসি। চোখ দুটো সদা জীবনের গান গাইছে। রাশান একাদেমি অভ সায়েন্সেস লিমেনোলজিকাল ইন্সটিটিউট-এর জিওফিসিসিস্ট তিনি, সুযোগ পেলে নতুন এই আমেরিকান বন্ধুদের নিয়ে একটু হেসে নেন।

‘আপনারা পশ্চিমা বেশ মজার লোক,’ ভারী টানে ইংরেজি বললেন তিনি।

‘উনি চিন্তিত,’ ব্রিজের আরেক পাশ থেকে বলে উঠল এক যুবক। ‘আর আমি পশ্চিমা নই—আপনি ভুলে গেছেন, ডক্টর। আমরা কেউ ভূমিকম্প প্রবণ এলাকার মানুষ নই।’

মাসুদ রানার গাঢ় কালো চোখে হাসি খেলছে। মনিটরগুলোর সামনে দাঁড়িয়ে রয়েছে।

জোসেফ কার্কের নাক ঝুলে পড়ল। ‘ভূমিকম্প হলো?’ সত্যিই চিন্তিত হয়ে পড়েছেন অ্যানাপলিস গ্র্যাজুয়েট। আমেরিকান নেভির কমান্ডার ছিলেন, কিছুদিন হলো নুমায় যোগ দিয়েছেন। এটা তাঁর প্রথম অ্যাসাইনমেন্ট।

‘দু একটা হজম করেছি আমি, কিন্তু আওয়াজ পেলাম এই প্রথম,’ বললেন ড. রেদোরভ।

‘ছোটগুলো কাপ-পিরিচ নাড়ায়, কিন্তু বড়গুলো অন্য জিনিস,’ বলল রানা। ‘তখন মনে হয় কয়েক শ’ লোকোমোটিভ ছুটছে।’

দুদিন হলো বৈকাল হুদে এসেছে মাসুদ রানা। একটা অ্যাসাইনমেন্ট শেষ করে লস অ্যাঞ্জেলেস-এ ছুটিতে ছিল। নুমার চিফ অ্যাডমিরাল জর্জ হ্যামিলটন ওকে ডিনারের দাওয়াত দেয়ায় হাজির হয়েছিল।

‘রাহাতের কাছে গুনলাম তোমার ছুটি চলছে?’

‘জী,’ বলেছে রানা।

আগুন নিয়ে খেলা-১

‘কখনও বৈকাল হুদে গেছ?’

‘দুয়েকবার, তবে ওখানে থাকা হয়নি।’

‘যেতে চাও?’

‘বস অনুমতি দিলে...’

‘অনুমতি দিয়েছেন,’ এককথায় বলেছেন অ্যাডমিরাল।

‘যাবে তুমি?’

‘কোনও অ্যাসাইনমেন্ট?’ সতর্ক হয়ে উঠছে রানা।

‘না। পিওর সায়েন্টিফিক রিসার্চ। রাহাত খান বলেছেন: বৈকাল হুদে গেলে সঙ্গে পিস্তল নিতে পারবে না। যাবে তুমি?’

রানা ভেবেছে, দুই বুড়ো কোনও প্যাঁচ খেলল কি না কে জানে! পিস্তল নেওয়া যাবে না... কেন?

তবে এককথায় জবাব দিয়েছে ও, ‘যাব।’

‘রাশান বিজ্ঞানীদের সঙ্গে যৌথ ভাবে কাজ করব আমরা, কাজেই নুমার কেউ অস্ত্র নেবে না,’ বলেছেন হ্যামিলটন। ‘ঘুরে এসো, ভাল লাগবে।’

দুই বুড়ো হঠাৎ আমার ভাল লাগা নিয়ে পড়ল কেন, ভেবেছে রানা। ডিনার শেষে অ্যাপার্টমেন্টে ফিরে সোহেলকে ফোন দিয়েছে।

ওর কাছ থেকে জানা গেল, রানার মেডিকেল ফিটনেস রিপোর্ট পাওয়া গেছে আজ। বুড়ো অত্যন্ত চিন্তিত। ওর স্বাস্থ্যের অবস্থা নাকি মারাত্মক! কয়েকবার রানাকে ভিডিও-ফোনে পাননি রাহাত খান, খেপে বোম হয়ে আছেন। এর পর অ্যাডমিরাল হ্যামিলটনের সঙ্গে কথা হয়েছে তাঁর।

‘আমি বেচারা মাঝখান দিয়ে বুড়োর বকা শুনে শেষ হলাম,’ বলেছে সোহেল। ‘সিগারেট, ড্রিঙ্ক সব তোর জন্য নিষিদ্ধ করেছে ডাক্তার। শরীরের যত্ন নে, শালা!’

‘নেব,’ বলেছে রানা। ‘বৈকাল হুদে বেড়াতে চলেছি, সঙ্গে এক অপূর্ব সুন্দরী।’

‘বর্ণনা দে, দেখি তোর সঙ্গে মানায় কি না?’

‘না রে, থাক, তোর বোন কষ্ট পাবে।’

‘বল না, দোস্তু!’

‘আজকাল তুই বড় ইয়ে হয়ে গেছিস,’ বলেছে রানা।

‘নীলাকে জানাতে হবে।’

রিসিভার থেকে সঙ্গে সঙ্গে হুঙ্কার ভেসে এসেছে, ‘ওরে শালা তুমি তোমার বোনকে বলে আমাকে শায়েস্তা করতে চাও!’

‘রাখি রে, আর কোনও খবর থাকলে বৈকাল হুদে ফোন দিস,’ রেখে দিয়েছে রানা।

ডক্টর পাভেল রেদোরভ বলে চলেছেন, ‘বৈকাল হুদের নীচে বেশ কয়েক জায়গায় প্রচণ্ড টেকটোনিক অ্যাক্টিভিটি চলছে। প্রায়ই ভূমিকম্প হয়।’

‘না হলেই ভাল হতো,’ মিইয়ে গেলেন জোসেফ কার্ক। মনিটর ব্যাস্কের সামনে চেয়ারে বসলেন। ‘যাকগে, আমাদের ডেটা কালেকশন ঠিক মত চললেই আমি খুশি।’

দ্যানিয়া জাহাজটা রাশান-আমেরিকান সায়েন্টিফিক সার্ভে-র কাজ করছে, ব্যস্ত মানুষগুলো বৈকাল হুদের ব্যাখ্যার অতীত স্রোত মনিটর করছেন। ইরকুতস্ক শহরের বিজ্ঞানীরা এটাই চেয়েছিলেন, এখন নুমার হাই-টেক সোনোবয়া ও মনিটরিং ইকুইপমেন্টগুলো হুদের তলদেশ সমীক্ষা করছে, স্রোতগুলো দেখা শেষ হলে থ্রি-ডিমেনশনাল ইমেজ তৈরি হবে। জানা যাবে কেন এই হুদ অস্বাভাবিক আচরণ করে। শান্ত জলে হঠাৎ ঘূর্ণিপাক তৈরি হয়, নৌকাগুলো মুহূর্তে তলিয়ে যায় কেন। স্থানীয়রা বলে হুদে দানব থাকে, ওগুলো জেলেদের জাল টেনে ধরে, এক পলকে সবকিছু তলিয়ে নিয়ে যায়।

সায়েন্টিফিক টিম হুদের উত্তর প্রান্ত থেকে কাজ শুরু করেছে, পানিতে শত শত সেন্সার ফেলা হয়েছে। কমলা রঙের পডগুলো নানান গভীরতা থেকে নানান তথ্য সংগ্রহ করবে—
আগুন নিয়ে খেলা-১

আগারওয়াটার বিশাল ট্রান্সপণ্ডারগুলোকে টেম্পারেচার, প্রেশার, পজিশন ইত্যাদি জানাবে। দ্যানিয়া জাহাজে বসানো হয়েছে সুপার কম্পিউটার, ওটা ট্রান্সপণ্ডারগুলো থেকে ডেটা পাবে, থ্রি-ডি গ্রাফিক ইমেজ তৈরি করবে।

মনিটরগুলোর সামনে বসে হ্রদের মাঝামাঝি জায়গা দেখলেন কার্ক। মনে হলো নীল আইসক্রিমের একটা বাউলে অসংখ্য কমলা মার্বেল ভাসছে। তারপর হঠাৎই স্ক্রিনে মার্বেলগুলো লাফিয়ে উঠল, উপরের দিকে ছুটছে।

‘বাপ্‌স!’ বলে উঠলেন কার্ক। ‘হয় কোনও ট্রান্সপণ্ডার কাত হয়েছে, নয় তো মারাত্মক ভূমিকম্প হয়েছে!’

মনিটরের পর্দায় চোখ চলে গেল রেরদোরভ ও রানার। কমলা বিন্দুগুলো দ্রুত হ্রদের তলা ছেড়ে উঠে আসছে।

‘নীচের স্রোত বড় তাড়াতাড়ি বেঁকে উঠছে,’ জ্র উঁচু করলেন রেরদোরভ। ‘এটা খুব অস্বাভাবিক, বিরাট ভূমিকম্প না হলে এমন হয় না।’

‘ভূমিকম্প বোধহয় বয়া দোলায়নি,’ বলল রানা। ‘ওটার কারণে পানি নড়ছে, ফলে বয়া সরেছে। পানির নীচে অল্প ভূমিকম্প অনেক সময়ে বিশাল ভূমিধস নামায়।’

‘হতে পারে,’ বললেন রেরদোরভ। ‘এটা নিশ্চিত যে ওখানে পানি উপরে উঠছে।’

রানার ধারণাই ঠিক, আসলে রিসার্চ ভেসেল দ্যানিয়ার এক শ’ তিরিশ মাইল উত্তরে সারফেসের দু শ’ ফুট নীচে ভূমিকম্পই হয়েছে! সেইজন্য পানির ভিতর থেকে গভীর আওয়াজ শোনা গেছে! রিখটার স্কেলে ভূমিকম্পের পরিমাণ ছিল ৬.৭! এপিসেন্টার ছিল হ্রদের উত্তর প্রান্তে। সবাই জানে, বিশাল ওলখন দ্বীপটা জনবসতিহীন, আছে শুধু গুরু জমি। কিন্তু কেউ জানে না ওটার কারণে হ্রদের পশ্চিম তীরে কী ভয়ঙ্কর ধ্বংসলীলা শুরু হবে! ওই দ্বীপের পূর্ব অংশ মুহূর্তে হ্রদের গভীরে নেমে

গেছে!

সাইসমিক স্টাডি অনুযায়ী বৈকাল হ্রদের তলদেশে বারোটোর বেশি ফল্ট লাইন রয়েছে। তারই একটা গেছে ওল্‌খন দ্বীপের নীচ দিয়ে। কোনও জিওলজিস্ট যদি ওই ফল্ট ভূমিকম্পের আগে ও পরে পরীক্ষা করতেন, নির্দিধায় বলতেন, ওটা মাত্র তিন মিলিমিটার সরেছে! কিন্তু বিজ্ঞানীরা এটাও বলবেন, ওই তিন মিলিমিটার একটা ফল্টের জন্য যথেষ্ট! ওটা এক পলকে পানির তলে কয়েক শ' ফুট ডেবে গেছে!

ক্ষণিকের জন্য ভূমিকম্প এলেও পর্বতের মত বিশাল মাটির একটা অংশ হ্রদে পড়ল। মাটির কণাগুলো একেকটা ছিল তিরিশ মিটার উঁচু। ওগুলো নামতে শুরু করে একটা অ্যাভালাঞ্চ তৈরি করল। সঙ্গে নিল পাথর, পলি ও কাদা। নীচের টিলাগুলো ঘোলাটে পানির ভিতর হারিয়ে গেল। এক মিলিয়ন কিউবিক মিটার সেডিমেন্ট আছড়ে পড়ল সতেরো শ' মিটার নীচের তলদেশে! চারপাশ অন্ধকার হলো। কিছুক্ষণ পর ভূমিধসের আওয়াজ থামল। কিন্তু ওটার কারণে যে এনার্জি তৈরি হয়েছে, সেটা প্রচণ্ড হয়ে উঠল। মাটি-পাথর-পলি-কাদা বিপুল পরিমাণ পানি সরিয়ে দিয়েছে। প্রথমে পানি নীচের দিকে ছুটল। কিন্তু তারপর আর সরবার পথ থাকল না—কাজেই উপরের দিকে উঠতে লাগল! লক্ষ লক্ষ গ্যালন পানিকে যে ভাবে হোক সরতে হবে!

ওল্‌খন দ্বীপের ভূমিধস দক্ষিণ দিকে কাত হয়ে পড়েছে, ফলে বিপুল পানি ছুটল ওদিকে। হ্রদের উত্তরদিক মোটামুটি শান্ত থাকল, কিন্তু দক্ষিণে সৃষ্টি হলো ভয়াবহ জলোচ্ছ্বাস। খোলা সাগরে ওটাকে সুনামি বলা হয়, কিন্তু মিষ্টি পানির হ্রদে ওটার নাম সেইশ ওয়েভ।

পানির তীব্র গতি হ্রদের সমতলে উঠল। দশ ফুট উঁচু দেয়াল তৈরি করে এগোল দক্ষিণে। হ্রদ ওদিকে সরল। বাড়তি পানির

চাপে অগভীর জায়গার পানি ফুলে উঠল, ফলে জলোচ্ছ্বাসের ঢেউ আরও উঁচু হলো, বেড়ে গেল গতিবেগ! এখন ওটার সামনে পড়া মানে নিশ্চিত মৃত্যু!

রিসার্চ ভেসেল দ্যানিয়ার ব্রিজে রানা ও রেন্দোরভ মনিটর স্ক্রিনে দেখল খুনি-ঢেউ। ওল্খন দ্বীপের থ্রি-ডিমেনশনাল ম্যাপে দেখা গেল সাক্ষাৎ মৃত্যু ছুটে আসছে দক্ষিণে! কমলা বিন্দুগুলো সরু একটা রেখা ধরে লাফিয়ে উঠল, তারপর দ্রুত সরল।

‘শুধু সার্ফেস পডগুলো ডায়াল করুন, কার্ক,’ বলল রানা। ‘দেখা যাক ওপরে কী ঘটছে।’

দ্রুত হাতে কম্পিউটারে নির্দেশ লিখলেন কার্ক। প্রায় সঙ্গে সঙ্গে স্ক্রিনে দুই ডিমেনশনাল ইমেজ ফুটল। ব্রিজের সবাই মনিটরের উপর চোখ রেখেছে। পডগুলো হ্রদের সারফেসের পাঁচ মাইল বিস্তৃত একটা এলাকা নিয়ে নড়ছে। এর পরের পডগুলো নড়তে দেখা গেল। প্রকাণ্ড ঢেউ উত্তরদিক থেকে দক্ষিণে আসছে!

‘ওই ঢেউ গড়িয়ে আসছে, কোনও সন্দেহ নেই,’ বললেন কার্ক। ‘ওটার ধাক্কা খেয়ে সেলারগুলো পনেরো মিটার উপরে উঠছে!’ আরেকবার মেযারমেন্ট পরীক্ষা করলেন তিনি। রানা ও রেন্দোরভের দিকে চেয়ে আস্তে করে মাথা নাড়লেন, মুখ গম্ভীর।

‘ল্যাগুন্লাইড ওরকম ঢেউ তৈরি করে,’ বললেন রেন্দোরভ। ইলেকট্রনিক ইমেজ দেখছেন, পরিষ্কার বুঝলেন কী আসছে। বাক্সহেডের সঙ্গে পিন দিয়ে আটকানো মানচিত্র দেখালেন। ‘ওই ঢেউ সেলেনগা নদীর অগভীর জায়গা ডিঙিয়ে দক্ষিণে আসবে। হতে পারে নদীর কারণে মিলিয়ে যাবে ঢেউ।’

আস্তে করে মাথা নাড়ল রানা। ‘অগভীর পানির কারণে আরও উল্টো হবে, সারফেস ফোর্স আরও বাড়বে।’ কার্কের দিকে চাইল রানা। ‘ওটার গতি?’

কার্ক ব্যস্ত হয়ে উঠলেন কম্পিউটার নিয়ে। মাউস দিয়ে দুই

পড়ের মাঝখানের দূরত্ব দেখে নিয়ে বললেন, 'সেন্সারের স্পাইক অনুযায়ী প্রতি ঘণ্টায় এক শ' পঁচিশ মাইল গতিতে আসছে!'

মনে মনে হিসাব কষল রানা। 'তার মানে পনেরো মিনিট, তারপর আমাদের মুখোমুখি হবে।' দ্রুত চিন্তা করছে ও। দ্যানিয়া শক্তপোক্ত জাহাজ, ঢেউয়ের মুখে বোধহয় টিকবে। কিন্তু যারা জেলে-নৌকা বা ট্র্যান্সপোর্ট ভেসেলে আছে? ওগুলো দশ ফুট উঁচু ঢেউ ঠেকাতে তৈরি হয়নি! হৃদের তীরে যারা আছে, সম্পূর্ণ অপ্রস্তুত ভাবে বিপদে পড়বে! জলোচ্ছ্বাস বহু মানুষ সঙ্গে নেবে!

'ডক্টর রেন্দোরভ, ক্যাপ্টেন,' ডাকল রানা। 'চারপাশের বোটগুলোকে সাবধান করুন। সেইশ ওয়েভ দেখার পর সাবধান হওয়ার সময় মিলবে না। তীরের কর্তৃপক্ষের সঙ্গেও কথা বলা দরকার। নিচু এলাকা থেকে লোক সরিয়ে নিতে হবে। হাতে সময় নেই।'

ক্যাপ্টেনকে দৌড়ে পরাজিত করে রেডিওর কাছে পৌঁছে গেলেন ডক্টর রেন্দোরভ, মাইক্রোফোনে সবাইকে সতর্ক করতে শুরু করলেন। রেডিওতে অসংখ্য বক্তব্য শোনা গেল। হে-টে করছে সবাই। অনেকে জানতে চাইছে, বিপদ কীসের? কেউ কেউ ধারণা করছে ডক্টর রেন্দোরভ বেহেড মাতাল অথবা উন্মাদ। রানা দেখল, হাসিখুশি সায়েন্টিস্ট রাগে লাল হয়ে উঠেছেন। ভদ্রলোক কয়েক মুহূর্ত শুনলেন, তারপর মাইক্রোফোনে বাপ-মা তুলে গালাগাল শুরু করলেন। বক্তব্য শেষে রানার দিকে চেয়ে বললেন, 'শালার জেলের দল! শালারা বলে আমি নাকি পাগল!'

কিন্তু কয়েক সেকেন্ড পর চারপাশ থেকে আলাপ শুরু হলো। এক জেলে-নৌকা আয়া বের নিরাপদ জায়গা থেকে জানাল, একটু আগে বিশাল এক ঢেউ তাদের ডুবিয়ে দিচ্ছিল। একটুর জন্য বেঁচেছে তারা। লোকটা দ্রুতগতিতে কথা বলে চলেছে।
আশুন নিয়ে খেলা-১

বিনকিউলার দিয়ে দিগন্তে চোখ রাখল রানা। ওখানে কালো রঙের কিছু জেলে-নৌকা ভাসছে। সব লিস্ত্ভিয়াস্কার নিরাপদ বন্দরের দিকে ছুটছে। ছোট এক মালবাহী জাহাজ ও হাইড্রোফয়েল ফেরি নৌকাগুলোকে পাশ কাটিয়ে গেল।

‘আপনি যথেষ্ট মনোযোগ পেয়েছেন, রেদোরভ,’ মৃদু হাসল রানা।

‘হ্যাঁ, তা বলা যায়,’ মস্ত শ্বাস ফেললেন বিজ্ঞানী। ‘আসলে লিস্ত্ভিয়াস্কার পুলিশ অ্যালাট ইশ্যু করেছে। হ্রদের চারপাশের স্টেশনগুলো এবার লোক সরিয়ে নেবে। আমাদের আর কিছু করার নেই।’

‘এবার রওনা হতে হয় আমাদের,’ বলল রানা।

‘ফুল-স্পিডে লিস্ত্ভিয়াস্কার দিকে,’ বললেন দ্যানিয়ার ক্যাপ্টেন। জাহাজ ঘুরছে, গতি বাড়িয়ে শহরের দিকে ফিরছে।

ক্যাপ্টেনকে দ্রুত কিছু বলল রানা।

জোসেফ কার্ক একটা মানচিত্র দেখছেন, নির্দিষ্ট একটা জায়গায় তর্জনী ঠুকলেন। বৈকাল হ্রদের নীচের অংশ ওটা। জলরাশি ওখানে পশ্চিমে বাঁক নিয়েছে।

‘টেউ এলে আমাদের উচিত এখানে থামা,’ বললেন তিনি। ‘পুরো ধাক্কা এখানে লাগবে না।’

‘ক্যাপ্টেনকে জানিয়েছি,’ বলল রানা।

‘আমরা লিস্ত্ভিয়াস্কা থেকে আঠারো মাইল দূরে,’ বললেন রেদোরভ। ব্রিজের জানালা দিয়ে পশ্চিম তীর দেখছেন। ‘মনে হয় না টেউয়ের আগে পৌঁছুতে পারব।’

লিস্ত্ভিয়াস্কা কান ফাটিয়ে বাজছে এয়ার-রেইড সাইরেন। বাসন্দারা ভীত-চকিত। যাদের নৌকা ছোট, পানি থেকে তুলে নিল। বড় নৌযানগুলোকে ডকের সঙ্গে শক্ত করে বাঁধা হলো। স্কুলের শিক্ষার্থীদের ছুটি দেয়া হলো, পইপই করে বলা হলো কী ঘটতে চলেছে বাবা-মাকে যেন জানায়। ডকের তীরবর্তী

দোকানগুলো বন্ধ হলো। হৃদের চারপাশের সমস্ত মানুষ উঁচু জমিতে গিয়ে উঠল।

পশ্চিম দিগন্তে বিনকিউলার তাক করল রানা। ডজনখানেক নৌকা তীরের দিকে ছুটছে। ওগুলো সব যেন লোহার কণা, ছুটছে লিস্তুভিয়াঙ্কা নামের চুম্বকের আকর্ষণে। দ্যানিয়ার ক্যাপ্টেন চুপচাপ ধরনের মানুষ, নাম ইভান তিতভ। শক্ত হাতে স্টিয়ারিং হুইল ধরে দাঁড়িয়ে আছেন, চোয়াল দৃঢ়বদ্ধ। মনে মনে জাহাজটাকে আরও দ্রুত যেতে বলছেন। ব্রিজের সবাই বারবার উত্তরদিক দেখছে। ওদিক থেকে আসবে মস্ত উঁচু ঢেউ।

জাহাজের রেডার স্ক্রিন লক্ষ করল রানা। ওদের পজিশন থেকে দক্ষিণ-পূবে কী যেন ভাসছে। খুব ছোট।

রেদোরভকে রেডার দেখাল রানা। ‘কেউ একজন ঢেউয়ের খবর জানে না।’

‘গাধাটা বোধহয় রেডিও বন্ধ করে রেখেছে,’ বিড়বিড় করলেন ডক্টর। রানার কাছ থেকে বিনকিউলার নিয়ে পোর্টসাইডের জানালা দিয়ে দেখলেন। অনেক দূরে আবছা ভাবে একটা বিন্দু দেখা গেল। ওটা পূব তীরের দিকে চলেছে।

‘প্রাচীরের ঠিক মাঝখানে পড়বে,’ বললেন রেদোরভ।

মাইক্রোফোনে কয়েকবার বোটকে ডাকল রানা। কোনও সাড়া নেই। মাইক্রোফোন রেখে দিল।

রেদোরভ আস্তে করে মাথা নাড়লেন। চোখে গনগনে আগুন। ‘ওরা জানে না, কাজেই মরবে। কিছু করার নেই আমাদের।’ কিছু বলতে গিয়ে থেমে গেলেন। জানালা দিয়ে জোর থাপ্-থাপ্ আওয়াজ আসছে।

বাইরে চোখ রাখল দু’জন।

ছোট একটা হেলিকপ্টার পানি ছুঁয়ে আসছে। দেখতে না দেখতে ব্রিজের উপর হাজির হলো, স্টারবোর্ডের দিকে সরছে। উড়োযানটা কামোভ কেএ-টোয়েন্টিসিক্স। পুরানো আমলের আগুন নিয়ে খেলা-১

সোভিয়েত সিভিলিয়ান হেলিকপ্টার। ষাট দশকে হালকা ট্রান্সপোর্ট ক্র্যাফট হিসাবে ব্যবহার হতো। এটার রং ধূসর, ফিউজেলাজে লিমনোলজিকাল ইন্সটিটিউটের সিল। চল্লিশ বছর বয়সী হেলিকপ্টার আরও নেমে আসায় পাইলটকে দেখা গেল। লোকটা দাঁতের ফাঁকে মোটা চুরুট গুঁজে রেখেছে।

রেডিওতে ববি মুরল্যাণ্ডের ভারী গলা ভেসে এল: ‘সমস্ত সার্ভে পড ছেড়ে এসেছি, এবার নামার অনুমতি চাইছি। ঢেউ আসার আগেই পাগলা পাখিটাকে বাঁধতে হবে।’

প্রায় গায়ের কাছে ঝুলছে হেলিকপ্টার, পাইলট খুশি মত এদিক-ওদিক দুলিয়ে চলেছে।

ডক্টর রেরদোরভের চেহারা ফ্যাকাসে হয়ে গেল। প্রায় চোঁচিয়ে উঠলেন, ‘ওটা ইন্সটিটিউটের মূল্যবান সম্পদ!’

‘চিন্তা করবেন না, ডক্টর,’ সান্ত্বনা দিল রানা। ‘চাইলে ববি ডোনাটের ফোকর দিয়ে সেভেন-ফোর-সেভেন নিতে পারে।’

‘হেলিকপ্টারটা উনি ডাঙায় রাখলে ভাল করতেন,’ বললেন কার্ক। ‘ঢেউ এলে ডেক থেকে ছিটকে পড়বে।’

‘তা-ই আসলে...’ থেমে গেলেন রেরদোরভ। অন্তর দিয়ে চাইছেন হেলিকপ্টার ব্রিজের কাছ থেকে সরুক।

‘আপনার আপত্তি না থাকলে ওই বোটে যেতে চাই,’ বলল রানা। ‘ওদের সাবধান করা দরকার।’

ওর দিকে অন্য দৃষ্টিতে চাইলেন রেরদোরভ, তারপর আস্তে করে মাথা দোলালেন।

মুখের কাছে মাইক্রোফোন তুলল রানা। ‘ফিউয়েল কেমন আছে, ববি?’

‘আসার আগে পোর্ট বৈকাল এয়ারফিল্ডকে ফতুর করে দিয়ে এসেছি,’ বলল মুরল্যাণ্ড। ‘সাড়ে তিন ঘণ্টা চলবে, যদি ভদ্রলোকের মত চলি। ...কিন্তু পাইলটের সিট এমন কেন? পিছন দিকটা তো শেষ হয়ে গেল!’ প্রায় বিকেল পর্যন্ত হুদের

একপ্রান্ত থেকে আরেক প্রান্তে সার্ভে পড ফেলেছে সে। কামোভ কেএ-টোয়েন্টিসিক্স চালাতে হলে সর্বক্ষণ মনোযোগ দিতে হয়। তাই পশ্চাদেশের ওই অবস্থা...

‘নামাও ওটা, কিন্তু ইঞ্জিন বন্ধ কোরো না,’ বলল রানা।
‘একটা বোটকে সাবধান করতে হবে।’

‘ঠিক আছে,’ কড়কড় করে উঠল রেডিও। হেলিকপ্টার উপরে উঠল, জাহাজের পিছনে গিয়ে নামতে শুরু করল।

‘কার্ক, আপনি রেডিওর পাশে থাকুন, টেউয়ের অবস্থা জানাবেন,’ বলল রানা। ‘আমাদের কাজ শেষ হলে তীরে ফিরব।’

‘আই আই,’ বললেন কার্ক।

দ্রুতপায়ে ব্রিজ থেকে বেরিয়ে এল রানা, একতলা নেমে নিজের কেবিনে ঢুঁ দিল। কাঁধে নীল রঙের একটা ব্যাগ ঝুলিয়ে নিয়ে বেরিয়ে এল। উপর তলায় উঠে এসে জাহাজের স্টার্নের দিকে চলল। বালবের মত দেখতে ডিকমপ্রেসন চেম্বারটাকে পাশ কাটিয়ে এল, সরু সিঁড়ি ভেঙে হেলিপ্যাডে উঠল। কামোভ নামছে, তীব্র বাতাস রানাকে নড়িয়ে দিতে চাইল। মাথা নিচু করে অপেক্ষা করল রানা, কপ্টার নেমে আসছে।

এয়ার ক্র্যাফটটা দেখে ড্রাগনফ্লাইয়ের কথা মনে পড়ল রানার, ছোটবেলায় চুপি চুপি গিয়ে যেগুলোর পিছনটা টিপে ধরত। প্রথম দৃষ্টিতে তিরিশ ফুট লম্বা কপ্টারটা উঁচু ফ্রেমওয়ালা একটা ফিউজেলাজ ছাড়া কিছুই মনে হয় না। ককপিটের পিছনে প্যাসেঞ্জার কেবিন ছিল, এখন ওটা নেই। হেলিকপ্টারটাকে ন্যাংটো লাগছে। টুইন ফ্লাইট কন্ট্রোল বেশিরভাগ জায়গা নিয়েছে। নানা ধরনের উপকণের চিন্তা নিয়ে এ কপ্টার তৈরি করা হয়েছে। পিছনের ডেড স্পেসে একটা বড় জায়গা রেখেছে ট্যাঙ্ক তুলতে। ওই ট্যাঙ্ক দিয়ে ফসলের মাঠে কীটনাশক স্প্রে করা হবে। প্যাসেঞ্জার কেবিন লাগিয়ে নিলে ওটা হয়ে উঠবে আগুন নিয়ে খেলা-১

যাত্রীবাহী। অ্যান্ডুলেন্সও হতে পারে। ইন্সটিটিউট এ জায়গা ব্যবহার করছে মালামালের প্ল্যাটফর্ম হিসাবে। এখন সেখানে কিছু টিউব বেঁধে রাখা হয়েছে। মেরিন-কারেন্ট সার্ভে পড। অনেক উপরে চলছে দুটো রেডিয়াল পিস্টন ইঞ্জিন, কন্সটারের দুই আলাদা কন্সট্রাক্ট-রোটটিং পাখা নিয়ন্ত্রণ করছে। একটার উপর আরেকটা পাখা কেমন যেন বিদঘুটে লাগে। কন্সটারের লেজে পাখা নেই, বদলে আছে স্ট্যাবিলাইজার ও এলিভেটর ফ্ল্যাপগুলো। কামোভ ছোট জাহাজে সহজেই ওঠা-নামা করতে পারে।

ককপিটের পাশে পৌছল রানা। হাতল ধরবার আগেই খুলে গেল দরজা, এক রাশান টেকনিশিয়ান লাফিয়ে নামল। ইশারায় রানাকে সিটে উঠে বসতে বলে হাতে ধরিয়ে দিল রেডিও হেডসেট। লোকটা দৌড়ে প্ল্যাটফর্ম ছেড়ে নেমে গেল। ফুটওয়ায়েলে ব্যাগটা রাখল রানা, তারপর সিটে উঠে বসল। ডানে কাত হলো ববি, দরজাটা ধপ করে আটকে দিল।

ববি মুরল্যাঙকে দেখলে কখনও মনে হয় না সে প্লেন চালাতে পারে। খাটো মানুষ, মোটা হাতওয়ালা ছোটখাটো এক ভালুক, মুখে সর্বক্ষণ চুরুট। মনে হয় না জীবনে কখনও দাড়িগোঁফ কেটেছে। চোখদুটোতে সবসময়ে চিকচিক করছে দুষ্টবুদ্ধি। মস্ত বিপদে পড়লেও ঠোঁটে সবসময় ঝোলে একটুকরো বাঁকা হাসি। বিমান যেমন দুর্দান্ত চালায়, তেমনি চালায় সাবমারসিবল।

‘তোমাদের সতর্কবাণী শুনলাম,’ হেডসেটের মাধ্যমে জানাল সে। ‘আমরা কি ডেউ দেখতে লিস্ত্ভিয়াস্কা চলেছি?’

‘আগে সামাজিক দায়িত্বের টানে সাড়া দিতে হবে। আকাশে ওঠো, দক্ষিণ-পূবে যেতে থাকো, খুলে বলছি।’

চলন্ত জাহাজ থেকে উঠতে শুরু করল কামোভ। দু শ’ ফুট উপরে উঠে পূবদিকে রওনা হলো ববি, ঘণ্টায় পঁচাশি মাইল গতি

তুলে ছুটছে। সেইশ ওয়েভ ও অসতর্ক বোটের কথা জানাল রানা। কিছুক্ষণ পর দিগন্তে ওটা দেখা গেল। দিক ঠিক করে নিল ববি। রেডিওতে দ্যানিয়ার সঙ্গে যোগাযোগ করল রানা।

‘মিস্টার কার্ক, ঢেউয়ের অবস্থা কী?’

‘প্রতি মুহূর্তে গতি আরও বাড়ছে, মিস্টার রানা,’ রুদ্ধশ্বাসে বললেন কার্ক। ‘ঢেউয়ের মাঝখানের উচ্চতা এখন তিরিশ ফুট। সেলেনগা নদীর ডেল্টা সামনে। ঢেউয়ের গতি আরও বাড়ছে।’

‘ধন্যবাদ, মিস্টার কার্ক। তৈরি থাকুন। বোটকে সাবধান করে শহরে ফিরব আমরা।’

‘ঠিক আছে, ভাল থাকুন,’ বললেন কার্ক। হঠাৎ তাঁর মনে হলো, রানার বদলে তিনি নিজে কপ্টারে থাকলে ভাল হতো।

ঢেউ এখনও চল্লিশ মাইল দূরে। পশ্চিমে লিস্ত্ভিয়াস্কার টিলাগুলো দেখা গেল। ঢেউয়ের মাঝ থেকে দ্যানিয়া সরতে পারবে। তবে উপকূলে কেউ নিরাপদ থাকবে না। জোসেফ কার্ক একে একে মিনিট গুনতে লাগলেন, চেয়ে রইলেন ব্রিজের জানালা দিয়ে। গম্ভীর চেহারায় ভাবলেন, সামনে ছবির মত সুন্দর প্রকৃতি, মানুষের বসত, কিন্তু ঢেউ আসবার পর জায়গাটা কেমন হবে?

পাঁচ

‘সঙ্গী জুটেছে,’ আকাশের দিকে আঙুল তাক করলেন বিল উইলসন।

আগেই দেখেছে গ্রেসি মুলার। উইলসন বলায় অন্যরা কাজ আগুন নিয়ে খেলা-১

থামিয়ে চোখ তুলল। ধূসর রঙের খাটো কপ্টারটা পশ্চিম থেকে আসছে। মনে হলো, ওটার গন্তব্য এই বোট।

থ্রেসিদের ফিশিং বোট পূর্ব তীরের দিকে চলেছে, পিছনে সার্ভে গিয়ার। কেউ খেয়াল করেনি, কখন যেন আশপাশের বোটগুলো চলে গেছে।

কপ্টারের উপর চোখ সবার।

কালো বোটের উপর চলে এল কপ্টার, স্থির হলো পোর্ট বিমের উপর। সার্ভে ত্রুয়া প্যাসেঞ্জার সিটে একজনকে দেখল। একহাতে সে মাইক্রোফোন ও হেডসেট দেখিয়ে চলেছে।

‘আমাদের সঙ্গে রেডিওতে কথা বলতে চায়,’ বললেন উইলসন। ‘আমাদের রেডিও ঠিক আছে, ক্যাপ্টেন?’

বিরক্ত ক্যাপ্টেনের জন্য প্রশ্নটা অনুবাদ করে শোনাল বেলোর্ম। জবাবে কড়া স্বরে বলতে শুরু করল ক্যাপ্টেন। হুইল-হাউজে হাত ভরে রেডিও মাইক্রোফোন বের করল, কপ্টারের দিকে উঁচু করল। আরেক হাতে গলা কাটবার ভঙ্গি করছে।

‘ক্যাপ্টেন বলছে দু’বছর হলো তার রেডিও নষ্ট,’ জানাল বেলোর্ম। ‘বলছে, এখানে ওই জিনিস লাগে না, রেডিও ছাড়াই চলে।’

‘এ লোক আমাকে অবাক করেনি,’ বলল এডি।

‘উন্মাদ!’ বললেন উইলসন।

‘মনে হয় আমাদের ফিরতি পথে যেতে বলছে,’ বলল থ্রেসি। কপ্টারের কো-পাইলট ইশারা করছে। ‘বোধহয় সোজা আমাদের লিস্ত্ভিয়াস্কায়ে যেতে বলছে।’

‘লিমনোলজিকাল ইন্সটিটিউটের কপ্টার,’ বলল বেলোর্ম। ‘আমাদের নির্দেশ দেয়ার অধিকার নেই ওদের। আমরা ওদের উপেক্ষা করতে পারি।’

‘লোকটা মনে হয় সাবধান করতে চাইছে,’ আপত্তির সুরে বলল থ্রেসি।

কপ্টার আরেকটু নামল। কো-পাইলট বারবার ইশারা করছে।

‘বোধহয় বলতে চায় ওদের এক্সপেরিমেন্ট এরিয়ায় ঢুকে পড়েছি,’ বলল বলোমা। দু’হাত উপরে তুলে চেষ্টা করে, ‘ওতবাসে, ওতবাসে! যাও! চলে যাও!’

উইণ্ডশিল্ড দিয়ে নীচে চাইল ববি, একটা মেয়েকে নাচতে দেখে অবাক হয়ে হাসল। কিন্তু নাচছে কই? বুড়ো ক্যাপ্টেন এতক্ষণ চেষ্টা করেছে, ওদের বাপ-মা তুলে গালি দিয়েছে।

‘আমরা যা-ই বলতে আসি না কেন, ওরা পছন্দ করছে না,’ বলল ববি।

‘লোকটার মাথায় গোবর, অথবা আনডিস্টিল্ড ভোদকা খায়,’ বলল রানা বিরক্ত কণ্ঠে। ‘ওতেই মগজটা গেছে। বোটের অবস্থা খেয়াল করো।’

ফিশিং-বোটের পোর্টসাইড হাল দেখল ববি। জায়গাটা এত ডেবে গেছে যে, যে-কোনও সময় পানিতে ডুববে বোট। ‘বলা যায় এমনভাবেই ডুবছে ওরা,’ বলল সে।

‘টেউ এলে ওরা শেষ,’ বলল রানা। দেখল দু’পাশে টেউ তুলে প্রাণপণে দক্ষিণে ছুটছে ঝকঝকে সাদা একটা মোটর বোট। সম্ভবত খবরটা একটু দেরিতে পেয়েছে, এখন পালাচ্ছে তড়িঘড়ি। ওটাকে দেখেও কোনও ভাবান্তর দেখা গেল না জেলে বোটের আরোহীদের। ‘তুমি আমাকে ডেকে নামিয়ে দাও, ববি।’

কোনও আপত্তি তুলল না ববি। ভাল করেই জানে, রানা আহত হওয়ার ঝুঁকিটা নেবে, কিন্তু মানুষগুলোকে বিপদে ফেলে ফিরে যাবে না। স্থির হাতে কন্ট্রোল ধরল ববি, ধীরে ধীরে বোট ঘুরে দেখল। এমন জায়গা নেই যেখানে কপ্টার নামানো যায়। নামলে পুরানো বোট দু’টুকরো হয়ে যাবে। হুইল-হাউজের ছাদ থেকে বারো ফুট উপরে উঠেছে মাস্তুল, যেন বর্ষা বাগিয়ে ধরে আগুন নিয়ে খেলা-১

বোট আগলে রেখেছে। কপ্টারের বিয়াল্লিশ ফুট পাখা, ওটাতে আটকালে... নাহ, বোটে নামবার পথ নেই।

‘ওই মাস্তুল আমাদের নামতে দেবে না,’ বলল ববি। ‘হয় তোমার সাঁতরাতে হবে, নইলে বিশ ফুট বেয়ে-ছেয়ে নামতে হবে। তাতে ঠ্যাং ভাঙতে পারে।’

কালো বোটের দিকে চাইল রানা। ডেকে দাঁড়িয়ে কপ্টারের ভাব-চক্কোর দেখছে সবাই, চেহারা য় দ্বিধা-আশঙ্কা। ‘এই ঠাণ্ডা পানিতে সাঁতরাতে চাই না,’ বলল রানা। ‘পারো যদি তো মাস্তুলের উপর নামিয়ে দাও, ফায়ার-ম্যানদের মত চেষ্টা করে দেখি।’

‘তেল-মাখা পিচ্ছিল বাঁশ বেয়ে বাঁদরের নামা?’

প্রিয় বন্ধু মস্ত ঝুঁকি নেবে, ভাল লাগল না ববির। কিন্তু রানা ঠিকই বলেছে, ওই মাস্তুলেই নামা উচিত। কপ্টার নিয়ে খুঁটির মাথার উপর থামবে, ঠিক তখনই রানা ওটা জাপ্টে ধরবে। বাকি পথ সরসর করে নামবে, যদি ফস্কে না পড়ে, হাত-পা না ভাঙে। স্থির জমিতে উড়ন্ত কপ্টার থেকে টাওয়ারে নামা যথেষ্ট কঠিন, আর চলন্ত বোটে অবতরণ প্রায় অসম্ভব একটা কাজ। বোট সর্বক্ষণ দুলছে—মাস্তুল যদি কপ্টারে গুঁতো দেয় সবাই মিলে মরবে! নিজেকে নিজে বলল ববি: খুব সাবধান, লক্ষ্মী ববি! একটু এদিক-ওদিক হলে ফড়িংটা আছড়ে পড়বে!

কামোভ নিয়ে বোটের মাঝখানে সরল ববি, মাস্তুলের দশ ফুট উপরে ঢাকাগুলো স্থির হলো। বোটের সঙ্গে এগিয়ে চলেছে কপ্টার। প্যাসেঞ্জার দরজাটা মাস্তুলের উপরে পৌছতেই বোটের গতির সঙ্গে তাল মিলাল ববি। ধীরে নামতে শুরু করল। মাস্তুলের তিন ফুট উপরে থামল।

‘রানা, বোট উঠছে-নামছে-দুলছে,’ ধীরে ধীরে বলল ববি। ‘বোটের মাস্তুলের ওঠা-নামা বুঝে চট করে নেমেই আবার উঠিয়ে নিতে হবে কপ্টার। ...মাস্তুল বেয়ে নামলে না হয়, আবার বেয়ে

উঠবে কী করে?’

‘আমি ও পথে আসছি না,’ বলল রানা। ‘নেমে বোট থামাব, তারপর নামবে তুমি।’ হেডসেট খুলল ও, পায়ের কাছ থেকে নীল ব্যাগটা তুলে নিল। ককপিটের দরজা খুলে যেতেই রোটরের দমকা হাওয়া ওর উপর আছড়ে পড়ল। হাত থেকে ব্যাগ ছেড়ে দিল রানা। হুইল-হাউজের ছাতে পড়ল ওটা, এক ডিগবাজি খেয়ে ওখানেই থামল। দরজা দিয়ে পা দুটো ঝুলিয়ে দিল রানা, হাতের ইশারায় কপ্টার স্থির রাখতে বলল। মাস্তুল সামনে-পিছনে দুলছে। গতিবেগের তালটা বুঝে নিল ও। এক ঢেউ যাওয়ার পর মাস্তুল খানিকক্ষণ থামছে। ওই সময়ের জন্য অপেক্ষা করল ও, তারপর ববিকে হাতের ইশারা করল। সঙ্গে সঙ্গে কপ্টার তিনফুট নামিয়ে দিল ববি। একই সময়ে দরজা থেকে বেরিয়ে গেল রানা।

পরের বিপজ্জনক মুহূর্তটা নষ্ট করল না ববি, দ্রুত কপ্টার তুলে নিল—আশা করল রানা মাস্তুল ধরতে পেরেছে। বোট থেকে সরল সে, সাইড জানালায় রানাকে দেখতে পেল—দু’ হাতে মাস্তুল জাপ্টে ধরে পিছলে নেমে যাচ্ছে।

‘দ্যানিয়া জাহাজ থেকে আমাদের এয়ারবোর্ন ইউনিট, শুনুন,’ জোসেফ কার্কের কণ্ঠ হেডসেটে ভেসে এল।

‘বলুন,’ সাড়া দিল ববি।

‘ওই ঢেউয়ের নতুন খবর দিতে যোগাযোগ করেছি। ঘণ্টায় ওটা এক শ’ পঁয়ত্রিশ মাইল গতিতে আসছে। উচ্চতা চৌত্রিশ ফুট। সেলেনগা নদীর ডেল্টা পেরিয়েছে, কাজেই আশা করা যায় গতি আর বাড়বে না।’

‘আপনি কি এটাকে কোনও ভাল খবর বলবেন?’ বলল ববি। দ্রুত জানতে চাইল, ‘ওটা ঠিক কখন আসছে?’

‘আপনারা যেখানে আছেন, সেখানে আসতে আঠারো মিনিট বাকি। দশ মিনিট পর দ্যানিয়া ঢেউয়ের মুখোমুখি হওয়ার জন্য আগুন নিয়ে খেলা-১

থামবে। আপনারা তৈরি থাকুন, যে-কোনও সময়ে উদ্ধার কাজে আসতে হতে পারে।’

‘আরেকবার বলুন, কার্ক। ওটা আঠারো মিনিট পর আসছে?’

‘হ্যাঁ।’

আঠারো মিনিট। প্রাচীন জেলে-নৌকা এই সামান্য সময়ে কোথায় পালাবে? পানির নীচে তলিয়ে যাবে। ওই বোটের কারও বাঁচবার পথ নেই। তিক্ত হয়ে গেল ববির মন, বিড়বিড় করে বলল, ‘আমি মৃত্যুর মুখে ঠেলে দিয়েছি রানাকে!’

ক্ষণিকের জন্য মাস্তুলের ক্রস-মেম্বারে থামল রানা, চারপাশ দেখল। পুরানো জিপিএস আর রেডিও অ্যান্টেনা ওর নাকের কাছে ঝুলছে। কপ্টার সরে যেতেই দমকা হাওয়া দূর হয়েছে। দুই পা ব্রেক হিসাবে ব্যবহার করে পিছলে নামছে রানা, গতি বাড়তে দিল না। বাকি পথ দ্রুত নামল, ছাদে নেমে ব্যাগটা তুলে নিল। স্টার্ন থেকে হুইল-হাউজের ছাদে ওঠার জন্য ল্যাগব্যাগে মই রয়েছে। দ্রুত পায়ে ওটা বেয়ে ডেকে নামল রানা। সার্ভে টিমের সবাই অবাক হয়ে দেখছে ওকে।

‘আপনাদের মাথা খারাপ হয়েছে?’ রাশান বলল বলোমার্মা। চোখে আগুন। ‘আমি জানতে চাই আপনি এখানে কী করছেন!’

‘প্লিজ, ইংরেজিতে বলবেন?’ বলল থ্রেসি।

‘আর এই হামলার মানে কী,’ বলল বলোমার্মা। রানাকে সন্দেহ ও অবিশ্বাস নিয়ে দেখছে।

‘আপনারা মস্ত বিপদে আছেন,’ বলল রানা।

বলোমার্মার পিছনে হুইল-হাউজের দরজায় এসে দাঁড়িয়েছে ক্যাপ্টেন, মেশিন গানের মত গালাগাল ছুঁড়ছে।

‘কমরেড,’ দ্রুত রাশান বলল রানা, ‘আরেক ফোঁটা ভোদকা যদি খেতে চাও, আগে জান বাঁচাতে হবে তোমার। এফুগি তোমার ফালতু বালতিটা লিস্ত্ভিয়াঙ্কার দিকে ঘুরিয়ে নাও।’

রানার কণ্ঠ গুড়গুড় করে উঠতেই থমকে গেল লোকটা।

‘সমস্যাটা আসলে কী?’ নরম স্বরে বলল গ্রেসি। রুঢ় পরিবেশটা সামলাতে চাইছে।

‘ওলখন দ্বীপে পানির নীচে ভূমিধস হয়েছে,’ বলল রানা। ‘ওটার কারণে বিরাট এক ঢেউ তৈরি হয়েছে। ত্রিশ ফুট উঁচু ওটা, এদিকে আসছে এখন। রেডিও ব্রডকাস্টেররা হ্রদের চারপাশের সবাইকে সাবধান করেছে। কিন্তু আপনাদের সম্মানিত ক্যাপ্টেন তা শুনতে পাননি।’

চমকে গেছে সবাই। বলোমার চেহারা ফ্যাকাসে হয়ে গেল, নিচু স্বরে ক্যাপ্টেনকে কী যেন বলছে। তার বক্তব্য শেষ হতে কোনও প্রতিবাদ করল না ক্যাপ্টেন, দু’ সেকেণ্ড পর হুইল-হাউজে ঢুকল। থ্রটল পুরো খুলে দিল, পুরানো ইঞ্জিন তীব্র প্রতিবাদ করল। বোট লিস্তভিয়াঙ্কার দিকে ঘুরিয়ে নেয়া হলো। স্টার্নের ডেকে সার্ভে গিয়ার পানি থেকে তুলতে ব্যস্ত হয়ে উঠল এডি ও উইলসন। বোটের গতি ধীরে ধীরে বাড়ছে।

আকাশে চোখ তুলে অবাক হলো রানা। কখন যেন বোটের উপর থেকে সরে গেছে ববি! পশ্চিমে চলেছে, দেখতে দেখতে দিগন্তে হারিয়ে গেল! এ বোট ঢেউকে হারাতে পারবে না, রানা চেয়েছিল ববি ওদের ধারেকাছে থাকুক। মনে মনে ভাগ্যকে অভিশাপ দিল রানা, বুদ্ধি করে ছোট কোনও রেডিও নিয়ে আসা উচিত ছিল!

‘আমাদের সাবধান করতে এসেছেন বলে ধন্যবাদ,’ বলল গ্রেসি, রানার সামনে এসে দাঁড়াল। হাসতে চাইল, কিন্তু ভালভাবে হাসি ফুটল না। হ্যাণ্ডশেক করবার জন্য হাত বাড়িয়ে দিল। ‘খুব ঝুঁকি নিয়ে নেমেছেন।’

ডাচ মেয়েটার সঙ্গে সোহানার কোথায় যেন মিল, ভাবল রানা। হাত মেলিয়ে টের পেল শক্ত করে হাত ধরেছে মেয়েটা। রানা বুঝল, এ মেয়েকে পছন্দ করা যায়। ছোবল দেবে না।

আগুন নিয়ে খেলা-১

‘আমাদের সতর্ক করেছেন বলে ধন্যবাদ,’ বলল বলোমা, কণ্ঠে দুঃখপ্রকাশের সুর। স্বরটাও আগের চেয়ে অনেকটা উষ্ণ। সবাই দ্রুত রানার সঙ্গে পরিচিত হলো। বলোমা বলল, ‘আপনি তো লিমনোলজিকাল ইন্সটিটিউটের রিসার্চ জাহাজ থেকে আসছেন?’

‘হ্যাঁ। আমরা লিস্ত্ভিয়াস্কার দিকে ফিরছিলাম। আপনাদের বোট একমাত্র নৌযান, যেটাকে আমরা সতর্ক করতে পারিনি।’

‘তোমাকে বলিনি এই বোটে সমস্যা থাকতেই হবে?’ ফিসফিস করে এডিকে বললেন উইলসন।

‘বোটের ক্যাপ্টেনেরও বিরাট সমস্যা আছে,’ আফসোস করে মাথা নাড়ল এডি।

‘মিস্টার রানা, মনে হয় আমরা একইসঙ্গে টেউয়ের মধ্যে পড়ব,’ বলল বলোমা। ‘ওটা কতক্ষণ পর আসতে পারে?’

বামহাত তুলে ডাইভ রোলেস্‌স ঘড়িটা দেখল রানা। ‘আমরা দ্যানিয়া ছাড়বার আগের হিসাব অনুযায়ী... বড়জোর পনেরো মিনিট।’

‘আমরা লিস্ত্ভিয়াস্কা পর্যন্ত পৌঁছব না,’ নিচু স্বরে বলল বলোমা।

‘হুদ দক্ষিণে চওড়া হয়েছে, কাজেই টেউ পশ্চিমদিকে এসে কিছুটা গতি হারাবে,’ বলল রানা। ‘আমরা লিস্ত্ভিয়াস্কার যত কাছে যাব, টেউয়ের প্রকোপ তত কমবে।’

লঙ্কর-মার্কী বোটে দাঁড়িয়ে থাকল রানা, মনে মনে জানে, ওরা টেউয়ের তলে চাপা পড়বে। বিল্জ পাম্প কাজ করে না বললেই চলে, এমনিতেই পানিতে ভরে উঠছে বোটের খোল। ইঞ্জিনটা এখন পর্যন্ত ঠির-ঠির করে চলছে। বোটের যেদিকে চাইল রানা, পাটাতনের চারপাশে পচা কাঠ। বোধহয় খোলের অবস্থা এর চেয়ে খারাপ।

‘আপনারা জলদি তৈরি হোন,’ বলল রানা। ‘সবাই লাইফ

জ্যাকেট পরে নিন। কিছু হারাতে না চাইলে ডেক বা গানেরের সঙ্গে বাঁধতে পারেন।’

গ্রেসির সাহায্য নিয়ে ব্যস্ত হয়ে উঠল উইলসন ও এডি, সার্ভে ইকুইপমেন্ট বেঁধে রাখছে। বলোম্বা হুইল-হাউজে ঢুকেছে, কিছুক্ষণ পর পুরানো কয়েকটা লাইফ জ্যাকেট নিয়ে ফিরল।

‘বোটে মাত্র চারটে লাইফ-জ্যাকেট,’ চড়া স্বরে বলল সে। ‘ক্যাপ্টেন বলেছে সে পরবে না। তবুও একটা কম পড়ছে।’ রানার দিকে তাকাল সে, চোখ যেন বলছে, তুমি এসে না জুটলে আমাদের হয়ে যেত এতেই।

‘চিন্তা নেই, আমি সঙ্গে নিয়ে এসেছি,’ বলল রানা। সার্ভে টিম জ্যাকেট পরতে ব্যস্ত হয়ে উঠল। জুতো ও পোশাক খুলে ফেলল রানা, ডাফল ব্যাগ থেকে বেরুল নিওপ্রিন ড্রাই সুট। পরে নিল।

‘ওই আওয়াজ কীসের?’ চমকে উঠল গ্রেসি।

মৃদু ভাবে আসছে শব্দ। মনে হলো বহুদূরে গর্জাচ্ছে মেঘ। কিন্তু থামছে না, পানির উপর দিয়ে ভেসে আসছে গুরুগম্ভীর ধমক। রানা মানসিক ভাবে তৈরি। ভাবল, পাহাড়ি এলাকায় মালগাড়ি বাঁক নিলে এমন আওয়াজ হয়। চাপা গুড়গুড় শব্দ বাড়ছে ধীরে ধীরে।

আওয়াজটা রানাকে জানিয়ে দিল কী ঘটবে। ঢেউয়ের গতি বেড়েছে, ক্ষমতাও! জোসেফ কার্ক সঠিক হিসাব কষতে পারেননি, সময়ের আগেই আসছে জলোচ্ছ্বাস!

‘ওই এল!’ দূরে আঙুল তাক করল এডি।

‘বিশাল! এত উঁচু!’ শ্বাস আটকে ফেলল গ্রেসি।

সার্ফাররা যেমন ঢেউ খোঁজে, ওই জলোচ্ছ্বাস তেমন নয়, চূড়ায় সাদা ফেনা নেই, বিরাট একটা ব্যারেলের মত গড়িয়ে আসছে তরল মৃত্যু! এক তীর থেকে আরেক তীর পর্যন্ত চওড়া! আসছে তো আসছেই! এখনও বিশ মাইল দূরে, তবে দেখলে

মনে হয়, মস্ত কোনও পাহাড়! চল্লিশ ফুট উঁচু! মরণ-ঢেউয়ের সঙ্গে আসছে গুড়গুড় আওয়াজ! পরিস্থিতি বুঝে দমে গেল সবাই।

‘বলোমা, ক্যাপ্টেনকে ঢেউয়ের দিকে বো তাক করতে বলুন, বলল রানা।’

কিছু বলতে হলো না, লোকটা হুইল-হাউজের দরজায় দাঁড়িয়েছে, চোখদুটো দশ টাকার রসগোল্লা হয়ে উঠেছে। দ্রুত হুইলের কাছে ফিরল, ঢেউয়ের দিকে বোট তাক করতে শুরু করল। রানা জানে, ওদের কিছু করবার নেই, সব নির্ভর করছে পচা খোল টিকবে কি না, তার উপর! বোট টিকবে হয়তো, কিন্তু পেট ভরা পানি ওদের ডুবিয়ে দেবে। সবাইকে বাঁচাবার চিন্তা এল রানার—যতক্ষণ শ্বাস, ততক্ষণ আশ। প্রথম চ্যালেঞ্জ সবাইকে নৌকার উপর রাখা। ডেকের চারপাশ দেখল রানা, চোখ পড়ল স্টারবোর্ডে। গানেলের কাছে পুরানো জাল গুটিয়ে রাখা।

‘উইলসন, এডি, আমার সঙ্গে হাত লাগান,’ বলল রানা।

তিনজন মিলে গানেল থেকে জাল সরিয়ে নিল, হুইল-হাউজের বান্ধহেডের সঙ্গে ঠেসে দিল। উইলসন এক প্রান্ত নিয়ে স্টারবোর্ডের রেলিঙে বাঁধল। পোর্টের স্টানশানের সঙ্গে আরেক প্রান্ত বাঁধল রানা।

‘ওটা দিয়ে কী হবে?’ জানতে চাইল গ্রেসি।

‘ঢেউ এলে সবাই জাল জাস্টে ধরে শুয়ে থাকব। তাতে আছড়ে পড়ে মরব না আমরা। শক্ত করে ধরলে ভেসেও যাব না।’

বোট অগ্রসরমান ঢেউয়ের মুখোমুখি করেছে ক্যাপ্টেন। সবাই জালের উপর উপুড় হয়ে শুয়ে পড়ল। এডি আছে রানার পাশে, ফিসফিস করে বলল, ‘খেলা শেষ হতে চলল, মিস্টার রানা। তবুও আপনাকে ধন্যবাদ। আমরা সবাই জানি বুড়ো

নৌকা আমাদের নিয়ে ডুববে। আপনিও জানেন। তার পরেও নিজের নিরাপত্তা ভুলে এসেছেন আমাদের বাঁচাতে।’

‘মরার কথা ভাবতে হয় না,’ নিচু স্বরে বলল রানা। ওর কণ্ঠে দৃঢ় প্রতিজ্ঞা বাজল।

চেউয়ের আওয়াজ দ্রুত বাড়ছে। পানির প্রাচীর এখন মাত্র পাঁচ মাইল দূরে! জেলে-নৌকা ওটার দিকে চলেছে! সবাই মানসিক ভাবে প্রস্তুতি নিল। কেউ কেউ নীরবে প্রার্থনা করছে। প্রায় সবাই ভাবছে মৃত্যুটা কীভাবে ঘটবে। পানির গর্জন কান বধির করে দিতে চাইছে। ওরা কেউ কপ্টারের আওয়াজ শোনেনি। কামোভ যখন পোর্টসাইড থেকে মাত্র এক শ’ গজ দূরে, ধড়মড় করে উঠে বসলেন উইলসন, ‘এই আওয়াজ আবার কীসের?’

‘সবাই চেউয়ের দিক থেকে চোখ সরিয়ে আকাশ দেখল। কপ্টারটা দ্রুত ছুটছে। অবাক হলো সবাই, চপারের বিশ ফুট নীচে ব্যারেলের মত জিনিসটা কেবল দিয়ে আটকে রাখা হয়েছে। স্রোতের তিন ফুট উপর দিয়ে ছুটে আসছে। রানা ছাড়া সবাই ভাবল—কপ্টারের পাইলট বন্ধ উন্মাদ, ওই বিরাট ব্যারেল দিয়ে কী করবে? ডুবে যাওয়ার এই শেষ মুহূর্তে বোটের কী দিতে এল!

শুধু রানা হাসছে। পেট-মোটা জিনিসটা কপ্টারের নীচে ঝুলছে। জাহাজের ডিকমপ্রেসন চেম্বার ওটা, হেলিপ্যাডে উঠবার সময় ওটাকে পাশ কাটিয়েছিল ও। কোনও ডাইভিং অ্যাক্সিডেন্ট হলে ওটা লাগতে পারে, তাই সঙ্গে আনা হয়। হঠাৎ চট করে মনে পড়েছে ববির, ওটা সাবমারসিবলের কাজ করবে—বোটের সবাই ওটার ভিতর ঢুকলে বাঁচবে। লাফ দিয়ে উঠে দাঁড়াল রানা, ববির উদ্দেশ্যে হাত নাড়ল—বোটের স্টার্নে চেম্বার নামিয়ে দিতে বলছে।

পর্বতের মত চেউ এগিয়ে আসছে! ওদিকে দ্রুত ছুটে এল আগুন নিয়ে খেলা-১

ববি, স্টার্নের উপর থামল। চেম্বার এদিক-ওদিক দুলছে। ওটা থামা পর্যন্ত অপেক্ষা করল ববি, তারপর তিন ফুট দ্রুত নেমে ডেকে নামিয়ে দিল। এক টনি চেম্বারের ভার সহ্য করল না পচা কাঠ, থ্যাচ করে পাঁচ ইঞ্চি ডেবে গেল। এরপর আর ভাঙল না। হাইপারব্যারিক চেম্বার তৈরি করা হয়েছে চারজনের জন্য। স্টার্নের পুরো জায়গা জুড়ে বসেছে। ডেক ওখানে পানির নীচে তলিয়ে গেল।

কেবল থেকে হুক দুটো খুলে দিল রানা, লাফিয়ে চলে গেল পাশের রেলে, ববির উদ্দেশে হাত নাড়ল। সঙ্গে সঙ্গে কণ্টার নিয়ে সরে গেল ববি। খানিকটা দূরে ভাসছে। দেখতে চায় কী ঘটে।

‘এ জিনিস এনে ফেলল কেন?’ জানতে চাইল বলোর্মা।

‘এটা আপনাদের বাঁচাবে,’ বলল রানা। ‘সবাই উঠে পড়ুন। হাতে সময় নেই।’

একবার উত্তরদিক দেখল রানা। তরল প্রাচীর ড্রামের মত গড়িয়ে আসছে, আর এক মাইল দূরে! ডিকমপ্রেসন চেম্বারের গোলাকার হ্যাচ খুলল ও, তাড়া দিল। সবার আগে ভিতরে ঢুকল থ্রেসি। এরপর উইলসন ও এডি। বলোর্মা দ্বিধান্বিত, চামড়ার একটা থলি বুকের সঙ্গে জাস্টে ধরেছে, দু’সেকেণ্ড পর এডির পিছু নিল।

‘তাড়াতাড়ি!’ প্রায় ধমক দিল রানা। ‘লাগেজ বাদ দিন!’

প্রকাণ্ড চেউয়ের দিকে চেয়ে আছে ক্যান্টেন, হুইল ছেড়ে দৌড়ে এল। বলোর্মার পর ঢুকল সে। হ্যাচ বন্ধ করছে রানা, বলোর্মা বলল, ‘আপনি আমাদের সঙ্গে আসছেন না?’

‘পাঁচজনই বেশি, তা ছাড়া বাইরে থেকে কাউকে চেম্বার সিল করতে হবে,’ বলল রানা।

‘কিন্তু... আপনি এভাবে...’ কিছু বলতে যাচ্ছিল থ্রেসি, বাধা দিল রানা।

‘পিছনে ব্ল্যাক্‌স্ট আর প্যাডিং পাবেন। ওগুলো গায়ে জড়িয়ে নিন সবাই। দু’হাতে রেল ধরে রাখবেন। কোনও ভয় নেই, ঢেউ পার হয়ে গেলেই ভেসে উঠবেন।’

ঢব করে ধাতব আওয়াজ হলো, হ্যাচ বন্ধ করে লকিং মেকানিজম আটকে দিল রানা। ভিতরে যারা রয়েছে, হঠাৎ টের পেল, আওয়াজ অনেক কমে গেছে। পুরু কাঁচের ওপাশ থেকে ঝাপসা আলো আসছে।

পোর্টহোলের মুখোমুখি বসেছে গ্রেসি, রহস্যময় মানুষটাকে দেখল। হঠাৎ ওদেরকে বাঁচাতে আকাশ থেকে নেমে এল মানুষটা, কিন্তু নিজের জীবন দিতে হচ্ছে এখন! দেখতে পেল মাসুদ রানা ব্যস্ত হয়ে ডাফল ব্যাগে কী যেন খুঁজছে। গানেলের পাশে চলে গেল, তারপর কালো অন্ধকার গ্রাস করল তাকে।

হঠাৎ ঘুটঘুটে আঁধার নেমে এল! আকাশ ছোঁয়া ঢেউ হাজির হয়ে গেছে! ওরা ব্যারеле ঢুকেছে দু’মিনিটও হয়নি, ভাবল গ্রেসি।

জলোচ্ছ্বাস চড়াও হলো বোটের উপর! ডিকমপ্রেসন চেম্বারে যারা রয়েছে তারা তিনতলা উঁচু ঢেউয়ের নীচে তলিয়ে গেল!

দু’ শ’ ফুট উপর থেকে দেখছে ববি মুরল্যাণ্ড। রানা ঢুকল না চেম্বারে, বাইরে দাঁড়িয়ে লক করছে চেম্বার। আর সময় নেই, এসে পড়েছে জলোচ্ছ্বাস। গাল কুঁচকে গেল ওর। নিজ চোখে দেখতে হচ্ছে ওকে প্রাণাধিক বন্ধুর মৃত্যু। অথচ এই নিশ্চিত মৃত্যু ঠেকানোর কোনও উপায়ই নেই ওর! কত বড় বড় বিপদের মুখে ঝাঁপিয়ে পড়ে যে বন্ধু বার বার ওর প্রাণ বাঁচিয়েছে, আজ তার মহাবিপদে কিছুই করতে পারছে না ও! নীচের ঠোটটা কামড়ে ধরল ববি, বিকৃত হয়ে গেল চেহারা। গাল বেয়ে দুফোঁটা তপ্ত অশ্রু নেমে এসে হারিয়ে গেল দাড়ির জঙ্গলে।

পর্বত সমান ঢেউ এসে ঝাঁপিয়ে পড়ল কালো নৌকার উপর! আগুন নিয়ে খেলা-১

নৌকা তখনও চলছে, গলুইটা তরল প্রাচীরে গুঁতো খেয়ে খাড়া ভাবে উঠতে চাইল। কিন্তু পচা কাঠ প্রচণ্ড চাপ সহ্য করতে পারল না, মুহূর্তে হাজার টুকরো হলো নৌকা! এক সেকেণ্ড আগে ওটা ছিল, হঠাৎ আর কিছুই থাকল না!

রানাকে বিস্ময় পানিতে অনেক খুঁজল ববি। কোথাও নেই ও! ডিকমপ্রেশন চেম্বারটাও নেই! ঢেউ সরে যাওয়ার পর ওই জায়গা কিছুটা শান্ত হলো। জলোচ্ছ্বাস বোটকে মাঝখান থেকে দু'টুকরো করেছে, গলুইয়ের অংশ এখনও ভাসছে! স্টার্নের অংশ ডিকমপ্রেশন চেম্বার সহ কোথায়, কে জানে! গলুই আধ মিনিট আকাশের দিকে তাক হয়ে থাকল, তারপর কাত হয়ে ডুবে গেল পানিতে! হৃদের গভীর থেকে বুদ্ধ উঠল কয়েকটা!

ছয়

প্রচণ্ড গর্জন তুলে এসে পড়ল জলোচ্ছ্বাস। দুলে উঠল বোট। চোঁচিয়ে বলল গ্রেসি, 'শক্ত করে রেল ধরুন সবাই!'

ওর কথা শেষ হবার আগেই ভয়াবহ ঢেউ আছড়ে পড়ল বোটের উপর। প্রচণ্ড ঝাঁকি খেল চেম্বার। বাক্সের দু'পাশে রেলিং, ওগুলো শক্ত করে ধরেছে সবাই। ভয় পেল, মিসাইলের মত উড়াল দেবে। বন্ধ জায়গায় ছিটকে পড়লে মরণ! সময় যেন স্থির হয়ে গেছে। পোর্টহোল দিয়ে দেখা গেল বিশাল ঢেউ বেয়ে উঠতে চাইল বোট, কিন্তু পায়ের নীচ থেকে জোরাল আওয়াজ অনুভব করা গেল! হুড়মুড় করে ভেঙে পড়ছে কিছু! মুহূর্তে দু'টুকরো হলো বোট! গলুইয়ের সামনের অংশ ঢেউ বেয়ে ওঠার

চেষ্টা করল, কিন্তু পিছনের ভারী অংশের চাপে মট করে দুটুকরো হলো বোট, তারপর বিস্ফোরিত হলো। পরমুহূর্তে প্রবল ঢেউয়ের নীচে তলিয়ে গেল চেম্বারসহ গোটা স্টার্ন!

থ্রোসির মনে হলো স্লো মোশন ছায়াছবি দেখছে। প্রথমে ধাক্কা খাওয়ার পর মনে হয়েছে উড়ে চলেছে ওরা, কোনও দানব চেম্বারটা কাঁধে তুলে নিয়েছে! নানাদিকে ছিটকে পড়েছে ওরা—চারপাশে কাতর ধ্বনি, গোঙানি! ভিউপোর্টে এতক্ষণ ঝাপসা আলো ছিল, এবার আলোও হারিয়ে গেল! চারপাশে শুধু গাঢ় আঁধার!

ওরা জানে না প্রকাণ্ড ঢেউ ওদের তুলে নিয়ে উল্টে ফেলেছে, বোটের স্টার্ন চড়াও হয়েছে চেম্বারের উপর! সঙ্গে রয়েছে ভারী ইঞ্জিন কম্পার্টমেন্ট ও ড্রাইভশাফট, চেম্বারটাকে তলিয়ে নিয়ে চলেছে! জায়গাটা পেরিয়ে গেছে জলোচ্ছ্বাস, কিন্তু বোটের ধ্বংস-স্তুপ আর কখনও ভাসবে না! বোঝা গেল, চেম্বারটা কারও জীবন রক্ষা করবে না, এখন ওটা পাঁচজন জীবন্ত মানুষের কফিন! শীতল এই হৃদ এখানে খুবই গভীর, তলদেশ অনেক নীচে!

ভারী স্টিলের চেম্বার তৈরি করা হয়েছে থার্মি অ্যাটমসফিয়ার সহ্য করবার মত করে, অর্থাৎ এক হাজার ফুট পানির নীচ পর্যন্ত নিরাপদ—কিন্তু বোট যেখানে ডুবেছে, হৃদের গভীরতা সেখানে তিন হাজার ফুটের বেশি! চেম্বার তলদেশে পৌঁছবার অনেক আগেই দুমড়ে-মুচড়ে যাবে! বাড়তি ওজন না থাকলে পাঁচজনকে নিয়েও ভেসে উঠত, কিন্তু অদৃষ্টের পরিহাস, বোটের স্টার্ন এখন ওটার ঘাড়ে চেপে নামিয়ে নিয়ে চলেছে!

ভিউপোর্ট থেকে আলো হারিয়ে যেতেই থ্রোসি বুঝে নিয়েছে, তলিয়ে গেছে ওরা! একটু আগে মিস্টার রানা কী বলেছে মনে পড়ল ওর। গম্ভীর মানুষটা বলেছে ওরা একটু পর ভেসে উঠবে। তার মানে এই জিনিসটার ভেসে ওঠার কথা। চেম্বারে সামান্য আগুন নিয়ে খেলা-১

পানিও ঢোকেনি। তারপরও ভাসছে না। তার মানে, অন্য কোনও শক্তি এটাকে নীচে নিয়ে যাচ্ছে!

‘যদি সম্ভব হয় আপনারা চেম্বারের এদিকে চলে আসুন,’ নিজেও থ্রেসি এক প্রান্তে সরল। ‘এক দিক থেকে আরেক দিকে ওজন সরাতে হবে!’

কথাটা শুনেছে সবাই, হতচকিত। হামাগুড়ি দিয়ে থ্রেসির পাশে চলে গেল। অন্ধকারে একজন আরেকজনের জখম পরিচর্যা করছে।

থ্রেসি আন্দাজ করছে, ওরা স্টার্নের শেষ প্রান্তে চাপা পড়েছে। তাই সবাইকে ওখানে সরে আসতে বলেছে। বোটের ইঞ্জিন এখন চেম্বারের মাথার উপর। ওটা ভয়ঙ্কর ওজনদার। পাঁচজন মানুষের ভার আরেক দিকে সরে যাওয়ায় নড়ল চেম্বার, ফলে নড়ে উঠল উপরের বোঝা। ইঞ্জিন কম্পার্টমেন্ট খানিকটা কাত হলো; অন্যের ঘাড়ে চেপে আরামেই ছিল, এবার সামান্য ভারসাম্য হারাল।

নৌকার স্টার্ন চেম্বারটাকে নিয়ে গভীরে নেমে চলেছে। ভিতর থেকে ক্যাঁচকোঁচ আওয়াজ পেল সবাই। পানির চাপ ও উপরের ওজন জিনিসটাকে খতম করছে! হঠাৎ প্লেটের ঝালাই ও রিবেট খসে পড়বে! সঙ্গে সঙ্গে চারপাশের প্রচণ্ড চাপে চিড়ে চ্যাপটা হয়ে মরবে ওরা!

চেম্বারের উপর থেকে ধীরে ধীরে সরছে ওজন, স্টার্নের অংশ আরও কাত হলো। নামছে আরও দ্রুত। চেম্বারের ভিতর থেকে কেউ জানল না, উপরে ইম্পাতের সঙ্গে ইম্পাত ঘষা লাগছে। খ্যাস-খ্যাস একটা আওয়াজ পাওয়া গেল। কাত হওয়া ডেকের তলা থেকে সরছে চেম্বার। উপরের ইঞ্জিন আরও কিছুটা ভারসাম্য হারাল, স্টার্ন নিয়ে আরও দ্রুত নীচের দিকে ছুটল। স্টার্ন ও চেম্বারের বিশ্রী ঘর্ষণের আওয়াজ পাওয়া গেল, তারপর গড়ান দিল চেম্বার! ধ্বংসস্থপ থেকে নিজেকে মুক্ত করে নিয়ে

চল্লিশ ডিগ্রি কাত হয়ে উঠতে লাগল!

যাত্রীদের মনে হলো উল্টো রোলার-কোস্টারে চড়েছে! বুলেটের মত উঠছে ওরা!

আকাশ থেকে কামোভ নিয়ে দেখছে ববি, ওর মনে হলো হঠাৎ পানির নীচ থেকে ওহাইও-ক্লাস সাবমেরিন ট্রাইডেন্ট মিসাইল ছুঁড়েছে! জলোচ্ছ্বাস চলে যেতে দেখেছে ববি, তারপর বোটের বো তলিয়ে গেছে, হ্রদের তলা থেকে উঠেছে কিছু বুদবুদ—কিন্তু এবার পানির আশি ফুট নীচে দেখতে পেল ডিকমপ্রেশন চেম্বারটা। উঠে আসছে! আরও অনেক গভীর থেকে আসছে বলে ওটার গতি প্রচণ্ড, কাত হয়ে সমতলে উঠল! গতি ওটাকে পানি থেকে কয়েক ফুট উপরে ছুঁড়ে দিল। পরমুহূর্তে ঝপাস্ করে পড়ল আবার। কপ্টার নিয়ে অনেক নেমে এসেছে ববি, খেয়াল করল, চেম্বার এখনও এয়ারটাইট, বিস্ফুরক পানিতে সহজ ভঙ্গিতে ভাসছে।

কয়েকবার হাতে-মুখে বাড়ি খেয়েছে থ্রেসি, কিন্তু পোর্টহোল দিয়ে নীল আকাশ দেখে স্বস্তির মস্ত শ্বাস ফেলল। কাঁচে নাক ঠেকিয়ে দেখল ওরা ভালভাবেই ভাসছে। মাথার উপর দিয়ে কালো একটা ছায়া চলে গেল। ধূসর কপ্টারের লেজ দেখেছে ও। চেম্বারের ভিতর সূর্যের রশ্মি ঢুকেছে, সেই আলোয় চারপাশ পরিষ্কার দেখা গেল। ওর চারপাশে মানুষগুলো পড়ে ছিল, এখন উঠে বসছে।

উত্তেজনা-পূর্ণ এই অভিযানে কমবেশি ব্যাথা পেয়েছে সবাই, কিন্তু অবাধ ব্যাপার, কেউ গুরুতর আহত হয়নি। বোটের ক্যাপ্টেনের কপালে বিশ্রী একটা কাটা চিহ্ন দেখা গেল, উইলসন নিতম্বে জোর ব্যাথা পেয়েছেন। এডি, থ্রেসি ও বলোমা আহত হয়নি বললেই চলে।

থ্রেসি এক পলক ভাবল, ওরা যদি বেড ম্যাট্রেসগুলো শরীরে জড়িয়ে না নিত, সবাই মারাত্মক কংকালনের শিকার আশুন নিয়ে খেলা-১

হতো—কটা হাড় ভাঙত কে জানে! হুঁশ হতেই অচেনা ওই লোকটার কথা মনে পড়ল গ্রেসির। মানুষটা ওদের উদ্ধার পাবার ব্যবস্থা করে দিয়েছে, কিন্তু নিজে কি ওই প্রলয়ঙ্কর জলোচ্ছ্বাস থেকে বাঁচতে পেরেছে?

মাসুদ রানা জানে, ওই চেম্বারে আর লোক আঁটবে না। জানে না, ও নিজে বাঁচতে পারবে কি না। ওই মরণ-টেউয়ের বিরুদ্ধে লড়ে কি বাঁচা সম্ভব? সমুদ্র ভালবাসে ও, সুযোগ পেলে ঘুরতে বেরিয়ে পড়ে, সার্কিং করে। ও জানে, টেউ যখন পিঠের উপর দিয়ে এগিয়ে যেতে চায়, ধাক্কা তখন সবচেয়ে কম লাগে। তবে সেটা সাধারণ টেউয়ের বেলায় সত্য—এই প্রলয়তুল্য মহাবিপদের বেলায় নয়। সার্ভে টিমকে ডিকমপ্রেশন চেম্বারে ঢুকিয়ে দিয়ে দ্রুত হাতে ফেসপ্লেট পরে নিয়েছে ও। ওটার সঙ্গে রয়েছে ড্রেইগার রিবিদার ইউনিট। বোটের কিনার থেকে ডাইভ দিয়ে পানিতে নেমে পড়েছে রানা, দ্রুত পা ছুঁড়ে সরতে চেয়েছে যতটা দূরে আর যতটা নীচে সম্ভব। কিন্তু তখন বিশাল টেউ গায়ের উপর! কয়েক সেকেন্ডে দেহি হয়ে গেছে ওর!

সেইশ ওয়েভের প্রচণ্ড টানে ভেসে উঠেছে, ডুবতে পারেনি! একটানে ওকে কোলে তুলে নিয়েছে টেউ, সঙ্গে নিয়ে এগিয়েছে। অনুভূতিটা দ্রুতগতি লিফটে করে নেমে যাওয়ার মত।

বোটের পরিণতি দেখতে পেয়েছে ও, টেউ বেয়ে উঠতে গিয়ে মাজা ভেঙে গেছে ওটার! কিন্তু ও নিজে গাঁথে গেছে টেউয়ের ভিতর। নিজেকে অসহায় লেগেছে, বিশাল পানির দেয়ালের গায়ে যেন ছোট্ট একটা মাকড়সা!

চারদিকে টেউয়ের কল-কল খল-খল ছল-ছল আওয়াজ! পানির লক্ষ কণা ছুটছে চারদিকে! চোখের সামনে এখন আর কিছু দেখা যাচ্ছে না! ধূসর হয়ে গেছে বৈকালের পানি। রিবিদার পিঠে রয়েছে, ফেসপ্লেটও মুখে, ফলে স্বাভাবিক ভাবে

শ্বাস নিতে পারছে। মুহূর্তের জন্য রানার মনে হলো উড়ে চলেছে ও। মনে মনে স্বীকার করল: আশ্চর্য এক অভিজ্ঞতা—জিভ শুকিয়ে গেছে ভয়ে, সেই সঙ্গে মজাও লাগছে দারুণ। ডুব দেওয়ার চেষ্টা করে বুঝতে পারল, ও আসলে পানির মাঝে বন্দি। এই আকাশ-ছোঁয়া ঢেউ ওকে যে-কোনও মুহূর্তে আছড়ে মারবে। হাত-পা ছুঁড়ে কোনও লাভ হবে না। পানির এই প্রচণ্ড শক্ত বাঁধন থেকে মুক্তি নেই! যুদ্ধ করে লাভ নেই বুঝতে পেরে শরীর এলিয়ে দিয়েছে রানা। ভাবটা এমন, আয়েস করে একটু বিশ্রাম করে নিই! ঢেউ ওকে আরও উপরের দিকে ঠেলে তুলছে। দ্রুতগতিতে এগিয়ে যাওয়ার চেতনা মগজ থেকে বিলুপ্ত হয়েছে। টের পেল না, যেখানে লাফিয়ে নেমেছিল, তার থেকে তিন শ' গজ দূরে চলে গেছে মুহূর্তে!

আকাশ বেয়ে উঠে চলেছে রানা, হঠাৎ টের পেল ডান পা পানি ছেড়ে বেরিয়ে গেছে! ফেসপ্রেটের ভিতর দিয়ে সূর্যের রশ্মি চোখে পড়ল। পানির ভিতর থেকে মাথা ভেসে উঠল ওর। সমস্ত শরীর নড়ে উঠল, সামনে থেকে জোর এক টান এল। মুহূর্তে হুঁশ ফিরল রানার, চমকে দেখল ও আছে বিশাল ঢেউয়ের ঠিক মাথার উপর! গড়িয়ে চলেছে ওটা। ত্রিশ ফুট উপর থেকে পড়লে? পানির চাপেই মরতে হবে। টের পেল, আর কয়েক ইঞ্চি এগোলে নীচে গিয়ে পড়বে। ঢেউয়ের চূড়ায় সাদা ফেনা দেখল রানা। তার মানে সময় হয়েছে, পানির এই প্রাচীর আরেক গড়ান দেবে। নীচে গিয়ে পড়া মাত্র হাজার হাজার টন পানি ওর উপর আছড়ে পড়বে।

সঙ্গে সঙ্গে মৃত্যু!

নিজেকে খাড়া রাখল রানা, দু'হাতে দু'দিকের পানি সরিয়ে দিতে চাইল। একইসঙ্গে দু'পা ছুঁড়ল সামনে। প্রাণপণে সাঁতার কেটে পিছিয়ে যেতে চাইল। যে-করে হোক চূড়া থেকে পিছাতে হবে! কয়েক মুহূর্ত পেরিয়ে গেল, তারপর পিছু টান টের পেয়ে আগুন নিয়ে খেলা-১

গেল রানা। সামনের পানিতে আরও জোরে পা ছুঁড়ল। ও যেন কোনও অলিম্পিক সাঁতারু, ঢেউয়ের মাথা থেকে পিছিয়ে থাকতে চাইছে। হাত-পা চলছে মেশিনের মত! দ্রুত এগিয়ে চলেছে ঢেউয়ের প্রাচীর, সঙ্গে টেনে নিতে চাইছে রানার শরীর!

তারপর ঢেউটা হঠাৎ মুঠো থেকে ওকে ছেড়ে দিল! রানার মনে হলো চারপাশ থেকে পানি সরছে! বুঝবার আগেই ডিগবাজি খেল, মাথাটা নীচের দিকে তাক করে দ্রুত নেমে চলেছে। কয়েক সেকেণ্ড পর বুঝল, ঢেউয়ের পিছন ঢাল থেকে পিছলে নেমে চলেছে ও। তবে এবার চার হাত-পা দিয়ে পতন নিয়ন্ত্রণ করতে পারল। ভাবল ধড়াস্ করে নীচে পড়বে, কিন্তু তা ঘটল না। স্রোতের অগ্রগতি ওকে কিছুক্ষণ টানল, তারপর চারপাশ শান্ত হয়ে এল। হার্নেসের সঙ্গে আটকানো ডেপথ্ গজ দেখল রানা। ও আছে বিশ ফুট নীচে। হাত-পা চালিয়ে উঠতে শুরু করল। সমতলে উঠে এসে দক্ষিণ দিক দেখল—প্লাবনের পানি গড়িয়ে চলেছে, বহু দূরের তীরে গিয়ে আছড়ে পড়বে। জলোচ্ছ্বাসের আওয়াজ কমে আসছে, তবে আরেকটা আওয়াজ কানে এল। ঘুরে তাকাল। ববির কামোভ আসছে এদিকে। দিগন্তের চারপাশ দেখল রানা, একটা জেলে-নৌকা নেই কোথাও!

রানার পাশে এসে থামল কপ্টার, এত নীচে নেমেছে যে ঢেউগুলো ওটার ল্যাণ্ডিং হুইল ছুঁয়ে দিল। সাঁতরে ককপিটের পাশে গেল রানা, ততক্ষণে প্যাসেঞ্জার দরজা হাঁ করা হয়েছে। ল্যাণ্ডিং স্কিড বেয়ে উঠল রানা, দরজা পেরিয়ে সিটে বসল। ফেসপ্লেট পুরো খুলবার আগেই ব্যস্ত হয়ে উঠল ববি, কপ্টার নিয়ে উঠতে শুরু করল।

‘কিছু বদমাশ লোক দশে দশ পাওয়ার জন্য উন্মাদ হয়ে ওঠে,’ চওড়া হাসি দিল ববি। প্রিয় বন্ধুকে আস্ত পেয়ে মহা খুশি।

‘এবার দাড়ি-ভরা মুখটা থেকে ভাল কোনও কথা শুনি,’

হাঁপাতে হাঁপাতে বলল রানা। ‘নৌকা গেল কই?’

মাথা নাড়ল ববি। ‘এক পলকে শেষ! ডিকমপ্রেসন চেম্বারও চলে গিয়েছিল ওটার সঙ্গে। কিন্তু বেশ কিছুক্ষণ পর গোলার মত উঠে এসেছে! ভিউপোর্টে কেউ হাত নেড়েছে, কাজেই ধরে নেয়া যায় সবাই ডিকার মধ্যে জ্যাক্ত আছে। দ্যানিয়ার সঙ্গে কথা হয়েছে, ওরা আসছে উদ্ধার করতে।’

‘শেষ সময়ে বুদ্ধি করে চেম্বারটা নিয়ে এসে দারুণ কাজ করেছে, ববি। নইলে সবাই মরত।’

‘টেউ এমন ভাবে এল যে তোমাকে তুলে নিতে পারিনি, দুঃখিত।’

‘আমার কপাল ভাল যে ওই জিনিসের মাথায় চড়ার সুযোগ পেয়েছি,’ বলল রানা। বন্ধুর দিকে চাইল। ‘দ্যানিয়া কেমন করেছে?’

‘লিস্ত্ভিয়াস্কার কাছে টেউ ছিল চোদ্দো ফুট। জাহাজ আরামসে বেরিয়ে গেছে। কার্ক বললেন ডেকের কয়েকটা শেকল এদিক-ওদিক সরেছে, এ ছাড়া সব ঠিক। ...আর ওটাকে শহরই বলো বা গ্রাম, ওটার খানিকটা ক্ষতি হয়েছে।’

ককপিট থেকে সুবিস্তৃত নীল পানির দিকে চাইল রানা, কোথাও ডিকমপ্রেসন চেম্বার দেখল না। ‘আমি কতটা দূরে?’ জিজ্ঞেস করল। টের পেল শরীরের এখানে ওখানে ছ্যাচা খেয়েছে, ব্যথা শুরু হয়েছে।

‘তিন মাইল তো হবেই,’ বলল ববি। ‘যে গতিতে গেলে... তোমাকে সোনার মেডেল দেয়া উচিত।’ কপ্টারের গতি বাড়াল ও, উত্তর দিকে চলেছে। নীচে শুয়ে আছে শান্ত হৃদ। খানিক যেতে সাদা একটা বল দেখা গেল—ওটাই ডিকমপ্রেসন চেম্বার, পানিতে হাবুডুবু খাচ্ছে। ওটার উপর কামোভ থামাল ববি। ‘ট্যাকের বাতাস এতক্ষণে বিমুক্ত হয়ে উঠেছে।’

‘আরও অন্তত দু ঘণ্টা চলবে,’ বলল রানা। ‘দ্যানিয়া আসতে আগুন নিয়ে খেলা-১

কতক্ষণ?’

‘বড়জোর দেড় ঘণ্টা।’ ফিউয়েল ডায়ালের উপর টোকা দিল ববি। কাঁটা নীচের দিকে নেমেছে। ‘ওদের সঙ্গে থাকতে পারছি না আমরা, তেল ফুরিয়ে আসছে।’

ডিকমপ্রেশন চেম্বার আঙুল দিয়ে দেখাল রানা। ‘একবার ওটার পাশে থামো, বলি ওদের বিপদে ফেলে রেখে ভাগছি না।’

‘ওই ঠাণ্ডা পানিতে আবার নামবে?’ এদিক-ওদিক মাথা নাড়ল ববি, কন্সটার নামাতে শুরু করল। ‘রানা, তুমি কি ব্যাঙ?’

‘পর্বত থেকে বরফ গলা পবিত্র পানি নেমেছে, গা-মন পরিষ্কার করে দেবে,’ বলল রানা, ‘তোমার পছন্দ হবে না, দেখে মনে হয় তুমি ছ’ মাসে একবার গোসল করো কি না সন্দেহ। তুমি বরং কন্সটার নিয়ে ভাগো।’ ফেসপ্লেট মুখে টেনে নিয়ে দরজা খুলল রানা। ছোট ছোট ঢেউয়ের পাশে নেমে এসেছে কামোভ। চেম্বারের দশ ফুট দূরে নিঃশব্দে নামল রানা, সাঁতরে চলে গেল পাশে, ভিউপোর্টে নাক ঠেকাল। ভিতরটা প্রায় অন্ধকার।

কন্সটার নিয়ে সরে গেল ববি, পশ্চিম দিকে চলেছে।

ভিউপোর্টে রানার ফেসপ্লেট দেখে চমকে গেল সবাই, আটকে ফেলল শ্বাস। কুচকুচে কালো দুটো মণি চেয়ে রয়েছে ওদের দিকে। মাসুদ রানা!

‘মানুষটা বেঁচে আছে!’ অবাক স্বরে বললু থ্রেসি।

সবাই ভিউপোর্টের চারপাশে ভিড় জমাল। হাত নাড়ছে রানাকে দেখে। ওরা জানে না মাসুদ রানা তিন মাইল দূর থেকে ফিরেছে কন্সটারে চড়ে।

ডান তর্জনী উঁচু করল রানা, তারপর ওটা বুড়ো আঙুলের দিকে ঝুকিয়ে দিল।

‘জানতে চাইছে আমরা সুস্থ আছি কি না,’ বলল এডি।

ভিউপোর্টের পাশে বসেছে বলোমা, মাথা দোলাল সে।

রানার মত করে সিগন্যাল দিল ।

রিস্টওয়াচ দেখাল রানা । আবারও তর্জনী উঁচু করল ।

মাথা ঝাঁকাল বলোম্যা, বুঝেছে । সবাইকে জানাল, 'সাহায্য আসতে এক ঘণ্টা লাগবে ।'

'তা হলে বরং আরাম করে বসি,' বললেন উইলসন । এডির সাহায্য নিয়ে ম্যাট্রেসগুলো নতুন করে বিছিয়ে নিলেন । এবার সবাই বসতে পারবে ।

ভিউপোর্ট ছেড়ে সরল রানা, চেম্বারটা এক পাক ঘুরে দেখল । ভিতরে পানি ঢোকেনি, কোনও ক্ষতিও হয়নি । ডুববে না নিশ্চিত । ওটার ছাদে উঠল রানা, হাত-পা ছাড়িয়ে বসল । চারপাশের পরিবেশ শান্ত । বিকেল হয়ে আসছে । দিগন্তে দ্যানিয়া জাহাজ দেখা দিল, চিমনি থেকে সাদা ধোঁয়া উঠছে ।

পঞ্চগ্ন মিনিট পর জাহাজটা হাজির হলো । ইতিমধ্যে স্টার্নের এক পাশে বুম সরিয়ে এনেছে ববি মুরল্যাণ্ড । ডিকমপ্রেশন চেম্বারের সঙ্গে এখনও কেবল আটকানো, কাজেই রানাকে শুধু ওগুলো ক্রেনের হকের সঙ্গে আটকে দিতে হলো । উঠতে লাগল চেম্বার । ওটার উপর বসে থাকল রানা । চার মিনিট পর দ্যানিয়ার স্টার্নের উপর নামল চেম্বার । স্কিডগুলো মেঝে স্পর্শ করতেই লাফিয়ে নামল রানা, লক করা হ্যাচ খুলে দিল । জোসেফ কার্ক ব্রিজ ছেড়ে ছুটে এলেন, হ্যাচের ভিতরে মাথা ঢুকিয়ে দিলেন । দু' হাতে থ্রেসিকে বেরিয়ে আসতে সাহায্য করলেন । ওর পর বলোম্যা । একে একে বেরিয়ে এল এডি, উইলসন ও বোটের মালিক ।

'বাতাস যে এত মিষ্টি হয়, জানতাম না,' বড় করে শ্বাস নিলেন উইলসন ।

জেলে-নৌকার মালিক সবার শেষে বেরিয়েছে । টলতে টলতে রেইলের পাশে চলে গেল—নীচে তাকিয়ে নৌকাটা শৃঙ্খল ।

আগুন নিয়ে খেলা-১

‘ওটা ডুবে গেছে,’ বলল রানা।

মাথা ঝাঁকাল লোকটা, কয়েকবার ফুঁপিয়ে উঠল।

রানার পাশে এসে দাঁড়াল গ্রেসি। ‘যে বিশাল ঢেউ, আমরা ভাবতেও পারিনি আপনি বাঁচবেন। এ কী করে সম্ভব করলেন?’

‘কখনও কখনও কপাল সাহায্য করে,’ মৃদু হাসল রানা। এবার ওর ডাফল ব্যাগের ভিতর থেকে ডাইভ ইকুইপমেন্ট বেরিয়ে এল। গ্রেসির দিকে চেয়ে দ্রুত নাচাল রানা। ‘কী বুঝলেন?’

‘আমাদের বাঁচিয়েছেন বলে অসংখ্য ধন্যবাদ,’ বলল গ্রেসি। সার্ভে ক্রুরা ওর সঙ্গে সাই দিল।

‘ধন্যবাদ আমার নয়, ওটা হানড্রেড পার্সেন্ট ববি মুরল্যাণ্ডের প্রাপ্য,’ বলল রানা। ‘ও বুদ্ধি করে ডিকমপ্রেশন চেম্বার নিয়ে না গেলে সবাই আমরা মরতাম।’

ক্রেনের ক্যাব থেকে নেমে এল ববি, মেয়েদের জন্য মস্ত এক বাউ দিল। গ্রেসির চোখে আটকে গেল ওর চোখ। নিচু স্বরে জিজ্ঞেস করল, ‘ওই টিনের ডিব্বার ভিতরে অসুবিধে হয়নি তো, ম্যাম?’

‘আপনি আমাদের... ধন্যবাদ, মিস্টার মুরল্যাণ্ড,’ বলল গ্রেসি, হ্যাগশেক করল ববির সঙ্গে। হাত ছাড়ল না।

‘আমাকে ববি বলেই ডাকবেন,’ মুরল্যাণ্ডের গালদুটো লাল হয়ে উঠল। ভাবছে, একটা মেয়ে এত সুন্দর হয় কী করে!

‘তা হলে আমাকে ম্যাম না বলে গ্রেসি বলবেন।’ চোখ নামাল গ্রেসি।

সবাই টের পেল, এক মুহূর্তে কী যেন ঘটে গেল এই দু’জনের মধ্যে। হাসলেন উইলসন।

‘স্টিলের পিনবল মেশিনে বলের কেমন লাগে, এখন আমি জানি,’ বিড়বিড় করে বলল এডি।

নিতম্ব ধরে গুণ্ডিয়ে উঠলেন উইলসন। ‘এ জাহাজে কি

ভোদকা বলে কিছু নেই?’

কথাটা শুনেছেন কার্ক। ‘বলেন কী, ভুললে চলবে না এটা রাশান জাহাজ! লেডিজ অ্যাণ্ড জেন্টলমেন, আসুন আমার সঙ্গে। আপনাদের কার কত ভোদকা দরকার দেখব আমরা। ...তবে জাহাজের ডাক্তার আগে আপনাদের পরীক্ষা করবেন, তারপর কেবিনে বা গ্যালিতে গিয়ে বিশ্রাম নেবেন। লিস্ত্ভিয়াস্কার ডক ক্ষতিগ্রস্ত হয়েছে বলে আজ ওখানে নামতে পারবেন না। আগামীকাল নিজেদের কাজে যাবেন।’

‘তুমি বরং সবাইকে সিক বে-তে নিয়ে যাও, ববি,’ বলল রানা। ‘আমি মিস্টার কার্কের সঙ্গে আলাপ সেরে নিই।’

একহাতে সুপারস্ট্রীকচারের দিকে দেখাল ববি, ডানহাত থ্রেসির বাহতে। প্যাসেজওয়ে ধরে সিক বে’র দিকে এগোল সবাই।

রানার পিঠে মৃদু চাপড় দিলেন কার্ক। স্বস্তির সঙ্গে হাসছেন। ‘ওখানে কী ঘটেছে ববির কাছে শুনলাম। আগে যদি জানতাম আপনি সেইশ ওয়েভের ওপর চড়বেন, সঙ্গে কারেন্ট-মেজারিং ডিভাইসটা দিয়ে দিতাম!’

‘চলুন গ্যালিতে যাই, গরম কিছু দিয়ে গলা ভেজাতে হবে,’ বলল রানা। ‘যাওয়ার পথে লিস্ত্ভিয়াস্কার তীরে কী ঘটেছে শুনব।’

রওনা হয়ে গেল দু’জন। ‘দূর থেকে যা দেখেছি মনে হয়েছে খুব একটা ক্ষতি হয়নি,’ বললেন কার্ক। ‘ডকগুলো নষ্ট হয়েছে, সড়কে পড়ে ছিল কয়েকটা বোট। তীরে কিছু দোকান ভেঙে পড়েছে। রেডিওতে শুনেছি কেউ মারাত্মক আহত হয়নি। আগে থেকে সাবধান করায় মৃত্যু হয়নি কারও।’

‘আমাদের সাবধান থাকতে হবে,’ বলল রানা। ‘আফটার শক আসতে পারে।’

‘কলোরাডোর গোন্ডেনের ন্যাশনাল আর্থকোয়েক ইনফর্মেশন

সেন্টারে খোলা একটা স্যাটলাইট লাইন রেখেছি। কিছু ঘটলে ওরা চেষ্টা করে উঠবে।’

হুদে সন্ধ্যা নামছে, চারপাশ আঁধার হচ্ছে ধীরে ধীরে। লিস্ত-ভিয়াস্কা বন্দরের দিকে এগিয়ে চলেছে দ্যানিয়া। ত্রুরা সামনের ডেকে দাঁড়িয়ে বন্দরটা দেখছে। জনপদে হাতুড়ির মত আঘাত হেনেছে ঢেউ; তীরের ছোট গাছ ও খুদে বাড়িগুলো ভেঙে নিয়ে গেছে। তবে মূল শহর বা বন্দরের মারাত্মক কোনও ক্ষতি হয়নি। দ্যানিয়া তীর থেকে এক মাইল দূরে নোঙর করল। উপকূলে ছোট ছোট বাতি দেখা যাচ্ছে। ইলেকট্রিসিটি নেই। বাতিগুলো জ্বলছে ব্যাটারিতে। বেলারাস ট্র্যাক্টরের গুঞ্জন পানির উপর দিয়ে ভেসে এল। সবাই যে-যার মত কাজে নেমে পড়েছে, প্লাবনের ক্ষয়-ক্ষতি মেরামতে ব্যস্ত।

দ্যানিয়ার গ্যালিতে এক কোণের টেবিলে বসেছে উইলসন ও এডি। সঙ্গে ডুবে যাওয়া বোটের মালিক পপোভিজ ও জাহাজের এক ত্রু। খানিক পর পর অ্যালটাই ভোদকা গ্লাসে ঢালছে নাবিক। আরেক কোণে বসেছে রানা, ববি মুরল্যাণ্ড ও পাভেল রেদোরভ, থ্রেসি ও বেলার্মা—মস্ত এক স্টারজিয়ন ভাজা আর বাটারটোস্ট দিয়ে ডিনার সারছে। খাওয়া শেষ হলে ডিশগুলো সরিয়ে নিল স্টুয়ার্ড। সে চলে যেতেই নামহীন এক বোতল বের করলেন রেদোরভ, সবাইকে টেলে দিলেন ড্রিন্ক।

‘আপনাদের সুস্বাস্থ্য কামনা করছি,’ দুই মহিলার উদ্দেশে টোস্ট করল ববি।

‘আপনার কারণে আমাদের স্বাস্থ্য এখনও সু আছে,’ মৃদু হাসল থ্রেসি। তরলে ছোট্ট করে চুমুক দিল, সঙ্গে সঙ্গে মুখ থেকে হারিয়ে গেল হাসি—চোখ দুটো আপেলের মত বড় হয়ে উঠল। ‘এটা কী বিষ?’ কেশে উঠল বেদম। ‘স্বাদ তো দেখি ব্লিচের মত!’

পেট কাঁপিয়ে হেসে উঠলেন রেদোরভ। ‘সামোগোন।

গ্রামের এক বন্ধু দিয়েছে।’

‘এ জিনিসকে আমার দেশে বলে মুনশাইন,’ বলল ববি, গম্ভীর চেহারা করে হাসি চাপল।

গ্লাসটা আস্তে করে সামনে থেকে সরিয়ে দিল গ্রেসি, ঠোঁটে কষ্টার্জিত হাসি। ‘আমি বরং ভোদকাই নেব।’

‘বলুন তো দুই সুন্দরী হঠাৎ বৈকাল হুদে পেট্রোলিয়ামের জন্য কেন?’ জানতে চাইল রানা।

‘বরজিন অয়েল কনসোর্টিয়াম হুদের উত্তরে পেট্রোলিয়াম উত্তোলন ও মাইনিং করবার অনুমতি পেয়েছে,’ কাঠ-কাঠ স্বরে বলল বলোমা।

‘বৈকাল হুদ তো সাংস্কৃতিক সম্পদ। জাতিসংঘ ওটাকে ওয়ার্ল্ড হেরিটেজ স্ট্যাটাস দিয়েছে। দুনিয়ার সমস্ত পরিবেশবাদী ওটাকে রক্ষা করতে ব্যস্ত।’ গম্ভীর হয়ে উঠেছে রেদোরভের মুখ। কল্পনায় বিস্তৃত সুনীল হুদে তেলের রিগ দেখছেন তিনি। চারপাশে নোংরা, কালি-তেল-আবর্জনা! ‘আপনারা হুদে ড্রিল করার অনুমতি পেলেন কী করে?’

‘পাইনি,’ বলল বলোমা। ‘আপনি ঠিকই ধরেছেন, আমরাও চাই না বৈকালের পানি নষ্ট হোক। সেটা আমাদের ইচ্ছে নয়। আমরা যদি তেলের ডিপোজিট পাই, হুদের পূর্বদিক থেকে মাটির নীচ দিয়ে তা তুলে নেব।’

‘তা সম্ভব,’ বলল ববি। ‘গালফ অভ মেক্সিকোয় এভাবে পেট্রল তোলা চলছে। কিন্তু তাতে ভয়ঙ্কর ঝুঁকি থাকে। কিছুদিন আগে ওখানে কী ঘটেছে তা তো নিশ্চয়ই জানেন। টিভিতে দেখেছেন, কত বড় ক্ষতি হয়েছে।’ ডাচ দেবীর দিকে চাইল ববি। ‘আমি কিন্তু এখনও বুঝলাম না, রটারড্যামের অপরূপা এখানে কেন!’

প্রশংসা কার না ভাল লাগে। গ্রেসির তো শুনতে শুনতে কান পচে যাওয়ার কথা। কিন্তু লাল হয়ে উঠল গ্রেসির গাল। বলল, আঙুন নিয়ে খেলা-১

‘আমস্টারড্যাম। আমি এসেছি আসলে আমস্টারড্যাম থেকে। আমার দুই নেশাপ্রেমিক কলিগ এসেছেন আমেরিকা থেকে। আমরা সবাই ডাচ শেল অয়েলে কাজ করি।’ হাত দিয়ে উল্টো দিকের টেবিল দেখাল হ্রেসি। ওখানে হো-হো করে হাসছে তার সঙ্গীরা, রাশান নাবিকের সঙ্গে নোংরা কৌতুক বিনিময়ে ব্যস্ত।

‘আমরা বরজিন অয়েল কনসোর্টিয়ামের অনুরোধে এসেছি,’ বলল হ্রেসি। ‘ওরা মেরিন সার্ভেতে অনভ্যস্ত, তাই আমাদের আসা। ডাচ শেল অয়েল এখন বল্টিক আর পশ্চিম সাইবেরিয়ার সামোটলার খনি থেকে তেল তুলছে। বরজিন অয়েল কনসোর্টিয়ামের কিছু এলাকায় তেল পাওয়া যেতে পারে জেনে আমরা এখন যৌথ ভাবে সার্ভে করছি।’

‘ওই ডেউ আসার আগে কোনও পেট্রোলিয়াম ডিপোজিট পেয়েছেন?’ জানতে চাইল রানা।

‘আমরা হাইড্রোকার্বন সিপের স্ট্রাকচারাল ইঙ্গিত খুঁজছি,’ বলল হ্রেসি। ‘আমাদের সঙ্গে সাইসমিক ইকুইপমেন্ট নেই, কাজেই পোটেনশিয়াল ডিপোজিট আছে কি না, দেখা হয়ে ওঠেনি। আমরা যখন বোট হারালাম, তখন পর্যন্ত কিছুই পাওয়া যায়নি।’

‘তেল চুয়ে বেরনো?’ বললেন রেদোরভ।

‘হ্যাঁ, ওটার মাধ্যমে প্রাথমিক ভাবে জানা যায় তেল ওখানে আছে। হ্রদের নীচের মাটি থেকে তেল বেরিয়ে ভেসে উঠতে দেখা গিয়েছিল। বুমার ট্রাক এবং সাইসমিক ইকুইপমেন্ট আসার আগে মাটির নীচের অবস্থা আমরা জানতাম না। এখন তো ভিশুয়াল জিওগ্রাফিকাল ইমেজও পাওয়া যায়। কিন্তু আগে শুধু পানির অয়েল সিপ দেখে হাইড্রোকার্বন ডিপোজিট আন্দাজ করতে হতো।’

‘হ্রদের জেলেদের কাছ থেকে আমরা জেনেছি কোনও কোনও জায়গায় তেল ভেসে উঠছে,’ বলল বলোমী। ‘ওসব

জায়গায় নৌ চলাচল নেই। আমরা আন্দাজ করছি, ওসব জায়গায় প্রচুর তেল না থাকলেও ছোট ছোট ডিপোজিট পাওয়া যাবে। তবে ড্রিল করা লাভজনক হবে না বলে কিছুই করা হবে না।’

‘হুদের তলে কাজ করতে হলে প্রচুর খরচ করতে হবে,’ বলল রানা।

‘খরচের কথাই যখন উঠল, মিস্টার রানা, আপনারা নুমার ক্রুরা এখানে রাশান রিসার্চ জাহাজে কী করছেন?’ জানতে চাইল বলোমার্মা।

‘আমরা রেদোরভের লিমনোলজিকাল ইন্সটিটিউটের অতিথি,’ বলল রানা। ‘সবাই আমরা হুদের স্রোতের গতিবিধি দেখছি, কেন কী ঘটছে জানতে চাইছি।’

‘আপনারা হঠাৎ আগে থেকে কী করে বুঝলেন সেইশ ওয়েভ আসছে?’

‘সেন্সর পডের মাধ্যমে। ওরকম শ’ খানেক পড আমরা হুদে ছেড়েছি। ওগুলো তাপমাত্রা, চাপ ইত্যাদি মাপছে। কন্সটার নিয়ে এই কাজই করছিল মিস্টার মুরল্যাণ্ড। আমরা সে-সময় ওল্খন দ্বীপের কাছে সার্ভে করছি। ওদিকের পানিতে সেন্সর বেশি ছিল। কার্ক হঠাৎ দেখলেন ওখানে কিছু ঘটছে। আমরা বুঝলাম ওখানে পানির নীচে ভূমিধস হয়েছে। আন্দাজ করা হলো ওই ধসের কারণে সেইশ ওয়েভ তৈরি হবে।’

‘আমাদের কপাল ভাল, আপনারা ওটা দেখেছেন,’ বলল থ্রেসি। ‘শুধু আমরা নই, আরও বহু মানুষ বাঁচল সেজন্য।’

‘ববি কেমন করে যেন প্রাকৃতিক দুর্যোগ টের পায়,’ হাসল রানা।

সামোগোনে চুমুক দিল ববি। ‘সাইবেরিয়ায় জ্যাক ড্যানিয়েলসের বোতল সঙ্গে না নিয়ে আসাই হলো সবচেয়ে বড় প্রাকৃতিক দুর্যোগ।’ তিঙ্ক চেহারা করে চোখের সামনে গ্লাস আঙুন নিয়ে খেলা-১

তুলল।

‘দুঃখজনক ব্যাপার হচ্ছে, ওই ডেউ এসে আমাদের বেজ কারেন্ট ডেটা সংগ্রহ বন্ধ করল,’ বললেন রেন্দোরভ। ‘তবে এটুকু সান্ত্বনা, ডেউয়ের ফরমেশন আর মুভমেন্ট থেকে দারুণ সব ডেটা পাব।’

‘এসব সেন্সর পড কি ভূমিকম্পের মূল-কেন্দ্র জানিয়ে দেবে?’ জানতে চাইল বলোর্ম।

‘ভূমিকম্প হ্রদের নীচে শুরু হলে,’ বলল রানা।

‘কার্ক বলেছেন আগামীকাল কম্পিউটার নিয়ে বসবেন, সেন্সর থেকে জানা যাবে ওটা কোথায় শুরু হয়,’ বলল ববি। ‘সাইসমোলজিস্টরা বলছেন ভূমিকম্প হ্রদের উত্তর-পশ্চিম তীরে ঘটে।’ গ্যালির চারপাশ দেখল ও। জোসেফ কার্ক নেই। ‘কার্ক বোধহয় ব্রিজে, কম্পিউটার নিয়ে ব্যস্ত।’

সামোগোন এক চুমুকে শেষ করল বলোর্ম, হাত তুলে ঘড়ি দেখল। ‘সারাটা দিন খুব খাটনি গেছে, তার ওপর ওই ডেউয়ের ধাক্কায় একেবারে ধসে গেছি। এবার কেবিনে গিয়ে শোবো।’

‘আমিও,’ হাই চাপল রানা। ‘চলুন, আপনার কেবিন দেখিয়ে দিই।’

‘তা হলে খুব ভাল হয়,’ বলল বলোর্ম।

দু’জন উঠে দাঁড়াতে উঠে পড়লেন রেন্দোরভও। সবাইকে শুভরাত্রি জানিয়ে রওনা হয়ে গেলেন।

মুরল্যাণ্ডের দিকে চাইল রানা। ‘তুমি বসে কেন? ভাবছ স্টুয়ার্ড আরও কিছু দেবে?’

‘আমার উৎসুক কর্ণ অপেক্ষা করেছে নেদারল্যাণ্ডের গল্প শোনার জন্য,’ থ্রেসির দিকে চেয়ে হাসল ববি।

‘নিশ্চয়ই বদলে পাওয়া যাবে দারুণ কিছু আমেরিকান গল্প?’ হাসছে থ্রেসিও।

‘যাহা বলিবে, সত্য বলিবে,’ হেসে ববির দিকে তর্জনী

নাচাল রানা, শুভরাত্রি জানিয়ে রওনা হলো বলোমাকে নিয়ে।

মেয়েটির কেবিন স্টার্নের কাছে, ওখানে পৌঁছে দিল রানা, বিদায় নিয়ে ফিরে গেল নিজের কেবিনে। প্রায় সারাদিন কাজ করেছে, শরীর ভেঙে আসতে চাইল। বাক্সে উঠে পড়ল রানা, কিন্তু ঘুমের অতলে হারাতে পারল না। সারাদিনের খণ্ড খণ্ড ঘটনা ফিরে আসছে মনে। কিছুক্ষণ মেডিটেশনের পর সব চিন্তা দূর হলো, কালো একটা পর্দা ঢেকে দিল ওর চেতনা। নিশ্চিন্তে ঘুমিয়ে পড়ল রানা।

সাত

চার ঘণ্টা ঘুমিয়েছে রানা, কিন্তু হঠাৎই ঘুম ভেঙে গেল—চমকে উঠে বসল বাক্সে। মেরুদণ্ড বেয়ে শিরশির করে নামল একটা বিশ্রী অনুভূতি। চারপাশ নিস্তব্ধ। কিন্তু ওর ষষ্ঠ ইন্দ্রিয় বলছে, কোথাও মস্ত গোলমাল হয়ে গেছে। রিডিং লাইট জ্বালল রানা, শরীর ঘুরিয়ে মেঝেতে নামল। মুহূর্তে ঘুম উধাও হলো চোখ ছেড়ে। টের পেল, পুরো জাহাজ ডেবে গেছে স্টার্নের দিকে।

দ্রুত হাতে পোশাক পরল রানা, সিঁড়ি ভেঙে মেইন ডেকে উঠল। বাইরের প্যাসেজওয়ে পেরিয়ে খোলা ডেকে বেরুল। কোথাও কেউ নেই। পুরো জাহাজ থমথম করছে। বো'র কাছে হাজির হলো রানা। বারবার সতর্ক করছে মন। জাহাজের ইঞ্জিনগুলো পুরোপুরি বন্ধ, নীরব রাতে নিচু একটা গুঞ্জন! ইঞ্জিন-রুমের অক্সিলিয়ারি জেনারেটর? ওটা কীসের গুনগুন!

আরেকপ্রস্থ সিঁড়ি ডিঙিয়ে ব্রিজে ঢুকল রানা, আগুন নিয়ে খেলা-১

কম্পার্টমেন্টগুলো দেখল। ব্রিজে কেউ নেই! কেন? ও কি জাহাজে একমাত্র মানুষ? আর সবাই কোথায়? ব্রিজের কন্সোলে চোখ বোলাল। লাল টগল সুইচটা পেয়ে টিপল। ওটাতে লেখা: ট্রেভোগা। রাতের স্তব্ধতা খানখান হলো—জাহাজের সমস্ত বেল বেজে উঠেছে! আধমিনিট পেরুনোর আগেই দৌড়ে ব্রিজে ঢুকলেন দ্যানিয়ার ক্যাপ্টেন, রাগী ষাঁড়ের মত তাঁর চেহারা।

‘এখানে কী-কী হয়েছে?’ রাগ সামলে নিয়ে তুতলে উঠলেন। মগজ হাতড়ে ইংরেজি শব্দ খুঁজছেন। ‘সাশা কোথায়? পাহারাদার?’

‘জাহাজ ডুবছে,’ শান্ত স্বরে রাশান বলল রানা। ‘ব্রিজে কেউ ছিল? একমিনিট আগে এসেছি। কাউকে দেখিনি।’

তেতো চেহারা হলো ইভান তিতভের, চোখ বিস্ফারিত। এই প্রথম টের পেলেন, পায়ের নীচের ডেক ঢালু। ...কেন?

‘আমাদের পাওয়ার দরকার!’ প্রায় ধমকে উঠলেন তিতভ। ইঞ্জিন-রুমের সঙ্গে যোগাযোগ করতে রিসিভার তুলে নিলেন, সঙ্গে সঙ্গে গাঢ় আঁধারে ডুবে গেল ব্রিজ। মাস্তুল, কেবিন ও ব্রিজের কন্সলের আলো—সব নিভেছে! গোটা জাহাজে ঘুটঘুটে অন্ধকার। সব ধরনের ইলেকট্রিকাল পাওয়ার হারিয়েছে। অ্যালার্ম বেলগুলো শকুনের বাচ্চার মত গুঙিয়ে উঠল, তারপর মিলিয়ে গেল।

বিড়বিড় করে কাকে যেন অভিশাপ দিলেন ক্যাপ্টেন, কন্সোল হাতড়ে ইমার্জেন্সি ব্যাটারির সুইচ খুঁজলেন। ওটা পেয়ে টিপে দিলেন, সঙ্গে সঙ্গে ব্রিজে জ্বলে উঠল মৃদু আলো। কাঁপছে বাতিগুলো। ব্রিজের দরজা খুলে দৌড়ে ঢুকলেন দ্যানিয়ার চিফ ইঞ্জিনিয়ার। মানুষটি ভারী ধরনের, দাড়িগুলো নিখুঁত ভাবে ছাঁটা। দৌড়ে এসে হাঁপিয়ে উঠেছেন। নীল চোখে আতঙ্ক দেখল রানা।

‘ক্যাপ্টেন, ইঞ্জিন-রুমের হ্যাচগুলো শেকল দিয়ে আটকে

দিয়েছে কেউ! ভেতরে ঢুকতে পারিনি! জাহাজে অনেক পানি ঢুকেছে! ডুবছে এখন!’

‘হ্যাচ আটকে দিয়েছে? কে? কেন? ...নোঙর ফেলে দাঁড়িয়ে ডুবছে আমার জাহাজ?’ অবাক চোখে চিফ ইঞ্জিনিয়ারকে দেখলেন ক্যাপ্টেন। সদুত্তর খুঁজছেন।

‘হঠাৎ দেখলাম বিল্জুগুলো ডুবে গেছে, স্টার্নের নীচের ডেকও,’ বললেন ইঞ্জিনিয়ার। শ্বাসের গতি কমেছে তাঁর।

‘আপনাদের কাছে শেকল বা তালা ভাঙার কিছু নেই?’ জানতে চাইল রানা।

‘আছে। কিন্তু সব ইঞ্জিন-রুমের লকারে, আগে ওগুলো হাতে পেতে হবে তো!’

‘আমাদের বোধহয় জাহাজ ছেড়ে নেমে পড়া উচিত,’ শান্ত স্বরে বলল রানা।

ওর দিকে একবার চাইলেন ক্যাপ্টেন, হৃৎপিণ্ড আঁকড়ে এল তাঁর। উনি এ জাহাজের ক্যাপ্টেন! জাহাজ ত্যাগ করা তাঁর জন্য নিজের সন্তানকে পরিত্যাগ করবার মত! তিনি তা কী করে করবেন! এ নির্দেশ দেয়া প্রায় অসম্ভব! আরও আছে, জাহাজের মালিক, ইন্সুরেন্স কোম্পানি, মেরিটাইম ইনকোয়েরি বোর্ড—সবাই মিলে ছেকে ধরবে তাঁকে। তাদেরকে বোঝানো খুব কঠিন হবে। কিন্তু তার চেয়ে বড় কথা, জাহাজ এখন ডুবছে, যে-কোনও সময় তুরা প্রাণের ভয়ে ছোট্টাছুটি শুরু করবে! সবার চোখের সামনে ডুবে যাবে জাহাজ! লক্ষ লক্ষ টাকার লোহা ও কাঠের অপচয় হবে! ওসব বাদ দিলেও কথা রয়ে যায়: একেকটা জাহাজ হয় একেক চরিত্রের, ক্যাপ্টেন ও তার তুরা দীর্ঘদিন ওটার অন্তরঙ্গ সংস্পর্শে থেকে চিনে নেয় ওর হাবভাব, চলন—সৃষ্টি হয় ভালমন্দ কত স্মৃতির! অনেকে বলে ক্যাপ্টেনরা তার জাহাজের প্রেমই পড়ে যায়। কথাটা তিতভের বেলায় খাটে।

হঠাৎ খুব ক্লান্তি লাগল ক্যাপ্টেন তিতভের, মুখ ফুটে কিছু বললেন না। থমথম করছে চেহারা, চিফ ইঞ্জিনিয়ারের দিকে চেয়ে আস্তে করে মাথা দোলালেন। নির্দেশ দেয়া শেষ।

ততক্ষণে ডেকে বেরিয়ে এসেছে রানা। চিন্তা করছে, কীভাবে জাহাজ ভাসিয়ে রাখা যায়! একবার ভাবল, ডাইভ গিয়ার নিয়ে ইঞ্জিন-রুমে ঢুকবে, কিন্তু তা করতে হলে প্রথমে হ্যাচ খুলতে হবে, শিকল সরাতে হবে। ...সময় কই? আর ইঞ্জিন-রুমের গায়ে যদি ফাটল থাকে, কিছুই করতে পারবে না ও। ওটা ডুববেই।

ববি ও কার্কের সঙ্গে ডেকের মাঝখানে দেখা হলো ওর। ব্রিজের দিকে দৌড়ে আসছিল, রানাকে দেখে থামল।

‘এখন দেখছি পানিতে নামতে বাধ্য হব,’ বলল ববি।

‘ইঞ্জিন-রুম পানিতে ভরে উঠেছে, হ্যাচগুলো শেকল দিয়ে আটকানো, কাজেই জাহাজ ডুবছে,’ বলল রানা। আস্তে আস্তে খাড়া হয়ে উঠছে ডেক, সেদিকটা দেখল। ‘ববি, কপ্টারের ইঞ্জিন গরম করতে কতক্ষণ লাগবে?’

‘ধরে নাও কাজ শেষ,’ বলল ববি। ঘুরেই দৌড় দিল স্টার্নের দিকে।

জোসেফ কার্ক হালকা জ্যাকেট পরেছেন, শীতে কাঁপছেন। রানা বলল, ‘কার্ক, আপনি সার্ভে টিমকে ডেকে নিয়ে আসুন, কোনও লাইফ-বোটের পাশে থাকুক। আপনার জন্য আরেকটা কাজ, ক্যাপ্টেনকে নোঙর তুলতে বলবেন।’

‘আপনার আস্তিনে লুকানো কিছু রয়েছে?’ জানতে চাইলেন কার্ক, আশান্বিত।

‘বোধহয় একটা টেকা,’ বিড়বিড় করে বলল রানা, স্টার্নের দিকে পা বাড়াল।

রাতের আঁধারে আকাশে ভেসে উঠল কামোভ, কয়েক সেকেন্ড

রিসার্চ জাহাজের উপর থাকল।

‘আমরা বোধহয় ভুলে গেছি নারী ও শিশুদের বাড়তি সুযোগ দিতে হয়,’ পাইলটের সিট থেকে বলল ববি। ‘তোমার মতলব কী, রানা?’

‘অয়েল সার্ভে টিমকে জড় করতে পাঠিয়েছি কার্ককে,’ বলল রানা। বুঝে নিয়েছে, ববির মস্ত চিন্তা এখন গ্রেসির জন্য। ‘তা ছাড়া, ওরা পানিতে পা ভেজানোর আগেই ফিরব আমরা।’

ককপিট থেকে ওরা দেখল, তীর থেকে ক্ষীণ আলো আসছে, তার সঙ্গে যোগ দিয়েছে জাহাজের ইমার্জেন্সি ডেক লাইট। মনে মনে বলল রানা, জাহাজ না ডুবলে হয়! নীচের ডেকগুলো আগে ডুবেছে, এরইমধ্যে স্টার্নের কাছে হাজির হয়েছে পানি!

ববিকে কিছু বলতে হলো না, ও লিস্তভিয়াস্কার দিকে রওনা হলো। শেষবারের মত দ্যানিয়া জাহাজটা দেখল রানা, তারপর চোখ সরিয়ে নিল। কামোভ এগিয়ে চলেছে। দেখা গেল, বন্দরের কাছে অসংখ্য নৌযান ভাসছে।

দু’মিনিট পর জানতে চাইল ববি, ‘বিশেষ কিছু খুঁজছ, রানা?’

‘শক্তিশালী কিছু দরকার,’ বলল রানা। ও যা খুঁজছে তেমন কিছু এ হুদে নেই। একের পর এক বোট পিছনে পড়ছে। কিছু বোট দেখা গেল, প্লাবনের ধাক্কায় তীরে গিয়ে উঠেছে।

‘ওটা হলে কেমন হয়?’ জানতে চাইল ববি। দু’মাইল দূরের একটা জলযান দেখাল। ওখানে বেশ কিছু বাতিও জ্বলছে।

‘গত রাতে ওটা দেখিনি,’ বলল রানা। ‘সকালে ভিড়বে বলে হয়তো অপেক্ষা করছে। চলো, গিয়ে দেখি।’

বাতিগুলোর দিকে কপ্টার তাক করল ববি, কিছুক্ষণ পর একটা জাহাজের আকৃতি ভেসে উঠল। কাছাকাছি পৌঁছে দেখা গেল, কার্গো জাহাজটা দৈর্ঘ্যে দু’শ’ ফুট। খোলটা কালো রঙের, সঙ্গে মিশেছে জঙের দাগ। নীল ফানেলটা ডেকের মাঝ দিয়ে উঠেছে, গায়ে সোনালী একটা তলোয়ারের লোগো। পুরানো আগুন নিয়ে খেলা-১

জাহাজ, হুদে বাকাল চলাচল করেছে। সম্ভবত উত্তরদিক থেকে কয়লা, কাঠ ইত্যাদি লিস্ত্ভিয়াস্কায়ে আনে। স্টারবোর্ডের উপর থামল ববি। একটু দূরে স্টার্নে কালো এক বিরাট ডেরিক থম মেরে রয়েছে। ফানেলের দিকে একবার চাইল রানা, তারপর মাথা নাড়ল। ‘কাজ হবে না। নোঙর করা। চিমনিতে ধোঁয়া নেই। ইঞ্জিন বন্ধ করেছে অনেক আগে। ওটা জাগানোর সময় নেই।’ লিস্ত্ভিয়াস্কার দিকে চাইল রানা। ‘শক্তির উপরে গতিকে গুরুত্ব দিতে হবে।’

‘গতি?’ জানতে চাইল ববি। ‘পাগলের মত এসব কী বলছ, রানা?’

‘লিস্ত্ভিয়াস্কার দিকে এগোও,’ বলল রানা। মুরল্যাণ্ড রওনা হতে হাত দিয়ে দেখাল, ওখানে পানির উপর ঝলমল করছে কিছু বাতি।

ইভাকিউয়েশন শুরু হয়েছে দ্যানিয়া জাহাজে। তিন ভাগের দুই ভাগ ত্রু দুটো লাইফ-বোটে উঠল, ওগুলো পানিতে নামিয়ে দেয়া হলো। বিজ্ঞানীরা এখনও কোনও বোটে ওঠেননি। ভিড়ের মাঝ দিয়ে এগোলেন জোসেফ কার্ক, প্যাসেজওয়ে পেরিয়ে নেমে এলেন এক ডেক। চারপাশে গোড়ালি পানি, থইথই করছে—বেড়ে উঠছে দ্রুত। তিন মিনিট পর সামনে পড়ল অতিথি কেবিনগুলোর একটা। ওখানে থামলেন কার্ক। এ ঘরে থ্রেসি ও বলোয়ার্মার থাকবার কথা। দু’হাতে থাবা দিলেন, গলা উঁচিয়ে ডাকলেন। কোনও জবাব মিলল না। হ্যাণ্ডেল ধরে মোচড় দিতেই খুলে গেল দরজা। ঘর ফাঁকা। ব্যক্তিগত জিনিসপত্র বলতে কিছু নেই। তাড়াহুড়ো করে এসেছে, সঙ্গে কিছু আনেনি মেয়েদুটো। দুই বেড়ে ব্ল্যাক্‌স্টগুলো এলোমেলো।

দরজাটা বন্ধ করে পরের কেবিনের সামনে থামলেন কার্ক। ততক্ষণে উরু ডুবে গেছে। বরফ-ঠাণ্ডা পানি! আবারও গলা

উঁচিয়ে ডাকলেন, জোরে নক করলেন। এই কেবিনে থাকবার কথা এডি ও উইলসনের। মোচড় দিতেই দরজা খুলে গেল। কেবিনে ইমার্জেন্সি বাতি মিটমিট করে জ্বলছে। প্রথম কেবিনের মত এটাও খালি। অগোছালো বিছানা বলছে মানুষদুটো ওখানে ঘুমিয়েছে।

বোধহয় উপরের ডেকে সবাই। উফ্, কী ঠাণ্ডা পানি রে! তাকে যেন হাজার পিন ফুটছে! শ্রাগ করলেন কার্ক। সার্ভে টিম আগে গেছে। বাকি থাকল শুধু জেলে-নৌকা মালিকের কেবিন। স্টার্নের কাছে ওটা। দ্রুত এগোবার চেষ্টা করলেন কার্ক, বিশ ফুট যাবার আগেই বুক পেরিয়ে খুতনি ধরল পানি। আর এগুনো সম্ভব নয়। নিশ্চয়ই আর সবার সঙ্গে গেছে লোকটা। ঘুরে দাঁড়িয়ে সিঁড়ির দিকে রওনা হলেন কার্ক। অসহ্য শীত! এখুনি কাপড় না পাল্টালে ঠাণ্ডায় হাইপোথারমিয়া শুরু হবে। তিন মিনিট পর কাঁপতে কাঁপতে উপরের ডেকে উঠে গেলেন। তৃতীয় একটা বোট পানিতে নামানো হয়েছে। ছ'জন ক্রু এখনও ডেকে দাঁড়িয়ে। চারপাশ আরেকবার দেখলেন কার্ক, সার্ভে টিম নেই। নিশ্চয়ই আগের দুই বোটের কোনটায় উঠেছে।

আনাতোলি মিখাইলভ নিজের বাক্সে ঘুমিয়ে স্বপ্ন দেখছে: মহাসুখে ফ্লাই-ফিশিং করছে লেনা নদীতে।

কিন্তু হঠাৎ বিরাট এক দানব এসে হাজির হলো! ধুব-ধুব-ধুব-ধুব আওয়াজ করছে! ওকে এক ছোঁ দিয়ে তুলে নিল! ঘুম ভেঙে গেল মিখাইলভের।

লিস্তুভিয়াঙ্কার হাইড্রোফয়েল ফেরির পাইলট সে। ভারী ফার-কোট ভালমত জড়িয়ে নিয়ে ছোট্ট কেবিন ছেড়ে স্টার্নের ডেকে উঠল। সঙ্গে সঙ্গে চোখ ধাঁধিয়ে দিল দুটো ফ্লাড লাইট। তীব্র হাওয়া তাকে উড়িয়ে নিতে চাইল। সঙ্গে রয়েছে বিকট আওয়াজ! আলো দুটো ডেকের একটু উপরে ভাসছে! দু' সেকেন্ড পর আগুন নিয়ে খেলা-১

ওগুলো উঠতে লাগল। কপ্টারের আওয়াজ কানের কাছ থেকে সরছে। দু'হাতে চোখ কচলাল মিখাইলভ, দৃষ্টি ফিরে পেতে চাইল। কয়েক সেকেণ্ড পর চোখ মেলে দেখল, তার সামনে দাঁড়িয়ে আছে এক লোক—বেশ লম্বা, চুলগুলো কালো, আর হাসিটা দেখবার মত—মনে হয় এক পলকে সবাইকে আপন করে নেবে।

লোকটা নরম স্বরে বলল, 'দুঃখিত, পাইলট, আপনার ফেরিটা একটু ধার নেব।'

তীক্ষ্ণ আওয়াজ তুলে হাই-স্পিড ফেরির টুইন ফরওয়ার্ড হাইড্রোফয়েল ব্লড ওটাকে দ্যানিয়ার কাছে নিয়ে গেল দ্রুত। সরাসরি ডুবন্ত জাহাজের বো'র সামনে থামল মিখাইলভ। ফেরির স্টার্নের রেইলে দাঁড়িয়েছে মাসুদ রানা, জাহাজটা দেখছে। ওটার স্টার্ন ডুবছে। বিশ ডিগ্রি কোণ তৈরি করে আকাশে নাক তুলেছে বো। যে-কোনও সময় কাত হয়ে ঢেউয়ের নীচে তলিয়ে যাবে জাহাজ।

হঠাৎ ধাতব আওয়াজ শুরু হলো। জাহাজের হোযহোল থেকে নোঙরের শিকল সড়সড়িয়ে নামল। ত্রিশ ফুট শেকল ধপাস করে পড়ল পানিতে, মুহূর্তে ডুবল। ওটার পিছনে ছুটল দড়ির লাইন। শিকলের ভারী ওজন না থাকায় দ্যানিয়ার বো আরও দু'ফুট উপরে উঠল।

'টো-লাইন গেল!' উপর থেকে জানানো হলো।

উপরে চাইল রানা, জাহাজের বো রেইলের কাছে দাঁড়িয়েছে ববি ও কার্ক। এক সেকেণ্ড পর মোটা দড়ি পানি ছুঁই-ছুঁই হলো।

ফেরি পিছিয়ে নিয়ে চলেছে আনাতোলি মিখাইলভ—দড়ির কাছে গিয়ে থামল। দু'হাতে লাইনটা তুলে নিল রানা, ক্যাপস্ট্যানের সঙ্গে বেঁধে দিয়ে সরে এল—ইশারা করল দু'হাতে।

‘টো-লাইন বাঁধা হয়েছে,’ গলা ছাড়ল রানা। ‘এবার নিয়ে চলুন, মিখাইলভ!’

ডিজেল ইঞ্জিনের গিয়ার ফেলল পাইলট, ধীরে সামনে বাড়তে থাকল। দশ সেকেন্ড পর দড়ি টানটান হতেই থ্রটল আরেকটু খুলল। প্রপেলারগুলো পানিতে ভাল মত কামড় বসাতেই আর বাড়তি সতর্কতা রাখল না মিখাইলভ, পুরো থ্রটল খুলল।

জোড়া ইঞ্জিনের কাতরানি শুনল রানা। পিছন ফিরে দেখল পানি বলকে উঠছে। প্রপেলারগুলো পানি কাটছে, কিন্তু কয়েক মুহূর্ত পেরিয়ে গেল, ফেরি এগোল না। এ যেন হাতিকে টেনে নিতে চায় গুবরে পোকা! তবে এই পোকা কামড় বসাতে জানে। ফেরিটা বত্রিশ নট গতি তোলে। এক হাজার হর্স পাওয়ারের মোটরগুলো প্রচণ্ড শক্তিশালী।

প্রথমে কোনও নড়াচড়া টের পাওয়া গেল না, কিন্তু ইঞ্চি ইঞ্চি করে সামনে বাড়ল ফেরি। বিশ সেকেন্ডে এক ফুট এগোল। ব্রিজ থেকে চেয়ে রয়েছে ববি ও কার্ক। ক্যাপ্টেন ও কয়েকজন ক্রুও রয়েছে ওখানে। সবাই তাকিয়ে রয়েছে রুদ্ধশ্বাসে। ফেরি দ্যানিয়াকে বন্দরের দিকে টেনে নিয়ে চলেছে। মিখাইলভ সাবধানতার ধার দিয়েও গেল না, সংক্ষিপ্ত পথ বেছে নিয়েছে।

দুই নৌযান আধ মাইল এগোতেই দ্যানিয়ার পেটের ভিতর থেকে বিদঘুটে আওয়াজ বেরুল। পানিতে ভরা অ্যাক্ট আর মাথা উঁচু করা বো'র মধ্যে দখলদারিত্ব নিয়ে টানাটানি শুরু হয়েছে। এ জাহাজ যারা তৈরি করেছে, তাদের স্ট্রাকচারাল ইন্টেগ্রিটি কেমন সেটা এবার বোঝা যাবে। টো-লাইনের কাছে দাঁড়িয়েছে রানা, দেখছে জাহাজটা থরথর করে কাঁপছে। সত্যিই যদি ডুবতে শুরু করে, ফেরিটাকে রক্ষা করবে ও, দ্রুত দড়ির ফাঁস খুলে দেবে।

একেক মিনিট যেন একেকটা ঘণ্টা। খুবই ধীরে ভীরের আগুন নিয়ে খেলা-১

দিকে এগিয়ে চলেছে দ্যানিয়া। পানির নীচে আরও তলিয়ে গেছে ওটার স্টার্ন। পেটের ভিতর থেকে কড়-মড় আওয়াজ বেরুচ্ছে। ধাতব গোঙানির সঙ্গে যুক্ত হলো জাহাজের বিপজ্জনক কাঁপুনি। ইঞ্চি ইঞ্চি করে এগিয়ে চলেছে দ্যানিয়া। আরও অনেকটা দূরে শহরের বাতি। ফেরিটা হালকা, মিখাইলভ ওটাকে সরাসরি সৈকতের দিকে নিয়ে চলেছে। মেরিনার ডকগুলো বানে বিধ্বস্ত, এখন ভরসা সামনের ওই পাথুরে পাড়। যারা দেখছে তাদের মনে হলো লোকটা ফেরি নিয়ে তীরে উঠতে চায়। তবুও প্রার্থনা করছে সবাই, লোকটা এগোক। বাড়িঘর থেকে ধাক্কা খেয়ে ফিরল মোটরগুলোর গর্জন। আর মাত্র পাঁচ ফুট সামনে তীর, কিন্তু তেড়েফুঁড়ে এগিয়ে চলেছে মিখাইলভ। তারপর বিশ্রী একটা কর্কশ আওয়াজ শুরু হলো—প্রচণ্ড ঝাঁকি খেল দ্যানিয়া, মাটিতে আটকে গেল খোল।

হাইড্রোফয়েল ফেরির কেবিনে মৃদু ঝাঁকুনি খেল মিখাইলভ, তবে ঢের বেশি টের পেল আওয়াজটা শুনে। আর দেরি করল না সে, দ্রুত বন্ধ করল উত্তপ্ত ইঞ্জিন। মোটরের আওয়াজ থামতে চারদিকে নামল থমথমে নীরবতা। লাইফ-বোটের ত্রুরা ফেরির পাশে থেমেছে, তাদের উল্লাসের চিৎকার শোনা গেল। এই চিৎকার হারিয়ে গেল বহু মানুষের হুল্লোড়ে। শহর থেকে সৈকতে হাজির হয়েছে বাসিন্দারা, সবাই এতক্ষণ লড়াইটা দেখেছে। দ্যানিয়ার ডেক থেকে যোগ দিল অন্যান্যরা; মাসুদ রানা, ববি মুরল্যাণ্ড ও আনাতোলি মিখাইলভের জন্য হিপহিপ-হুররে বলে চিৎকার শুরু হলো। জবাবে দুবার ভেঁপু বাজাল মিখাইলভ, তারপর স্টার্নে মাসুদ রানার পাশে গিয়ে দাঁড়াল।

‘হেলম-এ আপনি জাদু দেখিয়েছেন,’ বলল রানা।

‘আমার জাহাজটা ডুববে ভাবতেই মাথা গরম হয়ে গেল,’ লাজুক হাসল মিখাইলভ। প্রেমিকের দৃষ্টিতে চেয়ে রয়েছে দ্যানিয়ার দিকে। আশ্তে করে বলল, ‘আমি চাকরিজীবন শুরু

করি ওই বাবুসকার ডেক ঘষার কাজ দিয়ে। তা ছাড়া, ক্যাপ্টেন ইভান তিতভ আমার বন্ধু মানুষ, চাই না উনি বিপদে পড়ুন।’

‘দ্যানিয়া আবারও বৈকাল হুদ পাড়ি দেবে,’ বলল রানা। ‘তখনও ওটার দায়িত্বে থাকবেন ক্যাপ্টেন তিতভ।’

‘তা-ই যেন হয়। রেডিওতে উনি আমাকে বলেছেন দ্যানিয়াকে স্যাবোটাজ করা হয়েছে। বোধহয় পরিবেশবাদীদের কাজ। ওরা এমন ভাব করে, বৈকাল হুদ ওদের বাপ-দাদার কেনা সম্পত্তি।’

ভাবছে রানা—স্যাবোটাজ তো বটেই! হতে পারে পরিবেশবাদীদের। কিন্তু উদ্দেশ্য কী? বোধহয় এর জবাব দিতে পারবেন পাভেল রেরদোরভ।

লিস্তভিয়াঙ্কায় সবাই সৈকতে হাজির হয়েছে। আলাপ চলছে, আরেকটু হলে জাহাজটা ডুবত। ওটা থেকে ক্রুদের আনা-নেয়ার কাজে লেগে গেছে কিছু নৌকা। আরেক দল বড় পাথরগুলোর সঙ্গে বাঁধল দ্যানিয়াকে। পাশেই মাছ প্যাকেজিং প্লান্ট, ক্রু ও বিজ্ঞানীদের বিশ্রামের জন্য ওটা খুলে দেয়া হলো। যদিও ওটার মেঝে এখনও প্লাবনের পানিতে ভেজা। স্থানীয় জেলেরা সবার জন্য ভোদকা দিল, তাদের স্ত্রীরা নিয়ে এল কফি ও স্মোক্‌ড আমুল।

রানা ও মিখাইলভ ওয়্যারহাউসে ঢুকতে হই-হই করে উঠল সবাই। ওদের বারবার ধন্যবাদ জানালেন ক্যাপ্টেন তিতভ। সবার ধারণা তিতভ আবেগশূন্য মানুষ, কিন্তু মিখাইলভকে জড়িয়ে ধরে কেঁদে ফেললেন তিনি।

‘তুমি আমার দ্যানিয়াকে বাঁচিয়েছ। চিরকৃতজ্ঞ হয়ে রইলাম আমি তোমার কাছে।’

‘আমি সাহায্য করতে পেরে খুশি,’ বলল মিখাইলভ। ‘তবে ফেরি দিয়ে কাজ চলবে সেটা আবিষ্কার করেছেন মাসুদ রানা, তারপর ঘুম থেকে টেনে তুলেছেন আমাকে।’

রানার চোখ চলে গেল পাইলটের পায়ের দিকে। মানুষটা এখনও বেডরুমের স্পিয়ার পরনে। মৃদু হাসল রানা। ‘আশা করি কখনও আর ওভাবে তুলতে হবে না আপনাকে, মিখাইলভ।’ ক্যাপ্টেনের দিকে তাকাল ও। ‘ক্রুরা সবাই এসেছে, ক্যাপ্টেন?’

তিতভের চেহারা গম্ভীর হয়ে উঠল। ‘ব্রিজের পাহারায় ছিল সাশা, তাকে খুঁজে পাওয়া যায়নি। ডক্টর রেন্দোরভও নেই। আমি ভেবেছি আপনাদের সঙ্গে গেছেন।’

‘রেন্দোরভ? না। তাঁর সঙ্গে আমার শেষ দেখা হয়েছে ঘুমাতে যাওয়ার আগে।’

‘উনি কোনও লাইফ-বোটে ওঠেননি,’ বললেন তিতভ।

চিন্তিত চেহারায় ওদের দিকে এগিয়ে আসছে ববি ও কার্ক।

ক্যাপ্টেনের কথাটা শুনেছে ববি, বলল, ‘আরও কয়েকজন নেই। অয়েল সার্ভে টিম উধাও হয়েছে। কেউ কেবিনে ছিল না। লাইফ-বোটে যে উঠবে, তা-ও ওঠেনি।’

‘বোটের মালিকের কেবিন বাদে অন্য কেবিনগুলো আমি নিজে দেখেছি,’ বললেন কার্ক।

‘এদেরকে চলে যেতে দেখেনি কেউ?’ জিজ্ঞেস করল রানা।

‘না,’ আস্তে করে মাথা নাড়ল ববি। ‘কারও কোনও চিহ্ন নেই, যেন মানুষগুলো ছিলই না।’

আট

ভোর হতেই দক্ষিণ-পূবে লাফ দিয়ে উঠল লাল একটা গোলক। চারপাশের আঁধার মুহূর্তে দূর হলো। তীরের কাছে দ্যানিয়া থম

‘মেরে দাঁড়ানো। ইঞ্জিন-রুম, স্টার্ন হোল্ড আর নীচের কেবিনগুলো পানির তলায়। মেইন ডেকের চার ভাগের তিন ভাগই তলিয়ে গেছে। গতরাতে জাহাজটা এখানে টেনে না আনলে এখন আর কোনও চিহ্নই থাকত না।

প্লাবনের পানি টুরিস্টদের একটা কিওস্ক মাটির সঙ্গে মিশিয়ে দিয়েছে, ওটার পাশে দাঁড়িয়ে আছে রানা ও ক্যাপ্টেন তিতভ— জাহাজটা দেখছে। স্টার্নের দিকে চোখ গেল রানার। ওখানে কালো দুটো চকচকে নার্পী ভাসছে। সাঁতরে ওগুলো স্টার্নের রেল টপকাল। এ হুদে এই জাতের সিল প্রচুর পাওয়া যায়, সুন্দর চোখদুটো হরিণীর চোখের মত। কিছুক্ষণ ভেসে থাকল ওদুটো, তারপর ডুব দিল খাবারের সন্ধানে। একটু পর আবারও ভেসে উঠল। জাহাজের ওয়াটার-লাইন দেখল রানা। এক জায়গায় আটকে গেল নজর। ডক বা কোনও ছোট নৌকা ওখানে ঘসা দিয়েছে। লাল রং।

‘ইরকুস্ক থেকে স্যালভেজ ক্রু আগামীকাল আসবে,’ গম্ভীর কণ্ঠে বললেন ক্যাপ্টেন তিতভ। ‘তার আগে ক্রুদের পোর্টেবল পাম্প বসাতে বলব। অবশ্য লাভ হবে না, কেন জাহাজ ডুবেছে তা এভাবে জানা কঠিন।’

‘তার চেয়ে জরুরি হচ্ছে রেন্দোরভ ও অয়েল সার্ভে টিম কোথায় গেল সেটা জানা,’ বলল রানা। ‘তীরে ওঠেনি, এটুকু নিশ্চিত। ধারণা করছি বেঁচে নেই কেউ। জাহাজের ডুবে থাকা অংশে লাশগুলো খোঁজা উচিত।’

আপত্তি তুলতে গিয়েও মাথা দোলালেন তিতভ। ‘তা-ই আসলে। জানতে হবে আমার বন্ধু রেন্দোরভ কোথায়। তবে আপাতত কিছু করা চলবে না। পুলিশের ডুবুরি এলে যদি কিছু জানা যায়।’

এক লোক দূর থেকে আসছে, তার দিকে ঘাড় কাত করল রানা। ‘আমার মনে হয় না ততক্ষণ আমাদের অপেক্ষা করতে আশুন নিয়ে খেলা-১

হবে।’

পঞ্চাশ গজ দূরে ববি মুরল্যাণ্ড, দ্রুত পায়ে আসছে। কাঁধের উপর লাল হ্যাণ্ডেলওয়ালা একটা বোল্ট কাটার।

‘শহরে একটা গ্যারাজে অনেক কিছু বিক্রি হচ্ছে, এটা নিয়ে এলাম,’ কাছে এসে বলল ববি। বোল্ট কাটার কাঁধ থেকে নামানোয় বোঝা গেল জিনিসটা তার কোমরের চেয়ে উঁচু।

‘ওটা জাহাজের নিষিদ্ধ এলাকায় ঢুকতে সাহায্য করবে,’ বলল রানা। ‘ইঞ্জিন-রুম।’

‘আপনি ওখানে নামতে চান?’ মাথা নাড়লেন তিতভ। ‘ব্যাপারটা পুলিশি তদন্তে বাধা বলে মনে করবে সবাই।’

‘আমাদের জানতে হবে রেন্দোরভ আর সার্ভে টিম জাহাজে আটকা পড়েছে কি না,’ কড়া স্বরে বলল ববি।

‘তা ছাড়া কেন জাহাজ ডুবিয়ে দেয়ার চেষ্টা হলো, সেটাও জানতে হবে,’ বলল রানা। ‘ব্যাপারটা হয়তো আমাদের রিসার্চের সঙ্গে জড়িত। তা-ই যদি হয়, জানতে হবে কেন কী ঘটছে। আমাদের ডাইভ গিয়ারগুলো সামনের হোল্ডে, কাজেই ওখান থেকে সমস্ত ইকুইপমেন্ট পাব।’

‘যাওয়াটা বোধহয় ঠিক হবে না,’ সাবধানী স্বরে বললেন তিতভ।

‘মনে হচ্ছে, ববি নাস্তা খাওয়ার আগেই যেতে চাইবে,’ পরিবেশটা হালকা করতে চাইল রানা।

‘ওনেছি স্থানীয়রা বলেছে, যে যত স্টারজিয়নের প্যানকেক খেতে পারে, খাওয়াবে তারা,’ এক ভ্রু আকাশে তুলল ববি।

‘কপাল ভাল থাকলে ফিরে এসে পাব,’ বলল রানা।

কিছুক্ষণ পর ওদের সঙ্গে যোগ দিলেন জোসেফ কার্ক, তিনজন একটা জোড়িয়াক ধার নিয়ে রওনা হলো। দ্যানিয়ার স্টার্নে থামল ওরা, ঢালু থেকে নেমে সামনের হোল্ডের দিকে এগোল। পাঁচ মিনিট পর ববি ও রানাকে কালো ড্রাই সুট পরতে

সাহায্য করলেন কার্ক। দুই ডুবুরি ওয়েইট বেস্ট পরল, পিঠে আটকে নিল হালকা ওজনের রিব্রিদার সিস্টেম। ফেসপ্লেট পরবার আগে দূরের ডেকহেড দেখালেন কার্ক।

‘আমি ব্রিজে চললাম। কম্পিউটারগুলো ঠিক আছে কি না দেখব। বোধহয় সাইসমিক অ্যাক্টিভিটির নতুন তথ্য পাব। আপনারা কোনও জলকুমারী পেলে আমাকে ফেলে তার সঙ্গে আবার চলে যাবেন না।’

‘বৈকালের পানি যেমন ঠাণ্ডা, একটাও যদি থাকে, শীতে নীল হয়ে গেছে এতদিনে,’ ঘড়ঘড়ে স্বরে বলল ববি।

ফিনগুলো নিয়ে পিছনের ডেকে হাজির হলো রানা-ববি, ওগুলো পরে নিয়ে নামল পানিতে। খানিকটা এগুনোর পর পানির উচ্চতা কাঁধ সমান হলো। কপালে আটকানো খুদে বাতিটা জ্বলে নিল রানা, ডুব দিল। সামনে সামনে চলেছে। স্টারবোর্ডের দিকে একটা স্টেয়ারওয়েল পড়ল। সিনেমার ফ্র্যাঙ্কেনস্টাইনের মত ধীর পায়ে এগোল ওরা, পানির বাধা মানল না। পাশে আলো পড়ছে, রানা বুঝল ঠিক পিছনেই রয়েছে ববি।

সিঁড়ির উপর থেকে লাফ দিয়ে কয়েকবারে নীচে পৌঁছল দু’জন। ওখান থেকে আরেক ধাপ নামল ওরা। ডেক ঢালু। খানিকটা দূরে ইঞ্জিন-রুম। এখানে সূর্যের আলো নেই। আঁধার চারপাশ থেকে ঘিরে ধরতে চাইল। চারদিকের পানি ঢাকা ইউনিভার্সিটির সুইমিং পুলের মত স্বচ্ছ। ব্যাটারিচালিত ল্যাম্পের সরু আলো তীরের মত গিয়ে পড়ল ইঞ্জিন-রুমের হ্যাচের উপর। নেগেটিভ বয়েসি ওদের হাঁটতে সাহায্য করেছে। যেন চাঁদের মাটিতে হাঁটছে, প্রায় ভাসতে ভাসতে হ্যাচের সামনে হাজির হলো। চিফ ইঞ্জিনিয়ার ঠিকই বলেছেন, স্টিলের ভারী দরজা সিল করা। জং ধরা শিকল ল্যাচ আর বাল্কহেডের সঙ্গে পেঁচানো। মস্ত সোনালী এক প্যাডলক দিয়ে শিকল আটকানো। তালাটা নতুন।

আগুন নিয়ে খেলা-১

ববির আলো হ্যাচের উপর পড়েছে, সেই আলোয় চারাদক দেখল রানা। বোল্ট কাটার নিয়ে কাজে নামল ববি, প্যাডলকের পাশের লিঙ্ক কাটতে চাইল। ওর শক্তিশালী হাতদুটো একবার চাপ দিল, সঙ্গে সঙ্গে কুট করে একটা আওয়াজ হলো—ভেঙে গেল লিঙ্কের একদিক। পরের অংশ কাটতে লাগল পাঁচ সেকেন্ড। শিকলটা ল্যাচ থেকে খুলল রানা, হ্যাচ খুলে ভিতরে ঢুকল।

দ্যানিয়া জাহাজটার বয়স কম করেও তিরিশ বছর, কিন্তু ইঞ্জিন-রুম ঝকঝকে-তকতকে করে রাখা হয়েছে। কোথাও একটা দাগও পাওয়া গেল না। চিফ ইঞ্জিনিয়ারের প্রশংসা করতে হয়। ঘরের বেশিরভাগ জায়গা দখল করেছে জাহাজের ডিজেল জেনারেটর, ওটা ঘরের ঠিক মাঝখানে। গোটা বে ঘুরে দেখল রানা। ডেক ও বাল্কহেডে ধ্বংসাত্মক কিছু করা হয়েছে কি না খুঁজল ওর তীক্ষ্ণ দৃষ্টি। ইঞ্জিনটা কাছ থেকে দেখল। না, কোনও ক্ষতি করা হয়নি। তবে স্টিলের বড় একটা ফুটপ্লেট জায়গা থেকে সরানো হয়েছে। ওটা কাত করে রাখা টুলস্ বিনের পাশে। ওখানে গিয়ে থামল রানা, ওটার দিকে মনোযোগ না দিয়ে ফোকরের ভিতর উঁকি দিল। ওটা বিলজ-এ নামবার পথ। গর্তের গভীরতা মাত্র চার ফুট। নেমে পড়ল ও। ডেকের নীচে এখানে প্রচুর জায়গা, জাহাজের বাঁকানো খোলার সঙ্গে গিয়ে মিশেছে।

স্টার্নের দিকে বাতি তাক করল রানা। যতদূর আলো গেল, হাল প্লেট ফাটেনি। ও সাবধানে ঘুরে বসতে চাইল, কিন্তু পিঠে কীসের যেন খোঁচা খেল। এদিকে মাথার উপর হাজির হয়েছে ববি, ওর বাতি কম্পার্টমেন্টের ভিতর পড়ল। ওই আলোয় মোটা এক পাইপ দেখল রানা, ওর পিছনের জিনিসটা থেকে বেরিয়ে সামনের দিকে গেছে। ওটা কী বুঝবার জন্য ঘুরে বসল রানা, আলো দেখে একবার উপরে চাইল। সঙ্গে সঙ্গে মাথা দোলাল ববি, যেন বলতে চায়, আরে ওটাই তো বদে'র গোড়া!

পুরু জিনিসটা ভালভ, এগিয়ে যাওয়া পাইপের এক ফুট উপরে গাঁট মেরে রয়েছে। পাশে ছোট একটা প্ল্যাকার্ডে বড় করে লেখা: দোস্তারেজহেনিয়ে! সোজা কথায়, সাবধান হোন! ভালভের উপর দু'হাত নামাল রানা, ঘড়ির কাঁটার উল্টোদিকে মোচড় দিল। নড়ল না ভালভ। এবার উল্টোদিকে ঘোরাল। সহজেই ঘুরতে লাগল ভইল। পুরো ঘোরাল রানা, তারপর পঁ্যাচ আটকে যাওয়ায় বন্ধুর দিকে চাইল। আস্তে করে মাথা দোলাল ববি। যা বুঝবার বুঝেছে রানা—এই ভালভ জাহাজের সি-কক খোলে বা বন্ধ করে। সি-কক খুলে দেয়ায় পানি বিল্জ ডুবিয়ে দিয়েছে, ফলে জাহাজ ডুবতে বসেছিল। এক বা একাধিক লোক মিলে সি-কক খুলে বিল্জ পাম্পগুলো বন্ধ করেছে, তারপর শিকল দিয়ে ইঞ্জিন-রুমের হ্যাচ আটকে দিয়ে উধাও হয়েছে। মাঝরাতে জাহাজ ডুবতে চাইলে এটা ভাল বুদ্ধি।

বিল্জ কম্পার্টমেন্ট থেকে ভেসে উঠল রানা, ইঞ্জিন-রুম আড়াআড়ি ভাবে পার হলো। সামনের মেঝেতে আরেকটা ফ্লোরপ্লেট, তবে ওটা ঠিক ভাবেই বসানো। ওটা সরিয়ে দিল রানা, নেমে পড়ল ভিতরে। পোর্টসাইডের সি-ককও খোলা। ওটা বন্ধ করে উপরে উঠে এল।

রানা ও ববির উদ্দেশ্য অর্ধেক পূরণ হয়েছে। ইঞ্জিন-রুম খুলে জেনেছে জাহাজ কেন ডুবতে বসেছিল। কিন্তু রেদোরভ, সাশা ও অয়েল সার্ভে টিম কোথায় গেল, সেটা জানতে হবে। চট করে ঘড়ি দেখল রানা, আধ ঘণ্টার বেশি হলো ওরা পানির নীচে। এখনও ট্যাঙ্কে যথেষ্ট বাতাস রয়েছে, কিন্তু বরফ ঠাণ্ডা পানি ড্রাই সুটের ওপাশ থেকেই হাড় জমিয়ে দিচ্ছে। মাথা দোলাল রানা, ইঞ্জিন-রুমের হ্যাচ দেখাল।

ববির পিছনে বেরুল ও, ইঞ্জিন-রুমের আশপাশের কম্পার্টমেন্টগুলো দেখতে শুরু করল। কোথাও কোনও অস্বাভাবিকতা পাওয়া গেল না। এক তলা উপরে উঠল ওরা, আগুন নিয়ে খেলা-১

প্যাসেজওয়ে পেরিয়ে জাহাজের পেটের মধ্যে ঢুকল। হলের দু'পাশে রয়েছে কেবিনগুলো।

হাতের ইশারা করল রানা। পোর্টসাইডের কেবিনগুলো দেখবে ববি। নিজে চলল স্টারবোর্ড বার্থগুলোর দিকে। কেবিনগুলো স্টার্নের কাছে, প্রথম দরজা খুলল রানা। এই কেবিন ছিল রেদোরভের। এ ঘর ডুবেছে অনেক আগে, কিন্তু চারদিক সুন্দর করে সাজানো, মনে হয় মানুষটা হঠাৎ ফিরবে। রানা পা নাড়ানোয় একটা খবরের কাগজ মেঝে থেকে ভেসে উঠল, আরেক দিকে গিয়ে নামল। ডেস্কের উপর ল্যাপটপ, পানি ঢুকে শেষ। ডিনারে রেদোরভ যে ভারী জ্যাকেট পরেন, সেটা চেয়ারের পিঠে ঝুলছে। সামনে বেড়ে ক্লজিট খুলল রানা। রেদোরভের শার্ট ও প্যান্টগুলো র্যাকে নিপাট ভাঁজ করে রাখা। যে-লোক হঠাৎ জাহাজ ছাড়বেন, ওগুলো নেবেন না কেন? আপনমনে মাথা নাড়ল রানা। রেদোরভ স্বেচ্ছায় কোথাও যাননি।

কেবিন থেকে বেরিয়ে এল রানা, পরের তিনটি খুঁজল। ওখানেও সবকিছু স্বাভাবিক। স্টারবোর্ডের পিছন দিকের কেবিনটার সামনে হাজির হলো। কার্ক এই কেবিনে ঢোকেননি। প্যাসেজওয়ে থেকে উজ্জ্বল আলো আসছে। ববি পোর্টসাইডের শেষ কেবিনের দিকে চলেছে। নিজের কাজে মন দিল রানা, দরজার ল্যাচটা খুলল। সহজে খুলল না দরজা, দু'হাতে ধাক্কা দিয়ে ভিতরে ঢুকতে হলো। অন্য কেবিনগুলোর মত এটাও সাজানো-গোছানো। তবু একটা জিনিস খুব আলাদা। সরু আলোয় মনে হতে পারে বাক্সে পড়ে আছে একটা ডাফল ব্যাগ, বা দুটো বালিশ—কিন্তু রানার মন বলল, তা নয়!

এ কেবিনের অতিথি এখনও ভিতরে!

মহুর গতিতে বাক্সের পাশে পৌঁছল রানা। চিত হয়ে পড়ে আছে লাশ। ফ্যাকাসে মুখ খিঁচিয়ে রেখেছে। চোখদুটো

বিস্ফারিত। পরনে টি-শার্ট, কোমর পর্যন্ত কম্বল দিয়ে ঢাকা ওটাই আটকে রেখেছে লাশ, নইলে ভেসে উঠত। ফুসফুসের বাতাস বেরুনোর পর মেঝেতে নামত।

বাতির উজ্জ্বল আলো পড়ল লাশের মুখে। ওখান থেকে কপালে। মনোযোগ দিয়ে দেখছে রানা। রাবার গ্লাভসের ভিতর ওর দুটো আঙুল লোকটার কপাল স্পর্শ করল। চামড়ার চার ইঞ্চি নীল রঙের। হাড় ওখানে ভিতরে ডেবে গেছে। ভারী কিছু দিয়ে পিটিয়ে মারা হয়েছে লোকটাকে।

চোখের কোণে হঠাৎ আলো দেখল রানা, ঘুরে দাঁড়াল। দরজা পেরিয়ে ভিতরে ঢুকছে ববি। বাস্ক ও মেঝে লক্ষ করল রানা। ডেকের উপর কার্পেট নেই। কোনও জগ ছিল না কেবিনে। ভারী পেপার-ওয়েট বা বোতল নেই যে তাক থেকে হঠাৎ পড়বে। জেলে-নৌকার মালিককে খালি একটা কেবিন দেয়া হয়, সঙ্গে কিছু আনেনি সে।

কোনও সন্দেহ নেই, তাকে খুন করা হয়েছে।

নয়

‘যে-ই হোক, শয়তানি করে নষ্ট করেছে,’ রাগে কেঁপে উঠলেন জোসেফ কার্ক। ‘হার্ডওয়্যার থেকে আমাদের সমস্ত ডেটা মুছে দিয়েছে। গত কয়েকদিনের সব ডেটা শেষ!’ ব্রিজে মাসুদ রানা ও ববি মুরল্যাঙকে ড্রাই সুট থেকে বেরিয়ে আসতে সাহায্য করছেন আর ফুঁসছেন।

‘কোনও ব্যাকআপ নেই?’ জানতে চাইল রানা।

আগুন নিয়ে খেলা-১

‘থাকার কথা,’ বলল ববি, একটা হুকে ড্রাই সুট ঝুলিয়ে দিল। ‘কার্ক, আপনি তো কম্পিউটার ছাড়া কিছুই বোঝেন না। নিশ্চয়ই বরাবরের মত তিনটে করে ব্যাকআপ রেখেছেন?’

‘আমাদের ডিভিডির ব্যাকও চুরি হয়েছে,’ ববির দিকে গনগনে চোখে চাইলেন কার্ক। ‘মনে হয়, রেদোরভের কাজ। কারণ, যে হারামজাদা করেছে, ওই শালা নিজের কাজ বোঝে।’

‘আমাদের প্রিয় রেদোরভ?’ জানতে চাইল ববি। মনে মনে বলল, ‘আরে ভাই, আপনি না নিজেকে ভদ্রলোক মনে করেন? কেন খামোকা গালাগালি করছেন!’

‘আমার মনে হয় না রেদোরভ,’ বলল রানা। ‘তঁার কেবিন দেখেছি, মনে হয়নি নিজের ইচ্ছায় কোথাও গেছেন। অবশ্য, দৃশ্যটা সাজানোও হতে পারে।’

‘কিছুই বুঝতে পারছি না, রিসার্চের ডেটাগুলো কাজে লাগবে শুধু সায়েন্টিফিক কমিউনিটির,’ বললেন কার্ক। ‘আমরা প্রতিটি তথ্য রাশানদের সঙ্গে শেয়ার করেছি! ওগুলো আর কাদের কাজে লাগতে পারে?’ মাথা ঠাণ্ডা হয়ে আসছে তাঁর।

‘হতে পারে ডেটা চুরি মূল উদ্দেশ্য নয়, ওরা চাইছে ওই ডেটার ভিতরে যা আছে, সেটা গোপন করতে,’ বলল ববি।

‘হতে পারে,’ সায় দিলেন কার্ক।

ববি যোগ করল, ‘তা-ই যদি হয়, কার্ক, এতক্ষণে আপনার ব্যক্তিগত কম্পিউটার হৃদের নীচে...’

‘খুশিতে নাচব?’ বিড়বিড় করলেন কার্ক।

‘মন খারাপ করবেন না, আপনি বুড়ো জেলের চেয়ে ঢের ভাল আছেন,’ বলল ববি।

‘তা ঠিক। ওই লোক গোটা নৌকাই হারিয়েছে।’

‘তার চেয়েও বেশি কিছু হারিয়েছে,’ বলল রানা।

ববি জানাল কেবিনে ঢুকে কী দেখেছে।

বর্ণনা শুনে হাঁ হয়ে গেলেন কার্ক, ধীরে ধীরে মাথা

নাড়লেন। ‘কিন্তু বুড়ো মানুষটাকে কে খুন করল? গেল কোথায় সবাই? কিডন্যাপ করা হলো? নাকি ওরাই দায়ী এসবের জন্য? ডেটা চুরির জন্য ঘটছে সব?’

জবাব দিল না রানা। ববিও চুপ। ভাবছে।

নৌকার মালিককে খুন করেছে রেদোরভ ও সার্ভে টিম? স্বেচ্ছায় গেছে ওরা? কেন? কোথায়?

দুপুরে ইলেক্ট্রিসিটির ব্যবস্থা হলো। লিস্তভ্‌ইয়াক্সার মেইন লাইন থেকে দ্যানিয়া পর্যন্ত তার টেনে নিয়ে বিল্‌জ্‌ পাম্পগুলো চালু করা হলো। বাড়তি জেনারেটর ও অক্সিলারি পাম্পগুলোও কাজ শুরু করেছে। অ্যাফট্‌ ডেক থেকে হ্রদে গিয়ে পড়ছে পানির মোটা ধারা। প্লাবিত কম্পার্টমেন্টগুলো খালি করা হবে। ধীরে ধীরে ভেসে উঠছে স্টার্ন। তীর থেকে জাহাজ দেখছে জুরা।

লিস্তভ্‌ইয়াক্সার বাসিন্দারা ব্যস্ত, এলাকা পরিষ্কার করেছে। এ অঞ্চলের বিখ্যাত বাজারটি বসেছে খোলা আকাশের নীচে, নানা জাতের স্মোক্‌ড্‌ মাছ কেনা-বেচা চলছে। চারপাশে করাত ও হাতুড়ির আওয়াজ—মেরামত হচ্ছে বাড়িঘর।

হ্রদের চারপাশ থেকে ভূমিকম্প ও সেইশ ওয়েভের খবর আসছে। দক্ষিণ তীরের বাড়িঘর ভয়ঙ্কর ভাবে বিপর্যস্ত হয়েছে, কিন্তু আগাম সংবাদ পাওয়ায় কোনও মানুষ মারা যায়নি। বিখ্যাত বৈকালস্ক মিল মারাত্মক ক্ষতিগ্রস্ত হয়েছে, আগামী কয়েক সপ্তাহ বন্ধ থাকবে। ভূমিকম্প হ্রদের উত্তরপ্রান্তে তাইসেত-নাখোদকা তেল-পাইপলাইনকে বিধ্বস্ত করেছে, বহু জায়গায় পাইপ ফেটেছে। এ বিপর্যয়ের খবর শুনে এরইমধ্যে রওনা হয়েছেন লিমনোলজিকাল ইনস্টিটিউটের ইকোলজিস্টরা। আশঙ্কা করা হচ্ছে, উপচে পড়া তেল হ্রদে এসে নামবে।

লাঞ্চার পর লিস্তভ্‌ইয়াক্সার পুলিশ-চিফ দ্যানিয়া জাহাজে উঠলেন, সঙ্গে ইরকুতস্ক থেকে আসা দু’জন পোয়েন্দা। এঁরা আঙুন নিয়ে খেলা-১

ব্রিজে আসতেই আনুষ্ঠানিক ভাবে অভ্যর্থনা জানালেন ক্যাপ্টেন তিতভ। চেহারা দেখে বোঝা গেল, চিফ নীচ ধরনের লোক, ইউনিফর্ম তার ফিট হয়নি। রানা, ববি ও কার্ককে কম্পিউটারের সামনে দেখে তাচ্ছিল্যের সঙ্গে হাত নাড়ল—যেন বলতে চায়, ব্রিজে আবার এসব ফালতু লোক কেন! রানা বুঝল, এ লোক ক্ষমতা জাহির করতে পারলে খুশি হয়। হয়তো কোনও কাজই করবে না, কিন্তু তাকে গুরুত্ব দিতে হবে, নইলে সর্বনাশ করতে চাইবে। তিতভ জানালেন তাঁর এক ক্রুকে হারিয়েছেন, নিমজ্জিত কেবিনে জেলেনৌকার ক্যাপ্টেনের লাশ পাওয়া গেছে।

মৃতদেহের কথা শুনে রাগে লাল হয়ে উঠল চিফ। দ্যানিয়া জাহাজ ডুবতে বসেছিল, সেটা সাধারণ কোনও দুর্ঘটনা বলে চালানো যেত। কিন্তু সবকিছু জটিল করে তুলেছে ওই মরা হারামদাজা—এখন কাগজপত্র নিয়ে বসতে হবে, সেট অফিসাররা ঘাড়ের উপর শ্বাস ফেলবে। লিস্তভিয়াস্কাই কালে ভদ্রে দুয়েকটা মারামারি হয়, কখনও বা সাইকেল চুরি হয়—সেসবই যথেষ্ট ছিল। খুনের কী তদন্ত করবে সে? খেপে গেল লোকটা। বলল, ‘ভুল বলছেন আপনি, তিতভ। পপোভিজকে আমি ভাল করে চিনতাম। বেহেড মাতাল ছিল, আর সব বুড়োর মতই ভোদকা খেয়ে মরেছে। দুর্ঘটনা, আর কিছু না।’

‘কিন্তু আমার এক ক্রু আর সায়েন্টিস্ট রেদোরভের হারিয়ে যাওয়া?’ ক্যাপ্টেনের কণ্ঠে তীক্ষ্ণ বিদ্রূপ। ‘যে সার্ভে টিমকে উদ্ধার করি, তাদের কী হলো? জাহাজ ডুবিয়ে দেয়ারও চেষ্টা হয়েছে। এগুলোকে কী বলবেন আপনি, চিফ?’

‘হ্যাঁ, হুম্,’ বলল লোকটা। ‘ক্রু নিশ্চয়ই ভুল করে সি-কক খুলে ফেলে। ব্যাপারটাকে শ্রেফ একটা ভুল বলতে পারেন। ওরা যখন বুঝল, লজ্জা পেয়ে পালিয়ে গেল। শহরের গুঁড়িখানাগুলো খুঁজলে ওদের পাব।’ সে বলছে বটে, তবে টের পেল ইরকুতস্ক

থেকে আসা দুই গোয়েন্দা এসব মানবে না। বলে চলল সে,
'আমরা ত্রুদের ইন্টারভিউ নেব, প্যাসেঞ্জার কোথায় গেল সেটাও
তদন্ত করব। সময়ে সবই বেরিয়ে আসবে।'

উঠে দাঁড়াল রানা, এতক্ষণ চিফের পাশে দাঁড়ানো দুই
গোয়েন্দার উপর নজর বুলিয়ে যা বোঝার বুঝে নিয়েছে। এরা
ইরকুতক্ষ সিটি পুলিশের ক্রিমিনাল ইনভেস্টিগেশন ডিভিশন
থেকে এসেছে। বিরক্ত চেহারা দুটো বলছে, পুলিশ-চিফ যা-ই
বলুক, তারা তদন্ত করবে। ইউনিফর্ম পরেনি, কোটের ভিতর
আগ্নেয়াস্ত্র রেখেছে। ফালতু পুলিশ নয়, চেহারায় আত্মবিশ্বাস ও
ট্রেইনিঙের ছাপ। সবাইকে নিয়ে পুরো জাহাজ ঘুরে দেখল
তারা। রানা লক্ষ করেছে, লোক দু'জন পপোভিজ বা সার্ভে টিম
নিয়ে মোটেই চিন্তিত নয়, বিজ্ঞানী রেদোরভের হারিয়ে
যাওয়াকেই গুরুত্ব দিচ্ছে।

জিজ্ঞাসাবাদের পর বিড়বিড় করে বললেন কার্ক, 'কে বলে
রেদোরভ ভাল নেই? যেখানেই থাকুক, আনন্দে আছে।'

আবার ব্রিজে ফিরল সবাই। বারবার ক্যাপ্টেন তিতভকে
কড়া চোখে দেখছে পুলিশ-চিফ। নির্দেশ দিল, অনুপস্থিত ত্রুদের
যত শীঘ্র সম্ভব ফিরিয়ে আনতে হবে; যতক্ষণ তদন্ত শেষ না হয়,
সবাইকে জাহাজে থাকতে হবে।

তিন পুলিশ অফিসার চলে যাওয়ার পর ববি বলল, 'চট করে
যে ভাঙা থেকে দুটো বিয়ার খেয়ে আসব, সে সুযোগও দিল না
ব্যাটারা।'

'ওয়াশিংটন ছেড়ে এসে ভুল করেছি,' বিরক্ত স্বরে বললেন
কার্ক। 'কপাল মন্দ, শেষে সাইবেরিয়ায় এসে বন্দি হলাম!'

'গ্রীস্মে ওয়াশিংটন বাজে একটা জলাভূমি, এর বেশি কিছু
না,' বলল ববি।

জানালা দিয়ে বৈকাল ত্রুদের প্রাকৃতিক দৃশ্য দেখছে রানা,
দেড় মাইল দূরে গিয়ে পড়ল নজর—কালো জাহাজটা গতকাল
আগুন নিয়ে খেলা-১

ওখানে ছিল। এখন আরও দূরে একটা ডকে ভিড়েছে। স্টার্নে
বিরাট একটা ক্রেন, ব্যস্ত হয়ে কার্গো হোল্ড থেকে মালামাল
নামাচ্ছে।

ব্রিজের জানালার পাশে শক্তিশালী বিনকিউলার ঝুলছে, ওটা
আনমনে তুলে নিল রানা, চোখে লাগাল।

কালো জাহাজের পাশের ডকে দাঁড়িয়ে রয়েছে বড় দুটো
ফ্ল্যাটবেড ট্রাক। পাশে ছোট আরেকটা কাভার্ড ট্রাক। ক্রেনটা
বড় ট্রাকগুলোর উপর মালামাল নামাল। অবাক হলো রানা,
জাহাজগুলো সাধারণত লিস্তভিয়াস্কা থেকে মাল সংগ্রহ করে,
হ্রদের চারপাশের গ্রাম বা শহরে পৌঁছে দেয়। একটা ফ্ল্যাটবেড
ট্রাকের উপর ফোকাস করল রানা। ক্রেন ওটার উপর অদ্ভুত কী
একটা জিনিস নামাল। ওটা দেখতে উল্টো কোন্ আইসক্রিমের
মত। কাঠের বাস্ক, তবে ক্যানভাস দিয়ে মোড়ানো।

‘ক্যাপ্টেন,’ বলল রানা, ‘ওই কালো ফ্রেইটারটা দেখছেন?
ওটা সম্পর্কে কিছু জানেন?’

রানার পাশে চলে এলেন তিতভ। ‘ওটার নাম তাতিস্কা।
হ্রদে বহু বছর ধরে চলাচল করছে। এক সময়ে লিস্তভিয়াস্কা
থেকে উত্তরদিকে বৈকালস্কয়-এ স্টিল আর কাঠ নিয়ে যেত।
ওখানে এখন কাজ শেষ। এরপর জাহাজটা কয়েক মাস নোঙর
ফেলে এক জায়গায় দাঁড়িয়ে ছিল।’

‘আর এখন?’

‘এখন কিছুদিনের জন্য এক তেল কোম্পানি ওটা লিজ
নিিয়েছে। নিজেদের লোক সঙ্গে নিয়ে এসেছে, আগের ক্রুদের
কাজে নেয়নি বলে সবাই বিরক্ত। জানি না কোন্ কাজে ওটা
লাগানো হবে। হয়তো পাইপ লাইনের ইকুইপমেন্ট আনা-নেয়া
করবে।’

‘তেল কোম্পানি,’ বিড়বিড় করল রানা। ক্যাপ্টেনের চোখে
চাইল। ‘কোম্পানির নাম কি বরজিন অয়েল কনসোর্টিয়াম?’

‘তা-ই তো মনে হয়।’ কয়েক মুহূর্ত ভাবলেন ক্যাপ্টেন, তারপর বললেন, ‘হ্যাঁ, নাম ওটাই। ওরা হয়তো সার্ভে টিম, রেদোরভ আর সাশার ব্যাপারে কিছু বলতে পারবে।’ রেডিওর পাশে গিয়ে দাঁড়ালেন তিনি, ফ্রেইটারের ব্রিজে যোগাযোগ করছেন।

কয়েক সেকেন্ড পর ওপাশ থেকে কর্কশ মেজাজের এক লোক ঘেউ করে উঠল। ক্যাপ্টেনের প্রশ্নের জবাবে সংক্ষিপ্ত উত্তর দিচ্ছে সে। কান খোলা রেখেছে রানা, তবে বিনকিউলারে ফ্রেইটার দেখছে। ওর চোখ আটকে গেল জাহাজের খালি স্টার্নের উপর। বিনকিউলার নামিয়ে বলল, ‘ববি, এদিকে এসো।’

বন্ধুর পাশে গিয়ে দাঁড়াল মুরল্যাণ্ড, বিনকিউলার চোখে তুলল। ক্যানভাস দিয়ে ঢাকা জিনিসটা ফ্রেইটার থেকে নামানো হয়েছে। ববি বলল, ‘কার্গো খুব গোপনীয়তার সঙ্গে নামাচ্ছে। কেন?’

‘স্টার্নের ডেক খেয়াল করো,’ বলল রানা।

কয়েক সেকেন্ড পর বলল ববি, ‘গতকাল একটা ডেরিক ছিল। ওটা এখন নেই। ঠিক আমাদের বন্ধুরা যেমন হাওয়া।’

‘আমরা যখন ওই জাহাজের কাছে যাই, তখন ঘুটঘুটে অন্ধকার ছিল,’ বলল রানা। ‘কিন্তু ডেরিক হালকা কোনও জিনিস না যে হঠাৎ উধাও হয়ে যাবে।’

‘ওই ডেরিক অল্প সময়ে খোলা যায় না, দ্রুত খুলতে হলে মেকানিকাল ইঞ্জিনিয়ারদের বড়সড় বাহিনী লাগবে,’ বলল ববি।

‘যতটুকু দেখলাম, ওই জাহাজে মাত্র কয়েকজন ক্রু।’

এইমাত্র মাইক্রোফোন নামিয়ে রেখেছেন ক্যাপ্টেন তিতভ, কাঁধ ঝাঁকিয়ে বললেন, ‘তাতিস্কার ক্যাপ্টেনের সঙ্গে কথা হলো। পোকটা জানাল ওরা কোনও প্যাসেঞ্জার তোলে না। কোনও অয়েল সার্ভে টিম বৈকালের এদিকে কাজ করছে বলেও আগুন নিয়ে খেলা-১

শোনেনি। আমার মুখে শুনে যেন আকাশ থেকে পড়ল।’

‘তা-ই?’ তিক্ত হাসল ববি।

‘ক্যাপ্টেন, আপনি কি ফ্রেইটারের ম্যানিফেস্ট সম্পর্কে প্রশ্ন করেছেন?’ জিজ্ঞেস করল রানা।

‘হ্যাঁ, করেছি,’ বললেন তিত্ত। ‘ওরা নাকি এগ্রিকালচারাল ইকুইপমেন্ট বহন করে। ওদের কাজ ট্র্যাঙ্করের যন্ত্রাংশ ইরকুতস্ক থেকে বৈকালস্কে নিয়ে যাওয়া।’

দশ

স্থানীয় তরুণটি মাত্র কয়েক দিন হলো পুলিশ-বাহিনীতে যোগ দিয়েছে। আজ তাকে ডিউটি দেয়া হয়েছে দ্যানিয়ার উপর নজর রাখার জন্য, আঙুল নাচিয়ে বলেছে চিফ: কেউ যেন ওই জাহাজ ছেড়ে তীরে না নামে। আসবার পর থেকে ডাঙায় পায়চারি করছে সে, তিক্ত মনে ভাবছে, এটা কী ধরনের কাজ! বিরক্তিকর! আমি শালা কি পাহারাদার?

হঠাৎ পায়চারি বন্ধ করল সে, দ্যানিয়া জাহাজের বো’র সামনে থমকে দাঁড়াল। চোখের সামনে টুপ করে ডুবে গেল সূর্য। দ্রুত নেমে আসছে আঁধার। এ সময় মানুষের মন ছোট হয়, মনে হয় জীবন থেকে আরেকটা দিন খসে পড়ল। তরুণের মনে হলো কিছু ঘটলে ভাল হতো।

কিন্তু ঘটবেটা কী?

একবার ভাবল, পাহারা বাদ দেব? ওই দূর থেকে জোরালো বাজনার আওয়াজ আসছে না? হ্যাঁ, বাজনা! ওই পানশালা যেন

হাতছানি দিয়ে ডাকছে ওকে! ওখানে ঢুকতে পারলে মজা হতো! তরুণ মন আঁকুপাঁকু করে উঠল। ওখানে টুরিস্ট দেখা যাবে, চাই কী ইরকুতস্ক থেকে আসা কোনও কলেজ-ছাত্রীর সঙ্গে পরিচয়ও হয়ে যেতে পারে। ব্যাপারটা কি প্রেমে গড়াতে পারে না?

দু'মিনিট নিজের সঙ্গে লড়াই করল তরুণ, তারপর নিজেকে বোঝাল, দায়িত্ব রেখে যাওয়া যায় না।

কিন্তু ভাবতে গিয়ে সময় নষ্ট করেছে সে, কাজেই দেখল না, দ্যানিয়ার স্টার্নে বেরিয়ে এসেছে কালো পোশাক পরা দু'জন লোক—নিঃশব্দে রাবার বোটে নেমেছে তারা।

মাসুদ রানা ও ববি মুরল্যাও জাহাজের গা থেকে সাবধানে জোড়িয়াক সরিয়ে নিল, গভীর পানির দিকে চলেছে। দ্যানিয়ার বো'র কাছে দাঁড়িয়ে কিছুই বুঝল না তরুণ।

‘একটু এগোলে কী মিলবে জানো, রানা?’ ফিসফিস করে বলল ববি। ‘সামনে রয়েছে কয়েকটা বার। মাছ ধরতে যাওয়ার আগে চলো একটু ড্রিঙ্ক করে যাই।’

‘ওসব জায়গা ভয়ঙ্কর ফাঁদ, ধরে ধরে টুরিস্টদের গরম বিয়ার গিলিয়ে দেয়, সঙ্গে থাকে বাসি প্রেটজেল,’ আপত্তি তুলল রানা।

উদাস কবির ভাব ধরল ববি, ‘কোনও বিয়ার না থাকার চেয়ে গরম বিয়ার অনেক ভাল।’

‘তুমি পেট খারাপ করে মারা পড়বে, জেনে শুনে আমি তা হতে দিই কী করে বলো,’ রানা নির্বিকার।

নিকষ আঁধারে মিশে গেল বোট। দু'জন তীর ছেড়ে এক মাইল দূরে সরে গেল। চারপাশ নীরব, থমথমে। স্টার্টার কর্ডে টান দিল রানা, সঙ্গে সঙ্গে কেশে উঠে চালু হলো আউট-বোর্ড ইঞ্জিন। তীরকে সমান্তরাল রেখে এগোল রানা। পঁচিশ হর্স পাওয়ারের ইঞ্জিন বিট-বিট শব্দ করছে, বোটের গতি শ্লথ। ফ্লোরবোর্ড থেকে তিন ফুটি টো-ফিশ তুলে নিল রানা, বোটের

একধার থেকে নামিয়ে দিল। ওটার ইলেকট্রনিক কেবলের দৈর্ঘ্য প্রায় এক শ' মিটার। তার বেশির ভাগ খরচ হলো। গানেলের সঙ্গে লাইন বেঁধে ল্যাপটপ নিয়ে বসল ববি, সাইড-স্ক্যান সোনার কাজ শুরু করল। স্ক্রিনে কয়েক মিনিট পর ভেসে উঠল তলদেশের হলদে ইমেজ।

‘ছায়াছবি শুরু,’ ঘোষণা দিল ববি। ‘এক শ’ আশি ফুট নীচে ঘুমিয়ে আছে হলদে মেঝে।’

তীর থেকে বেশ অনেকটা দূরত্ব রেখে এগিয়ে চলেছে রানা, অনেকক্ষণ পর কালো জাহাজের পাশে পৌঁছল। আরও সিকি মাইল পেরিয়ে আবারও বোট ঘুরিয়ে নিল—তবে এবার আরও বিশ ফুট ফারাক রেখে ফিরছে। তলদেশ এখানে আরও গভীর।

‘আমরা যখন গতরাতে আসি, তাতিস্কা কাছেপিঠেই কোথাও ছিল,’ দক্ষিণ-পূর্ব দেখাল রানা। উত্তরদিকের তীরে কোনও ল্যাণ্ডমার্ক খুঁজছে। ঘন আঁধারে তেমন কিছু দেখা গেল না।

আস্তে করে মাথা দোলাল ববি। ‘আমারও মনে হয় এদিকে ছিল।’

পকেট থেকে কম্পাস বের করল রানা, বেয়ারিং ঠিক করে নিল, নামিয়ে রাখল সামনের বেঞ্চে। বোট এগিয়ে চলেছে, মাঝে মাঝে পেনলাইট জেলে দিক ঠিক করছে রানা। সামনের আধ মাইল পেরিয়ে গেল। কিছু নেই। বোট ঘুরিয়ে নিল রানা, আরও খানিকটা দক্ষিণে সরে ফিরতি পথ ধরল। পরবর্তী এক ঘণ্টা খুঁজল ওরা। ক্রমে তীর থেকে আরও সরছে। ল্যাপটপের স্ক্রিনে তলদেশ দেখছে ববি।

অনেকক্ষণ পর তীরের দিকে চাইল রানা। ওরা ধীরে ধীরে দক্ষিণে সরেছে, কিন্তু কিছুই পাওয়া যায়নি। কথাটা বলবে রানা, কিন্তু তার আগেই বলে উঠল ববি, ‘পেয়েছি।’

কোর্স ধরে এগোল রানা, স্ক্রিনে ঝুঁকে ইমেজ দেখল। কালো কিছু ভেসে উঠছে। আরেকটু এগোতে মনে হলো, জিনিসটা

উল্টো A-এর মত। তার সঙ্গে ক্রস-মেশারও রয়েছে।

‘লম্বায় চল্লিশ ফুট,’ বলল ববি। ‘গতরাতে যে ডেরিক দেখলাম, মনে হয় ওটাই। ব্যাটারা নোংরা করেছে হুদ, শান্তি হওয়া উচিত।’

কালো ফ্রেইটারের দিকে চাইল রানা, ‘কিন্তু প্রশ্ন হচ্ছে, ওয়াটসন, কাজটা করল কেন?’

কিছুক্ষণ পর বোটের ইঞ্জিন বন্ধ হলো। ববি জানে, প্রশ্নের জবাব না পাওয়া পর্যন্ত থামবে না রানা। কালো জাহাজটা দেখবার পর থেকে খটকা লাগছে ওর। বরজিন অয়েল কনসোর্টিয়াম ওটা লিজ নিয়েছে শুনে ঠিক করেছে, ওখানে টু দেবে। ওর মনে কোনও সন্দেহ নেই, ওই জাহাজের সঙ্গে পান্ডেল রেদোরভ ও সার্ভে টিমের অদৃশ্য হওয়ার সম্পর্ক রয়েছে। দূর থেকে ফ্রেইটার দেখছে রানা, কী যেন ভাবছে। সোনার ফিশ পাটাতনে তুলল ববি, ল্যাপটপ বন্ধ করে বৈঠা হাতে তুলে নিল। নিঃশব্দে জাহাজের দিকে এগোল বোট।

তীরের কাছে অন্ধকারে থম মেরে আছে তাতিস্কা। খানিক দূরে ছোট্ট একটা গ্রাম। ওখানে কোনও আলো নেই। ট্রাকদুটো এখনও পিয়ারের পাশে রাখা—পিঠের উপর রহস্যময় মালামাল। লম্বা একটা শিকল দিয়ে পিয়ারের মুখ বন্ধ। গ্রামবাসী ঢুকবে, তা হবে না। পথের মাথায় একটা কুঠি—সামনে পায়চারি করছে দুই প্রহরী। একটা ট্রাকের পাশে দাঁড়িয়েছে কয়েকজন, বনেটের উপর খোলা মানচিত্র রেখে দেখছে। মনে হলো না জাহাজে কেউ আছে।

নিঃশব্দে তাতিস্কার স্টার্নের দিকে এগোল রানা-ববি। কিছুক্ষণ পর উঁচু ফ্যানটেইলের নীচে পৌছল। স্টার্নের মুরিং লাইন কাছে আসতেই খপ করে ধরল রানা, ওটার সাহায্য নিয়ে ডকের পাশে বোট ভিড়াল। ববির জন্য অপেক্ষা করল না, বোট ছেড়ে ভূতের মত উঠে গেল আঁধার ডকে। ফাটা এক পাইলনের আগুন নিয়ে খেলা-১

সঙ্গে দড়ি বাঁধল ববি, এক লাফে পিয়ারে উঠে দাঁড়াল বন্ধুর পাশে।

ট্রাকদুটো জাহাজের বো'র কাছে পার্ক করা। লোকজনের গলার আওয়াজ ওখানে। একটু দূরে ডকের কিনারে কয়েকটা জং ধরা ড্রাম রাখা। ওদিকে এগোল রানা। ওর পিছন পিছন হাজির হলো ববি। ফিসফিস করে বলল, 'সোমবার চার্চ যেমন ফাঁকা থাকে, তেমনি ফাঁকা জাহাজ।' ফ্রেইটারের দিকে চেয়ে আছে।

'কিন্তু একটু বেশি খালি লাগছে না?' রানার কণ্ঠে সন্দেহ। ড্রামের পাশ থেকে উঁকি দিল—পিয়ারের শেষপ্রান্তে জাহাজের সামনের হোল্ডে মিশেছে এক গ্যাংওয়ে। ডকের রেলিং খেয়াল করল রানা। আট ফুট উঠলে রেলিং ধরা সম্ভব। বন্ধুর দিকে চাইল। 'গ্যাংপ্ল্যাঙ্ক দিয়ে জাহাজে ওঠা বেশি রাজকীয় হয়ে যায়। চলো, এক কাজ করি, এই ড্রামগুলোর উপর ওঠা যাক।'

'ভিতরে কী?' ড্রামে মৃদু টোকা দিল ববি। 'খালি। এক মাথা তুমি ধরো, আরেক মাথা আমি—একটা নিলেই যথেষ্ট।'

ড্রামটা নিঃশব্দে তুলে নিল দু'জন, দ্রুতপায়ে ডকের আরেক প্রান্তে এসে জাহাজের পাশে নামাল। প্রথমে ড্রামের উপর উঠল রানা। তাতিকার খোল মাত্র তিন ফুট দূরে। কিন্তু ওই পর্যন্ত পৌঁছতে হলে মাঝখানের পানি ডিঙাতে হবে। একবার রেলিঙের নীচের অংশ দেখল রানা, তারপর ছোঁড়া টিলের মত লাফ দিল। দূরত্ব মুহূর্তে পেরিয়ে গেল, দু'হাতে খপ্প করে ধরল রেলিঙের রড। দু'সেকেণ্ডে বুলল, তারপর পেগুলামের মত ডানে-বামে দুলতে লাগল। সামান্য গতি বাড়তেই ডান পা তুলল, প্রথম রডের তলা দিয়ে ভরে দিল উরু। পরের সেকেন্ডে রডের তলা দিয়ে শরীর ছেঁচড়ে ডেকে উঠল। ববি খাটো মানুষ, ফলে এভাবে লাফ দেয়া তার জন্য কঠিন, আরেকটু হলে ঠাণ্ডা পানির মধ্যে পড়ত—শুধু বামহাতে রেলিং ধরতে পারল। অসহায় ভাবে

ঝুলতে লাগল। রানা দু'হাতে ওকে চট করে ধরল, এক টানে ডেকে তুলে নিল।

‘এলিভেটর না থাকলে এর পর থেকে আমি নেই,’ বিড়বিড় করল ববি।

বিশ্রাম নিতে তিরিশ সেকেণ্ড ব্যয় করল রানা, চারদিক দেখল। এখানে গাড় অন্ধকার। চারপাশ পুরোপুরি নিস্তব্ধ।

তাতিস্কা ছোট ফ্রেইটার, সাগরগামী নয়, দৈর্ঘ্যে দু’ শ’ তিরিশ ফুট। ডিজাইনের দিক দিয়ে ক্লাসিক কার্গো শিপ। মাঝখানে সুপারস্ট্রাকচার। সামনে-পিছনে খোলা ডেক। তাতিস্কার খোল স্টিলের, তবে ডেকগুলো কাঠের—তার উপর গত চল্লিশ বছর ধরে তেল আর ডিজেলের দাগ পড়েছে। একপাশে ধাতব কয়েকটা কন্টেইনার রাখা। ঘাড় নেড়ে ইশারা করল রানা।

দু’জন দ্রুত এগোল, একটা কন্টেইনারের আড়ালে থামল। এক কোনা থেকে উঁকি দিয়ে স্টার্নের হোল্ড দেখল রানা।

বে’র দু’দিকে লোহার পাইপ রাখা। হোল্ডের মাঝখানে কিছু নেই। কিন্তু মেঝের উপর অসংখ্য দগদগে দাগ। ওগুলো বোধহয় ডেরিক খুলতে গিয়ে হয়েছে। রানার চোখ পড়ল হোল্ডের মাঝে, ওখানে পড়ে আছে ছ’ ফুট ডায়ামিটারের ডেক ক্যাপ। বোধহয় ওটা দিয়ে অ্যাক্সেস হোল ঢেকেছে।

‘স্ট্রিং হোল, নর্থ সি’র ড্রিল শিপের মত,’ নিচু স্বরে বলল রানা।

‘ড্রিল পাইপও আছে,’ বলল ববি। ‘কিন্তু এ জাহাজ ড্রিল শিপ হয় কী করে?’

মাথা দোলাল রানা, ববি ঠিকই বলেছে। তাতিস্কা ড্রিল শিপ না যে পাইপ বা ড্রিল থাকবে। এরা মাটি খুঁড়ে পেট্রোলিয়াম খুঁজছে? জাহাজে তেল তুলবে? এই ফ্রেইটার হয়তো মাটির গভীরে ড্রিল করবে, পাইপ বসাবে—কিন্তু তেল তুলতে পারবে আগুন নিয়ে খেলা-১

না। বরজিন অয়েল কনসোর্টিয়াম তা হলে জাহাজটাকে এই কাজে লাগাতে চায়?

দ্বিতীয়বার ভাবল না রানা, দ্রুতপায়ে পোর্টসাইডের প্যাসেজওয়ের কাছে হাজির হলো। বান্ধহেডের সঙ্গে পিঠ ঠেকিয়ে প্যাসেজওয়েতে উঁকি দিল। কারও সাড়াশব্দ নেই। ফাঁকা করিডোর। হালকা পায়ে রওনা হলো রানা, পিছনে ববি। ডক থেকে আর দেখতে পাবে না কেউ।

খানিক এগোতে সামনে ক্রস প্যাসেজওয়ে পড়ল। ওখানে স্বল্প ওয়াটের বাতি জ্বলছে, হলদেটে আলো। দূরে ইলেকট্রিকাল জেনারেটর চলছে। বাতির সামনে থামল রানা, সোয়েটারটা কোমর থেকে তুলে সাবধানে ধরল বালব। কয়েক পঁ্যাচ খুলতেই নিভে গেল বাতি। ঢাকা প্যাসেজওয়ে, ডকের আলো পৌঁছেনি এখানে। চারদিক ঘুটঘুটে অন্ধকার।

ক্রসওয়ের কোনা থেকে উঁকি দিল রানা। চারপাশ দেখে নিয়ে আবারও পা বাড়াবে, কিন্তু কানের কাছে খুট করে আওয়াজ হলো। পিছনের কেবিনে কেউ, দরজা খুলছে! দুই লাফে পাশের প্যাসেজে ঢুকল রানা-ববি, কয়েক পা এগোতেই বামে একটা খোলা কম্পার্টমেন্ট পড়ল—ভিতরে মৃদু আলো। চট করে ভিতরে ঢুকল দু'জন। দরজা বন্ধ করল ববি।

পদশব্দের জন্য অপেক্ষা করল ওরা, সেই ফাঁকে চারপাশ দেখল। এটা জাহাজের মেস, কনফারেন্স রুম হিসাবেও ব্যবহার হয়। জাহাজটা অতি পুরানো, পরিত্যক্ত হওয়ার মত, কিন্তু এ ঘরের আসবাবপত্র সব নতুন। মেঝে ঢেকেছে ইরানি কার্পেট, একমাথা থেকে আরেকমাথা পর্যন্ত মেহগনি কাঠের টেবিল, চেয়ারগুলো দামি চামড়া দিয়ে মোড়ানো। পুরু ওয়ালপেপার দিয়ে দেয়াল ঢাকা, এখানে-ওখানে রুচিসম্মত তৈলচিত্র। চারদিকে টবে নকল গাছ দেখে পরস্পরকে দেখল দু'জন। এ ঘর ওয়ালডোর্ফ-অ্যাসটোরিয়ার লবির মত সাজানো হয়েছে।

ওদের দরজার উল্টোদিকে ডবল পাল্লাওয়ালা দরজা, ও পথে গেলে বোধহয় জাহাজের গ্যালি। রানার পাশের বান্ধহেডে ডেকহ্যাণ্ডের জন্য বিশাল এক ভিডিও স্ক্রিন। ওটাতে স্যাটলাইট ভিডিও ফিড চলছে।

‘ভাজা মাছ আর বোর্চ স্যুপ নিয়ে আরাম করে বসবার পরিবেশ,’ বিড়বিড় করল ববি।

কোনও মন্তব্য না করে এক দেয়ালের সামনে গিয়ে দাঁড়াল রানা—ওখানে পিন দিয়ে কিছু মানচিত্র আটকানো। একবার দেখেই রানা বুঝল, ওগুলো কম্পিউটার থেকে পাওয়া। বৈকাল হ্রদের বিভিন্ন সেকশন দেখিয়েছে। কিছু জায়গায় কলম দিয়ে লাল বৃত্ত আঁকা। একটা মানচিত্রে উত্তরপ্রান্ত দেখানো, ওখানে অনেক বেশি লাল বৃত্ত। কোনও কোনও বৃত্ত উপকূলের উপর বসানো, ওখানে পশ্চিম থেকে পূবে গেছে তেলের পাইপ-লাইন।

‘যেসব জায়গা ড্রিল করা যায়, বা করা হয়েছে?’ জানতে চাইল ববি।

‘কী জানি।’

কান পাতল ববি। পায়ের শব্দ মিলিয়ে গেল। দূরের কোনও সিড়ি বেয়ে নেমে গেছে। আর কোনও আওয়াজ নেই। দরজা এক তিল ফাঁক করল ববি। প্যাসেজওয়ে এখন ফাঁকা।

‘ধারেকাছে কেউ নেই। জাহাজে কেউ আছে কি না সন্দেহ।’

নিচু স্বরে বলল রানা, ‘লোকটা তীরে পৌঁছে কোনদিকে যায়, দেখতে চাই।’

সাবধানে দরজা ফাঁক করল ববি, দু’জন বেরিয়ে এল। পোর্টসাইড প্যাসেজওয়ে ধরে নিঃশব্দে এগোল ওরা। খানিকটা যেতেই সুপারস্ট্রাকচার ফুরিয়ে গেল—সামনে খোলা ডেক। দু’দিকে খয়ে যাওয়া দুটো হোল্ড। পোর্টের গলুইয়ের কাছে ক্রেডলে পুরানো এক বোট। পাশে উইঞ্চ, ওটার কেবল এখনও বোটের সঙ্গে লাগানো। বোট সম্প্রতি ব্যবহার হয়েছে।

আগুন নিয়ে খেলা-১

‘কেউ ব্রিজে থাকলে পরিষ্কার দেখতে পাবে বোটটা,’ মাথা কাত করে ব্রিজ দেখাল ববি। বিশ ফুট উপরে সামনের জানালা, ম্লান আলো আসছে ওখান থেকে।

‘কেউ তাকিয়ে থাকলে তবেই দেখবে,’ বলল রানা। ‘আমি চট করে ঘুরে আসছি, তুমি থাকো।’

ছায়ার ভিতর অপেক্ষা করল ববি। পোর্ট ডেকের দিকে দ্রুত পা চালাল রানা। ডক ও ব্রিজ থেকে আলো আসছে, ডেক আবছা ভাবে দেখা যায়। ছায়ার মত এগিয়ে চলেছে রানা। চোখের কোণে ট্রাকগুলো দেখল। একটার কাছে গোল হয়ে আলাপ করছে কয়েকজন। রানার পরনে কালো রঙের সোয়েটার ও প্যান্ট। ডক থেকে ওকে দেখা প্রায় অসম্ভব। ওর চিন্তা শুধু ব্রিজের লোকটা।

বোটের পাশে দৌড়ে পৌঁছল রানা, গলুই ঘুরে রেলিঙের ছায়ার ভিতরে বসল। কয়েক সেকেণ্ড অপেক্ষা করল, কেউ চিংকার করল না। ফ্রেইটার থমথম করছে। কাছের গ্রাম থেকে সামান্য আওয়াজ আসছে। মাথা উঁচু করল রানা, ব্রিজের দিকে চাইল। ভিতরে দু’জন লোক, ডেকের দিকে খেয়াল নেই, কী নিয়ে আলাপ করছে।

উবু হয়ে বসল রানা, পেনলাইট বের করে এক সেকেণ্ড আলো ফেলল। বোটের খোলটা দেখছে। তক্তাগুলো বয়সের ভারে মুচমুচে, লাল রং করা। খোলে হাত বুলিয়ে দেখল, নখে উঠল রং। যা সন্দেহ করেছে—দ্যানিয়ার স্টারবোর্ডে এই রঙই দেখেছে ও!

উঠে দাঁড়াল রানা, গলুই ঘুরে এগুনোর আগেই কী যেন পড়ল চোখে। পাটাতনের কাছে হাত নিয়ে বাতি জ্বালল। দু’সেকেণ্ড পর নিভিয়ে দিল আবার। এই হ্যাট ওর পরিচিত। কপালের কাছে আঁকা এক ষাঁড়, পা দাবিয়ে তেড়ে আসছে। জিনিসটা জিওফিসিস্ট পাম্বেল রেন্দোরভের। নিঃশব্দে শিস

বাজাল রানা। তাতিকা জাহাজে রহস্যময় কিছু ঘটছে।
লোকগুলো দ্যানিয়া ডুবিয়ে দিতে চেয়েছে। জু-সাশা, রেরদোরভ
ও সার্ভে টিমকে ধরে এনেছে।

কিন্তু কেন?

পেনলাইট পকেটে রেখে উঠে দাঁড়াল রানা, আরেকবার
চাইল ব্রিজের দিকে—লোকদুটো এখনও আলাপে ব্যস্ত। গলুই
ঘুরে ফিরতি পথ ধরতে গিয়েও থমকে দাঁড়িয়ে পড়ল রানা।
ঘাড়ের কাছে শিরশির করছে! কেউ খুব কাছে চলে এসেছে! ঘুরে
দাঁড়াল রানা, কিন্তু ততক্ষণে দেরি হয়ে গেছে—হ্যালোজেন
ফ্ল্যাশলাইট জ্বলে উঠল চোখের সামনে। পরক্ষণে রাশান ভাষায়
চিৎকার করল কেউ, ‘ওস্তানোভকা!’

এগারো

ডকের আলোয় ছোকরাকে দেখতে পেল রানা, পাঁচ ফুট দূরে
থেকে। হালকা-পাতলা গড়ন, কালো চুলগুলো তেলতেলে।
পরনে কাজের ওভারঅল। ওকে দেখে নার্ভাস মনে হলো, কিন্তু
ডানহাতে ধরা ওয়াইরিজিন পিওয়াই নাইন এমএম
অটোমেটিকটা নিষ্কম্প, নলটা রানার বুক থেকে সরছে না।
ফোকাসলে ক্যাপস্টানের পিছনে বসে ছিল চুপচাপ। ওখান
থেকে গ্যাংপ্ল্যাক্স পরিষ্কার দেখা যায়। রানার পেনলাইটের আলো
দেখতে পেয়ে সঙ্গে সঙ্গে এসে হাজির হয়েছে।

ছোকরার বয়স বড়জোর আঠারো, বাদামি চোখদুটো অতি
চঞ্চল। রানার মনে হলো না এ পেশাদার গার্ড। পিস্তল ধরা
আগুন নিয়ে খেলা-১

হাতে কালো গ্রিজ। সম্ভবত মেকানিক। তবে আগ্নেয়াস্ত্র ঠিক ভাবেই ধরেছে। উত্তেজিত চেহারা বলছে, প্রয়োজনে ট্রিগার টিপবে।

বোট ও জাহাজের রেলিঙের মাঝখানে আটকা পড়েছে রানা। বোটের ওপাশে দাঁড়িয়ে আছে ছোকরা। মনে মনে দূরত্ব মাপল রানা। লাফ দিয়ে বোট পেরুনো অসম্ভব। ছোকরার বামহাতে অকিটকি, মুখের কাছে তুলল।

যা করার জলদি কর, হাতে সময় নেই! নিজেকে বলল রানা।

ববি এখান থেকে পঞ্চাশ ফুট দূরে, কোনও সাহায্যে আসবে না। ডেকে বেরলে ধরা পড়বে সে-ও।

বোটে লাফিয়ে উঠে ব্যাটার উপর ঝাঁপিয়ে পড়লে? মনে মনে মাথা নাড়ল রানা। নাকে-মুখে গুলি খেয়ে মরব! যদি এক লাফে রেলিং টপকে খসে পড়ি?

একবার ছোকরাকে দেখল রানা। ব্যাটা দ্রুত কথা বলে চলেছে। কোন্ ভাষা কে জানে! কিন্তু চঞ্চল চোখদুটো আর সরছে না! একটু ঝুঁকল রানা, অন্য প্রান্ত থেকে কথা শুরু হলে ছোকরা মনোযোগ সরাবে। একটু সুযোগ ওর এখন খুব দরকার। মোটা একটা কণ্ঠ ঝাঁড়ের মত টেঁচিয়ে উঠল রিসিভারে। এক ইঞ্চির বিশ ভাগের এক ভাগ বামে সরল রানা, পাদুটো শক্ত করল, এবার এক লাফে রেলিং টপকে ঝাঁপিয়ে পড়বে পানিতে।

কিন্তু হলো না।

চোখের সামনে মাজল ফ্ল্যাশ দেখল রানা, কানের কাছে তীক্ষ্ণ আওয়াজ তুলল ওয়াইরিজিন। লাফ দিয়ে উঠেছে ছেলেটার হাতের পিস্তল। বরফের মূর্তির মত জমে গেল রানা। ওর মাথার পাশে ছিন্নভিন্ন হয়েছে রেলিঙের কাঠ। ফুটবলের মত একটা অংশ উধাও! টুকরোগুলো নীচের পানিতে গিয়ে ঝপাস্ করে পড়ল।

একটুও নড়ল না রানা। ডক থেকে হৈ-চৈয়ের আওয়াজ আসছে। ততটা আলোড়ন তোলেনি পিস্তল, যতটা তুলেছে রেডিও। দু'জন লোক দৌড়ে গ্যাংওয়ে বেয়ে উঠল, হাতে পিস্তল। প্রথমজনকে চিনল রানা—দ্যানিয়ার হারিয়ে যাওয়া হেলমস-ম্যান, সাশা। ব্রিজ কম্প্যানিয়নওয়ে থেকে হাজির হলো তৃতীয় একজন, এর কণ্ঠস্বরে কর্তৃত্বের সুর। লোকটার চুল বাদামি, পরিস্থিতি ভালভাবে বুঝতে চাইছে। বাম চিবুকে লম্বা একটা কাটা দাগ, কম বয়সে ছোরার পোচ খেয়েছে।

‘এই লোকটা বোটের পাশে লুকিয়ে ছিল,’ বিজাতীয় ভাষায় নিশ্চয়ই এই কথাটাই বলল ছোকরা।

এক মুহূর্ত রানাকে দেখল বাদামি চুল, তারপর দুই ক্রুর দিকে চাইল। ‘সঙ্গে আরও কেউ থাকতে পারে, খুঁজে দেখো। আর কোনও গোলাগুলি যেন না হয়, দেখবে। আমরা বাড়তি মনোযোগ চাই না।’

ডক থেকে যে দু'জন এসেছে, তারা আলাদা হয়ে গেল, সামনের ডেক থেকে খোঁজা শুরু করল। অন্ধকার জায়গাগুলো ভাল করে দেখছে। পিস্তলের মুখে ডেকের মাঝখানে নিয়ে আসা হলো রানাকে। ব্রিজের লোকটা উপর থেকে উজ্জ্বল বাতি জ্বেলে দিল। চারপাশ মুহূর্তে দিন হয়ে গেল।

‘পাবলো রেন্দোরভ কোথায়?’ শান্ত স্বরে জানতে চাইল রানা। ‘আমাকে এখানে দেখা করতে বলেছে।’

নামটা শুনে বাদামি চুল কোনও প্রতিক্রিয়া দেখাবে তা আশা করেনি রানা। ঠিকই, লোকটা ওর কথা পাত্তা দিল না। জানতে চাইল, ‘তুমি কোন্ দেশি মাল, হে? দ্যানিয়া থেকে বোধহয়? খুব দুঃখজনক, পথ হারিয়েছ।’

‘তাতে কী, তোমাদের তো পেয়েছি,’ বলল রানা, গলা শুকিয়ে কাঠ। ওর কাছে কোনও অস্ত্র নেই, নিজেকে মুক্ত করবে কী করে? দুই বুড়ো এ কোথায় পাঠাল ওকে? অ্যাডমিরাল আগুন নিয়ে খেলা-১

হ্যামিলটন বলেছিলেন, বৈকালভ্রমণ হবে তোমার জন্য সুন্দর এক অবসর বিনোদন! জিভটা তেতো লাগল রানার। অবসরটা আবার চিরস্থায়ী না হয়ে যায়!

উত্তর শুনে কুঁচকে গেল গাল-কাটার কপাল। কয়েক সেকেণ্ড কুঁচকে দেখল রানাকে। হেলম্‌স-ম্যান সঙ্গীকে নিয়ে ফিরছে। কাছে এসে মাথা নাড়ল। ‘একাই এসেছে।’

‘সঙ্গে কেউ নেই?’ বলল বস্। ‘বেশ, ওই লোকের সঙ্গে নিয়ে রাখো। পরে ফেলব।’

রানার পিছনে থামল ছোকরা গার্ড, পিঠে মাজল ঠেসে ধরল। গাল-কাটা বলল, ‘ডাইনে, প্যাসেজওয়ের দিকে এগোও, কোনও চালাকি না।’

একটু স্বস্তি পেল রানা। ছোকরা কয়েক ফুট পিছনে হাঁটলে কিছু করতে পারত না। এখন সুযোগ পাবে। হাঁটতে শুরু করল রানা। সামনে ছায়া পড়বে। প্রহরীরা ওদিকে যাওয়ার আগে ওখানে ববি ছিল। ...এখন কোথায়? নিশ্চয়ই ওদের এগোতে দেখে লুকিয়েছে কোথাও।

প্যাসেজওয়ে শুরু হলো, এগিয়ে চলেছে রানা। পিছনে লেগে থাকল ছোকরা। চিবুক-কাটা বসকে চোখের কোণে দেখল রানা, পাশের স্টেয়ারওয়েল বেয়ে ব্রিজের দিকে চলেছে।

ক্রসওয়ে পেরিয়ে গেল রানা। আশা করেছিল ববি ওখানে তৈরি থাকবে। নেই। সেটা বোধহয় ভালই হয়েছে। ছোকরার পিছনে পিস্তল হাতে হাঁটছে আরও দুই প্রহরী। স্টার্ন ডেকে বেরুল রানা। কোন্‌দিকে যেতে হবে পিঠে পিস্তলের খোঁচা দিয়ে বোঝানো হলো। রেলিঙের ধারে বিশ ফুট একটা কন্টেইনার, মাঝখানে দরজা, ওটার সামনে গিয়ে থামল রানা, কাঁধের উপর দিয়ে চাইল পিছনে। সাশার সঙ্গী ইশারা করতেই একটু পিছিয়ে এল। দরজার সামনে গিয়ে দাঁড়াল লোকটা। বামহাতে পিস্তল, ডানহাতে চাবির গোছা। প্যাডলকে চাবি ঢুকাতে গিয়ে একটু

খতমত খেল। সুযোগ নিল রানা, সামনে বেড়েই আধ পাক ঘুরল—বাম কনুই বিদ্যুদ্বিগ্নে ছুটল ছোকরার পাজর লক্ষ্য করে। ছোকরা কিছু বুঝবার আগেই গুঁতো খেল। ততক্ষণে রানা ঘুরে দাঁড়িয়েছে, ডান কাঁধের পুরো শক্তি ব্যয় করল ও নকআউট পাঞ্চের পিছনে। ওর চোয়ালে নামল যেন স্নেজহ্যামার। মড়মড় করে ভাঙলো তিন-চারটে দাঁত। ছোকরা ঘুরেই হেলম্‌স-ম্যানের বুকের ভিতর গিয়ে সঁদাল, অজ্ঞান! বাড়তি ওজন লোকটাকে বেসামাল করে ফেলল, তারসাম্য ফিরে পাওয়ার চেষ্টা করছে সে। রানা দেখল অজ্ঞান ছোকরার পিস্তলটা খট-খটাশ শব্দে ডেকে পড়ল!

দ্বিতীয় লোকটা তখনও প্যাডলক খুলছে। ঝুঁকি নিল রানা, পিস্তলটা হাতে পাওয়ার জন্য ঝাঁপিয়ে পড়ল ডেকে। পলিমার গ্রিপ মুঠোর মধ্যে পেল বটে, কিন্তু পিঠের উপর ধপাস করে পড়ল বেহুঁশ দেড় শ' পাউণ্ড! হেলমস-ম্যান সাশা এক ধাক্কায় অচেতন দেহটা ওর পিঠের উপর ফেলেছে! গড়ান দিয়ে সরতে চাইল রানা, কিন্তু ঠাণ্ডা নল গলার পাশে খোঁচা দিল। বেঈমান সাশা গর্জে উঠল, ‘খবরদার!’

খেলা শেষ!

পিস্তল ছেড়ে দিল রানা। এদের বস্ বলেছে গোলাগুলি না করতে। কিন্তু দরকার পড়লে? নিশ্চয়ই গুলি করবে!

পিঠের ওজন সরিয়ে দিল রানা, হাঁটু গেড়ে বসল। ওর ঘাড়ের ব্যারেল ঠেসে ধরেছে বিশ্বাসঘাতক। তার সঙ্গী এইমাত্র প্যাডলক খুলেছে। দু’হাতে দরজার দুই পাল্লা সরাল, ঘড়ঘড় শব্দ হলো।

‘ওঠ, শালা!’ কয়েক পা পিছাল দ্যানিয়ার হেলম্‌স-ম্যান। তার সঙ্গী রানাকে দূর দিয়ে পেরুল। ‘ওঠ শালা, ভিতরে ঢোক!’

উঠে দাঁড়াল রানা, দরজা পেরিয়ে ঢুকল ভিতরে। ততক্ষণে লোকটা নিঃশব্দে পিছনে এসে দাঁড়িয়েছে, গায়ের জোরে ধাক্কা দিল পিঠে। নরম কিছুর সঙ্গে হোঁচট খেল রানা, তাল সামলাতে আগুন নিয়ে খেলা-১

না পেরে হুড়মুড় করে পড়ল। তাড়াতাড়ি উঠে ঘুরে বসল।
ভিতরে সামান্য আলো আসছে, ফ্লোরে হাত-পা ছড়িয়ে পড়ে
রয়েছে একজন। মানুষটা দুই কনুইয়ের উপর ভর দিয়ে মুখ
তুলল।

ভাল করে চেনে তাকে রানা।

‘মিস্টার রানা... আবার দেখা হলো, কিন্তু খুশি হতে
পারলাম না,’ ক্লান্ত স্বরে বললেন বিজ্ঞানী পাভেল রেদোরভ।

রানাকে বো’র কাছে বন্দি হতে দেখল ববি, নিঃশব্দে কাউকে
যেন অভিশাপ দিল। সঙ্গে কোনও অস্ত্র নেই! বো ঘুরে টেণ্ডারের
দিকে যাবে? সম্ভব নয়। সামনে খোলা ডেক। গুলির আওয়াজ
পেল ববি। আগুন ঝলসে উঠল! রানাকে সাবধান করছে গার্ড।
ডক থেকে দৌড়ে জাহাজে উঠল দু’জন লোক। ক্রস-
প্যাসেজওয়ায়ে ঘুরে স্টারবোর্ডে যাব? ভাবল ববি। যারা গ্যাংপ্ল্যাঙ্ক
বেয়ে উঠেছে, তাদের পিছনে পৌঁছলে কোনও সুযোগ মিলবে?
না। লোকদুটোকে নির্দেশ দিল আরেকজন। খুঁজতে আসছে
ওরা।

নিঃশব্দে কনফারেন্স রুমে ঢুকে পড়ল ববি। ওরা এদিকে
এলে কোথায় লুকাবে দেখে নিল। সাত মিনিট পেরিয়ে গেল,
কেউ ঘরে ঢুকল না। আরও কয়েক মিনিট অপেক্ষা করে দরজা
ফাঁক করল ববি, উঁকি দিল। নেই কেউ। বেরিয়ে এল ও,
বান্ধহেডের পাশ দিয়ে এগোল। পোর্ট ডেক পেরিয়ে ক্রস-
প্যাসেজওয়ায়েতে ঢুকল আবার। কিন্তু কোনা ঘুরতে গিয়ে ছিটকে
পড়ল ধাক্কা খেয়ে। ওরই মত কালো পোশাক পরা আরেকটা
ভূত, যেন আকাশ থেকে পড়েছে। প্রচণ্ড সংঘর্ষে কাপড়ের
পুতুলের মত ছিটকে পড়ল দু’জন। আগে সামলে নিল ববি,
ক্ষিপ্ত বিড়ালের মত লাফ দিয়ে উঠে পড়ল। উঠতে শুরু করেছে
লোকটাও—সুযোগ দিল না ববি, ঝাঁপিয়ে পড়ল ওর উপর।

ববির গলা টিপে ধরল লোকটা, জবাবে দু'হাতে ওর মাথাটা ধরে বান্ধহেডের সঙ্গে ঠুকল ববি, বারবার, যতক্ষণ না ওর গলা ছাড়ল লোকটা। করোটির হাড় স্টিলের দেয়ালে ঘণ্টির মত তিন-চারটে আওয়াজ তুলল। মাত্র কয়েক সেকেন্ডে, তারপর শিথিল হয়ে গেল দেহটা।

হাঁপিয়ে উঠেছে ববি, এবার কী করবে ভাববার সুযোগ মিলল না। পোর্টের ডেক থেকে পায়ের আওয়াজ আসছে! রানাকে স্টার্নের দিকে নিয়ে চলেছে। আঁধার ক্রস-প্যাসেজগুলোতে অচেতন লোকটাকে টেনে নিল ববি, পাজাকোলা করে তুলে আবারও ঠুকল গিয়ে কনফারেন্স রুমে, নামিয়ে দিল লম্বা টেবিলের উপর। লোকটার উচ্চতা ওরই সমান, পরনে কালো ওভারঅল। মাথায় উলের ক্যাপ। সার্চ করল ববি, লোকটা ফ্রেইটারের রেডিও অপারেটর। ওর কাছ থেকে কোনও অস্ত্র পাওয়া গেল না। ওভারঅলটা খুলে নিল ববি, প্যাণ্টের উপর দিয়ে পরল। কালো রঙের ফিশিং ক্যাপ পরে নিয়ে ভাবল, চট করে তুরা বুঝবে না। করিডোরে বেরিয়ে স্টার্নের দিকে রওনা হলো—কী করবে জানে না এখনও।

পাভেল রেদোরভের পোশাক অগোছালো, চুলগুলো এলোমেলো, চোখের উপর ঘুসি খেয়েছে, বাম দ্রুচর চারপাশে নীল দাগ। ক্লান্ত চেহারা, রানাকে দেখে বললেন, 'আপনিও বন্দি? কেউ আমাদের উদ্ধার করবে না।'

'আপনার অবস্থা কী?' জানতে চাইল রানা, সায়েন্টিস্টকে উঠে বসতে সাহায্য করল।

'আমি ঠিক আছি,' বললেন রেদোরভ। 'ওদের একজন ঘুসি খেয়ে জ্ঞান হারিয়েছিল, তাই একটু পিটিয়েছে।' ক্ষণিকের জন্য ঠোঁটে তৃপ্তির হাসি ফুটে উঠল।

কণ্টেইনারের ডাবল ডোর ঘড়ঘড় শব্দে বন্ধ হলো। চারপাশে আগুন নিয়ে খেলা-১

এখন শুধু ঘুটঘুটে অন্ধকার। একটা ডিজেল জেনারেটরের গুঞ্জন শোনা গেল—লোকগুলো কোনও ক্রেন চালু করছে। কন্ট্রোলগুলো নিয়ে ব্যস্ত অপারেটর। ডেক পেরুল বুম, স্টিলের হুক কন্টেইনারের উপর থামল। কেইবল ছাড়ল অপারেটর, ছাদে হুক নামবার আওয়াজ হলো।

বাক্সের ভিতর পেনলাইট জ্বালল রানা। রেন্দোরভ বললেন, ‘ওরা দ্যানিয়া ডুবাতে চেয়েছিল। কিন্তু আপনাকে এখানে দেখে মনে হচ্ছে, সেটা পারেনি।’

‘প্রায় ডুবিয়েই দিয়েছিল,’ বলল রানা। ‘তবে টেনে নিয়ে যাওয়া হয়েছে সৈকতের কাছে। অয়েল সার্ভে টিমকে খুঁজে পাওয়া যায়নি। ওরা আপনার সঙ্গে এসেছে?’

‘হ্যাঁ, তবে পরে এখান থেকে সরিয়ে নিয়েছে ওদের। আমার কেবিনের বাইরে হই-চই শুনে বেরিয়ে আসি, তখনই পিস্তলের মুখে বন্দি হই। কাজটা করেছে ডেক অফিসার, সাশা। ওই লোকের সঙ্গে ছিল বলোমা, হাতে পিস্তল! আমাদের অস্ত্র দেখিয়ে বোটে তোলে। এখানে কেন নিয়ে এসেছে, জানি না।’ আশ্তে করে মাথা নাড়লেন রেন্দোরভ।

‘আমাদের মুক্তির পথ খুঁজতে হবে এখন,’ উঠে দাঁড়াল রানা, চারপাশে আলো ফেলল। ওরা ছাড়া কন্টেইনারে আর কেউ নেই, চটের কয়েকটা বস্তু পড়ে আছে শুধু।

কেবলের কয়েকটা লুপ কন্টেইনারের সঙ্গে আটকে দিল সাশা। ছাদে উঠল এক হালকা লোক, কেবলগুলো গুছিয়ে নিয়ে ক্রেনের হুকে পরাল। ছোকরা মেকানিক রানার ঘুসি খেয়ে জ্ঞান হারিয়েছিল, এখন জেগে উঠে পিস্তলটা কুড়িয়ে নিয়েছে। তিন্ত চোখে দূর থেকে দেখছে কন্টেইনার।

ক্রেন অপারেটর কন্টেইনার থেকে লাফিয়ে নামল, মেকানিককে পাশ কাটিয়ে ক্যাবে গিয়ে উঠল। জায়গাটা

অস্বকার। এ কাজে এত অভ্যস্ত যে বাতি জ্বালবার দরকার মনে করল না, লিফট লিভার নিয়ে ব্যস্ত হয়ে উঠল। বুমটা উঠতে লাগল, কয়েক সেকেন্ড পর টানটান হলো কেবলগুলো। ডেক থেকে ধীরে ধীরে উঠছে কন্টেইনার। ওটার দিকে পুরো মনোযোগ দিয়েছে সে, খেয়াল করল না আঁধারে এক লোক ক্যাবের পাশে এসে দাঁড়িয়েছে। খুট শব্দে চমকে চেয়ে দেখল, লাফ দিয়ে উঠে পড়েছে লোকটা ক্যাবে!

কানের নীচে ক্যারোটিড আর্টারির উপর বেঁটে একটা আঙুলের খোঁচা খেল অপারেটর, সঙ্গে সঙ্গে জ্ঞান হারাল। দু'হাতে তাকে টেনে নিল ববি, ডেকের উপর ছুঁড়ে ফেলল। অনাহূত অতিথি সিটে বসে কন্ট্রোলগুলো নিয়ে ব্যস্ত হয়ে উঠল। বুম উঠছে, কন্টেইনারটাকে আরও উঠতে দিল ববি, তারপর বামহাতে লিটারাল কন্ট্রোল নাড়ল। বুমটা জাহাজের মাঝখানে আসতেই ফিরতি পথে পাঠাল। পোর্ট রেলিঙের দুই ইঞ্চি উপর দিয়ে পেরিয়ে গেল কন্টেইনার। এক মিনিট পেরুল, কন্টেইনারটা সাগরের উপর এদিক-ওদিক দুলছে। ববির আশা পূরণ হলো, সাশা আর তরুণ গার্ড কন্টেইনারের দিকে এগিয়ে গেল। পোর্ট রেলিঙের সামনে দাঁড়িয়ে দেখবে কী ভাবে জিনিসটা ডোবে।

কন্ট্রোলের উপর দু'হাত রেখে অপেক্ষা করছে ববি। রাতটা শীতল, কিন্তু জ্বর উপর নামল এক ফোঁটা ঘাম। সাশা রেলিং থেকে হাতের ইশারা করল, বুম নামিয়ে দিতে বলছে। বুমটা জাহাজ থেকে আরও কয়েক ফুট সরাল ববি, কন্টেইনার এদিক-ওদিক দুলছে। আর সরবে না, জানে ববি, দ্রুত হাতে কন্ট্রোল টেনে নিল—বিদ্যুৎঘেগে স্টার্নের দিকে ফিরছে বুম!

রেলিঙের পাশ থেকে লোকদু'জন হতবাক হলো—বুম মাথার উপর! দুই টনি কন্টেইনার এক সেকেন্ড ঝুলে থাকল, তারপর তাদের দিকে তেড়ে গেল!

মেকানিক কুৎসিত একটা গালি দিয়ে বসে পড়ল, তার মাথার উপর দিয়ে গেল কণ্টেইনার। কিন্তু সাশার কপাল খারাপ, সে না বসে লাফ দিয়ে পিছাতে চাইল—কণ্টেইনারটা মুহূর্তে হাজির হলো, প্রচণ্ড জোরে ধাক্কা দিল ওর ফুসফুসে। লোকটার গলা দিয়ে বিদ্যুটে আওয়াজ বেরল। ডেকের আরেকদিকে ছিটকে পড়ল, সঙ্গে সঙ্গে মারা গেছে।

গালাগালির ফাঁকে রেলিং থেকে ক্রেন-ক্যাবের দিকে তাকাল মেকানিক, তারপর হঠাৎ চূপ মেরে গেল। বুঝে গেছে ক্যাবে বসে আছে অন্য কেউ! কোমর থেকে পিস্তল বের করল ছোকরা, কিন্তু ততক্ষণে আবার নড়তে শুরু করেছে বুম, কণ্টেইনার নিয়ে পোর্ট রেলিঙের দিকে ছুটল বুম! পিস্তল তুলল সে, ক্যাব লক্ষ্য করে গুলি করল। আগেই নিচু হয়ে গিয়েছে ববি, মাথার উপর দিয়ে তীক্ষ্ণ আওয়াজ তুলে চলে গেল বুলেট। বসে পড়ে ক্রেন কন্ট্রোল চালু রাখল ববি।

ছুটন্ত কণ্টেইনারের দিকে গুলি করল প্রহরী, জানে ওটা মাথার উপর দিয়ে যাবে। কিন্তু ঠিক সময়ে এলিভেশন কন্ট্রোল উপরে তুলে দিল ববি, বুমটা ডেকের উপর নামাল কণ্টেইনার। ছেঁচড়ে এগোল বাক্স, সামনে পড়ল অস্ত্রধারী। তাকে নিয়ে এগোল কণ্টেইনার, রেলিঙে গিয়ে ধাক্কা দিল। ছোকরা চোখের সামনে দেখল তার ডান পা-টা চিড়ে-চ্যাপ্টা হলো। গলা ছেড়ে বেরুল তীক্ষ্ণ চিৎকার। একটানা চেষ্টাতে লাগল, হাতে তখনও পিস্তল। ক্যাব থেকে লাফিয়ে নামল ববি, এক দৌড়ে পৌঁছে গেল ছোকরার কাছে, পিস্তলটা কেড়ে নিল। মাথা থেকে ক্যাপ খুলে গুঁজে দিল ছোকরার মুখে। বলল, ‘আপাতত এ-ই ব্যবস্থা! আকাশ থেকে কিছু পড়লে সবসময় সাবধান!’

ঘোলা চোখে ববির দিকে চাইল তরুণ, এখন তার মাথা ভরা প্রচণ্ড ব্যথা! পিস্তল হাতে কয়েক পা সরল ববি, প্যাডলকের উপর নল তাক করল। দুটো গুলির পর খুলে গেল তালা।

একটানে দরজা খুলল ববি। টলতে টলতে ভিতর থেকে বের হলেন রেদোরভ। পিছনে রানা।

‘এটা কি নরক?’ শয়তানি হাসি হাসল রানা। ‘সামনে কি খোদ ইবলিশকে দেখছি?’

‘ইবলিশের সাধ্য কী এত ভাল বোওলিঙ করে,’ মাথা নাড়ল ববি। ‘তুমি দেখছ রাজপুত্রের মত সুন্দর এক যুবককে। যাকে দেখে হতবাক হয় হাজারো যুবতী, ভেবে পায় না গরিলার মত মানুষটা এত সুন্দর হয় কী করে!’

বিস্মল চোখে ববির দিকে চাইলেন রেদোরভ, তারপর পায়ের ব্যথা ভুলে হেসে ফেললেন।

দাড়ি হাতড়ে নিয়ে তাড়া দিল ববি, ‘আমার মনে হয় না আর এখানে থাকা উচিত! এ রাজ্যের রাজা হঠাৎ হাজির হলে ভয়ঙ্কর বিপদ হবে!’

জাহাজের সামনে থেকে ছুটে আসছে কয়েকজন, চিৎকার করছে! গ্যাংপ্র্যাক্স বেয়ে উঠছে আরও অনেকে! চট করে স্টার্নের ডেক দেখল রানা, তারপর রেদোরভের দিকে চাইল। কণ্টেইনারের ভিতর আছাড় খেয়েছে সারেণ্টিস্ট, খুঁড়িয়ে হাঁটছে—দৌড়াতে পারবে না। ‘আমি বোট নিয়ে আসি,’ বলল রানা। ‘ববি, তুমি ওঁকে স্টার্নের পিছনে নিয়ে এসো।’

মৃদু মাথা দোলাল ববি, ততক্ষণে স্টারবোর্ডের রেলিং লক্ষ্য করে ছুটছে রানা। রেলিঙে পৌঁছে দু’হাতে রড ধরল, দু’পা ঘুরিয়ে নিয়ে লাফ দিল। তার আগে বেশি দূর দৌড়াতে পারেনি, প্রায় ফস্কে গেল পিয়ার। ডেকের উপর ডান পা পড়তেই সামনে বাড়তে চাইল রানা, শরীরটা বলের মত গুটিয়ে নিল—বার কয়েক গড়ান দিয়ে উঠে দাঁড়াল।

জাহাজে আরও লোক উঠছে, তাদের হৈ-চৈ শোনা গেল। বেশকিছু টর্চ ডেকের উপর জ্বলছে, স্টার্নের দিকে চলেছে। বো’র কাছে লোকজনের আওয়াজ। চারপাশ দেখল রানা, হঠাৎ ওকে আশুন নিয়ে খেলা-১

দেখলে গুলি করবে ওরা। এ নিয়ে দ্বিতীয়বার ভাবল না, ঝেড়ে দৌড় দিল জোড়িয়াকের দিকে। আধ মিনিট পর লাফ দিয়ে বোট নামল, ইঞ্জিন কর্ডে টান দিয়ে আশা করল, গর্জে উঠবে ইঞ্জিন। দুবার খুক-খুক করে কেশে চুপ রইল ওটা। দৃঃ-শালা! দ্বিতীয়বার দড়ি টানতেই অবশ্য সাড়া দিল ইঞ্জিন, স্টার্নের দিকে ছুটল রানা। স্টিলের ট্র্যানসমে গিয়ে ধাক্কা লাগতে রাবারের বোট থামাল।

থ্রটল নিউট্রাল করল রানা, উপর দিকে চাইল। ওখানে পাভেল রেদোরভকে দেখল, স্টার্নের দড়ি বেয়ে ধীরে নামছে।

‘হাত ছেড়ে দিন, রেদোরভ,’ তাড়া দিল রানা। পাটাতনের উপর দাঁড়িয়ে রয়েছে, বুঝতে পারেনি লোকটা একবারও দেখবে না কোথায় নামা উচিত। ময়দার বস্তার মত রানার কাঁধের উপর নামল ভারী রাশান, ওখান থেকে পাটাতনে। আছাড় খেল রানা, লাফ দিয়ে উঠে দাঁড়াল। হঠাৎ জাহাজের ডেক ও পিয়ার থেকে গুলি শুরু হলো। মনে হলো ওখানে দু’দল লড়াই করছে। পরমুহূর্তে ববিকে স্টার্নের লাইনের কাছে দেখা গেল। দড়ি বেয়ে দ্রুত নেমে আসছে ববি, বোটের দু’ফুট উপর থেকে পাটাতনে লাফ দিয়ে নামল, ব্যস্ত হয়ে বলল, ‘পলায়নই উট্টম!’

আমেরিকান উচ্চারণে বাংলা শুনে মৃদু হাসল রানা। জাহাজের ডেক থেকে উত্তেজিত চিৎকার আসছে। ধাক্কা দিয়ে বোট সরিয়ে নিল রানা, থ্রটল খুলে জাহাজের পোর্ট বিম ঘুরে বেরিয়ে এল হুদে। পূর্ণ গতি তুলল। বোটের ফাইবার-গ্লাস খোলার পাশে আটকানো ব্যাগসি টিউব, ওগুলো ভারসাম্য রক্ষা করে গতি তুলতে সাহায্য করছে। কয়েক মুহূর্ত বিপদের সম্ভাবনা থাকল, জাহাজ ও ডেক থেকে ওদের পরিষ্কার দেখা গেল। গুলি আসতে পারে, কাজেই পাটাতনে শুয়ে থাকল রানা-ববি-রেদোরভ।

তবে কোনও গুলি এল না। ঘাড় ফিরাল রানা, জাহাজের

পোর্ট রেলিঙে দাঁড়িয়ে রয়েছে ছ'সাতজন, আঁধারে অদৃশ্যমান বোটটাকে দেখছে তারা।

ওদিকে চেয়ে রয়েছে ববি, উঠে বসে বলল, 'শেষদিকে হাল ছেড়ে দিল কেন শালারা?'

'গোলাগুলির আওয়াজে জেগে গেছে গ্রামের সবাই, ওদের আর গোলাগুলির সুযোগ কই?' বলল রানা। এখন আর লুকোচুরি করছে না, বোট নিয়ে দ্রুত দ্যানিয়ার দিকে চলেছে। কিছুক্ষণ পর জাহাজের পাশে পৌঁছল। স্টারবোর্ডে একটা স্টেয়ারওয়েলের পাশে থামল ওরা।

তরুণ পুলিশ হঠাৎ বোট দেখেছে, ওটাকে থামানোর জন্য একের পর এক নির্দেশ ঝাড়ল। রেদোরভ উঠে দাঁড়ালেন, পাল্টা ধমকে উঠলেন। তাঁর ধমক শুনে মিইয়ে গেল তরুণ, ঠকাস্ করে স্যালিউট ঠুকে শহরের দিকে ছুটল।

'কী বললেন?' জানতে চাইল ববি।

'পুলিশ চিফকে ঘুম থেকে তুলতে বলেছি,' বললেন রেদোরভ। 'সবাইকে নিয়ে আসুক। দল ভারী না করলে ফ্রেইটার সার্চ করা যাবে না।'

রানা-ববি জাহাজ ছেড়ে চলে যাওয়ার পর ডেকের উপর পায়চারি করেছেন জোসেফ কার্ক, একটু আগে ব্রিজে গেছেন, তরুণ পুলিশ আর রেদোরভের চিৎকার শুনে বেরিয়ে এলেন, ডেকে তিনজনকে উঠতে দেখে দৌড়ে এলেন।

'ডক্টর রেদোরভ... আপনি সুস্থ?' ডক্টরের ফোলা মুখ ও রক্তাক্ত পোশাক দেখে থমকে গেলেন তিনি।

'আমি ঠিক আছি। প্লিজ, ক্যাপ্টেনকে আসতে বলুন।'

রেদোরভকে নিয়ে সিক বে-তে গেল রানা। ক্যাপ্টেন ও ডাক্তারকে ডাকতে গেলেন কার্ক। ঘর থেকে এক বোতল ভোদকা নিয়ে এল ববি, রেদোরভকে এক গ্লাস ঢেলে দিল। লম্বা এক চুমুক দিলেন বিজ্ঞানী। ততক্ষণে চলে এসেছেন ডাক্তার, আগুন নিয়ে খেলা-১

রোগীকে পরীক্ষা করছেন। জিঙ্কস করলেন, ‘এই হাল হলো কী করে?’

পেটে খানিকটা ভোদকা পড়তেই পিপাসা বেড়ে গেল, দ্বিতীয় চুমুকে গ্লাসটা শেষ করে লাজুক হেসে বাড়িয়ে ধরলেন রেদোরভ ওটা ববির দিকে—আরও খানিকটা না হলেই নয়। মুচকি হেসে আবার গ্লাসটা ভরে দিল ববি।

এইবার রানা ও ববিকে দেখিয়ে বললেন বিজ্ঞানী, ‘এ তো কিছুই নয়। এঁরা আরেকটু দেরি করলেই মরতাম। আমার কপাল ভাল যে নুমার বন্ধুরা ছিল।’

‘আপনি সুস্থ হয়ে উঠুন, সেজন্য,’ নিজের গ্লাস ঠোটে তুলল রানা।

‘আমেন,’ নিজের গ্লাসে চুমুক দিল ববি। জুঁকুচকে উঠেছে ওর, গ্রেসির জন্য উদ্দিগ্ন। জানতে চাইল, ‘ডক্টর, আপনি কি বলতে পারেন গ্রেসি বা অন্যরা কোথায়?’

‘জানি না। জাহাজে তোলার পর আমাকে আলাদা করে দিয়েছে। আমাকে খুন করতে চেয়েছে, তবে ওদের মনে হয় কোনও কাজে লাগাবে। খুব সম্ভব জাহাজেই কোথাও রেখেছে।’

‘পাভেল, আপনি ফিরেছেন,’ এইমাত্র সংকীর্ণ সিক বে-তে ঢুকেছেন তিতভ।

‘কজির হাড়ে চিড় ধরেছে ওঁর, শরীরের এখানে-ওখানে ফুলে গেছে,’ জানালেন ডাক্তার। কপালের উপর ব্যাণ্ড-এইড আটকে দিলেন।

‘এসব কিছুই না,’ হাতের ইশারায় ডাক্তারকে সরে যেতে বললেন রেদোরভ। ‘গুনুন, তিতভ, বরজিন অয়েল কনসোর্টিয়ামের ফ্রেইটার... কোনও সন্দেহ নেই ওরাই আমাদের জাহাজ ডুবিয়ে দিতে চেয়েছে। ওদের পক্ষে কাজ করছিল আপনার ক্রু, সাশা। তার সঙ্গে ছিল বেলোমা নামের ওই ডাইনী।’

‘সাশা? মাত্র কয়েকদিন আগে আমার ফার্স্ট অফিসার ফুড

পয়েজনিঙে অসুস্থ হওয়ায় ওকে নিয়েছি। লোকটা দেখছি চরম বিশ্বাসঘাতক!’ বিড়বিড় করে গাল দিলেন ক্যাপ্টেন। ‘এখনই কর্তৃপক্ষকে জানাব ও দ্যানিয়াকে ডুবিয়ে দেয়ার চেষ্টা ও জেলেবোটের ক্যাপ্টেনকে খুনের সঙ্গে জড়িত। পার পাবে না!’

কর্তৃপক্ষ মানে সেই পুলিশের চিফ ও তার তরুণ অ্যাসিস্ট্যান্ট, দু’জন এল প্রায় এক ঘণ্টা পর। খবর পেয়ে তাদের সঙ্গে এসেছে ইরকুতস্ক থেকে আসা দুই ডিটেকটিভ। পুলিশ চিফকে ঘুম থেকে তুলবার পর সে পোশাক পাল্টেছে, সসেজ দিয়ে নাস্তা করেছে, আয়েশ করে কফি পান করেছে, তারপর রওয়ানা দিয়েছে দ্যানিয়ার উদ্দেশে। আসবার পথে স্থানীয় এক সরাইখানা থেকে দুই ডিটেকটিভকে সঙ্গে নিয়ে এসেছে।

কী ভাবে কিডন্যাপ করা হয় প্রথম থেকে আবারও খুলে বললেন পাভেল রেদোরভ। ববি জানাল তাতিস্কা থেকে ডেরিক ফেলে দেওয়া হয়েছে হুদে। শেষে বলল, কীভাবে ওরা পালিয়ে এসেছে।

চিফের কাছ থেকে তদন্তের দায়িত্ব তুলে নিল ইরকুতস্কের ডিটেকটিভ দু’জন, বুদ্ধিদীপ্ত প্রশ্ন শুরু করল। রানা লক্ষ করল বিশেষ কোনও কারণে সায়েন্টিস্টকে গুরুত্বের সঙ্গে নিয়েছে তারা, মনে হলো দু’পক্ষ পরস্পরকে আগে থেকেই চেনে।

‘আমরা আমাদের পুরো ফোর্স নিয়ে ওখানে তদন্ত করব,’ গাল-ভরা বক্তব্য ঝাড়ল চিফ। তরুণ পুলিশকে বলল, ‘বেলিকভ, এখুনি যাও, আমাদের ফোর্সকে পুলিশ হেডকোয়ার্টারে হাজির করো!’

এক ঘণ্টা পেরুল, তারপর স্থানীয় পুলিশের আটজন মার্চ করে রওনা হলো কালো ফ্রেইটারের দিকে—সামনে চলেছে পেট-মোটা চিফ। ভোরের আলো মাত্র ফুটছে। মাটি ছুঁয়ে ঝুলছে ভেজা ভেজা কুয়াশা। লোকগুলোর পাশে চলেছে রানা, ববি, আগুন নিয়ে খেলা-১

কার্ক ও রেদোরভ ।

আগে ডকের পথ কাঠ দিয়ে আটকানো ছিল, কিন্তু এখন কোনও বাধা এল না । আড়াটা সরিয়ে রাখা । কোনও পাহারাদার নেই । ভিতরে ঢুকল সবাই । চারপাশে কেউ নেই । তিক্ত মনে ভাবল রানা, পাখি উড়ে গেছে! জাহাজের পাশে যে তিনটে ট্রাক ছিল, গায়েব হয়ে গেছে ওগুলোও ।

থপথপ করে গ্যাংপ্ল্যাক্স বেয়ে ফ্রেইটারে উঠল চিফ, গলা উঁচিয়ে ক্যাপ্টেনকে ডাকল । কেউ জবাব দিল না, আওয়াজ বলতে রয়েছে শুধু জেনারেটরের মৃদু গুঞ্জন । লোকটার পিছনে থাকল রানা । ফাঁকা ব্রিজে কেউ নেই । লোকটা খেয়াল করল না জাহাজের লগ, চার্ট বা মানচিত্রগুলো নেই । প্রচুর সময় নিয়ে জাহাজ সার্চ করল পুলিশ । সন্দেহজনক কিছু পাওয়া গেল না । জাহাজে কেউ নেই যে জিজ্ঞাসাবাদ করা যায় ।

‘একেই বলে ক্লিন পাততাড়ি গুটানো,’ বিড়বিড় করে বলল ববি । রানার দিকে চাইল । ‘জাহাজের একটা কেবিনেও কারও ব্যক্তিগত কিছু নেই!’

‘এত কম সময়ে? অস্বাভাবিক,’ বলল রানা । আস্তে করে মাথা নাড়ল । ‘না, মনে হয় ওদের কাজ শেষ হয়ে গিয়েছিল । ওরা এমনিতেই যাচ্ছিল, শেষ মুহূর্তে আমরা হাজির হই ।’

‘সঙ্গে কিডন্যাপ করে নিয়ে গেছে অয়েল সার্ভে টিমকে,’ বলল ববি, গ্রেসির মিষ্টি মুখটা ওর মনে পড়ল । কিছুক্ষণ চুপ করে থাকল ও, তারপর রানার পাশে হেঁটে ব্রিজে ঢুকল । এমন কোনও সূত্র খুঁজছে, যেটা থেকে জানা যাবে ট্রাকগুলো কোথায় গেল ।

ধূসর কুয়াশার ওপার থেকে বেরিয়ে এল লালচে রোদ, জাহাজটাকে ভাসিয়ে দিল আলোর বন্যায় । ব্রিজ উইণ্ডে দাঁড়িয়েছে রানা, স্টার্নের ডেকের দিকে চেয়ে রইল । রেদোরভকে কেন কিডন্যাপ করা হয়? সার্ভে টিমকে কোথায়

নেয়া হলো? জাহাজের ত্রুটা উধাও হয়েছে, তাদের সঙ্গে গেছে রহস্যময় কার্গো—কোথায় নিল? ওই যে পড়ে আছে খালি কন্টেইনার। দু'দিন আগেও ওখানে ছিল ডেরিক। ওটা ফেলে দেয়া হলো কেন? যৌক্তিক জবাব খুঁজছে রানা, বুঝতে পারছে, ডেরিকের সঙ্গে আরও বড় কোনও রহস্য জড়িয়ে রয়েছে।

বারো

হরমুজ প্রণালী। ওখানে ঢুকবার জন্য ভিড় করে আছে ফ্রেইটার, ট্যাঙ্কার ও যুদ্ধ-জাহাজ। খানিক দূরে কাতারের উপকূল।

বিকেল। ব্রিজে দাঁড়িয়ে অস্বচ্ছ কাঁচওয়ালা বিনকিউলার চোখে তুললেন ক্যাপ্টেন রিয়াজ আহমেদ। ডানে পারস্য গালফ। সুনীল জলরাশি রোদ লেগে ঝিকিয়ে উঠছে। আনমনে মাথা দোলালেন রিয়াজ। কপাল ভাল, আজকের ভিড় প্রায় শেষ। দূরে শ্লথ গতিতে চলেছে এক বিশাল ট্যাঙ্কার, ক্রুড অয়েলে টই-টমুর। আরেকবার চারপাশ দেখলেন ক্যাপ্টেন, তাঁদের স্টার্নের এক মাইল পিছনে আসছে একটা কালো ড্রিল শিপ।

ওটা দেখে নিয়ে নিজ জাহাজের উপর বিনকিউলার নামিয়ে আনলেন রিয়াজ। প্রায় আট শ' ফুট দূরে রাজকুমারী রেবেকার প্রাউ। সাদা ডেক উজ্জ্বল রোদে ঝলসচ্ছে। তাঁর সুপারট্যাঙ্কার 'ভেরি লার্জ ক্রুড ক্যারিয়ার' গোত্রের জাহাজ। একেকবারে দু' মিলিয়ন ব্যারেল তেল বহন করতে পারে। তবে প্রকাণ্ড হোল্ড এখন খালি। আবার ফিরছে ঘাওয়ার তেল-খনি থেকে হালকা আগুন নিয়ে খেলা-১

ক্রুড অয়েল নিতে। ক্যাপ্টেন রিয়াজ স্ট্রাইট অভ হরমুজ পেরুনোর সময় আনমনেই সতর্ক হয়ে উঠলেন। ইরানের পিছনে পাগলা কুকুরের মত লেগেছে আমেরিকা, তাদের নেভি পুরো গালফ পাহারা দিচ্ছে, সুযোগ পেলে নতুন আরেকটা যুদ্ধ চাপিয়ে দেবে সবার উপর। ব্রিজে পায়চারি শুরু করলেন রিয়াজ, বারবার দিগন্তে চলে যাচ্ছে চোখদুটো। একবার ক্রুড অয়েল নিয়ে আরব সাগরে বেরুতে পারলে তবে গে স্বস্তি।

হঠাৎ সামনের ডেকের উপর চোখ পড়ল রিয়াজের। বিনকিউলার তাক করলেন। ওখানে চিকন এক লোক, হলুদ এক মপেডে চেপে ডেকের উপর দিয়ে ছুটে আসছে। এখানে-ওখানে পাইপ ও ভালভ, সেসব এড়িয়ে টপ-স্পিডে ছুটছে মপেড। রিয়াজের বিনকিউলার ওটাকে অনুসরণ করল। একলোক খালি গায়ে লাউঞ্জ চেয়ারে বসেছে, মপেড তাকে পাশ কাটল। লোকটার হাতে স্টপওয়াচ।

‘ফাস্ট অফিসার দেখছি এখনও ট্র্যাক রেকর্ড ডিঙাতে চাইছে,’ হেসে ফেললেন ক্যাপ্টেন রিয়াজ।

রংচঙা ন্যাভিগেশন চার্ট দেখছে ট্যাঙ্কারের একযিকিউটিভ অফিসার, চোখ না তুলে আস্তে করে মাথা দোলাল। ‘নিশ্চিত থাকতে পারেন, আজও আপনার রেকর্ড টিকে যাবে।’

আনমনে হাসলেন রিয়াজ। তাঁর এই সুপারট্যাঙ্কারের ক্রু তিরিশজন। এই দীর্ঘ ট্র্যাস আটলান্টিক ভ্রমণ শেষ হতে চায় না, কাজেই তাঁরা কোনও না কোনও উত্তেজনা খোঁজেন। তেল তুলবার সময় বিরাট ডেকে ইন্সপেকশন করবার জন্য এক মপেড রাখা হয়েছে। ওটা এখন রেসিং মোটর-সাইকেল! সবাই সর্বোচ্চ গতি তুলে রেকর্ড গড়তে চাইছে। ডেকের উপর আঁকাবাঁকা এক ট্র্যাক তৈরি করা হয়েছে, সেখানে রয়েছে উঁচু-নিচু পথ ও কঠিন বাঁক। ক্রুরা একে একে মপেড নিয়ে এই জটিল কোর্সে নামে, প্রতিযোগিতা করে ইণ্ডি ৫০০ রেসের মত। ক্যাপ্টেন রিয়াজ

সবচেয়ে কম সময়ে পুরো কোর্স ঘুরতে পেরেছেন। কাজেই আপাতত তাঁর গলায় ঝুলছে ‘অতি দ্রুত মপেড-মানব’ নামের বরমালা।

‘দাহরান চলে এল, স্যর,’ বলল ভারতীয় একযিকিউটিভ অফিসার, সুতীর্ন চক্রবর্তী। নরম স্বরে কথা বলেন। ‘রাস তানুরা আর পঁচিশ মাইল। আমি কি অটো-পাইলট ডিসেনগেজ করব?’

‘হ্যাঁ, করুন। গতি দশ নটে নামিয়ে আনুন। বার্থিং মাস্টারকে জানান: আমরা আন্দাজ দু’ঘণ্টা পর টাগ-বোট নেব।’

সুপারট্যাক্সারের ক্ষেত্রে অতি সতর্ক থাকতে হয়। বিশেষ করে থামাবার সময়। তেলের ট্যাক্স খালি, ফলে জাহাজ অনেকটা উপরে ভেসে ওঠে, এদিক-ওদিক সরতে চায়—তারপরও ব্রিজে যারা থাকে তাদের জন্য জাহাজ নড়ানো কঠিন, এ যেন মন্ত কোনও পাহাড় নড়ানো।

পশ্চিম তীরে বাদামী মরুভূমি জায়গা ছেড়ে দিয়েছে দাহরান শহরকে। ওটা কোম্পানি শহর, ওখানে রয়েছে সৌদি আরামকো অয়েল কনগ্লোমারেট। শহর পিছিয়ে গেল, দাম্মাম বন্দর পেরিয়ে ট্যাক্সার ঢুকল সরু পেনিনসুলার ভিতর। সামনে ছড়িয়ে রয়েছে রাস তানুরার বিশাল অয়েল ফ্যাসিলিটিজ।

সৌদি অয়েল-ইণ্ডাস্ট্রির মূল কেন্দ্রে রয়েছে রাস তানুরা। দেশের ক্রুড অয়েলের অর্ধেকের বেশি ওখান থেকে রপ্তানি করা হয়। মরুভূমির অনেক গভীরে তেল-খনিগুলো, সেখান থেকে অজস্র পাইপ নিয়ে আসছে ক্রুড অয়েল, জমা হচ্ছে বিশাল এই কমপ্লেক্সে। পেনিনসুলার সামনে রয়েছে গোটা বিশেক প্রকাণ্ড স্টোরেজ ট্যাক্স। ওগুলোর ভিতর রয়েছে কালো রঙের ক্রুড অয়েল। কিছু ট্যাক্স প্রাকৃতিক গ্যাস রাখবার জন্য। এ ছাড়াও রয়েছে আরও ট্যাক্স, ওগুলোতে অন্যান্য পেট্রোলিয়াম প্রডাক্ট রাখা—সবই রপ্তানি হবে আমেরিকা, ইউরোপ ও এশিয়ার বিভিন্ন দেশে। উপকূলের আরও সামনে রয়েছে পৃথিবীর সবচেয়ে বড় আগুন নিয়ে খেলা-১

প্রসেসিং প্লান্ট, ওখানে ক্রুড অয়েল থেকে পেট্রোলিয়াম উৎপাদন চলছে। তবে রাস তানুরার দেখবার মত এই জায়গাটা রাজকুমারী রেবেকা থেকে প্রায় দেখাই যায় না।

প্রকাণ্ড ট্যাঙ্ক বা পাইপ-লাইনের দিকে খেয়াল নেই ক্যাপ্টেন রিয়াজ আহমেদের, তিনি দেখছেন সামনের সুপারট্যাঙ্কারগুলো। এক টার্মিনালে নোঙর ফেলেছে সব। ওই বন্দরের নাম সি আইল্যাণ্ড; পানির উপর একের পর এক বিম জুড়ে তৈরি—এক মাইলের বেশি দৈর্ঘ্য। তৃষ্ণার্ত উট যেমন মরুদ্যানের এসে তৃষ্ণা মিটিয়ে নেয়, খালি সুপারট্যাঙ্কারগুলো তেমনি সি আইল্যাণ্ডে আসে সেই একই উদ্দেশ্যে। দুটো করে জাহাজ প্রায় পাশাপাশি রাখা হয়, মাঝখানে থাকে শুধু সরু পিয়ার। তীরের স্টোরেজ ট্যাঙ্কগুলো সুপারট্যাঙ্কারের হোল্ডে তেল পাম্প করে। তিরিশ ইঞ্চি সাপ্লাই পাইপ পানির নীচ দিয়ে দুই মাইল বিস্তৃত, গালফ-এর ডিপ-ওয়াটার ফিলিং-স্টেশনে তেল পৌঁছে দিচ্ছে।

ফিলিং-স্টেশনের ভিতর মন্তর গতিতে চলেছে রাজকুমারী রেবেকা। ক্যাপ্টেন রিয়াজ ব্রিজ থেকে দেখছেন, এক গ্রিক ট্যাঙ্কারকে সি আইল্যাণ্ডে ভিড়িয়ে দিল তিনটে টাগ-বোট। এরপর রাজকুমারী রেবেকার পালা। নিজ হাতে এবার জাহাজের নিয়ন্ত্রণ নিল পাইলট, লোডিং টার্মিনালের শেষে গিয়ে থামল। গ্রিক ট্যাঙ্কারের উল্টোদিকের বার্থ তাদের। ডানে সরতে লাগল পাইলট। কিছুক্ষণ পর থামল। এরপর টাগ-বোটগুলো তাদের ঠেলে নিয়ে বার্থে রাখবে। চারদিকের দৃশ্য ক্যাপ্টেন রিয়াজের অতি পরিচিত। কাছেই তেল তুলছে সাতটি সুপারট্যাঙ্কার। একেকটির দৈর্ঘ্য এক হাজার ফুটেরও বেশি—টাইটানিকের চেয়ে অনেক বড়!

দূরে সাদা পালওয়ালা এক আরব ডাউ দেখলেন রিয়াজ, দুই মাস্তুল নিয়ে নাচতে নাচতে চলেছে। স্থানীয় নৌকাগুলো দেখলে কেমন যেন দুলে ওঠে মন। দুই 'শ' বছর আগেও আরব নাবিক

এসব নৌকা নিয়ে বাণিজ্যে বেরিয়ে পড়ত। এই ডাউটা উপকূল এড়িয়ে উত্তরদিকে চলেছে, কিছুক্ষণ পর কালো রঙের ড্রিল শিপ পেরিয়ে গেল। জ্রু কুঁচকে কালো জাহাজটা দেখলেন রিয়াজ।

‘আমাদের পোর্ট-সাইডে টাগ তৈরি, স্যার,’ পাইলট মন্তব্য করল।

বাস্তবে ফিরলেন ক্যাপ্টেন, আস্তে করে মাথা দোলালেন। কিছুক্ষণ পর সি আইল্যাণ্ডের স্লটে মস্ত জাহাজটা ভরে দেয়া হলো। স্টোরেজ ট্যাঙ্কের মুখে বেশ কিছু অয়েল-লাইন আটকে দেয়া হলো, গুরু হলো ক্রুড অয়েল পাম্প করা। তেলের কারণে ধীরে ধীরে বাড়ছে জাহাজের ওজন, একসময় পানিতে ডেবে বসলে অস্থির ভাবটা দূর হবে। টার্মিনালের সঙ্গে জাহাজ আটকে দেয়া হয়েছে। আগামী কয়েক ঘণ্টা নিরাপদ সময়। করবার মত কোনও কাজ নেই। স্বস্তির শ্বাস ফেললেন ক্যাপ্টেন রিয়াজ।

মাঝরাত্রে হঠাৎ জেগে উঠলেন ক্যাপ্টেন। কেন যেন অস্বস্তি অনুভব করছেন। ঘুমটা চটে গেছে। কেবিন থেকে বেরিয়ে ফরোয়ার্ড ডেকে চলে এলেন। হোল্ডে ক্রুড অয়েল তোলা প্রায় শেষ। রাত তিনটের সময় রাজকুমারী রেবেকা বন্দর ছেড়ে রওনা হবে। তখন এই বার্ষে ঢুকবে অন্য জাহাজ। দূরে এক টাগ-বোট হর্ণ বাজাল। ওদিকে কোনও সুপারট্যাঙ্কারের তেল নেওয়া শেষ, এবার সি আইল্যাণ্ড ছেড়ে রওনা হবে গন্তব্যের উদ্দেশে।

সৌদি উপকূলে মিটমিট করে জ্বলছে অসংখ্য বাতি। হঠাৎ চমকে উঠলেন ক্যাপ্টেন রিয়াজ। মন বলল, জাহাজের খোল বার্ষের উপর চেপে বসতে চাইছে! ডক ও জাহাজের মাঝে রয়েছে ডলফিন বা বাফার, প্রচণ্ড চাপ সহ্য করে—কিন্তু এখন তা করছে না! নীচ থেকে ঘট-ঘটাং আওয়াজ উঠছে! মস্ত টার্মিনালের সবখানে ওই একই আওয়াজ! রেলিঙের পাশে চলে গেলেন আশুন নিয়ে খেলা-১

রিয়াজ, শক্ত করে রেলিং চেপে ধরে নীচে চাইলেন। কিছুই বোঝা গেল না।

সি আইল্যাণ্ড ও সুপারট্যাঙ্কারগুলো গভীর রাতে খ্রিসমাস ট্রির মত ঝলমল করছে। চারপাশ দেখলেন রিয়াজ, হতবাক হয়ে ভাবলেন, গোটা টার্মিনাল থরথর করে কাঁপছে! কিন্তু... এ হতেই পারে না! এই টার্মিনাল সাগরের অনেক গভীরে গেঁথে দেয়া হয়েছে! উঠে আসবে না! সরবেও না! তার মানে সুপার-ট্যাঙ্কারগুলো নিজ নিজ বার্থের ভিতর গুঁতোগুঁতি করছে! দূরে চাইলেন রিয়াজ, আরেকবার চমকে উঠলেন। চারদিকে টার্মিনাল সাপের মত কুণ্ডলী পাকিয়ে উঠছে, বার্থগুলো তিনদিক থেকে জাহাজগুলোকে চেপে ধরছে!

বাম্পারগুলো হাতুড়ির মত লাগছে জাহাজে! কয়েক সেকেন্ড পর বজ্রপাতের মত আওয়াজ শুরু হলো! দু'হাতে রেলিং শক্ত করে ধরলেন রিয়াজ, ফ্যাকাসে হয়ে উঠল মুখ। বুঝতে পারছেন না কী ঘটছে। চোখের সামনে জাহাজ থেকে চব্বিশ ইঞ্চি লোডিং আর্মগুলো খসে পড়ল, যাওয়ার আগে হোস-পাইপের মত ক্রুড অয়েল ছড়িয়ে গেল। একটু দূর থেকে আতঁচিৎকার ভেসে এল। এক প্ল্যাটফর্ম ইঞ্জিনিয়ার জান বাঁচানোর জন্য টার্মিনাল জাপ্টে ধরেছে, কিন্তু গোটা স্ট্রাকচার দুলাচ্ছে এদিক-ওদিক!

যেদিকে চোখ যায় টার্মিনাল নড়ে-চড়ে উঠছে, যেন বিশাল কোনও অজগর সাপ! ছোবল দিচ্ছে জাহাজগুলোর উপর! ট্রান্সফার লাইন খুলে যাওয়ায় চারদিকে অ্যালার্ম বাজতে শুরু করেছে! সাগরে গিয়ে পড়ছে ক্রুড অয়েলের স্রোত! দূর থেকে লোকজনের হাহাকার শোনা গেল, সাহায্য চাইছে! নীচে শক্ত হ্যাট পরা দু'জনকে দেখতে পেলেন রিয়াজ, টার্মিনাল ধরে ছুটবার ফাঁকে চেষ্টা চলেছে! তাদের পিছনে একে একে বাতিগুলো নিভছে! ক্যাপ্টেন রিয়াজ নিজের চোখকে বিশ্বাস করতে পারছেন না। কয়েক সেকেন্ড পর বুঝলেন, গোটা সি

আইল্যাণ্ড সত্যিই নামতে শুরু করেছে নীচের দিকে!

আরও দ্রুত নড়ছে টার্মিনাল, জাহাজে ধাক্কা দিয়ে চলেছে। ডলফিনগুলো ট্যাঙ্কারের খোলে পিষছে নিজেদেরকে! এই প্রথম ক্যাপ্টেন খেয়াল করলেন পায়ের নীচ থেকে গম্ভীর এক আওয়াজ আসছে! কীসের যেন গর্জন। আরও বাড়ছে, কান ঝালাপালা হয়ে যাওয়ার অবস্থা, তারপর হঠাৎই সব থেমে গেল! আবার শোনা গেল মানুষের আত্ননাদ! টার্মিনাল থেকে দৌড়ে পালাতে চাইছে সবাই!

ক্যাপ্টেন রিয়াজের মনে হলো এই টার্মিনাল যেন তাসের ঘর! দেখতে দেখতে এক মাইল দীর্ঘ দ্বীপ পানির নীচে নেমে গেল! সাগরে পড়া মানুষের চিৎকার ভেসে আসছে! নতুন করে চমকে উঠলেন রিয়াজ, তাঁর নিজের জাহাজও নিরাপদ নয়! একহাতে বেল্ট থেকে রেডিও খুলে নিলেন, ঝেড়ে দৌড় দিলেন ব্রিজের দিকে—চেষ্টা করে নির্দেশ দিতে শুরু করলেন, ‘মুরিং লাইন কেটে দিন! আল্লাহর দোহাই, মুরিং লাইন কাটুন!’

ব্রিজ এখনও এক শ’ মিটার দূরে, দৌড়ে চলেছেন রিয়াজ, ডেকের উপর থকথক করছে পিচ্ছিল ক্রুড অয়েল, আছাড় খাওয়ার ভয়কে পাত্তা না দিয়ে ছুটছেন তিনি। শ্বাস নিতে গিয়ে ফুসফুস জ্বলে উঠছে। তারই ফাঁকে রেডিওতে নির্দেশ দিলেন, ‘বলুন... চিফ... ইঞ্জিনিয়ারকে... তাকে বলুন... আমাদের পুরো পাওয়ার দরকার! এখনই!’

কিছুক্ষণ পর ট্যাঙ্কারের সুপারস্ট্রাকচার স্টার্নে পৌঁছলেন রিয়াজ। কয়েক করিডোর দূরে এলিভেটর, কিন্তু সামনে স্টেয়ারওয়েল দেখে সেদিকে ছুটলেন। একটানা দৌড়ে আটতলা উঠে ব্রিজে ঢুকলেন। কথা বলবার সাধ্য নেই। টের পেলেন পায়ের নীচে কাঁপুনি শুরু হয়েছে। জাহাজের ইঞ্জিন চালু হয়েছে! সামনের জানালার কাছে থামলেন রিয়াজ, যা ভয় পেয়েছেন, ঠিক তা-ই দেখতে পেলেন!

রাজকুমারী রেবেকার সামনে আটটি সুপারট্যাঙ্কার জোড়ায় জোড়ায় ট্যাঙামে আটকানো, এদিকে সি আইল্যাণ্ড নেমে চলেছে! নব্বুই ফুট নীচে সাগরে মেঝে! ট্যাঙ্কারগুলোর মুরিং লাইন এখনও টার্মিনালের সঙ্গে আটকানো! টার্মিনাল শুধু নামছে না, দু'পাশের সুপারট্যাঙ্কারগুলোকেও সঙ্গে নিতে চাইছে। নীচের দিকে টানের কারণে জাহাজগুলো একটা আরেকটার দিকে হেলে পড়ছে! এখন আর টার্মিনালের আলো নেই, কিন্তু রিয়াজ দেখলেন সামনের দুই ট্যাঙ্কারের বাতিগুলো পরস্পর পরস্পরের উপর আছড়ে পড়ল! পরমূহূর্তে এল ধাতুর সঙ্গে ধাতুর সংঘর্ষের তীক্ষ্ণ আওয়াজ! দুই জাহাজ একটা আরেকটার সঙ্গে প্রচণ্ড ধাক্কা খেয়েছে, এবার বোধহয় ডুববে!

গলা ফাটিয়ে চৈচিয়ে উঠলেন ক্যাপ্টেন রিয়াজ, 'ইমার্জেন্সি! ফুল অ্যাস্টার্ন!' একষিকিউটিভ অফিসারের দিকে চাইলেন। 'মুরিং লাইনের ব্যবস্থা কী?'

'স্টার্নের লাইন সরিয়ে নেয়া হয়েছে,' জবাবে বলল চক্রবর্তী। 'বো'র লাইনের খবর পাওয়ার জন্য অপেক্ষা করছি। তবে এখনও অন্তত দুটো লাইন খোলা হয়নি!' বিনকিউলারে স্টারবোর্ডের বো দেখছে সে। ওখানে দুটো দড়ি এখনও আটকানো। টানটান হয়ে উঠছে ওগুলো।

'ইউরোপা আমাদের উপর এসে পড়ছে,' হেলমস-ম্যান বলল, ডানদিকে মাথা ঝাঁকিয়ে ইশারা করল।

গ্রিক জাহাজটা পাশের বার্থে, ওটার দিকে চাইলেন রিয়াজ। ওটা রাজকুমারী রেবেকার সমান, তিন শ' তেরিশ মিটার দীর্ঘ। একটু আগে দুই জাহাজের মাঝে ষাট ফুট দূরত্ব ছিল, কিন্তু টার্মিনালটা নামতে নামতে টানছে দুটোকেই—ফলে এখনি জাহাজ দুটো একটা আরেকটার সঙ্গে ধাক্কা খাবে!

এখনও হাঁপাচ্ছেন ক্যাপ্টেন রিয়াজ। ব্রিজের সবাই বিস্ফারিত চোখে দেখছে কী সর্বনাশ ঘটতে চলেছে। কেউ জানে না অনেক

নীচে সুপারট্যাঙ্কারের বিশাল প্রপেলার ঘুরতে শুরু করেছে। ইঞ্জিনিয়ারের নির্দেশে খেপে উঠেছে ইঞ্জিনগুলো, রেভস দ্রুত থেকে দ্রুততর হচ্ছে।

প্রথমে মনে হলো রাজকুমারী রেবেকার পিছন দিক নড়ছে না। তারপর অতি ধীরে পিছাতে শুরু করল বিশাল সুপারট্যাঙ্কার। মুহূর্তের জন্য গতি থামল, বো'র মুরিং লাইনে টান পড়ছে। তারপর পট করে ছিঁড়ল দড়ি, জাহাজ আবারও পিছাতে শুরু করল। ইউরোপা জাহাজটা স্টারবোর্ডের দিকে কাছিয়ে এসেছে। কোরিয়ানদের তৈরি ট্যাঙ্কার ড্রুড অয়েলে প্রায় ভরা, রাজকুমারী রেবেকার চেয়ে অন্তত বারো ফুট নীচে ডেবে রয়েছে।

ক্যাপ্টেন রিয়াজের মনে হলো ব্রিজ থেকে বেরুলে এক লাফে ওই জাহাজের ডেকে পা রাখতে পারবেন। 'স্টারবোর্ড টোয়েন্টি,' হেলম্স-ম্যানকে নির্দেশ দিলেন।

পাশের ট্যাঙ্কারের কাছ থেকে জাহাজের বো সরিয়ে নেয়া শুরু হলো। গতি ধীর হলেও কিছুক্ষণ পর নিমজ্জিত টার্মিনাল থেকে তিন শ' ফুট পিছিয়ে এল জাহাজ। তবে সেটা যথেষ্ট নয়, গ্রিক জাহাজটা এখনও পাশে রয়ে গেছে।

ক্যাপ্টেন রিয়াজ যতটা ভেবেছেন, তার চেয়ে কম ধাক্কা খেল দুই জাহাজ। হুইল-হাউজে সামান্য ঝাঁকিও লাগল না। তবে নিচু একটা ধাতব আওয়াজ জানাল দুই জাহাজে ঘসা লাগছে। পাশের জাহাজের মাঝামাঝি জায়গাটায় নাক ঘষে পিছিয়ে চলেছে রাজকুমারী রেবেকা। পুরো আধ মিনিট ধরে এই চলল, তারপর বিচ্ছিন্ন হলো দুই জাহাজ। আরও খানিকটা পিছিয়ে যাওয়ার পর ইঞ্জিন নিউট্রাল করতে বললেন ক্যাপ্টেন রিয়াজ। সঙ্গে সঙ্গে জাহাজ থেকে লাইফ-বোট নামানো হলো। উদ্ধার কাজে নামবে ওরা এবার। সবার আশা, ডকের শ্রমিকদের পাওয়া যাবে পানিতে। নাবিকরা বোট নিয়ে চলে যেতে আরও

এক হাজার ফুট পিছিয়ে নেয়া হলো জাহাজ। সামনে পড়ে রইল শুধু ধ্বংসস্তুপ!

দশটা সুপারট্যাঙ্কার ভাসছে, কিন্তু ওগুলো নিয়ে সাগরে বেরুনো এখন অসম্ভব। দুটো জাহাজের ডেক এমন ভাবে আটকে গেছে যে ওগুলো খুলতে ওয়েল্ডারদের লাগবে অন্তত এক সপ্তাহ। তিনটে জাহাজের জোড়া হালের প্লেট ফুটো হয়েছে, সেখান থেকে গলগল করে বেরিয়ে আসছে ক্রুড অয়েল, মিশে যাচ্ছে গালফের পানিতে। ক্যাপ্টেন রিয়াজের অতি সাবধানতায় রাজকুমারী রেবেকার ক্ষতি কম হয়েছে। দ্রুত জাহাজ পিছিয়ে নেয়ায় ট্যাঙ্কগুলো ফুটো হয়নি। কিন্তু স্বস্তির শ্বাস ফেলতে পারলেন না তিনি, হঠাৎ শুনলেন চাপা একটা গর্জন! মনে হলো বিস্ফোরণের আওয়াজ!

‘স্যর, রিফাইনারিটা গেল,’ বলল হেলমস-ম্যান। হাত তুলে দেখাল সে পশ্চিম তীর।

ওদিকের দিগন্তে কমলা রঙের কিছু বড় হয়ে উঠছে! প্রথমে মনে হলো সূর্য উঠছে বুঝি! তারপর শুরু হলো একের পর এক বিস্ফোরণ! সাগরের ঢেউ লাফিয়ে উঠল! আগুনের লেলিহান শিখা দাউ দাউ করে জ্বলে উঠেছে তীরে!

রাজকুমারী রেবেকার ক্রুরা এক ঘণ্টা ধরে এ-ই অভূতপূর্ব দৃশ্য দেখল। তারপর একটু একটু করে আগুন নিভতে শুরু করল, আকাশ ঢেকে দিল কালো ধোয়া। চারপাশ অন্ধকার হয়ে এল। পোড়া পেট্রোলিয়ামের গন্ধে শ্বাস আটকে আসতে চাইল সবার।

অনেকক্ষণ পর একযিকিউটিভ অফিসার সুতীব্র চক্রবর্তী বলল, ‘সন্ত্রাসীরা বিস্ফোরক নিয়ে ওখানে ঢুকল কী করে! আমি তো জানতাম ওটা দুনিয়ার অন্যতম সিকিউর্ড ফ্যাসিলিটি।’

আস্তে করে মাথা দোলালেন রিয়াজ, চুপ করে রইলেন। সুতীব্র ঠিকই বলেছে। আরব সেনাবাহিনীর সেরা লোকগুলো এই

কমপ্লেক্স পাহারা দেয়। চারপাশে রয়েছে কঠোর নিরাপত্তার জাল। কিন্তু সন্ত্রাসীরা শুধু সি আইল্যাণ্ড ধ্বংস করেনি, রিফাইনারিও উড়িয়ে দিয়েছে। রিয়াজ আন্দাজ করলেন, তাঁরা যদিকে রয়েছেন সেদিকের সাগরে কোনও বিস্ফোরণ ঘটানো হয়নি। কপাল ভাল তাঁর ক্রুরা এখনও নিরাপদ। স্রষ্টাকে ধন্যবাদ দিলেন রিয়াজ, মনে মনে বললেন, যত দ্রুত সম্ভব এখান থেকে সরে পড়ব। সাগরে কেউ বেঁচে আছে কি না খুঁজতে আরেকবার সার্চ করা হলো। নেই কেউ! রিয়াজ আরও কয়েক মাইল সরিয়ে নিলেন জাহাজ।

কিছুক্ষণ পর ভোর হলো। এবার পরিষ্কার দেখা গেল তীরে কী ঘটেছে। ততক্ষণে চারদিক থেকে দমকল-বাহিনী, পুলিশ, সেনাবাহিনী—সবাই আসতে শুরু করেছে। রাস তানুরা রিফাইনারি ছিল পৃথিবীর অন্যতম বড় শোধনাগার, কিন্তু ওখানে এখন পড়ে রয়েছে শুধু পোড়া আবর্জনার স্তূপ! আগুন সব পুড়িয়ে দিয়েছে! সি আইল্যাণ্ডের টার্মিনাল একইসঙ্গে আঠারোটি সুপার-ট্যাঙ্কারকে তেল দিত, এখন ওটা সাগরের নীচে হারিয়ে গেছে। ট্যাঙ্কগুলো একেকবারে ত্রিশ মিলিয়ন ব্যারেল পেট্রোলিয়াম ধারণ করত—এখন সব বিধ্বস্ত। সমস্ত তেল বেরিয়ে গেছে। এর ফলে সাগরের প্রাণীকুলের উপর অকল্পনীয় বিপর্যয় নেমে আসবে। মরুভূমির অসংখ্য সাপ্লাই পাইপ ফেটে গেছে। থকথকে ক্রুড অয়েল নতুন করে হারিয়ে যাচ্ছে মরুভূমির নীচে।

সেদিন এক রাতেই সম্ভাব্য রণাঙ্গণের তিন ভাগের এক ভাগ হারিয়েছিল সৌদি আরব। কিন্তু এই ঘটনার সঙ্গে কোনও সন্ত্রাসী-দলের সম্পর্ক থাকতে পারে, একথা একবারও কেউ উচ্চারণ করেনি। ওই এলাকার চতুস্পার্শ্বের সাইসমোলজিস্টরা জানেন ওখানে কী ঘটেছে। ভয়ঙ্কর ওই ভূমিকম্পটি ছিল রিখটার আগুন নিয়ে খেলা-১

স্কেলের সাত পয়েন্ট তিন মাপের! গোটা সৌদি আরবের পূব দিক কাঁপিয়ে দিয়েছে ওটা। যেসব পণ্ডিত বিশ্লেষণ করেছেন তাঁরা জানেন, প্রাকৃতিক বিপর্যয় ঠেকানোর সাধ্য মানুষের নেই। তাঁরা কম্পিউট করে দেখেছেন এমনই ঘটবার কথা, রাস তানুরার মাত্র দুই মাইল দূরে ছিল ভূমিকম্পের এপিসেন্টার। এলাকাটা কেঁপে উঠবার ফলে পারস্য উপসাগরের চারদিকে হৈ-চৈ শুরু হয়েছে। কোনও সন্দেহ নেই, এই ভূমিকম্পের কারণে ভয়াবহ ভাবে ক্ষতিগ্রস্ত হবে গোটা পৃথিবীর অর্থনীতি!

তেরো

সস্তা সিগারেটে সুখ টান দিল চুই কুয়েং, বাকি অংশ এক টোকা দিয়ে রেলিঙের ওপাশে পাঠিয়ে দিল। অলস ভঙ্গিতে দেখল, নীচের ওই নোংরা পানির ভিতর গিয়ে পড়ছে জ্বলন্ত টুকরোটা। তার মনে খানিকটা আশা, পারদ-রঙা পানিতে দপ করে আগুন জ্বলে উঠবে। এদিকের পানিতে যে পরিমাণ পেট্রোলিয়াম মিশেছে, তা সংগ্রহ করতে পারলে ছোট কোনও শহরের এক বছরের চাহিদা মেটানো যেত। একটা মরা ম্যাকারেলের পাশে পানিতে পড়ে ফুস করে নিভে গেল সিগারেটের টুকরো।

ওই মরা ম্যাকারেল প্রমাণ করে চিনের নিংবো বন্দরের পানি অত্যন্ত দূষিত। চারদিকে নতুন ব্যবসা-কেন্দ্র গড়ে তোলা হচ্ছে, প্রতিনিয়ত আসছে খোলে ফটল ধরা কণ্টেইনার শিপ, ট্যাঙ্কার ও ফ্রেইটার। ইয়াংঘি নদীর ব-দ্বীপে জমজমাট ব্যবসা করছে এ ব্যস্ত বন্দর। খানিক দূরে শাংহাই শহর। সাগর-বন্দর হিসাবে

দ্রুত বেড়ে উঠছে নিংবো। চিনের রপ্তানি-সামগ্রীর বেশির ভাগ এখন এ পথে যায়। ইয়াংযি নদীর মুখে সুগভীর চ্যানেল, ফলে তিন লাখ টনি সুপারট্যাকারগুলোও ভিড়তে পারে ডকে।

‘কুয়েং!’ যে কর্কশ কণ্ঠ গর্জে উঠল, সেটার মালিক লোকটা ডোবারম্যান কুকুরের গর্জনকে হার মানিয়ে দিল। তবে দেখতে সে বুলডগের মত, অতিরিক্ত ভারী।

চট করে সুপারভাইজারের দিকে ঘুরে চাইল কুয়েং। ওই লোক নিংবো বন্দরের তিন নম্বর কন্টেইনার টার্মিনালের অপারেশন্স ডিরেক্টর। ডক মাড়িয়ে এগিয়ে আসছে গ্যাং সং। তার রাগ গগ্গারের রাগের মত, সুযোগ পেলে অধীনস্থদের জব্দ করে মজা পায়। থলথলে চেহারা, সর্বক্ষণ কুঁচকে রেখেছে এক জ্র।

‘কুয়েং!’ লংশোর-ম্যানের উদ্দেশে আরেকবার ঘেউ করে উঠল সে। ‘আমাদের স্কেজুয়াল বদলে গেছে। হোকামা মারু সিংগাপুরের দিকে যাবে না। ইঞ্জিনে গোলমাল। ওটার বদলে আমরা রুব্বি’জ স্টারকে তিন নম্বর ডকের তিনের এ বার্থ দেব। সাড়ে সাতটার দিকে আসবে। সবাইকে নিয়ে তৈরি থাকবে।’

‘জানিয়ে দেব সবাইকে,’ আন্তে করে বলল কুয়েং।

কন্টেইনার শিপ টার্মিনালে সর্বক্ষণ কাজ চলে। একটু দূরে পূর্ব চিন সাগর, ওখান থেকে নিয়মিত জাহাজ আসছে, ডকে ভিড়ছে। ওগুলোতে তুলে দেয়া হচ্ছে সস্তা ইলেকট্রনিক্স সামগ্রী, বাচ্চাদের খেলনা ও পোশাক। সব চলে যাচ্ছে উন্নত দেশে।

গ্যাং সং কড়া স্বরে শাসাল, ‘কাজে নামতে যেন দেরি না হয়। লোডিঙের পর সবাইকে থাকতে বলবে। তোমরা ঠিক ভাবে কাজ করছ না। আমার কাছে নালিশ আসছে।’ ক্লিপবোর্ড নিচু করল সে, ডান কানের ভাঁজে হলুদ পেন্সিল রাখল, তারপর হাঁটতে শুরু করল। দু পা এগিয়ে আবারও থমকে দাঁড়াল, চরকির মত ঘুরে দাঁড়াল। চোখদুটো বিস্ফারিত, কুয়েঙের দিকে আগুন নিয়ে খেলা-১

চাইল। অন্তত কুয়েণ্ডের তাই মনে হলো।

‘ওই জাহাজে আগুন!’ বিড়বিড় করে বলল গ্যাং সং।

কুয়েং বুঝতে পারল তার কাঁধের উপর দিয়ে দেখছে লোকটা। তাড়াতাড়ি ঘুরে দাঁড়াল সে।

বন্দর টার্মিনালের কাছে ভাসছে চোদ্দটা জাহাজ। বেশির ভাগ কণ্টেইনার শিপ ও সুপারট্যাঙ্কার। ছোট কিছু কার্গো শিপ এখানে-ওখানে। ওগুলোর ভিতর থেকে বেরিয়ে এসেছে একটা কার্গো শিপ, এদিকে আসছে। জাহাজের ভিতর থেকে ঘন ধোঁয়া পাক দিয়ে বেরুচ্ছে।

কুয়েণ্ডের মনে হলো জাহাজটা অনেক আগে পরিত্যক্ত হওয়ার কথা। চল্লিশ বছরের বেশি হবে ওটার বয়স। খোলটা একসময় লাল রঙের ছিল, এখন রঙের চিহ্ন নেই কোথাও, সারা গায়ে বিশী মরিচার দাগ থকথক করছে। জাহাজের সামনের হোল্ড থেকে বেরিয়ে আসছে ঘন কালো ধোঁয়া, ঢেকে দিয়েছে সুপারস্ট্রাকচার। তারই ভিতর থেকে বিশ ফুট উঁচু লকলকে হলদে আগুন দেখা যাচ্ছে। ফ্রেইটারের প্রাউর দিকে চাইল কুয়েং, হলদেটে ফেনা কেটে এগিয়ে আসছে ওটা!

‘ওটা আসছে... কমাশিয়াল টার্মিনালের দিকে!’ মুখ হাঁ হয়ে গেল কুয়েণ্ডের।

‘হারামজাদার দল!’ খেপে উঠল গ্যাং সং। ‘এদিকে কোনও জায়গা নেই!’ হাত থেকে ক্লিপবোর্ড ফেলে দিল সে, ঘুরেই দৌড় দিল ডক অফিসের দিকে। ওই জাহাজের ক্যাপ্টেনকে রেডিও করবে।

চারপাশের সবাই দেখেছে পুরানো জাহাজের আগুন। অনেকে রেডিওতে ওই জাহাজের ক্যাপ্টেনকে জানাতে চাইল, এই পরিস্থিতিতে কী করা উচিত। খামোকাই কষ্ট করছে তারা। বদলে ওখান থেকে কেউ জবাব দিল না।

কণ্টেইনার ডকের শেষে দাঁড়িয়ে রয়েছে কুয়েং। জ্বলন্ত

জাহাজ তীরের দিকে ছুটছে! একটুর জন্য রক্ষা পেল একটা বার্জ, ওটাকে পাশ কাটাল ফ্রেইটার! সামনে পড়বে এক কণ্টেইনার শিপ। ওটা আগেই সরতে শুরু করেছে। কুয়েং হাঁ করে দেখছে। কণ্টেইনার শিপের পাঁচ ফুট দূর দিয়ে বেরিয়ে গেল ফ্রেইটার। ওটার ব্রিজে দাউ-দাউ করে জ্বলছে আগুন। কুয়েঙের মনে হলো কণ্টেইনার টার্মিনালে এসে ঢুকবে। কিন্তু শেষ মুহূর্তে বামে ঘুরতে শুরু করল। মনে হলো ওটা দিক ঠিক করে নিল, তারপর ছুটল নিংবোর ক্রুড অয়েলের লোডিং ফ্যাসিলিটির দিকে!

কেজি আইল্যান্ডের দিকে চেয়ে রইল কুয়েং, চট করে জ্বলন্ত জাহাজের দিকে চাইল। ওটার ডেকে কেউ নেই। কেউ আগুন নেভাবার চেষ্টা করছে না। ব্রিজের আগুন ও ধোঁয়া একটু সরতেই ভিতরটা দেখা গেল। ওখানে কোনও ক্রু নেই! শিউরে উঠল কুয়েং, তার মন বলল, ওটা ভুতুড়ে জাহাজ! মানুষের প্রাণ নিতে এসেছে!

নিংবোর ক্রুড অয়েল টার্মিনাল পানির উপর ভাসছে। ইদানীং ওটাকে নতুন করে সাজানো হয়েছে। একইসঙ্গে চারটে সুপারট্যাঙ্কারকে জায়গা দিচ্ছে। জ্বলন্ত জাহাজ কেজি আইল্যান্ডের বামের ট্যাঙ্কারটার দিকে ছুটছে। সৌদি সরকারের জাহাজটা কালো-সাদা রঙের। ওটার একযিকিউটিভ অফিসার রেডিওতে শুনেছে কী ঘটছে, তাড়াতাড়ি এয়ার হর্নের সুইচ টিপল—কান ফাটানো আওয়াজ শুরু হলো। তবুও তেড়ে এল ফ্রেইটার! ব্রিজ উইঙের বাইরে থম মেরে দাঁড়িয়ে থাকল একযিকিউটিভ। আর কিছু করবার নেই তার!

হর্নের তীব্র আওয়াজে ছোটোছুটি শুরু করল ক্রুরা। অনেকে জাহাজ ছেড়ে নেমে পড়ল পাশের গ্যাংপ্ল্যাঙ্কে। অপলক চোখে জ্বলন্ত জাহাজ দেখছে একযিকিউটিভ অফিসার। তার পাশে এসে দাঁড়ালেন ক্যাপ্টেন। কারও মুখে রা নেই, দেখছেন জং-ধরা এক আগুন নিয়ে খেলা-১

জাহাজ তাঁদের সুপারট্যাঙ্কারের পেটের দিকে আসছে!

বিস্ফোরণ ঘটল না, শেষ মুহূর্তে জাহাজটা আবারও ঘুরতে শুরু করল। ওটার বো বামদিকে তীক্ষ্ণ বাঁক নিল, সুপারট্যাঙ্কারের পাঁচ ফুট দূর দিয়ে সরে গেল। দেখে মনে হলো ফ্রেইটারটা কারও নির্দেশ পালন করছে, সুপারট্যাঙ্কারের পাশ কাটিয়ে ডকিং টার্মিনালের দিকে ছুটল। বন্দরের মুখে প্রায় ভাসমান র‍্যাম্পটা, ওখানে ছ'শ' ফুট পাইলন, উপরে পাইপ-লাইন। জাহাজে ক্রুড অয়েল তোলা বা নামানোর পাম্পও ওখানেই।

তীরের মত ওদিকে ছুটে চলেছে জ্বলন্ত জাহাজ, সামনের ডেকে নাচছে লেলিহান আগুন। এবার আর সরল না জাহাজ, গতি কমল না, বরং বাড়ল আরও। দেখতে দেখতে টার্মিনালের প্রান্তে পৌঁছল, ম্যাচের কাঠির মত উড়ে গেল কাঠের প্ল্যাটফর্ম, নানা দিকে ছিটকে পড়ল ডক। একটার পর একটা পাইলন ভেঙে ছুটছে ফ্রেইটার, গতি কমছে না একটুও। এক শ' গজ সামনে এক সুপারট্যাঙ্কারের কুরা গ্যাংপ্ল্যাঙ্কে নেমেছে, তারা জানে দৌড়ে পালাতে হবে, কিন্তু বুঝছে না কোনদিকে যাওয়া উচিত। এক মুহূর্ত পর তাদের আর ভাবতে হলো না, গ্যাংপ্ল্যাঙ্ক চুরমার করে দিয়ে হাজির হলো ফ্রেইটার! ইম্পাত, কাঠ ও মানব-দেহ একইসঙ্গে জড়িয়ে-পেঁচিয়ে গেল! গ্যাংপ্ল্যাঙ্ক মুহূর্তে ডুবল, সঙ্গে গেল মানুষগুলো! তখনও যারা বেঁচে রইল, তারা কিমা হলো প্রপেলারের আঘাতে!

ডক ভেঙে এগিয়ে চলেছে ফ্রেইটার, গতি ক্রমে কমে আসছে। ওটার বো'র সঙ্গে লটকে রইল নানান জঞ্জাল। তীরের দিকে চলল ফ্রেইটার। শেষ পাইলন পেরিয়ে গেল, সামনে পড়ল অফ-লোডিং ও স্টোরেজ ফ্যাসিলিটি। ওখানে গিয়ে ডাঙায় উঠতে চাইল ফ্রেইটার, কিন্তু তীরের মাটিতে হঠাৎ আটকে গেল।

এতক্ষণ যারা ধ্বংস-যজ্ঞ দেখেছে, তারা স্বস্তির শ্বাস

ফেলল। কিন্তু পরমুহূর্তে জাহাজের ভিতর থেকে বেরিয়ে এল চাপা এক আওয়াজ! ওই বিস্ফোরণের ফলে আস্ত বো-টা লাফ দিয়ে আকাশে উঠল—কমলা রঙের এক বিশাল ইস্পাতের পাত! চারদিকে ছিটকে পড়ল আগুন! পানিতে মেশা ক্রুড অয়েল জ্বলে উঠল, পানির উপর দিয়ে আগুনের চাদর ছুটল চারদিকে! মনে হলো নোঙর করা ট্যাঙ্কারগুলো রক্ষা পাবে না। ওগুলোকে ঘিরে ধরল লেলিহান আগুনের শিখা। দুই মিনিট পেরুনের আগেই ভাসমান কেজি আইল্যাণ্ড মিলিয়ে গেল ধোঁয়ার আধারে! ধোঁয়ার নীচে জ্বলছে কমলা আগুন!

অবাক হয়ে ওদিকে চেয়ে রইল কুয়েং, ক্রুড অয়েল টার্মিনালের চারদিকে ছুটছে আগুন! বিধ্বংসী ফ্রেইটার দেখল সে। ওটা দাঁড়িয়ে ছিল, কাত হয়ে পানিতে পড়ল! আনমনে মাথা নাড়ল কুয়েং, এভাবে যারা ধ্বংস-লীলা ঘটাতে পারে, তারা বদ্ধ উন্মাদ!

চুই কুয়েং যে ডকে রয়েছে, তার এক মাইল দূরে ভাসছে এক ভাঙাচোরা কালো লঞ্চ। ওটার সামনের অংশে ঝুলছে ক্যানভাস। লঞ্চের বোর কাছে শুয়ে আছে বাদামি রঙের এক লোক, সামনের ট্রাইপডে ছোট এক টেলিস্কোপ। ওটার সঙ্গে লেজার সাইট রয়েছে, ফলে বন্দরের চারপাশ ভালভাবে দেখা যায়। দাউ-দাউ আগুন দেখছে সে।

পানির উপর দিয়ে পাতলা ধোঁয়া ভেসে আসছে। লোকটা তৃপ্তির হাসি হাসল। টেলিস্কোপ থেকে লেজার সাইট ও ওয়্যারলেস ট্রান্সমিটার খুলে নিল। একটু আগেও ট্রান্সমিটারটা ফ্রেইটারের অটোম্যাটিক ন্যাভিগেশন সিস্টেমকে চালিয়েছে।

লোকটার হাতে এখন এক স্টেইনলেস স্টিলের সুটকেস। ওটা গানেলের উপর তুলল সে, পারদ-রঙা পানিতে আস্তে করে ছেড়ে দিল। সুটকেসে পোরা হাই-টেক কম্পোনেন্টগুলো পানির আগুন নিয়ে খেলা-১

নীচে হারিয়ে গেল চিরদিনের জন্য ।

লোকটার চোয়ালে লম্বা একটা কাটা দাগ । লঞ্চের পাইলটের দিকে চেয়ে নিচু স্বরে বলল, ‘মেরিনা হোটেলের দিকে চলো । আমার প্লেন ধরতে হবে ।’

পুরো দেড় দিন জ্বলল বন্দর, তারপর দমকল-বাহিনী আগুন নিভাতে পারল । গতকাল তিনটে টাগ-বোট দ্রুত কাজ করেছে, অয়েল সুপারট্যাঙ্কারগুলো সরিয়ে নিয়েছে । তবে তীরের ফ্যাসিলিটিগুলো রক্ষা করা যায়নি । আগুনে পুড়ে কেজি আইল্যাণ্ড টার্মিনাল সম্পূর্ণ বিধ্বস্ত হয়েছে । চোদ্দ জন কর্মী মারা গেছে । এক সুপারট্যাঙ্কারের ছ’জন ক্রুকে আর খুঁজে পাওয়া যায়নি । ধরে নেয়া হয়েছে, তারা আর বেঁচে নেই ।

আগুন নিভে যাওয়ার পর তদন্তকারী দল পুরানো ফ্রেইটারে উঠেছে । তারা অবাক হয়ে দেখেছে, ওটাতে কোনও লোক ছিল না । একটা লাশও পাওয়া যায়নি । যারা নিজের চোখে ওই ঘটনা দেখেছে, তাদের কথা শেষে মেনে নিতে হয়েছে—ওই পরিত্যক্ত জাহাজ নিজ থেকে হাজির হয় ! ফ্রেইটারটা আগে এ বন্দরে দেখা যায়নি । ওটার ইন্স্যুরেন্স এজেন্টকে খুঁজে বের করে জানা গেছে, মালয়েশিয়ার এক জাহাজ ভাঙা ইয়ার্ড ওটা বিক্রি করে দেয় এক স্ক্র্যাপ ডিলারের কাছে । সেই স্ক্র্যাপ ডিলারের আর কোনও খোঁজ পাওয়া যায়নি । জানা গেছে, লোকটা নকল কোম্পানি ফেঁদে বসেছিল । এমন কোনও ঠিকানা পাওয়া যায়নি যে অনুসন্ধান করা যায় ।

তদন্তকারীরা আন্দাজ করেছে, ওই জাহাজের কর্মচারীরা ক্যাপ্টেনের উপর প্রতিশোধ নিতে আগুন ধরিয়ে দেয় । ‘নিংবো বন্দরের রহস্যময় জাহাজ’ নিয়ে স্থানীয়রা নানা কাহিনি তৈরি করল । তাদের ধারণা, ওই জ্বলন্ত জাহাজ কেজি আইল্যাণ্ডকে ধ্বংস করতে এসেছিল । এবং তাই করে গেছে ।

কিন্তু লংশোর-ম্যান চুই কুয়েং অন্য কথা ভাবে। তার ধারণা কেউ ইচ্ছা করে ওই জাহাজ পাঠিয়েছিল, এবং ওটা দিয়ে তার ইচ্ছে মত ধ্বংসযজ্ঞ চালিয়ে কেটে পড়েছে আলগোছে।

boiRboi.net

চোদ্দ

‘লেটা, দশ মিনিট পর কনফারেন্স রুমে মিটিং। যাওয়ার আগে কফি দেব?’ দরজার চৌকাঠে দাঁড়িয়েছে জুনিয়র অফিসার।

মুখ তুলে চাইল লেটা সিন, চেহারা বিকৃত করল। ভাব দেখে মনে হলো চোখের সামনে অদ্ভুত কোনও প্রাণী দেখছে।

‘হেইগেন,’ প্রায় ধমকে উঠল সে। ‘আমার প্রস্রাব এখন কফির মত খয়েরি! রক্তে যা আছে, তা দিয়ে স্পেস-শাটলও চলবে! ...আর কফি চাই না, ভাগো! পাঁচ মিনিট পর আসছি!’

‘ঠিক আছে, প্রোজেকশন সিস্টেম ঠিক করতে গেলাম,’ ঘুরে রওনা হলো জন হেইগেন। সবসময় হাসে সে, কিন্তু এখন চেহারা গম্ভীর। করিডোর ধরে এগিয়ে গেল।

গত দু’দিনে কতবার কফি নিয়েছে মনে নেই লেটার, তবে তার জানা আছে, ও জিনিস তাকে টিকিয়ে রেখেছে। গতকাল রাস তানুরা ভূমিকম্পের খবর আসতে শুরু হলে চেয়ারের সঙ্গে সেঁটে গেছে সে, হিসাব কষতে শুরু করেছে। এই ভূমিকম্পের ইকোনমিক ইমপ্যাক্ট কেমন হবে সেটা জানতে হবে। বুঝতে হবে তেল কোম্পানিগুলো কী ধরনের প্রতিক্রিয়া দেখাবে। একবার শুধু নিজের অ্যাপার্টমেন্টে গেছে লেটা, দু’ঘণ্টা ঘুমিয়ে পোশাক পাল্টে নিয়ে আবারও অফিসে! চারপাশে সারাক্ষণ হৈ-আগুন নিয়ে খেলা-১

চৈ করছে সবাই!

লেটা সিন স্যাক্স ইনভেস্টমেন্ট ব্যাঙ্কিং কোম্পানির সিনিয়র কমোডিটি রিসার্চ অ্যানালিস্ট। দিনে বারো ঘণ্টা কাজ করবার অভিজ্ঞতা তার আছে। সে তেল ও প্রাকৃতিক গ্যাসের উপর স্পেশালিস্ট, কিন্তু কখনও ভাবতে পারেনি রাস তানুরা নিয়ে বাড়তি চিন্তা করতে হবে। এখন ফার্মের সমস্ত সেল্‌স্ অ্যাসোসিয়েট ও ফাণ্ড ম্যানেজার ওকে ছেকে ধরছে, ক্লায়েন্টদের অ্যাকাউন্টের বিষয়ে তাদের পরামর্শ দরকার। শেষে বাধ্য হয়ে ফোনের প্লাগ খুলে রেখেছে লেটা, হাজারো হিসাব-নিকাশের ভিতর ডুবে গেছে। ওর কাজও প্রায় খতম। আর একবার অয়েল এক্সপোর্টের সংখ্যাগুলোর উপর চোখ বুলাল, উঠে দাঁড়িয়ে কে অ্যাংগার সুট নিভাঁজ করে নিল, ল্যাপটপ কম্পিউটারটা হাতে নিয়ে পা বাড়াল দরজার দিকে।

কনফারেন্স রুমে লেটার জন্য নির্দিষ্ট চেয়ারটা ছাড়া আর একটাও খালি নেই। সবাই লেটা সিনের রিপোর্ট পাওয়ার জন্য অধীর হয়ে অপেক্ষা করছে। মেয়েটা নিজ চেয়ারে বসতেই মিটিং শুরু হলো, সংক্ষেপে প্রথমে বিশ্ব অর্থনীতির উপর দু'চার কথা বলল হেইগেন। তার চোখ শ্রোতাদের উপর স্থির। সিনিয়র ম্যানেজারদের সহজে চেনা যায়। কম বয়সেই তাঁদের চুল পাকা, সুটের ভিতর থেকে বেরিয়ে আসতে চাইছে থলথলে ভুঁড়ি—এঁরা জীবনের বেশিরভাগ সময় অফিসেই কাটিয়েছেন। আরেকদিকে রয়েছে তরুণ সেল্‌স্ অ্যাসোসিয়েট, তারা চাঁছাছোলা, প্রতিষ্ঠানের দীর্ঘ সিঁড়ি বেয়ে উঠতে ব্যস্ত—সিনিয়র অফিসারদের পবিত্র ভূমিতে পা রাখতে মরিয়া। অন্য কারও পিঠে ছুরি বসাতে আপত্তি নেই। তাতে যদি পাওয়া যায় প্রতি বছর সাত সংখ্যার বোনাস, সেটাই কাম্য। আরেকদিকে রয়েছেন ইনভেস্টমেন্ট প্রফেশনালরা, তাঁদের বেতন লাখ ডলারের উপরে। কিন্তু অতিরিক্ত কাজের চাপে সে টাকা খরচের মন মরে গেছে।

এঁদের অনেকে শুনতে চান না লেটা ভবিষ্যৎ সম্বন্ধে কী বলবে। তাঁদের দরকার এমন কাউকে, যার উপর সমস্ত দোষ চাপিয়ে দেয়া যায়। কিন্তু যারা লেটার বক্তব্য মনোযোগ দেন, শীঘ্রি বুঝে যান মেয়েটি নিজের কাজ জানে। মাত্র দু'বছর হলো ও এই ফার্মে যোগ দিয়েছে, এরইমধ্যে ওর নাম ছড়িয়ে পড়েছে। এই বুদ্ধিমতি অ্যানালিস্ট সমস্যার গভীরে ঢুকতে পারে, সহজে বোঝে ভবিষ্যতে কী ঘটতে চলেছে।

‘এখন বর্তমান অয়েল মার্কেটের উপর আলোচনা করবেন লেটা সিন,’ বক্তব্য শেষ করল হেইগেন, হাতের ইশারায় লেটাকে পড়িয়ামে আহ্বান করল।

মাইকের সামনে দাঁড়াল লেটা, প্রজেকশন সিস্টেমের সঙ্গে যুক্ত করল ল্যাপটপ। ওটার স্ক্রিনে পাওয়ারপয়েন্ট ভেসে উঠল। কনফারেন্স রুমের এক পাশের ব্লাইণ্ড টেনে দিল হেইগেন। মস্ত পিকচার উইণ্ডো ঢাকা পড়তে ম্যানহাটানের চওড়া রাস্তা হারিয়ে গেল। ওখানে ফুটে উঠল মানচিত্র।

‘লেডিজ অ্যাণ্ড জেন্টলমেন, আপনারা দেখছেন রাস টানুরা,’ শুরু করল লেটা সিন। নরম স্বরে বলছে, কিন্তু আত্মবিশ্বাসের সঙ্গে। সৌদি আরবের ম্যাপ দেখাল সে। এর পর পরই ভেসে উঠল অয়েল রিফাইনারি ও স্টোরেজ ট্যাঙ্কগুলোর ছবি।

‘সৌদি আরবের পেট্রোলিয়াম ও প্রাকৃতিক তরল গ্যাসের টার্মিনাল রাস টানুরা। ওটা ও-দেশের সবচেয়ে বড়। ওখান থেকে ক্রুড অয়েল ও গ্যাস রপ্তানি হয়... বা বলা উচিত, হতো। ভয়ঙ্কর ভূমিকম্পের ফলে ওটা বন্ধ হয়ে গেছে। ভয়াবহ আগুনে ওই রিফাইনারির ষাট ভাগ বিধ্বস্ত হয়েছে। আরও কী ক্ষতি হয়েছে, সেটা এখন খতিয়ে দেখছে সৌদি সরকার। স্টোরেজ ফ্যাসিলিটির বেশির ভাগ ধ্বংস হয়ে গেছে।’

‘এর ফলে তাদের তেলের রপ্তানিতে কী ধরনের প্রভাব পড়তে পারে?’ রিগান নামের এক ম্যানেজার জানতে চাইলেন।

আশুন নিয়ে খেলা-১

কুলের মত কান তাঁর। একটা ডো-নাটে কামড় বসালেন।

‘তেমন কিছু না,’ বলল লেটা। ফাঁদ পেতেছে, মাছটা তুলতে চাইছে।

‘তা হলে সবাই মিলে ফিউয়েল নিয়ে এত ভাবছে কেন?’ ভদ্রলোকের ঠোঁটের কোণ থেকে ছিটকে উঠল ডো-নাটের গুঁড়ো।

‘বেশিরভাগ রিফাইনারির প্রোডাক্ট নিজে ব্যবহার করে সৌদি আরব। কিন্তু ক্ষতিটা হয়েছে অন্যখানে। ভূমিকম্পের ফলে পাইপ-লাইনগুলো ফেটে গেছে, শিপিং টার্মিনাল রাস টানুরা বিধ্বস্ত হয়েছে।’ স্ক্রিনে আরেকটা ছবি ভেসে উঠল। দেখা গেল সি আইল্যান্ডের লোডিং টার্মিনাল। ওখানে ক্রুড তুলছে বারোটা সুপারট্যাঙ্কার।

‘শুনেছি ওই ফ্লোটিং টার্মিনালগুলো সাগরে, তাই ভূমিকম্প ওগুলোর কোন ক্ষতি করে না,’ ঘরের পিছন থেকে একজন মন্তব্য করল।

‘তা-ই হওয়ার কথা, কিন্তু ভূমিকম্পের এপিসেন্টার ছিল মাত্র দুই মাইল দূরে। ওই টার্মিনালগুলো ভাসমান টার্মিনাল নয়, সমুদ্রের মেঝেতে গেঁথে দেয়া। ভূমিকম্পের কারণে নীচের মাটি সরে যায়, ফলে দাঁড়ানো টার্মিনাল ধসে পড়ে। যেমনটা হয়েছে সি আইল্যান্ডে। সবচেয়ে বড় সুপারট্যাঙ্কারগুলোকে ক্রুড অয়েল দিত ওই টার্মিনাল। এখন আর দেবে না। শুধু তাই নয়, মাটির উপর স্থির লোডিং পিয়ারগুলোর বেশ কিছু বিধ্বস্ত হয়েছে। রাস টানুরার এক্সপোর্টের ইনফ্রাস্ট্রাকচারের বেশিরভাগই ক্ষতির মুখে পড়েছে, অথবা ধ্বংস হয়েছে। আর সেই কারণেই বিগ অয়েল শক শুরু হয়েছে।’ মিস্টার রিগানের চোখে চোখ রেখে থামল লেটা।

ঘরের ভিতর পিন পতন নীরবতা।

ডো-নাট খাওয়া শেষে মুখ খুললেন রিগান, ‘মিস সিন,

সৌদি আরব থেকে কী পরিমাণ পেট্রোলিয়াম এখন আর আসবে না?’

‘প্রতিদিন ছয় মিলিয়ন ব্যারেল।’

‘পৃথিবীর চাহিদার প্রায় দশ পার্সেন্ট, তা-ই না?’ জানতে চাইলেন এক সিনিয়র অ্যাসোসিয়েট।

‘প্রায় সাত পার্সেন্ট। নিশ্চয়ই পরিস্থিতিটা বুঝতে পারছেন?’ পরের স্লাইডে চলে গেল লেটা। ওটাতে নিউ ইয়র্কের মার্কেটাইল এক্সচেঞ্জ দেখা গেল, সূচক আকাশে উঠছে। হুড়হুড় করে বাড়ছে পশ্চিম টেক্সাসের ক্রুড অয়েলের দাম। ‘আপনারা তো জানেনই ক্রুডের মার্কেট একটুতেই অস্থির হয়ে ওঠে। গত চব্বিশ ঘণ্টায় প্রতি ব্যারেলের দাম উঠেছে আড়াই শ’ ডলার। আপনারা যাঁরা ইকুইটির সঙ্গে জড়িত, নিজ চোখে দেখছেন ডো এক্সচেঞ্জে কত দ্রুত দর পতন ঘটছে।’

অনেকে দীর্ঘশ্বাস ফেললেন, আফসোস করে মাথা নাড়লেন কেউ কেউ।

‘কিন্তু এরপর কী ঘটতে পারে?’ জানতে চাইলেন রিগান।

ধীরে মাথা দোলাল লেটা। ‘সেটাই সবার প্রশ্ন। মার্কেট আপাতত অস্থির, কী ঘটতে চলেছে কেউ জানে না। মানুষ ভয় পেলে সে কী করবে, সেটা আন্দাজ করা কঠিন।’ সামনে রাখা কফির কাপ মুখে তুলল লেটা। সবাই অস্থির হয়ে অপেক্ষা করলেন। লেটা সুন্দরী নারী, কিন্তু এ মুহূর্তে অন্য কারণে তার দিকে চেয়ে রয়েছেন সবাই। ওর বিবেচনার উপর অনেক কিছু নির্ভর করছে। ক্ষমতার স্বাদ চমৎকার, টের পেল লেটা। বলতে শুরু করল ও, ‘আমাদের মনে রাখতে হবে রাস টানুরা আমাদের জীবনে দীর্ঘস্থায়ী ক্ষত তৈরি করবে। আমেরিকার স্থানীয় অর্থনীতি প্রচণ্ড ঝাঁকি খাবে। অবস্থা অনেকটা নাইন/ইলেভেনের মত হবে। আগামী কয়েক সপ্তাহ পেট্রলের দাম আকাশে উঠবে। বহু লোক গাড়ি রেখে বাসে করে অফিস যাবে।

আগুন নিয়ে খেলা-১

বাচ্চাদের ডাইপার থেকে শুরু করে প্লেনের টিকেটের দাম অনেক বাড়বে। হঠাৎ সবকিছুর দাম অতিরিক্ত বাড়তে শুরু হওয়ায় পুরো অর্থনীতি নড়বড়ে হয়ে পড়বে। এমনটি ঘটবে, সাধারণ মানুষ ভাবেনি। তারা বাড়তি কোনও জিনিসপত্র কিনবে না। কিছুদিনের জন্য অর্থনীতি থমকে যাবে।’

‘আমেরিকার প্রেসিডেন্ট এ ব্যাপারে কিছু করতে পারেন?’ জানতে চাইলেন রিগান।

‘করবার তেমন কিছু নেই। তবে দুটো কাজ করলে ধাক্কাটা কম লাগবে। এখন আমাদের দেশের স্ট্র্যাটেজিক পেট্রোলিয়ামের রিজার্ভ কাজে লাগানো যায়। প্রেসিডেন্ট ইচ্ছে করলে সৌদি ক্রুডের ঘাটতি কমিয়ে আনতে পারেন। যদি ন্যাশনাল ওয়াইল্ড-লাইফ রিফিউজের কর্তাদের নির্দেশ দেন। ওখানে ড্রিল করবার অনুমতি দিলে আলাস্কা পাইপ-লাইনে নতুন করে পুরোদমে কাজ শুরু হবে। এর ফলে অভ্যন্তরীণ বাজার খানিকটা হলেও স্থির হবে।’

‘কী ধরনের দীর্ঘস্থায়ী পরিস্থিতি সৃষ্টি হতে পারে?’ জানতে চাইলেন রিগান।

‘অস্থির মার্কেটে যে ভয় কাজ করছে, সেটার কারণে ভবিষ্যৎ পরিস্থিতি আন্দাজ করা কঠিন। তবে এটা বলা যায়, বহুদিন পর্যন্ত ফিউয়েল সঙ্কট চলবে। ক্রুডের দাম যেখানে উঠেছে, তিন মাসের মধ্যে তা অনেকটা নেমে আসবে। সৌদি ক্রুড অয়েল না থাকায় ওপেকের অন্য দশটি দেশ সুযোগ নিতে চাইবে। তবে তাদের ইনফ্লাস্ট্রাকচারের উপর নির্ভর করে তারা সংক্ষিপ্ত সময়ে কতটা কী করতে পারবে।’

‘ওপেক নিশ্চয়ই ক্রুডের দাম বাড়িয়ে ধরতে চাইবে?’ বললেন এক অ্যাসোসিয়েট।

‘বেশিদিন চাহিদা থাকলে তা-ই চাইবে। কিন্তু ভয়ও আছে তাতে। বেশি চাইলে বিশ্ব অর্থনীতির সূচক নীচের দিকে মোড়

নেবে। জনগণ খরচ কমাতে শুরু করবে। এর ফলে মন্দা শুরু হবে।’

‘তেমনটা হতে পারে ভাবছেন আপনি?’

‘হতেই পারে। তবে উন্নত দেশগুলোর মত ওপেকও চাইবে না মন্দা শুরু হোক। ওটা শুরু হলে তাদের আয় অনেক কমে যাবে। আমাদের আজকের সমস্যা: কীভাবে স্থানীয় বাজারে ক্রুড অয়েল পাওয়া যায়। আমরা যদি হঠাৎ দেখি অন্য কোনও কারণে সাপ্লাই কমে গেছে, সেক্ষেত্রে কী ঘটবে কেউ জানে না।’

‘তা হলে এখন কীভাবে বিনিয়োগ করব আমরা?’ জানতে চাইলেন রিগান।

‘ধারণা করা হচ্ছে রাস টানুরা ও টার্মিনালগুলো ছ’ থেকে ন’ মাসের মধ্যে মেরামত করা সম্ভব হবে। অবশ্য এমনও হতে পারে ওখানে নতুন রিফাইনারি ও টার্মিনাল বসানো হবে। আমার পরামর্শ, আপাতত আমরা বর্তমান দামে তেল কিনব, আশা করব শীঘ্রি, মানে, ন’ মাস থেকে শুরু করে বারো মাসের মধ্যে দাম কমে আসবে।’

‘আপনি তা-ই ধারণা করছেন?’ রিগানের কণ্ঠে সন্দেহ।

‘আমি কি তা-ই বলেছি?’ কড়া স্বরে বলল লেটা। ‘হঠাৎ আগামীকাল ভেনেজুয়েলার উপর প্রকাণ্ড উল্কাপিণ্ড পড়তে পারে। আগামী সপ্তাহে কোনও ফ্যাসিস্ট ডিক্টেটর নাইজেরিয়ার ক্ষমতা দখল করে নিতে পারে। এরকম এক হাজার একটা রাজনৈতিক এবং প্রাকৃতিক দুর্ঘটনা ঘটা সম্ভব। সেসব তেলের মার্কেটকে এক পলকে বদলে দিতে পারে। এটা মেনে নিতে হবে, যে-কোনও মুহূর্তে খারাপ কিছু ঘটলে তেলের বাজারে তার কুপ্রভাব পড়বে। তবে রাস টানুরায় যা ঘটেছে, তেমন যদি আর কোনও দুর্ঘটনা ঘটে তা হলে শুরু হবে মহা-মন্দা। সেক্ষেত্রে বিশ্ব অর্থনীতি ধসে পড়বে, সব আবার ঠিক হতে বহু বছর লাগবে। নিশ্চয় করে কিছু বলা সম্ভব নয়, তবে আমার ধারণা,

রাস টানুরা যেভাবে বিশ্ব অর্থনীতিকে ঝাঁকি দিয়েছে, আরকিছু তেমনটি পারবে না। তা ছাড়া, এ ধরনের দুর্যোগ কমই ঘটে।’
সবার উপর চোখ বোলাল লেটা। শেষ স্লাইড সরিয়ে নিল।
‘আপনাদের আর কোনও প্রশ্ন?’

হেইগেন জানালার শেড সরিয়ে দিতেই সূর্যালোক ঝাঁপিয়ে পড়ল ঘরে। সবাই চোখ কুঁচকে ফেললেন।

‘লেটা, আমার ডেস্ক গ্লোবাল ইকুইটির বিজনেস নিয়ে কাজ করে,’ বললেন মোটা এক স্বর্ণকেশী মহিলা। ‘আপনি কি বলতে পারেন সৌদি ত্রুড না থাকবার ফলে কোন্ কোন্ দেশ বেশি ক্ষতিগ্রস্ত হবে?’

‘আমি শুধু বলতে পারি সৌদি তেল কোন্ দেশগুলোতে রপ্তানি হচ্ছে। যেমন, আমাদের ইউএসএ। আমরা উনিশ শ’ তিরিশ থেকে আজ পর্যন্ত সবচেয়ে বেশি নিই। ওয়াশিংটন বছ বছর থেকে মিডল ইস্টের ত্রুড অয়েলের উপর থেকে চাহিদা কমিয়ে আনতে চাইছে। কিন্তু এখনও এ দেশ সৌদি তেলের উপরই নির্ভর করে। আমাদের ফিউয়েল আমদানির পনেরো শতাংশ ওখান থেকে আসছে।’

‘ইউরোপিয়ান ইউনিয়নের কী অবস্থা?’

‘ইউরোপের পশ্চিমা দেশগুলোর বেশিরভাগ তেল আসে নর্থ সি থেকে। তবু তারাও সৌদি ত্রুডের উপর বেশ কিছুটা নির্ভর করে। আমার ধারণা অন্য রপ্তানিকারক দেশগুলো তাদের চাহিদা মেটাতে চাইবে। উন্নত দেশগুলোতে ভয়াবহ সংকট তৈরি হবে না। ...তবে এশিয়ার দেশগুলো পড়বে মহা বিপদে।’

এক চুমুকে কফি শেষ করল লেটা সিন, কম্পিউটারে আরেকটা ফাইল খুলল। খেয়াল করল কেউ ঘর ছেড়ে যায়নি, ওর প্রতিটি কথা শুনবার জন্য অপেক্ষা করছে।

‘জাপান প্রচণ্ড এক ঝাঁকি খাবে,’ রিপোর্ট দেখছে লেটা। ‘ত্রুড রপ্তানিকারক দেশগুলো জাপানের এক শ’ ভাগ চাহিদা

পূরণ করে। সাইবেরিয়ায় যে ভূমিকম্প ঘটল, সেটার কারণে টাইশেট-নাখোদকা পাইপ-লাইন এখন বন্ধ। বেশিরভাগ লোক এখনও জানে না, কিন্তু ওই ভূমিকম্পের ফলে ত্রুড় অয়েলের দাম প্রতি ব্যারেলে পনেরো ডলার বেড়ে গেছে।’ রিপোর্ট একবার দেখে নিল লেটা। ‘জাপান ফিউয়েলের বাইশ ভাগ আমদানি করে সৌদি আরব থেকে। টানুরা বন্ধ হয়ে যাওয়ায় তাদের অর্থনীতি বিপর্যস্ত হবে। অবশ্য রাশা যদি দ্রুত তাদের পাইপ-লাইন মেরামত করে ত্রুড়ের রপ্তানি বাড়ায়, সেক্ষেত্রে জাপান অর্থনীতি কিছুটা সামলে নেবে।’

‘আর চিন?’ জানতে চাইলেন ফ্রেঞ্চকাট দাড়িওয়ালা এক ভদ্রলোক। ‘শাংহাইয়ে যে আগুন ধরল, সেটার কারণে কী ঘটতে পারে?’

পেজের নীচের অংশ দেখল লেটা। ঙ্গ কুঁচকে উঠল। ‘চায়নিজ অর্থনীতি জাপানের মতই ধাক্কা খাবে। তাদের বিশ ভাগ ত্রুড় অয়েল সৌদি আরব থেকে আসত ট্যাক্সারগুলোর মাধ্যমে। আমি এখনও নিংবো অয়েল টার্মিনালের ক্ষতি নিয়ে কাজ করতে পারিনি। তবে এটা বলা যায়, রাস টানুরা বন্ধ হয়ে যাওয়ায় চায়নিজরা বিরাট বিপদে পড়েছে। সামলে নিতে তাদের কয়েক মাস লাগবে।’

‘চিনাদের সামনে তেলের অন্য কোনও বাজার?’ পিছন থেকে জানতে চাইলেন একজন।

‘না, নেই। দিতে পারে শুধু রাশা। কিন্তু তারা পশ্চিমা দেশ ও জাপানকে দিতে চাইবে। কাজাখস্তান খানিকটা সাহায্যে আসতে পারত, কিন্তু সেটাও সম্ভব হবে না। কারণ চিনে আগে থেকেই তারা যা দিচ্ছে, তার বেশি ধারণক্ষমতা পাইপগুলোর নেই। কাজেই ধরে নেয়া যায়, চিনা অর্থনীতি মারাত্মক বিপদে পড়েছে। কোনও ভাবে তাদের এনার্জির চাহিদা মিটাতে পারছে না।’ লেটা মনের ভিতর গোঁথে নিল, অফিসে ফিরেই চিন

পরিস্থিতি নিয়ে বসতে হবে।

‘আপনি কিছুক্ষণ আগে জানিয়েছেন আমাদের স্থানীয় বাজারে সঙ্কট শুরু হবে,’ বললেন বেগুনি টাই পরা এক ভদ্রলোক। ‘সেটা কত ভয়াবহ হতে পারে?’

‘বাজারে নতুন কোনও সমস্যা তৈরি না হলে কিছু এলাকায় স্বল্প দিনের জন্য চাহিদা মিটবে না। আমাদের মনে রাখতে হবে আমরা মানুষের ভয় নিয়ে কাজ করছি। এরপর যদি আর কোনও দুর্ঘটনা ঘটে, তা বাস্তব হোক বা কাল্পনিক হোক, আমাদের অর্থনীতি মুখ থুবড়ে পড়বে।’

কিছুক্ষণ পর মিটিং শেষ হলো, ফিন্যানশিয়াররা গম্ভীর চেহারা নিয়ে নিজ নিজ অফিসে ফিরলেন। ল্যাপটপ হাতে তুলে নিল লেটা, দরজার দিকে পা বাড়াল। ওর পিছু নিল একটা ছায়া। ঘাড় ফিরিয়ে দেখল লেটা, এ লোক সেই ডো-নাট খাওয়া মিস্টার রিগান।

‘চমৎকার মিটিং চালিয়েছেন, লেটা,’ আকর্ণ হেসে বললেন। ‘চলুন, আপনাকে কফি খাওয়াই।’

দাঁতে দাঁত পিষল লেটা, পরমুহূর্তে হাসির ভঙ্গি করল, আস্তে করে মাথা দোলাল।

পনেরো

গ্রীষ্মের উত্তপ্ত দিন। বেইজিং যেন জ্বলন্ত কড়াই। গাড়ি ও কারখানার ধোঁয়া শ্বাস আটকে দিতে চাইছে। বুলেভার্ডগুলোতে জ্যামে আটকা পড়েছে অজস্র সাইকেল ও গাড়ি। মা’রা তাদের

বাচ্চাদের নিয়ে জলাশয়ের তীরে গিয়ে বসছে—যদি একটু শীতল
হাওয়া পাওয়া যায়! কিশোর ভেঙাররা চলতে চলতে চেঁচাচ্ছে,
হাতে ঠাণ্ডা কোকা-কোলা। টুরিস্ট ও ব্যবসায়ীরা কিনছে দেদার।

এবার সত্যি খুব গরম পড়েছে।

বেইজিংয়ে ব্যস্ত হয়ে উঠেছে চিন কমিউনিস্ট পার্টির বড়
কর্মকর্তারা।

পলিটব্যুরো হেডকোয়ার্টার।

বেজমেন্টে বিশাল মিটিং কক্ষে এসি চলছে। মেঝেতে পুরু
কার্পেট। চার দেয়ালে অপূর্ব সব চিত্র শিল্প। সেগুন কাঠের
গোল-টেবিল ঘিরে মুখ গম্ভীর করে বসে আছেন ছ'জন
ভিআইপি। এঁরা পলিটিকাল ব্যুরোর স্ট্যাণ্ডিং কমিটির সদস্য।
গণচিনে এঁরা চাইলে করতে পারেন না, এমন কিছু নেই।

কিছুক্ষণ আগে নিজের চেয়ারে বসেছেন জেনারেল
সেক্রেটারি, চিনের প্রেসিডেন্ট—হু জিনতাও।

এসি চলছে, কিন্তু ভীষণ গরম লাগছে বাণিজ্যমন্ত্রী ঝ্যাং
কুইজিয়নের। চুলগুলো গেছে তাঁর, আছে শুধু এখন মাথা জুড়ে
মস্ত এক মরুভূমি। বারবার চোখ পিটপিট করছেন, যেন চোখে
ভাল দেখছেন না। তাঁর পাশে দাঁড়িয়েছে তরুণী সহকারী ই
দেন।

‘ঝ্যাং, আপনার জানা আছে আমরা গত নভেম্বরে পঞ্চ
বার্ষিক অর্থনৈতিক পরিকল্পনা পাশ করেছি,’ কড়া স্বরে বললেন
প্রেসিডেন্ট জিনতাও। ‘এখন আপনি বলতে চান সামান্য
কয়েকটা দুর্ঘটনা আমাদের জাতীয় পরিকল্পনা পণ্ড করে দেবে?’

খুক-খুক করে কেশে উঠলেন কুইজিয়ান। নাক চুলকে
নিলেন, তারপর নরম স্বরে বললেন, ‘মিস্টার জেনারেল
সেক্রেটারি, পলিটব্যুরোর সম্মানিত সদস্যগণ—আমাদের সবার
জানা, গত কয়েক বছরে মহাচিন অনেক বদলে গেছে। আমাদের
অর্থনীতি দ্রুত বাড়তে শুরু করেছে। আর সেজন্যই আমাদের
আগুন নিয়ে খেলা-১

দরকার প্রচুর পেট্রোলিয়াম। এই তো কয়েক বছর আগে আমরা ছিলাম ত্রুড অয়েলের রপ্তানিকারক দেশ। কিন্তু এখন আমরা নিজেরাই আমদানি করতে বাধ্য হচ্ছি। আমাদের বিশালাকার অর্থনৈতিক কর্মকাণ্ডের কারণেই এটা ঘটছে। বলতে দুঃখ লাগে, কিন্তু এখন অন্যান্য দেশের রাজনৈতিক পরিস্থিতি, বর্তমান বিশ্ব অর্থনীতি ও অস্থির পেট্রোলিয়াম মার্কেট আমাদেরকে বদলে দিচ্ছে। যেমনটা ঘটছে আমেরিকার। চার দশক ধরে।’

‘হ্যাঁ, আমরা জানি আমাদের জ্বালানি খাত দ্রুত বাড়ছে,’ ধৈর্যের সঙ্গে বললেন জিনতাও। বাণিজ্যমন্ত্রী কী বলেন সেটা শুনবার জন্য অপেক্ষা করছেন।

পার্টির এক সদস্য জানতে চাইলেন, ‘আমরা কতটা ক্ষতিগ্রস্ত হবো?’

‘দু’ হাত কাটা পড়বার মত,’ বললেন কুইজিয়ান। ‘আগামী কয়েক মাস সৌদি আরব থেকে আমাদের ফিউয়েল পাওয়ার পথ বন্ধ। আমরা অন্য কোনও দেশ থেকে পেট্রোলিয়াম নিতে চাইলেও কয়েক মাস লাগবে। নিংবো বন্দরে আগুন ধরবার ফলে আমরা ভয়ঙ্কর ভাবে ক্ষতিগ্রস্ত হয়েছি। জ্বালানি চাহিদার এক তৃতীয়াংশ ওখান দিয়ে আসত। জাহাজগুলো আর ওখানে ভিড়বে না। নতুন করে বন্দর চালু করতে মাসের পর মাস লেগে যাবে। আমি বলতে বাধ্য হচ্ছি, আমরা বিরাট বিপদের মুখে পড়েছি।’

পলিটব্যুরোর এক সদস্য বললেন, ‘আমি শুনেছি বন্দর পুরোপুরি চালু হলেও জ্বালানি সংগ্রহ করতে এক বছরেরও বেশি লাগবে। তার আগ পর্যন্ত কী ব্যবস্থা হবে?’

‘আপনি ঠিকই বলেছেন, নিংবো চালু হওয়া পর্যন্ত অন্য ভাবে জ্বালানি সংগ্রহ বাধ্যতামূলক হয়ে উঠেছে,’ বারকয়েক ঘনঘন বাউ করলেন কুইজিয়ান।

‘জ্বালানি আমাদের লাগবে,’ তপ্ত স্বরে বললেন হু জিনতাও। ‘পুরো দু’ দিন হলো শাংহাই শহরে বিদ্যুৎ নেই। দেশের

বেশিরভাগ কারখানা সংক্ষিপ্ত সময়ের জন্য চালু রাখা হচ্ছে। বিদ্যুৎ আমাদের দিতেই হবে! লাখ লাখ বাড়ি বিদ্যুৎহীন, রাতে মানুষ রান্না করতে পারছে না! আমাদের সদস্য বলছেন অন্য দেশ থেকে জ্বালানি আনতে অনেক সময় লাগবে! ...তার মানেরটা কী?’ বাণিজ্যমন্ত্রীর চোখে চাইলেন জিনতাও। ‘আমরা কি ভাবব পঞ্চ বার্ষিক পরিকল্পনা বানে ভেসে গেছে? আমি জানতে চাই আপনি এই সমস্যা সমাধানের জন্য কী করছেন!’

কুইজিয়ানের মনে হলো শামুকের খোলার ভিতর গিয়ে লুকান। পলিট সদস্যরা তাঁর দিকে চেয়ে রয়েছেন। ঢোক গিললেন তিনি, বড় করে শ্বাস নিয়ে শুরু করলেন, ‘মাননীয় প্রেসিডেন্ট, সম্মানিত পলিটব্যুরো সদস্য, আপনারা বোধহয় এরইমধ্যে জেনে গেছেন থ্রি গর্জ ড্যামে হাইড্রোইলেকট্রিসিটি তৈরির কাজ প্রায় শেষ, শীঘ্রি ওখানে বাড়তি জেনারেটরগুলো কাজ শুরু করবে। এ ছাড়াও বিভিন্ন পর্যায়ে রয়েছে সাতটি কয়লা ও গ্যাস চালিত পাওয়ার প্লান্ট নির্মাণের কাজ, দ্রুত ওগুলোর কাজ শেষ করার জন্য ব্যবস্থা নেওয়া হয়েছে। এতদিন প্রাকৃতিক গ্যাস বা খনিজ তেলের অভাবে নন-হাইড্রো পাওয়ার প্লান্টগুলোকে পুরোপুরি কাজে লাগানো যায়নি, ওগুলো চালানো এখন আরও কঠিন হয়ে উঠেছে। ভিয়েতনাম সরকার আপত্তি তুললেও আমাদের সরকারী তেল কোম্পানিগুলো দক্ষিণ চীন সাগরে পেট্রোলিয়াম আবিষ্কারের চেষ্টা করছে। এদিকে আমরা বহির্বিশ্বের সরকারগুলোর সঙ্গে জোরাল সম্পর্ক গড়ে তুলছি। এরইমধ্যে পররাষ্ট্র মন্ত্রণালয় ইরানের সঙ্গে তেল চুক্তি করেছে, আশা করছি ওটার কারণে প্রচুর ক্রুড অয়েল পাওয়া যাবে। এছাড়া আমরা পশ্চিমা কোম্পানিগুলোর সঙ্গেও যোগাযোগ করছি।’

‘বাণিজ্যমন্ত্রী ঠিকই বলেছেন,’ নরম স্বরে বললেন পররাষ্ট্র মন্ত্রী। প্রেসিডেন্ট জিনতাওর বামে বসে আছেন। খুকখুক করে আঙুন নিয়ে খেলা-১

কেশে উঠলেন। ‘তিনি যা বললেন, এসব তৎপরতা ভবিষ্যতে আমাদের জন্য সুফল বয়ে আনবে। কিন্তু, বর্তমানে আমরা যে সমস্যার মুখোমুখি, সেটা দ্রুত দূর করা সম্ভব নয়।’

‘আমি বাণিজ্যমন্ত্রীর কাছে আবারও জানতে চাই, আগামী কয়েক মাস কী ভাবে চলবে?’ একটু চড়ে গেল প্রেসিডেন্টের কণ্ঠ। হাসি-হাসি চেহারাটা এখন থমথম করছে।

‘ইরান ছাড়াও মিডল ইস্টের আরও কয়েকটি দেশের সঙ্গে আলাপ হয়েছে আমাদের, তারা কথা দিয়েছে যত দ্রুত সম্ভব রপ্তানি শুরু করবে। তবে ওই ক্রুড অয়েল পাওয়ার জন্য পশ্চিমা দেশগুলোর সঙ্গে আমাদের তীব্র প্রতিযোগিতা করতে হবে। তাতে দাম বেশি পড়বে।’ মিহি হয়ে উঠল কুইজিয়ানের কণ্ঠ, ‘আরেকটি বিষয়, নিংবো বন্দর অচল হয়ে পড়ায় সাগর-পথে তেল পাওয়া কঠিন হয়ে উঠেছে।’

‘রাশানদের সঙ্গে কথা হয়েছে?’

‘ওরা জাপানিদের সঙ্গে মাখামাখি করছে,’ তিক্ত চেহারা করলেন পররাষ্ট্রমন্ত্রী। ‘আমরা তাদের সঙ্গে আলাপ করেছি। বলা হয়েছিল দু’ দেশীয় কারিগরী সহায়তা বাড়ানো হোক। পশ্চিম সাইবেরিয়া থেকে পাইপ-লাইন চিনে আসতে পারে। কিন্তু রাশানরা রাজি হয়নি। তারা প্রশান্ত মহাসাগরীয় পাইপ-লাইন বসাবে, জাপানকে তেল যোগান দেবে। অবশ্য কিছুদিনের জন্য আমরা রেল ট্যাঙ্কারের মাধ্যমে তেল আনতে পারি। যদিও সেটা যুক্তিযুক্ত হবে না। খরচ অনেক বেশি পড়বে, যথেষ্ট ক্রুড অয়েল পাওয়াও যাবে না।’

‘তার মানে সত্যিকারের কোনও সমাধান নেই,’ আরও গম্ভীর হয়ে উঠলেন প্রেসিডেন্ট। ‘আমাদের অর্থনীতি থমকে দাঁড়াবে, পিছাতে থাকবে আমরা। পশ্চিমারা এগোবে, আর আমরা সবাই ফিরব খামারে। রাতে বাতি জ্বলবে না। বাচ্চারা লেখাপড়া করবে না, ফসলের খেতে কাজ করবে।’

নীরব হয়ে উঠল ঘর। কেউ কিছু বলছেন না। শুধু এসির মৃদু ফিসফিস শব্দ। কিছুক্ষণ পেরিয়ে গেল, তারপর কুইজিয়ানের পাশে দাঁড়ানো তরুণী গলা পরিষ্কার করল। তার দিকে দেখছেন না কেউ। মৃদু স্বরে বলল সে, 'এক্সকিউজ মি, জেনারেল সেক্রেটারি, মন্ত্রী মহোদয়, আজই আমাদের মন্ত্রণালয়ে অদ্ভুত একটা বার্তা এসেছে। তারা আমাদেরকে ক্রুড অয়েল সরবরাহ করতে চায়।' বাণিজ্যমন্ত্রীর দিকে চাইল সে, গালদুটো লালচে হয়ে উঠল। 'মাননীয় বাণিজ্যমন্ত্রী, আমি দুঃখিত, সময় ছিল না বলে আপনাকে জানাতে পারিনি। আপনাদের আলাপ শুনে এখন বুঝতে পারছি, ওই বার্তা বোধহয় গুরুত্বপূর্ণ।'

'কারা কী বলেছে?' জানতে চাইলেন প্রেসিডেন্ট হু জিনতাও।

'একটা প্রস্তাব। মঙ্গোলিয়া থেকে। তারা আমাদের হাই কোয়ালিটি ক্রুড অয়েল দিতে...'

'মঙ্গোলিয়া?' তরুণীকে থামিয়ে দিলেন বাণিজ্যমন্ত্রী। 'মঙ্গোলিয়ায় কোনও পেট্রোলিয়াম নেই।'

'প্রস্তাবে বলেছে তারা প্রতি দিন দশ লাখ ব্যারেল দিতে পারে,' বলল ই দেন। 'আরও জানিয়েছে নব্বুই দিনের মধ্যেই ফিউয়েল সাপ্লাই দিতে পারে।'

কুইজিয়ান কড়া চোখে সহকারীর দিকে চাইলেন। নিজ থেকে কিছু জিজ্ঞেস করেননি তিনি, তার পরও মেয়েটি কথা বলছে। 'কোথাকার কোন্ উন্মাদ,' বললেন।

'হয়তো তা-ই,' বললেন জিনতাও। 'তবে এই উন্মাদের ব্যাপারে খোঁজ নেয়া যেতে পারে। ওই বার্তা থেকে আর কী পাওয়া গেল?'

'পেট্রোলিয়াম দেয়ার বদলে তাদের কিছু দাবি রয়েছে,' বলল ই দেন। 'ইঠাৎ পুরোপুরি নার্ভাস হয়ে উঠল। মনে মনে চাইছে আর কিছু বলতে না হোক। কিন্তু সবার চোখ ওর উপর!

আগুন নিয়ে খেলা-১

লজ্জা ঝেড়ে বলতে শুরু করল সে, 'ব্রুড অয়েলের দাম নির্ধারণ করতে হবে বাজার মূল্য অনুযায়ী। আগামী তিনবছর তাদের কাছে থেকে এই মূল্যেই তেল কিনতে হবে। তারা একা উত্তর-পূর্বের পাইপ-লাইন ও কিনছ্যাংদাও বন্দর ব্যবহার করবে। এ ছাড়া, ইনার মঙ্গোলিয়ায় চিনির অধিকৃত যে ভূখণ্ড রয়েছে, সেটা আনুষ্ঠানিক ভাবে মঙ্গোলিয়ান সরকারকে ফিরিয়ে দিতে হবে।'

প্রায় একইসঙ্গে গর্জে উঠলেন কয়েকজন পলিট সদস্য। খেপে গেছেন সবাই। কে এই উন্মাদ যে এই ধরনের দাবি করে! হৈ-চৈ শুরু হলো। টেবিলের উপর অ্যাশট্রে ঠুকলেন প্রেসিডেন্ট। কাজ হচ্ছে না। এবার নিজেই চেঁচিয়ে উঠলেন জিনতাও, 'চুপ! চুপ করুন আপনারা!' থেমে গেলেন সবাই। প্রেসিডেন্টের চোখে রাগ, তবে মাপা স্বরে বললেন, 'আপনারা দেখুন সত্যি কেউ এ ধরনের প্রস্তাব দিয়েছে কি না। যদি দিয়ে থাকে, আমাদের জানতে হবে তারা কারা, তাদের কাছে সত্যিই ফিউয়েল আছে কি না। যদি থেকে থাকে, দাম নিয়ে পরে চিন্তা করব আমরা।'

'আপনি যা বলেন, জেনারেল সেক্রেটারি,' আস্তে করে বাউ করলেন কুইজিয়ান।

'তবে আগে আমাকে সব জানাবেন। আমি জানতে চাই কে বা কারা এভাবে অপদস্থ করতে চায় চিন সরকারকে। তারা কোন সাহসের ভিত্তিতে এসব দাবি করছে!'

অসহায় চোখে ই দেনের দিকে চাইলেন কুইজিয়ান। তরুণী প্রেসিডেন্টের দিকে ফিরল। 'আমাদের মন্ত্রণালয় এ দলটিকে চেনে না। নাম বরজিন অয়েল কনসোর্টিয়াম।'

ষোলো

ওরা পাঁচজন হারিয়ে গেছে। দু সপ্তাহের জন্য উলান-উদে ছেড়ে বেরিয়েছে, সেলেনগা নদী-উপত্যকায় সাইসমিক অ্যাক্টিভিটি দেখবার জন্য। রাশান সরকারের লুকঅয়েল কোম্পানির লোক ওরা, এ অঞ্চলের মানুষ নয়, এলাকাটা একদম অপরিচিত। ঝামেলাটা শুরু হলো ঠিক যখন কেউ জিপিএসের উপর কফি ফেলল। ইলেকট্রনিক যন্ত্রটা মুহূর্তে শেষ! তারপরেও ওরা দক্ষিণে এগিয়েছে। অনেক দেরিতে বুঝেছে সাইবেরিয়া ছেড়ে মঙ্গোলিয়ায় ঢুকে পড়েছে। মানচিত্র আর কোনও কাজে আসবে না। ফিরতি পথ না ধরে তখনও এগিয়েছে ওরা মাটির নীচের ঢেউগুলো দেখবার জন্য। ‘থাম্পার’ ট্রাক জানিয়েছে মাটির নীচে অনেকগুলো পকেট রয়েছে। ওখানে গ্যাস বা তেল পাওয়া যেতে পারে। এখন গভীর এক পকেট ধরে দক্ষিণ-পূবে চলেছে সার্ভে টিম, সবাই ধারণা করেছে ওখানে ক্রুড অয়েল মিলবে। খেয়াল নেই, সেলেনগা নদী অনেক দূরে সরে গেছে।

‘এখন উত্তরদিকে গেলেই হলো, ওদিকে আমাদের ট্রাক থাকবে,’ বললেন আলেকজান্ডার সার্গোভ। ছোটখাটো মানুষ, টাক পড়তে শুরু করেছে। দলের নেতা তিনি। পশ্চিম দিক দেখলেন। ওদিকে রয়েছে ঘন সবুজ অরণ্য। চারপাশে ছায়া নামছে, একটু পর সূর্য ডুববে।

‘আসার সময় পাউরুটির টুকরো ফেললে ঠিক পথে ফিরতে পারতাম,’ হেসে বলল তরুণ অ্যাসিস্ট্যান্ট ইঞ্জিনিয়ার সেমেন আগুন নিয়ে খেলা-১

ইগোরভ ।

‘আমার মনে হয় না কায়াখতা পর্যন্ত পৌছব, যথেষ্ট ফিউয়েল নেই,’ বলল থাম্পার ট্রাকের ড্রাইভার । ট্রাকের মত সে-ও বিশাল । পা-দানি পেরিয়ে ড্রাইভিং কম্পার্টমেন্টে ঢুকল, চওড়া বেঞ্চে শুয়ে পড়ল । মোটা বাহু মাথার নীচে রাখল, ঘুমাবে ।

থাম্পার ট্রাকটি তিরিশ টনি । পেটের নীচে রয়েছে স্টিলের পাত, মাটির বুকে জোর আঘাত করে গভীরে সাইসমিক শক পাঠায় । খুদে ট্র্যাকসিভারগুলো ট্রাক থেকে অনেকটা দূরে বসানো হয়, মাটির নীচের পরতগুলো থেকে সিগনাল ধারণ করে । সেগুলোকে বদলে নেয় কম্পিউটারাইজড প্রসেসিং কনভার্টার, মাটির নীচের ভিযুয়াল মানচিত্র ও ইমেজ তৈরি করে ।

পিছন থেকে এসে ট্রাকের পাশে থামল লাল রঙের এক ফোর-হুইল-ড্রাইভ, নেমে এল দু’জন—তর্কে যোগ দিল ।

‘সীমান্ত পেরনোর অনুমতি আমাদের নেই, আর এখন আমরা জানিই না সীমান্ত কোথায়,’ প্রায় নালিশ করল জিপের ড্রাইভার ।

‘সাইসমিক রিডিং বলছে আমাদের আরও এগিয়ে যেতে হবে,’ বললেন সার্গেভ । ‘তা ছাড়া নির্দেশ আছে, দু সপ্তাহ চারপাশ ঘুরে দেখতে হবে । লুকঅয়েল কোম্পানির আমলারা বুঝুক কীভাবে এখানে ড্রিল করবে । অনুমতি পাওয়ার দায়িত্ব তাদের । সীমান্ত নিয়েও ভাবতে হবে না, আমরা জানি উত্তরদিকে গেলে ফিরতে পারব । আমাদের প্রথম কাজ ফিউয়েল যোগাড় করে সীমান্তে পৌঁছানো ।’

ড্রাইভার কী যেন বলতে গিয়েও থেমে গেল । বুম্‌বুম্‌! দূর থেকে বিস্ফোরণের আওয়াজ ভেসে এল ।

‘টিলার উপর,’ বলল ইগোরভ ।

তারা রয়েছে টিলার এক ঢালে । পাহাড়ি এলাকা । জমি ক্রমশ পাহাড়ের চূড়ায় গিয়ে মিশেছে । ঘন হয়ে জন্মেছে পাইন

গাছ। তারই ফাঁকে অসংখ্য খাদ। ওখান থেকে নির্মেষ আকাশে উঠছে ধূসর ধোঁয়া। টিলা-টক্করে ধাক্কা খেয়ে ছুটাছুটি করে মিলিয়ে গেল প্রতিধ্বনি। ভারী যন্ত্রপাতির আবছা আওয়াজ ঢাল বেয়ে নামছে।

‘কী-কী রে বাবা!’ বিস্ফোরণের আওয়াজে জেগে উঠেছে ট্রাকের ড্রাইভার।

‘পাহাড়ের ওপর বিস্ফোরণ,’ বললেন সার্গোভ। ‘খুব সম্ভব মাইনিং চলছে।’

‘ভাবতে ভাল লাগছে, এই নির্জন এলাকায় আমরা একা নই,’ বিড়বিড় করল ড্রাইভার, মুহূর্তে ঘুমিয়ে পড়ল আবার।

‘কোন পথে ফিরব বলতে পারবে ওরা,’ আনমনে বলল ইগোরভ।

বেশিক্ষণ অপেক্ষা করতে হলো না। একটা গুঞ্জন শুরু হলো, দূরে দেখা গেল কালো এক জিপ-গাড়ি, দ্রুত এগিয়ে আসছে। এক টিলা ঘুরে ঢাল বেয়ে নেমে এল, ঘ্যাঁচ করে থামল সার্ভে টিমের পাশে। চারপাশ ঢেকে গেল ধুলোয়। জিপের দুই আরোহী এক মুহূর্ত বসে থাকল, তারপর সাবধানে নামল। তারা মঙ্গোল, নাক চ্যাপ্টা, চোয়ালের হাড় উঁচু, অপেক্ষাকৃত বেঁটে লোকটা কয়েক পা সামনে বাড়ল, প্রায় ধমকে উঠল, ‘এখানে কী করছেন আপনারা?’

‘উপত্যকায় সার্ভে করতে গিয়ে পথ হারিয়েছি,’ বললেন সার্গোভ। ঠিক করেছেন বেশি পাত্তা দেবেন না। ‘উত্তর সীমান্তের কায়াখতা যেতে চাই। সঙ্গে যথেষ্ট ফিউয়েল নেই। আপনারা সাহায্য করতে পারেন?’

‘সার্ভে’ শব্দটা শুনেই সতর্ক হয়ে উঠেছে লোকটা। একবার থাম্পার ট্রাক দেখল, তারপর শান্ত স্বরে বলল, ‘আপনারা ক্রুড অয়েল খুঁজছেন?’

মাথা দোলালেন ইঞ্জিনিয়ার।

ডানহাত দিয়ে চারপাশ দেখাল মঙ্গোল। ‘এখানে কোনও তেল নেই। ...আজ রাত এখানে থাকুন। কাল সকালে ট্রাকের জন্য ফিউয়েল নিয়ে আসব। তখন দেখিয়ে দেব কোন পথে কায়াখতা যাবেন।’

আর একটা কথাও বলল না সে, সঙ্গীকে নিয়ে জিপে উঠল। গর্জে উঠল ইঞ্জিন। গাড়ি ঘুরিয়ে নেয়া হলো, রওনা হয়ে গেল দু’জন।

‘আমাদের সমস্যার সমাধান হলো,’ সম্ভ্রষ্ট মনে বললেন সার্গোভ। ‘আজ এখানে ক্যাম্প করব আমরা, সকালে ফিউয়েল নিয়ে ফিরতি পথ ধরব। ...দেখা যাক স্ত্রিপান খানিকটা ভোদকা রেখেছে কি না।’ ঘুমন্ত ড্রাইভারের কাঁধ ধরে ঝাঁকালেন তিনি।

পাহাড়ি এলাকা। দ্রুত নামল রাত। শুরু হলো হিম হাওয়া। হাড় কাঁপিয়ে দিল সবার। সার্ভে টিম ক্যানভাসের তাঁবুর সামনে মস্ত আগুন জ্বালল। সবাই ওটার ধারে বসল। ক্যান থেকে স্টু ও ভাত বের করা হলো। গরম করে বেড়ে নেয়া হলো। এ-ই রাতের খাবার। বিস্মাদ খাবার শেষ করে তাস খেলতে বসল সবাই, সঙ্গে রয়েছে ভোদকা ও সিগারেট। খুচরো পয়সা দিয়ে জুয়া শুরু হলো। কিন্তু কিছুক্ষণ পর খেলার দান বাড়িয়ে দেয়া হলো।

খেলা চলছে। একটু পর সার্গোভ বললেন, ‘আমার হাতে রানিং।’ টাকাগুলো জিতে নিলেন। তাঁর চোখ দুটো ঢুলু ঢুলু, থুতনি বেয়ে নামল এক ফোঁটা ভোদকা। প্রচুর গিলেছেন। কিছুক্ষণ হলো নিজেই নিজের প্রশংসা করছেন।

‘চালিয়ে যান, এভাবে জিতলে ব্ল্যাক সি’র তীরে ডাচা কিনে নিতে পারবেন,’ উৎসাহ দিল একজন, হাসছে।

আরেকজন হেসে উঠল, ‘ডাচা না হোক, ক্যাসপিয়ান সি’র তীরে কালো একজোড়া ডাশাও তো মিলবে?’

‘আমি অনেক হেরেছি, এবার উঠব,’ বলল ইগোরভ। খেয়াল করেছে, এরইমধ্যে এক শ’ রুবল উধাও। ‘স্লিপিং ব্যাগে ঢুকে ভাবব কোন্ কৌশলে চুরি করেন সার্গোভ।’

টলতে টলতে উঠে পড়ল সে। সবাই হাসাহাসি করছে দেখেও দেখল না। একবার তাঁবু দেখল, কিন্তু ওদিকে না গিয়ে থাম্পার ট্রাকের পাশে চলে গেল। হালকা হচ্ছে। প্রস্রাব শুরু করে তাল সামলাতে পারল না, খেয়াল করেনি পাশে খাদ—পিছলে গিয়ে পড়ল ছ’ ফুট নীচে। বড় একটা পাথরে ঠুকে গেল মাথা। সঙ্গে সঙ্গে অবশ হয়ে গেল দেহ। কয়েক মিনিট চুপ করে পড়ে থাকল ইগোরভ, মাথার ব্যথা কমতে টের পেল ডান হাঁটু চিনচিন করছে। বিড়বিড় করে নিজেকে অভিশাপ দিল—ব্যাটা সাবধান থাকতে পারিস্ না! আস্তে করে উঠে বসল, তখনই শুনতে পেল রূপ-রূপ আওয়াজ। দ্রুত এগিয়ে আসছে। ঘোড়ার খুর। বেশ কয়েকটা। হামাগুড়ি দেয়ার ভঙ্গিতে ঢাল বেয়ে উঠতে শুরু করল ইগোরভ, চোখদুটো কিনারা পেরতেই থাম্পার ট্রাক ও ক্যাম্প-ফায়ার দেখল। তার সঙ্গীরা চুপ হয়ে গেছে।

আঁধার চিরে বেরিয়ে এসেছে ছয়জন অশ্বারোহী, তাঁবুর সামনে থামল। ইগোরভ চোখদুটো কচলে নিল, ভাবছে ভুল দেখছে কি না। আগুনের আভা পড়ছে লোকগুলোর উপর। সবাই যেন প্রাচীন ইতিহাসের বই থেকে বেরিয়ে এসেছে। পরনে কমলা রঙের সিল্কের টিউনিক। গোড়ালি পর্যন্ত নেমেছে ওটা, প্রায় ঢেকে দিয়েছে ঢোলা পাতলুন। পাতলুন আবার গুঁজেছে ভারী চামড়ার বুটের ভিতর। মধ্যযুগীয় পোশাক। কোমরে পাকিয়ে বাঁধা ফিতা থেকে ঝুলছে তলোয়ারের দীর্ঘ খাপ। পিঠে তুন, কাঁধে ধনুক। তীরের গোড়া ঘিরে রেখেছে পাখির পালক। লোকগুলো ধাতব টুপি দিয়ে মাথা ঢেকেছে, পিছনে খাটো একটা দণ্ড, ওটা থেকে ঝুলছে ঘোড়ার লেজ দিয়ে তৈরি বেণি। আগুন নিয়ে খেলা-১

প্রত্যেকে চিকন গৌফ রেখেছে, ওগুলো খুতনি পেরিয়ে নেমেছে।
লোকগুলোকে অশুভ মনে হলো ইগোরভের।

হঠাৎ একইসঙ্গে থেমেছে তারা, ঋজু হয়ে বসে আছে জিনের
উপর।

আগুনের ধার থেকে উঠে দাঁড়ালেন সার্গোভ, প্রায় এক
বোতল ভোদকা শেষ করেছেন। ডান হাত তুলে বোতল
দেখালেন। ‘আপনাদের ঘোড়াগুলো দারুণ! আসুন! ভোদকা
চলবে? এসে বসে পড়ুন।’

জবাব দিল না কেউ। ইঞ্জিনিয়ারকে ঠাণ্ডা চোখে দেখছে
লোকগুলো। তারপর তাদের একজন আচমকা এক হাত পাশে
সরিয়ে নিল, যেন বিদ্যুৎদ্বিগে নড়ল হাতটা। ইগোরভ কয়েক
সেকেণ্ড পর বুঝল লোকটার হাতে তীর-ধনুক! ছিলা টেনে ছেড়ে
দিল সে, ছুটল কাঠের তীর! চোখ দিয়ে ওটার গতি-পথ অনুসরণ
করা গেল না, ইগোরভ শুধু বুঝল বোতলটা সার্গোভের হাত
থেকে নীচে পড়েছে। হাজার টুকরো হলো ওটা। এক পা পিছিয়ে
গেলেন সার্গোভ, বামহাতে গলা চেপে ধরলেন। আঙুলগুলো শক্ত
করে ধরেছে তীরের শাফট। প্রৌঢ় ইঞ্জিনিয়ার হাঁটু গেড়ে
বসলেন, গলা চিরে বেরিয়ে এল গোঙানি। মাত্র কয়েক মুহূর্ত,
তারপর কাত হয়ে পড়ে গেলেন, তাজা রক্ত গড়িয়ে নামছে গলা
বেয়ে। আগুনের আভায় দেখা যাচ্ছে স্পষ্ট।

তিন রাশান লাফ দিয়ে উঠে দাঁড়াল, চমকে গেছে। কিন্তু
কিছু করবার আগেই আক্রমণ করল মঙ্গোলরা। যন্ত্রের মত হাত
নাড়ছে তারা, প্রত্যেকে বারোটা করে তীর ছুঁড়ল। রাশানদের
বুকে গাঁথল ওগুলো। মাত্র চার সেকেণ্ড পর থামল মঙ্গোলরা।
ততক্ষণে রাশানরা লুটিয়ে পড়েছে। কয়েকবার গোঙাল তারা,
তারপর মারা গেল। তীরন্দাজরা একবার দেখল লাশগুলো,
তারপর কাঁধে ঝুলিয়ে নিল ধনুক।

খাদের ভিতর থেকে দেখছে ইগোরভ। চোখদুটো

বিস্ফারিত। ভয়ে সর্বশরীর কাঁপতে শুরু করেছে, গলা দিয়ে গোঙানি বেরিয়ে আসতে চাইল—এক হাতে নিজের মুখ চেপে ধরল। বুকের ভিতর ধূপধাপ করে লাফাচ্ছে হৃৎপিণ্ড। ভিতর থেকে নির্দেশ এল, দৌড়াও ইগোরভ, পালাও! খাদে নেমে এল ইগোরভ, দৌড়াতে শুরু করল। জীবনে কখনও এত জোরে দৌড়ায়নি। হাঁটুতে ব্যথা নেই, রক্তে অ্যালকোহল নেই, কিছুই নেই... শুধু আছে নিখাদ আতঙ্ক! খাদের ভিতর দৌড়ে চলেছে ইগোরভ, ঢাল বেয়ে নামছে, জানে না অন্ধকারে কোনও বাধা-বিপত্তি আছে কি না। কয়েকবার আছাড় খেল, হাত-পা কেটে গেল। প্রতিবার টলতে টলতে উঠল, আবারও দৌড়াতে শুরু করল। ধড়ফড় করছে হৃৎপিণ্ড, ফুসফুস ফেটে যেতে চাইল। বারবার মন বলল, ওই বুঝি খুরের আওয়াজ! ওরা তেড়ে আসছে! কিন্তু এল না তারা।

দুই ঘণ্টা একটানা ছুটল ইগোরভ, জানে না টলতে টলতে চলেছে। তারপর এক সময়ে সেলেনগা নদীর তীরে পৌঁছল, সামনে পড়ল বড় দুটো বোল্ডার। মাঝখানে গুহামত জায়গা দেখে ঢুকে পড়ল সে, এক কিনার ধরে শুয়ে পড়ল। ভয়ঙ্কর দুঃস্বপ্ন থেকে উদ্ধার করল তাকে জ্বরের ঘোর। তারপর নিজের অজান্তেই ঘুমিয়ে পড়ল সে।

সতেরো

এবড়োখেবড়ো পথটা কোথায় গেছে? প্যানেল ট্রাকটা চলেছে কোথায়? প্রতি মুহূর্তে ঝাঁকি লাগছে। শরীরের হাড়গুলো ঝনঝন

করছে গ্রেসির, ব্যথায় মেরুদণ্ড টনটন করছে। বামপাশের খটখটে বেঞ্চিতে বসানো হয়েছে ওকে, হাত-পা বাঁধা। মুখে গৌজা রয়েছে রুমাল। ডানদিকের বেঞ্চে কঠোর চেহারার দুই প্রহরী। গ্রেসির পাশে বসেছেন বিল উইলসন ও এডি গ্রিন। তাতে স্বস্তি পাওয়ার কোনও কারণ নেই, তারাও বন্দি।

মাংসপেশি আড়ষ্ট হয়ে গেছে, সারাশরীর ভেঙে আসছে। ভীষণ খিদে লেগেছে। বৈকাল হুদে যা ঘটল, সেটা নিয়ে ভাবছে গ্রেসি। জাহাজের কেবিনে ঘুমিয়ে ছিল, হঠাৎ ঘুম ভেঙে গেল কপালে খোঁচা খেয়ে। পাশের বিছানা থেকে উঠে এসেছে বলোমার্স, কপালে ঠেসে ধরেছে পিস্তল। কেবিন থেকে পিস্তলের মুখে নামতে হলো গিয়ে ডিঙি নৌকায়। ততক্ষণে বিল উইলসন, পাভেল রেদোরভ আর এডিকে ওখানে নিয়ে আসা হয়েছে। ওদের চারজনকে নিয়ে গিয়ে তোলা হলো কালো রঙের সেই ফ্রেইটারে। রেদোরভকে সরিয়ে নেওয়া হলো।

ডেকের মেঝেতে কিছুক্ষণ বসিয়ে রাখল ওদের, তারপর আবারও জাহাজ থেকে নামিয়ে নিল, তুলল এই প্যানেল ট্রাকে। ডকে দু'ঘণ্টা বসে থাকল ওরা, তারপর কাছেই গোলাগুলি শুরু হলো, জাহাজে হৈ-চৈ চলল বেশ কিছুক্ষণ, তারপর হঠাৎ ট্রাকের ইঞ্জিন চালু হলো।

তিক্ত মনে রেদোরভের কথা ভাবল গ্রেসি। রাশান বিজ্ঞানীর ভাগ্যে কী ঘটল কে জানে! ওদের সামনে থেকে নিয়ে গেছে তাঁকে। হাসিখুশি মানুষটাকে বোধহয় জাহাজের অন্য কোথাও নিল। মেরেই ফেলল নাকি! দ্যানিয়ারই বা কী ঘটল? ওরা যখন চলে আসতে বাধ্য হলো, তখন ডুবছিল জাহাজ। খাঁটি অন্তরের ববি মুরল্যাণ্ড, সিংহ হৃদয় মাসুদ রানা, জুরা—সবাই ডুবে মরল?

আবছা আলোয় প্যানেল ট্রাকের চারপাশ দেখল গ্রেসি। বুঝতে চাইছে কেন ওদের কিডন্যাপ করা হলো। কোনও কারণ খুঁজে পেল না। ভয় লাগছে ওর, মন বলছে যে কাজে নেয়া হচ্ছে

সেটা শেষ হলেই ওদের মেরে ফেলা হবে। মনের গভীরে ডুব দেবে না, ঠিক করল থ্রেসি। বেচারী এডি ও উইলসনের দিকে চাইল। ব্যথায় মুখ কুঁচকে রেখেছেন উইলসন। কালো ফ্রেইটার থেকে নামবার সময় তাঁকে ধাক্কা মেরে ফেলে দেয়া হয়েছিল, বাজে ভাবে বাম গোড়ালি মচকেছেন, বোধহয় হাড়ো ফ্র্যাকচার হয়েছে। মেঝেতে পা রাখছেন না, বাম পা বুকের কাছে টেনে নিয়ে জোড়া হাতে ধরে রয়েছেন। আহত বলেই তাঁর পা দুটো বাঁধা হয়নি।

বসেই ঘুমিয়ে পড়েছে এডি। শার্টের বুকের কাছে কয়েক ছোপ শুকনো রক্ত। উইলসন পড়ে যেতেই তুলতে গিয়েছিল এডি, পাশ থেকে কারবাইনের বাঁট চালিয়েছে এক প্রহরী। কপালটা ছেঁচে গেছে। পনেরো মিনিট পর জ্ঞান ফিরেছে এডির। তার আগেই অচেতন দেহটা ট্রাকের মেঝেতে ছুঁড়ে ফেলা হয়েছে। ওদের দুজনকে ট্রাকে তুলে বেঁধেছে। দু'ঘণ্টা পর রওনা হয়েছে ট্রাক। কোথায় কে জানে!

চোখ বুজে ঘুমিয়ে পড়তে চাইল থ্রেসি, তাতে যদি এই দুঃস্বপ্ন থেকে পরিত্রাণ পাওয়া যায়! পারল না। পাঁচ ঘণ্টা একটানা চলল ট্রাক, তারপর আন্দাজ করল কোনও শহরে ঢুকেছে। খানিক পর পর থামল ট্রাক, চারপাশ থেকে গাড়ির ইঞ্জিনের আওয়াজ পাওয়া গেল। এরপর সিগন্যালের বাতির বাধা আর থাকল না, শহর থেকে বেরিয়ে গতি বাড়াল ট্রাক, দুলতে দুলতে চলল আঁকাবাঁকা কাঁচা সড়ক ধরে। পাঁচ ঘণ্টা পর গতি কমাল ট্রাক। দুই প্রহরী সতর্ক হয়ে উঠল, সবার মুখ থেকে রুমাল বের করে নিল। থ্রেসি বুঝল, ওরা গন্তব্যে পৌঁছে গেছে প্রায়।

‘এটার মধ্যে যতক্ষণ রাখল, প্লেন হলে তার দশ ভাগের এক ভাগ সময়ে পৌঁছে যেতাম,’ মুখ কুঁচকে বললেন উইলসন। পরমুহূর্তে বড়সড় গর্তে পড়ল ট্রাকের চাকা, বেঞ্চ থেকে ছিটকে আগুন নিয়ে খেলা-১

পড়তে গিয়েও সামলে নিল সবাই।

উইলসন সাহস হারাননি, তাঁর দিকে চেয়ে মৃদু হাসল থ্রেসি তবে বলল না কিছু। ট্রাক আরেকবার ঝাঁকি খেয়ে থমকে গেল, ডিজেল ইঞ্জিনের খ্যার-খ্যার আওয়াজটা বন্ধ হলো। খট-খটাং শব্দে পিছন দরজা খুলে গেল। ভিতরে ঝাঁপিয়ে পড়ল উজ্জ্বল সোনালী সূর্যালোক। এক প্রহরী কারবাইন তাক করল বন্দিদের দিকে, অন্যজন খুলে দিল হাত-পায়ের বাঁধন। মাথা কাত করে নামতে বলল। উইলসনকে দু'পাশ থেকে ধরল এডি ও থ্রেসি, সাবধানে নামিয়ে আনল মাটিতে।

ওরা রয়েছে প্রকাণ্ড এক বৃত্তাকার কম্পাউণ্ডে, চারপাশ উঁচু দেয়াল দিয়ে ঘেরা। অনেক দূরত্ব রেখে ডানে-বামে দুটো বিশাল দালান—যেন আলাদা দুই সময়কে ধারণ করছে। ঝকঝকে নীল আকাশে এক ফোঁটা মেঘ নেই, আবহাওয়া বৈকাল হ্রদের চেয়ে অনেক উষ্ণ, ঝিরিঝরি হাওয়া দক্ষিণ থেকে বইছে। বাতাস শুকনো, তাতে ধুলোর গন্ধ পেল থ্রেসি। উঁচু এই জমি থেকে পুবে ও দক্ষিণে বহু দূর দেখা যায়, প্রাচীরের নীচ থেকে শুরু হয়েছে ঘেসো উপত্যকা, ঢেউ খেলে মিশেছে গিয়ে দিগন্তে। কমপ্লেক্সের বামে রয়েছে ধূসর-সবুজ এক পাহাড়-চূড়া। ওই পাহাড় কেটেই বের করা হয়েছে গোটা কম্পাউণ্ড। পাহাড়ে ঘন হয়ে জন্মেছে দীর্ঘ পাইন গাছ ও প্রচুর ঝোপঝাড়।

ডানে হেজ ঝাড় দিয়ে তৈরি দীর্ঘ দেয়াল, তার ওপাশে রয়েছে দোতলা লাল ইঁটের দালান। আধুনিক ইঞ্জিনিয়ারাল পার্কের কথা মনে পড়িয়ে দেয়। তবে দালানের এক পাশে দেখা গেল একটা আস্তাবল, একদম বেমানান। বড় একটা কোরালে ঘুরছে ছ'সাতটা তাগড়া ঘোড়া, ধুলো-ভরা জমিতে জন্মানো খোঁচা-খোঁচা ঘাসগুলো ছিঁড়ে চোয়ালে পুরছে। দালানের আরেক প্রান্তে স্টিল দিয়ে তৈরি বিশাল গেট। গ্যারাজের ভিতর অনেকগুলো ট্রাক। এখানে ওখানে মেকানিকাল ইকুইপমেন্ট।

গ্যারাজের ভিতর কাজ করছে কালো জাম্পসুট পরা জনাকয়েক মেকানিক, ধুলো ভরা মাটি খোঁড়ার যন্ত্রগুলোর মেরামত চলছে।

‘আমি তো জানতাম তাজমহল ভারত বর্ষে,’ বলল এডি।

‘কে জানে, আমরা হয়তো সত্যি ভারতেই এসে হাজির হয়েছি,’ গাল কুঁচকালেন উইলসন।

বামে ঘুরে চাইল গ্রেসি, সঙ্গে সঙ্গে এডির কথা মেনে নিল—সত্যিই, এই স্থাপত্যের সঙ্গে তাজমহলের অনেক মিল। তবে এটা কিছুটা ছোট। প্রধান গম্বুজটা সবুজ মার্বেল দিয়ে তৈরি। এর সঙ্গে ডানদিকের ইগুস্ট্রিয়াল দালানের ক্রোনও তুলনাই হয় না। জাত শিল্পীরা বহু সময় দিয়ে সযত্নে এই স্থাপত্য নির্মাণ করেছে। চারপাশের সবকিছুতে নাটকীয়তা, স্বপ্নময়তার ছাপ। সামনে ধবধবে শ্বেত-মর্মরের কলামগুলো ছ’ফুট পরপর, মাঝখানে গোলাকার এক পোর্টিকো, ওখান দিয়ে ঢুকতে হয় প্রাসাদে। শ্বেত-মর্মরের ছাত বৈদ্যুতিক বালবের মত ফুলে নেমে এসেছে সিংহ কবাটের উপর। ছাত ফুঁড়ে অনেকখানি উঠেছে সোনালি এক তীক্ষ্ণ দণ্ড। সব মিলে তাজমহলের খানিক এদিক-ওদিক, কিন্তু জিনিস একই। সবুজ গম্বুজটা গ্রেসিকে পেস্তা আইসক্রিমের স্কুপের কথা মনে করিয়ে দিল, ওটা যেন স্বর্গ থেকে পড়েছে ওর তৃষ্ণা মেটাতে।

কাছেই নদীর কলধ্বনি শুনতে পেল। পাথর বাঁধানো দুটো নালা দু’পাশ দিয়ে বড়সড় এক আয়তাকার সরোবরে গিয়ে পড়েছে। সেখানে টলটলে পানি, মাঝখানে বলমল করছে রাজকীয় ভবনের প্রতিবিম্ব। নালা দুটো আবার সরোবর থেকে বেরিয়ে ভবনের ভিতর ঢুকেছে। চারদিকে অপূর্ব বাগিচা, তাতে হাজারো গাছে লক্ষ-কোটি ফুল। এখানে ওখানে শ্বেত-পাথরের ফোয়ারা। চারপাশ দেখে মুগ্ধ হলো গ্রেসি। তবে তা মুহূর্তের জন্য। বাগানের ওপাশে ভবনের সামনে বলোর্ম্যা ও সাশা! তাদের পাশে দাঁড়িয়ে আছে এক লোক, কোমরে হোলস্টার।

আগুন নিয়ে খেলা-১

মাথা দোলাল সে, তারপর বাগান পেরিয়ে হনহন করে আসতে লাগল। ট্রাকের পিছনে এসে কৰ্কশ স্বরে বলল, 'এদিকে চলুন।' ইংরেজি বলছে, কিন্তু উচ্চারণ এত বিকৃত যে বুঝতে কষ্ট হলো।

এডি ও উইলসনের পিছনে অবস্থান নিয়েছে দুই প্রহরী। কড়া স্বরে নির্দেশ দিল তারাও। প্রকাণ্ড ভবনের দিকে পা না বাড়িয়ে উপায় থাকল না। পোর্টিকোর দিকে চলেছে ওরা, সেখানে কারুকার্যময় মস্ত এক দরজা। স্যাভয় হোটেলের ফটকে যেমন দু'পাশে দু'জন প্রহরী থাকে, ওখানেও তেমনি দু'জন দাঁড়িয়ে: পরনে কমলা রঙের এমব্রয়ডারি করা দীর্ঘ সিল্ক কোট। লোকদুজন তীক্ষ্ণ বল্লম হাতে পাথরের মূর্তির মত দাঁড়িয়ে থাকল, দরজা খুলে দিল না।

থ্রেসিদের পাশ থেকে এক প্রহরী দরজা খুলল, ইশারায় প্রশস্ত ফয়েই দেখাল। ঢুকল ওরা। গম্বুজটা কাছ থেকে প্রকাণ্ড লাগল। চারপাশের দেয়ালে ঝুলছে দানবাকৃতির শিল্পচিত্র, নানারঙা মাঠে চরছে ঘোড়ার পাল। এইমাত্র পিছন-দরজা পেরিয়ে ঢুকেছে এক খাটো হাউসকিপার, হলদেটে ক্ষয়া দাঁত বের করে ডানদিকে যেতে বলল। শ্বেত মার্বেলের উপর দিয়ে নিঃশব্দে এগোল সবাই, কিছুক্ষণ হেঁটে চলে এল একটা হলওয়াতে। আরেকটু এগোতে সামনে পড়ল পাশাপাশি কয়েকটা কামরা। থ্রেসি, উইলসন ও এডিকে একে একে ঢোকানো হলো আলাদা তিনটে ঘরে। বাইরে থেকে বল্টু আটকানোর শব্দ পেল ওরা।

দরজা বন্ধ হতেই চারপাশ দেখল থ্রেসি। বড়সড় কামরা। সাজানো গোছানো। মেঝেতে পুরু কার্পেট বিছানো। মাঝখানে ডাবল বেড, পাশে সাইড টেবিলে ধোঁয়া ওঠা সুপ ও প্লেটে পাউরুটি। বামদিকের দেয়ালে মস্ত চেস্ট অভ ড্রয়ার্স। ডানদিকের দেয়াল ঘেঁষে রিডিং টেবিল ও তিনটে চেয়ার। অ্যাটাচড বাথরুমে ঢুকল থ্রেসি, প্রতিটি ফিটিংস বিলাসবহুল।

মুখ-হাত ধুয়ে নিল, ফিরে এসে বসল সাইড টেবিলে, সুপ ও পাউরুটিকে মনে হলো অমৃত। খিদে মিটেই ক্লান্তিতে বুজে এল চোখ, শুয়ে পড়ল নরম বিছানায়। এক পলকে তলিয়ে গেল গভীর ঘুমে।

তিন ঘণ্টা পর দরজায় জোর টোকার আওয়াজ হলো। ঘুম ভেঙে গেল গ্রেসির।

‘আমার সঙ্গে আসুন,’ দরজা খুলে দাঁড়িয়েছে খাটো হাউসকিপার, গ্রেসিকে শুয়ে থাকতে দেখে চোঁট চাটল, চোখে নগ্ন লালসা।

চট করে উঠে বসল গ্রেসি, নেমে পড়ল খাট ছেড়ে। উইলসন ও এডি অপেক্ষা করছে হলওয়াটে। উইলসনের পা ব্যাণ্ডেজে মোড়ানো, একটা কালো লাঠিতে ভর দিয়ে দাঁড়িয়েছেন। এডির কপালে ব্যাণ্ডেজ, পরনে এখন ঢোলা সুতির পুলোভার।

‘আপনারা আগের চেয়ে সুস্থ?’ জানতে চাইল গ্রেসি।

‘খুন করার আগে শুশ্রূষা করছে,’ বলল এডি।

‘নতুন করে মারধর করছে না,’ খেতেও দিয়েছে, এটুকু বলা যায়,’ মেঝেতে লাঠি ঠুকলেন উইলসন।

পথ দেখাল হাউসকিপার, গম্বুজওয়ালা ফয়েই-তে হাজির হলো ওরা। বামের চওড়া হলওয়াটে ধরে মস্ত এক কক্ষে নিয়ে যাওয়া হলো। বুক শেল্ফগুলো চারদেয়াল প্রায় ঢেকে দিয়েছে, তাতে থরে থরে সাজানো চামড়া দিয়ে মোড়ানো পুরু বই। এক কোনা জুড়ে বিরাট এক ফায়ারপ্লেস, পাশে বার। দরজা পেরিয়ে চমকে উঠল গ্রেসি, উপরের দেয়াল থেকে নেমে আসছে প্রকাণ্ড এক কালো ভালুক! দু খাবায় ভীষ্ম নখর, আক্রমণের ভঙ্গিতে দাঁতগুলো খিঁচিয়ে রেখেছে। চট করে চারপাশের দেয়াল দেখল গ্রেসি, এ ঘর যেন ট্যান্ড্রিয়ারমিস্টদের স্বর্গ! ঘরের প্রতি কোণে স্টাফ করা সাইবেরিয়ান সাদাবাঘ, হরিণ, বিগহর্ন ভেড়া, নেকড়ে আগুন নিয়ে খেলা-১

ও শেয়াল—দাঁত খিঁচিয়ে রয়েছে দর্শকদের দিকে, টকটকে লাল চোখে অশুভ দৃষ্টি। ঘরের মাঝখানে বলোর্মার পাশে যে-লোক দাঁড়িয়ে, সে-ও যেন দেয়াল ছেড়ে নেমে এসেছে—চেহারাটা ভয়ঙ্কর হিংস্র!

লোকটার হাসি দেখে গায়ে কাঁটা দিল থ্রেসির। চোখা দাঁতগুলো হাঙরের দাঁতের মত ত্রিকোণ, যেন কাঁচা মাংস খুবলে নেবে। চেহারা থেকে ছিটকে পড়ছে ক্ষমতার দাপট। উচ্চতা ও গঠন মাঝারি, তবে পেশিগুলো দড়ির মত পাকানো। দীর্ঘ কালো চুলগুলো পিঠের উপর বিছানো। ওই চেহারা মঙ্গোল নারীদের কাছে আকর্ষণীয় মনে হবে, চোয়ালের হাড় উঁচু, কাঠ-বাদামের মত চোখে অদ্ভুত সোনালী-বাদামী আভা। একসময় বহুদিন কাজ করেছে সূর্যের নীচে, ফলে চোখের কোণ কুঁচকে গেছে। পরনে এখন ধূসররঙা, নিপাট সুট—অতীতের তিক্ত সময়গুলো পেরিয়ে এসেছে লোকটা।

‘ঠিক সময়ে এসেছেন,’ চাঁছাছোলা স্বরে বলল বলোর্মার। ‘পরিচয় করিয়ে দিই, ইনি জালাইর তেমুজিন, বরজিন অয়েল কনসোর্টিয়ামের প্রেসিডেন্ট।’

‘পরিচিত হতে পেরে খুশি হলাম,’ খোঁড়াতে খোঁড়াতে এগিয়ে গেলেন উইলসন, লোকটার বাড়ানো হাত ধরলেন। থ্রেসির মনে হলো, বহুদিন পর বন্ধুর দেখা পেয়ে উনি খুশি। ‘বলবেন আমরা এসেছি কোথায়, আর এখানেই বা কি করছি?’ মিষ্টি করে জানতে চাইছেন, কিন্তু গায়ের জোরে হাতটা পিষলেন।

ব্যথা পেয়ে চমকে গেছে মঙ্গোলিয়ান, জবাব দেবার আগে চট করে হাত টেনে নিল। ‘আপনারা আছেন আমার বাড়িতে, এন্টারপ্রাইজের হেডকোয়ার্টার এখানে।’

‘মঙ্গোলিয়া?’ জানতে চাইল এডি।

জবাব দিল না মঙ্গোল, বলল, ‘সাইবেরিয়া থেকে চটজলদি

আপনাদের নিয়ে আসতে হয়েছে, সেজন্য আমি দুঃখিত। বলোর্মার কাছে গুনেছি আপনারা ওখানে ভয়ঙ্কর বিপদে পড়তেন।’

‘তা-ই?’ বলল গ্রেসি। আড়চোখে প্রাক্তন কেবিন-মেটের দিকে চাইল।

‘আপনাদের নিরাপত্তার জন্যই পিস্তলের মুখে ওখান থেকে সরিয়ে আনা হয়েছে,’ ব্যাখ্যা করল বলোর্মা। ‘বৈকাল হ্রদের র্যাডিক্যালরা অত্যন্ত বিপজ্জনক। ইন্সটিটিউটের জাহাজে উঠে পড়ে ওরা, ঘুমন্ত মানুষসহ জাহাজ ডুবিয়ে দেয়ার চেষ্টা করে। কপাল ভাল যে আমি টের পেয়ে যাই। কাছেই আমাদের লিজ নেয়া নৌযান ছিল, যোগাযোগ করায় ওটা আমাদের উদ্ধার করে। কাউকে সাবধান করব সে-সময় হাতে ছিল না, গোপনে জাহাজ ত্যাগ করি। নইলে সবার উপর হামলা আসত।’

‘আমি আগে কখনও শুনিনি বৈকাল হ্রদের পরিবেশবাদীরা এভাবে হামলা করে,’ বলল গ্রেসি।

‘ওটা তরুণ র্যাডিক্যালদের নতুন এক দল। বহুদিন হলো রাশান কর্তৃপক্ষ আইন-শৃঙ্খলা রক্ষার ব্যাপারে ঢিল দিয়েছে। সেই সুযোগে বিদ্রোহী হয়ে উঠেছে এরা, যা খুশি করে, সবার উপর অত্যাচার করছে।’

‘বিজ্ঞানী ডক্টর রেদোরভকে আমাদের সঙ্গে নেয়া হয়,’ বললেন উইলসন। ‘তাকে কোথায় নিয়ে যাওয়া হয়েছে?’

‘চাপাচাপি করছিলেন, জাহাজে ফিরে ইন্সটিটিউটের সবাইকে সাবধান করবেন। চলেই গেলেন। বলতে খারাপই লাগছে, তাঁকে আমরা নিরাপত্তা দিতে পারলাম না।’

‘মারা গেছেন? ...দ্যানিয়ার আর সবাই?’

‘নিজেদের নিরাপত্তার খাতিরে ওখান থেকে সরে আসি আমরা। রিসার্চ জাহাজ বা ডক্টর রেদোরভের ব্যাপারে আর কিছুই জানি না।’

আগুন নিয়ে খেলা-১

বলোমার কথা শুনে ফ্যাকাসে হয়ে গেল থ্রেসি। মরে গেছে ওরা! ববি... রানা... সবাই!

‘আমাদের এখানে এনেছেন কেন?’ জানতে চাইল এডি।

‘আমরা আপাতত আমাদের বৈকাল হ্রদের প্রজেক্ট বাতিল করছি। তবে এখানে সম্ভাবনাময় যেসব তেল-খনি রয়েছে, সেগুলো কতটা সমৃদ্ধ সেটা আপনারা আমাদের বলতে পারবেন। দেড় মাসের জন্য আপনাদের সঙ্গে একটা চুক্তি করব আমরা, ওই অনুযায়ী আরেকটা প্রজেক্ট হাতে নেবেন।’

‘আমাদের কোম্পানিকে জানানো হয়েছে?’ জানতে চাইল থ্রেসি। ওর মনে পড়ে গেল সেল ফোন রেখে এসেছে দ্যানিয়া জাহাজে। ‘সুপারভাইজারের সঙ্গে আলাপ করতে হবে আমার।’

‘খুবই দুঃখিত, কিন্তু আমাদের মাইক্রোওয়েভ ফোনের লাইন আপাতত ডাউন,’ বলল জালাইর। ‘নিশ্চয়ই বুঝতে পারছেন এসব দুর্গম এলাকায় এ সমস্যা প্রায়ই হয়। একটু ধৈর্য ধরুন, লাইন ঠিক হলে যেখানে খুশি কল দেবেন।’

‘আমাদের জন্তর মত ঘরে আটকে রাখছেন কেন?’ বলল থ্রেসি।

‘আমরা এখানে সেনসিটিভ রিসার্চ প্রজেক্ট নিয়ে কাজ করছি। দুঃখিত, কিন্তু বাইরের কেউ ফ্যাসিলিটি ঘুরে দেখবেন, তা আমরা হতে দিতে পারি না। তবে পরে কোনও এক সময়ে আপনাদের চারপাশ ঘুরিয়ে দেখাব।’

‘আর আমরা যদি এখনই চলে যেতে চাই?’ জানতে চাইল থ্রেসি।

‘আমার ড্রাইভার আপনাদের উলানবাটোরে পৌঁছে দেবে, ওখান থেকে প্লেন ধরে বাড়ি ফিরবেন,’ হাসল জালাইর তেমুজিন, বকবক করে উঠল তীক্ষ্ণধার দাঁতগুলো।

প্রচণ্ড শান্তি, ভেঙে আসছে দেহ, কিছুই ভাবতে চাইছে না থ্রেসি। ঠিক করল এই মুহূর্তে লোকটার ধৈর্যের পরীক্ষা নেয়া

ঠিক হবে না। ‘আমাদের কাছে ঠিক কী চান আপনি?’

টেবিল থেকে ইন্টারকমের রিসিভার তুলে নিল বলোর্মা, কী যেন বলল। এক মিনিট পর দরজা খুলে গেল, একটা ট্রলি ঠেলে ঢুকল এক পরিচারক। ট্রলিতে বেশ কয়েকটা ফোল্ডার ও তিনটে ল্যাপটপ কম্পিউটার। কম্পিউটারগুলো চলছে, স্ক্রিনে দেখা গেল জিওলজিকাল অ্যাসেসমেন্ট ও সাবসারফেস সাইসমিক প্রোফাইল।

আঙুল তুলে ট্রলি দেখাল জালাইর তেমুজিন। ‘নতুন এক জিওলজিকাল রিজিয়নে ড্রিলিং অপারেশন এক্সপ্যাণ্ড করছি আমরা। ফোল্ডার ও কম্পিউটারে যেসব ডেটা পাবেন, সেগুলো থেকে জমির অবস্থা বুঝবেন। আমাদের দরকার অপটিমাল ড্রিলিং লোকেশনগুলো।’ তার কথা শেষ, ডানদিকের দরজার দিকে চলল। পায়ে পায়ে চলেছে বলোর্মা। ঘর ছেড়ে চলে গেল দু’জন।

‘এক গাদা কাজ চেপে গেল,’ বিড়বিড় করে বলল এডি।

‘অতটা নয়, দেখে মনে হয় প্রফেশনালি ডেটা সংগ্রহ করা হয়েছে,’ বললেন উইলসন, এক হাতে সাবসারফেস ইসোপ্যাচ ম্যাপ তুলে ধরেছেন। জমির নীচের সেডিমেন্টারি লেয়ারগুলো দেখলেন।

‘ডেটা নয়, আমি ভাবছি এখান থেকে পালিয়ে যাওয়ার কথা,’ একটা ফাইল তুলে নিয়েও ঝপাত করে নামিয়ে রাখল এডি।

‘মিস্টার ভালুক, মাথা ঠাণ্ডা রাখো,’ ফিসফিস করে বললেন উইলসন, ঘরের এক কোণের দিকে মাথা কাত করলেন। ‘ক্যামেরা দিয়ে আমাদের দেখছে।’

চট করে ওদিকে চাইল এডি, স্টাফ করা এক রেইনডিয়ারের পাশে উঁকি দিচ্ছে খুদে এক ভিডিও ক্যামেরা।

মুখের সামনে মানচিত্র ধরে নিচু স্বরে বলে চলেছেন আগুন নিয়ে খেলা-১

উইলসন, 'বুদ্ধিমানের কাজ হবে ফাইলগুলো নাড়াচাড়া করা।'

ট্রলি থেকে এক ল্যাপটপ তুলে নিল এডি, টেবিলের উপর রেখে বসে পড়ল ওটার সামনে। মুখটা মনিটরের আড়ালে রেখে বলল, 'পিস্তলের মুখে ধরে এনে এখন গল্প শোনাচ্ছে। পরিস্থিতি ভাল লাগছে না আমার। মনে হচ্ছে এরা বধ্য উন্মাদ।'

'আমারও তা-ই ধারণা,' ফিসফিস করল গ্রেসি। 'বৈকাল হুদ থেকে আমাদের নিরাপদে সরিয়ে আনার কথাটা নির্জলা মিথ্যা।'

'কথা যখন উঠলই, আমি যখন দ্যানিয়া থেকে আসতে চাইলাম না, বলোম্যা পিস্তল বাগিয়ে বলল, ওর সঙ্গে না গেলে এক গুলিতে আমার বাম কান উড়িয়ে দেবে।' আস্তে করে বাম কানের লতি চুলকে নিলেন উইলসন। 'যে-মেয়ে উপকার করতে না দিলে কানই উড়িয়ে দিতে চায়, তার কথা বিশ্বাস করা খুব কঠিন!'

একটা টপোগ্রাফিকাল মানচিত্রের ভাঁজ খুলল গ্রেসি, উইলসনকে পার্বত্য এলাকার দিকে আঙুল তাক করে অর্থহীন কিছু দেখাল। বলল, 'ডক্টর রেদোরভের ব্যাপারটা ভেবেছেন? তাঁকে ভুল করে আমাদের সঙ্গে ধরে আনে। আমার মনে হয় তাঁকে খুন করেছে।'

'আমরা নিশ্চিত নই, তবে বোধহয় তা-ই করেছে,' বলল এডি। 'প্রশ্ন হচ্ছে আমাদের নিয়ে কী করবে। তথ্যগুলো পেয়ে গেলেই হয়তো...'

'এদের সবকিছু পাগলামি মনে হচ্ছে,' আস্তে করে মাথা নাড়ল গ্রেসি। 'তবে এটা বুঝতে পারছি, এখান থেকে বেরিয়ে যাওয়ার পথ খুঁজে বের করতে হবে।'

'আসার সময় ডানদিকে যে ইণ্ডাস্ট্রিয়াল বিল্ডিং দেখলাম, ওখানে বিরাট একটা গ্যারাজ আছে, ভিতরে অনেক রকমের গাড়ি,' বললেন উইলসন। 'আমরা যদি ওখান থেকে একটা ট্রাক চুরি করে বেরিয়ে পড়ি, পথ খুঁজে নিয়ে উলানবাটোরে পৌঁছতে

পারব।’

‘ঘরে আমাদের আটকে রাখবে, বাইরে নজরবন্দি,’ বলল এডি। ‘আমাদের তৈরি থাকতে হবে, যাতে প্রথম সুযোগে পালাতে পারি।’

‘এই পা নিয়ে দৌড়ানো অসম্ভব, দেয়ালও টপকাতে পারব না,’ আহত পা দেখলেন উইলসন। ‘আমাকে ছাড়াই পালানোর চেষ্টা করতে হবে আপনাদের।’

‘একটা বুদ্ধি এসেছে,’ বলল এডি। চোখদুটো ঘরের আরেক প্রান্তে এক ডেস্কের উপর স্থির। কয়েক সেকেন্ডেও ব্যস্ত হয়ে মানচিত্রগুলোর মধ্যে কলম খুঁজল, তারপর উঠে গিয়ে ডেস্ক ঘেঁষে দাঁড়াল। কলমদানী থেকে তুলে নিল একটা পেনসিল, সঙ্গে রূপালি লেটার ওপেনার। মুহূর্তে ওটা চলে গেল বাম আঙ্গিনে। এক মুহূর্ত দ্বিধা করল এডি, তারপর পেনসিল হাতে ফিরল টেবিলে, ধপ করে চেয়ারে বসে কী যেন আঁকার ভঙ্গি করল। ফিসফিস করে বলল, ‘আজ রাতে। থ্রেসিকে নিয়ে চারপাশ ঘুরে দেখব। আশা করি পালানোর কোন পথ খুঁজে পাব। আগামী রাতে বেরিয়ে পড়ব। সঙ্গে থাকবে এক পঙ্গু লোক।’ উইলসনের দিকে চেয়ে হাসল এডি।

‘খোঁড়া লোকটা খুশি মনে যাবে,’ মৃদু হাসলেন উইলসন।

আঠারো

হাত-ঘড়ির অ্যালার্ম বাজতে উঠে বসল এডি। রাত দুটো। দ্রুত পোশাক পরে নিল। ম্যাট্রেসের তলা থেকে বের করল লেটার আগুন নিয়ে খেলা-১

ওপেনার, গাড় অন্ধকারে দরজার সামনে হাজির হলো। চৌকাঠ হাতড়ে দেখল, কবাটের ডানদিকে তিন জায়গা খানিকটা উঁচু, ওখানে ধাতব কজা। লেটার ওপেনার দিয়ে উপর কজার মাথা খোঁচাতে শুরু করল, কিছুক্ষণ কসরত করতেই ধাতব পিন আলগা হলো। ওটাই কজার তিনটি অংশ ধরে রেখেছে। এবার সহজেই বেরিয়ে এল পিন। পরবর্তী পনেরো মিনিটে অন্য দুই কজার পিন ঘায়েল হলো। ধীরে ধীরে কবাট সরিয়ে নিতে চাইল এডি, একটু পিছাতেই ঘটানু করে আওয়াজ হলো—উল্টোদিকের চৌকাঠ থেকে বেরিয়ে এসেছে ডেড বোল্ট। পাশ ফিরল এডি, হলওয়েতে বেরিয়ে এল, সাবধানে চৌকাঠের সঙ্গে বসিয়ে দিল কবাট। গর্তের মধ্যে মজবুত বোল্ট গেঁথে যেতেই মনে হলো দরজা যেমন বন্ধ ছিল, তেমনি চিরকাল বন্ধই থাকবে। কেউ মনোযোগ দিয়ে খেয়াল না করলে বুঝবে না।

হলওয়ে ফাঁকা পড়ে আছে। বামের ঘরটা গ্রেসির। পা টিপে দরজার সামনে পৌঁছে গেল এডি। নিঃশব্দে বোল্ট খুলল, আস্তে দরজা ঠেলতেই সরে গেল। বিছানায় বসে আছে গ্রেসি। হলওয়ের বাতিতে এডিকে দেখে ফিসফিস করে বলল, ‘কাজের কাজ করেছ, এডি!’

আকর্ণ হেসে মাথা কাত করল এডি, অনুসরণ করতে বলছে। করিডোরে বেরিয়ে এল গ্রেসি, পা টিপে মেইন ফয়েই-র দিকে রওনা হলো দু’জন। করিডোরে খানিকটা পরপর লো ওয়াটের বাতি জ্বলছে। কোথাও কেউ নেই, থমথম করছে চারপাশ। গ্রেসির জুতোর রাবারের সোল মার্বেল পাথরে ঘষা লেগে কিঁচকিঁচ আওয়াজ তুলছে। থামল গ্রেসি, জুতো খুলে মোজা পায়ে এগোল।

স্ফটিকের বিশাল এক ঝাড়-বাতি ফয়েই আলোকিত করেছে। করিডোর থেকে বেরিয়ে সাবধানে এগোল এডি ও গ্রেসি, বামদিকের দেয়াল ঘেঁষে চলেছে। খানিকটা দূরে সর

জানালা। প্রায় উবু হয়ে ওটার কাছে চলে গেল এডি, ডানদিকটা দেখল। ওখানে সিংহ দরজা। দ্রুত পিছিয়ে এল, থ্রেসির দিকে চেয়ে এপাশ-ওপাশ মাথা নাড়ল। গভীর এ রাতেও বাইরের দুই প্রহরী কাঠের মূর্তির মত দাঁড়িয়ে। কখনও নড়েচড়ে কি না কে জানে! অন্য কোনও পথ খুঁজতে হবে।

এডি তাগাদা দিতেই দ্রুতপায়ে ফয়েই পেরুল থ্রেসি। একটু এগোতেই ডানে পড়ল চওড়া সেই করিডোর। ডানদিকে একের পর এক ঘর, দরজা বন্ধ। দালানের মালিক বোধহয় ওগুলো ব্যবহার করে। বামে পড়ল ট্যাক্সিডারমিস্টদের স্বর্গ সেই বিরাট ঘর। কিছুক্ষণ হাঁটবার পর করিডোর শেষ হলো, সামনে পড়ল ভবনের সত্যিকার স্টাডি রুম। কত লক্ষ বই থাকতে পারে ভেবে বিস্মিত হলো থ্রেসি। মস্ত এ ঘরে পুরানো এক গ্র্যাণ্ডফাদার ক্লক টক-টক করছে, আর কোনও শব্দ নেই। সারি সারি বুক শেলফ পেরিয়ে এক পিছন দরজা পাওয়া গেল, খোলা। সামনে ডাইনিং হল, ওটা পেরিয়ে দু'পাশে ছোট দুটো কনফারেন্স রুম—ওগুলো সং ও জিন ডাইন্যাস্টির অ্যাণ্টিক দিয়ে অদ্ভুত সুন্দর ভাবে সাজানো। ভিতরে ঢুকল না ওরা। বারবার ছাত ও দেয়াল দেখছে থ্রেসি, এখন পর্যন্ত কোনও ভিডিও ক্যামেরা চোখে পড়েনি। ইঠাৎ কানের কাছে ফিসফিস শুনে চমকে গেল, অজান্তে এডির বাম বাহু খামচে ধরল। মাংসপেশিতে ধারাল নখ গাঁথতেই মুখ কুঁচকে ফেলল এডি, চট করে চারপাশ দেখল।

ওই আওয়াজ কীসের?

কয়েক মুহূর্ত পর বুঝল ওরা, বাইরে দামাল হাওয়া বইছে। লজ্জা পেয়ে হাত সরিয়ে নিল থ্রেসি।

ছোট্ট এক করিডোর পেরিয়ে খোলামেলা এক সিটিং রুমে ঢুকল ওরা। মেঝে থেকে ছাত পর্যন্ত তিনদিকে বিশাল উঁচু জানালা। রাতের ঘন আঁধারে দু'জন দেখল, নাটকীয় ভাবে আকাশ ছুঁয়েছে পাহাড়ের চূড়া, ওখান থেকে ঢালু হয়ে নেমে আগুন নিয়ে খেলা-১

জমিন মিশেছে গিয়ে ঢেউ খেলানো উপত্যকায়—তারপর মিলিয়ে গেছে দিগন্তে। সিটিং রুমের এক পাশে একটা সিঁড়ি, কার্পেট মোড়ানো ধাপগুলো নীচে নেমেছে। সিঁড়ির দিকে ইশারা করল এডি, সঙ্গে সঙ্গে মাথা দোলাল থ্রেসি, পিছু নিল। জুতো খুলে হেঁটে এসেছে, টিসটিস করছে পা, পুরু কার্পেট আরামদায়ক লাগল। প্রথম ল্যান্ডিং পেরনোর সময় দেয়ালে প্রকাণ্ড এক পোরট্রেইট দেখল। ফারের ট্রিম দেয়া কোট পরে ঘোড়ার উপর বসে রয়েছে প্রাচীন এক যোদ্ধা। কোমরে কমলা রঙের তলোয়ারের খাপ। মাথার উপর মঙ্গোলদের ক্ল্যাসিকাল হেলমেট, যেন উল্টো গামলা। উপর থেকে থ্রেসির দিকে চেয়ে রয়েছে ছবিটা, সোনালী-কালো চোখে বিজয়ীর চাহনি। ঠোঁটে বাঁকা হাসি, বেরিয়ে পড়েছে তীক্ষ্ণধার দাঁতগুলো। লোকটার চেহারার সঙ্গে জালাইর তেমুজিনের অনেক মিল, ভাবল থ্রেসি। কেন যেন শিউরে উঠল, ছবির দিকে পিঠ ফিরিয়ে সিঁড়ি বেয়ে নামতে শুরু করল।

নীচের ল্যান্ডিংয়ে নেমে এল দু'জন। সামনে মাঝারি এক করিডোর। ভবন থেকে ওটা খানিক দূরে গিয়ে থেমেছে। করিডোরের ডান দেয়ালে বেশ ক'টা জানালা, ওখান থেকে প্রকাণ্ড এক উঠান দেখা গেল।

‘এখানে নিশ্চয়ই কোর্টহাউসে বেরুনোর কোনও দরজা থাকবে,’ বলল এডি। ‘যদি ওটা দিয়ে বেরিয়ে পড়ি, বাড়ির কোনা ঘুরে গেস্ট উইন্ডের দিকে যেতে পারব। সেদিকে না গিয়ে সোজা আড়াআড়ি বাগান ক্রস করব, মাঝখানের রাস্তাটা পেরিয়ে লুকিয়ে চলে যাব গ্যারাজে।’

‘ও পর্যন্ত খুঁড়িয়ে যেতে খুব কষ্ট হবে মিস্টার উইলসনের,’ বলল থ্রেসি। ‘তবে কপাল ভাল যে চারপাশে গার্ড নেই। চলো, দরজাটা খুঁজে বের করি।’

‘একবার এই ঘেরাটোপ থেকে বেরুতে পারলে পুলিশ নিয়ে

ফিরব,’ বলল এডি। ‘তখন মিস্টার উইলসনকে উদ্ধার করতে পারব।’

দ্রুত পায়ে করিডোরের শেষমাথায় পৌঁছে গেল দু’জন। সত্যি, দরজা একটা আছে। ছিটকিনি খুলে ফেলল গ্রেসি, ভয়ে ধুকধুক করছে বুক—এই বুঝি অ্যালার্ম বেজে উঠবে। ধীর হাতে দরজা টানল, নিঃশব্দে খুলছে। কোথাও কোনও আওয়াজ নেই। উঠানে বেরিয়ে এল দু’জন। সরু ফুটপাথে অনেক দূরে-দূরে একটা-দুটো বাতি জ্বলছে। ঠাণ্ডা মাটি পায়ে কামড় বসাতেই জুতোজোড়া পরে নিল গ্রেসি। পরনে ওর হালকা পোশাক, শীতে কেঁপে উঠল। রাতের হিম হাওয়া বয়ে চলেছে একটানা।

‘আগে এ বাড়ি ছেড়ে সরি,’ বলল এডি। ডানদিকে খানিকটা দূরে এক স্থাপত্য দেখাল। ওটা কালো পাথর দিয়ে তৈরি, বহু প্রাচীন। কোনও মন্দির বা প্যাগোডা হতে পারে। গোলাকৃতির। ছাতের উপর ফুটবলের মত গম্বুজটা লালচে।

সরু ফুটপাথ ধরে এগোল ওরা, মন্দিরের কাছে চলে গেল। ভিতরে ঢুকবার পথ প্রায় গুহার মত। ওদিকে না গিয়ে দেয়ালের পাশ দিয়ে এগোল এডি। গ্রেসিকে ফিসফিস করে বলল, ‘আমার মনে হয় ওদিকে একটা গাড়ি দেখেছি!’

ওর ঠিক পিছনে সঁটে রইল গ্রেসি।

মন্দির পিছনে রেখে খানিকটা এগিয়ে দমে গেল দু’জন। সামনে অর্ধচন্দ্রাকৃতির বড় এক উঠান। কোমর সমান কাঠের বেড়া দিয়ে ঘেরা। নীচের এক ফুট ফাঁকা। একসময় জায়গাটা করাল হিসাবে ব্যবহার হতো। ভিতরে ঘোড়া-টানা ছ’টা ওয়্যাগন ছত্রভঙ্গ হয়ে পড়ে আছে: বহু আগেই পরিত্যক্ত। ছাত-খোলা একটা ওয়্যাগনে দেখা যাচ্ছে শাবল, কোদাল ও নানাধরনের বাস্র। আরেকটা ওয়্যাগনের পাশে ছেঁড়া তারপুলিন, ভিতর দিয়ে উঁকি দিচ্ছে একটা চাকা। বাকি অংশ দেখা গেল, ধুলো ভরা পুরানো এক মোটর-সাইকেল। করালের আরেক পাশে একটা

গাড়ি, বহু পুরানো। অ্যান্টিক, ধুলো-ধূসরিত। একটা চাকারও টায়ার নেই, শুধু রিমের উপর দাঁড়ানো।

‘এখানে এমন কিছু নেই যেটা নিয়ে উলানবাটোরে যাওয়া যায়,’ হতাশ স্বরে বলল গ্রেসি।

আস্তে করে মাথা দোলাল এডি। ‘ওই গ্যারাজ থেকেই গাড়ি নিতে হবে।’ আরও কিছু বলতে গিয়েও হঠাৎ থেমে গেল ও, কাছেই তীক্ষ্ণ আওয়াজ! নাক ঝাড়ছে কোনও ঘোড়া। এই ক্রম থেকে বেশি দূরে না। ওটার মালিক সঙ্গে থাকতে পারে! ‘ওয়াগনের পিছনে, জলদি!’ ফিসফিস করল এডি।

ওকে অনুসরণ করল গ্রেসি, ত্রল করে বেড়ার তলা দিয়ে চলে গেল কাছের ওয়াগনের নীচে। কাঠের চাকাগুলোর আড়ালে চুপচাপ পড়ে থাকল। মোটা স্পোকগুলোর ফাঁক দিয়ে দেখছে।

কয়েক সেকেন্ড পর দুই ঘোড়সওয়ারকে দেখা গেল। স্লেটের ফুটপাতে রূপ-রূপ আওয়াজ তুলছে ঘোড়াগুলো। মন্দির পেরিয়ে এসে করালের সামনে থামল দু’জন। শ্বাস আটকে ফেলল গ্রেসি, যা দেখছে বিশ্বাস করতে চাইছে না চোখ। একটু আগে সিঁড়ির ল্যান্ডিংয়ে যে লোককে দেখেছে, প্রায় তারই মত পোশাক এদের! কমলা রঙের টিউনিক, তাতে সোনালী সুতোর কাজ। আলো পড়ায় ঝিকমিক করছে পোশাক। ঢোলা পাতলুন, পায়ে ভারী বুট। মাথার উপর ধাতব টুপি, তার পিছন থেকে নেমেছে ঘোড়ার লেজ দিয়ে তৈরি বেণি। কয়েকবার ঘোড়া নিয়ে একই জায়গায় ঘুরল দু’জন। গ্রেসি ও এডি মাত্র পাঁচ ফুট দূরে। মাটির উপর পা ঠুকছে ঘোড়াদুটো, নাকে ধুলো ঢুকছে গ্রেসির। হঠাৎ হাঁচি এল ওর, নাক চেপে ধরে সামলে নিতে চাইল। দু’ সেকেন্ড পর বুঝল, এ একদম অসম্ভব!

তার আগেই বিজাতীয় ভাষায় কী যেন বলেছে লোক দু’জন, ঘোড়াদুটো অন্ধকারে ছিটকে রওনা হলো। যেদিক থেকে এসেছে সেদিকে। খটা-খট শব্দ দেখতে দেখতে দূরে চলে গেল।

লোকদু'জন বোধহয় হাঁচির শব্দ শুনতে পায়নি।

‘ওরা রাতের প্রহরী,’ বলল এডি।

‘অনেক কাছে চলে এসেছিল,’ বলল গ্রেসি, ওয়্যাগনের তলা থেকে বেরুল, উঠে দাঁড়িয়ে দু’হাতে পোশাক ঝাড়ল।

‘বেশি সময় পাব না, একটু পর আবারও আসবে,’ বলল এডি। ‘তার আগেই বাগান পেরিয়ে গ্যারাজে পৌঁছুতে হবে।’

‘তা-ই আসলে,’ সায় দিল গ্রেসি। ‘লোকগুলো দেখতে ভয়ঙ্কর, সামনে পড়তে চাই না।’

বেড়ার তলা দিয়ে ক্রল করল না ওরা, টপকাল। শ্বেত পাথরের ভবনের দিকে ছুটল। দালানের ডান কোনা থেকে বাগানে ঢুকবে। রাস্তা পেরিয়ে চলে যাবে বিশাল গ্যারাজে।

উঠানের মাঝামাঝি যেতেই তীক্ষ্ণ এক চিৎকার ভেসে এল। হঠাৎ ক্ষুরের জোর আওয়াজ উঠল, পিছন থেকে ছুটে আসছে ঘোড়াগুলো! কাঁধের উপর দিয়ে চাইল গ্রেসি ও এডি, চমকে গেল। সেই দুই প্রহরী! মন্দিরের কাছে অপেক্ষা করছিল! এখন মাত্র পঞ্চাশ গজ দূরে!

থমকে দাঁড়িয়ে পড়ল ওরা দু’জন, বুঝতে পারছে না বাড়ির দিকে দৌড় দেবে, না উঠান ধরে ছুটবে। তারপর দেখল বামদিকের ঘোড়াটা আকাশে পা তুলেছে, ওটার লাগাম টেনে ধরেছে আরোহী। এক পলকের জন্য মূর্তি হয়ে গেল ঘোড়াটা, তারপর ধপ করে পা নামাল, আর নড়ল না। কিন্তু দ্বিতীয় আরোহী পূর্ণ গতিতে ছুটে আসছে!

ওদের উপর দিয়ে চালিয়ে দেবে ঘোড়া? গ্রেসির চোখে তীব্র আতঙ্ক দেখল এডি। পাথরের মত জমে গেছে বেচারি।

‘সরে যাও! পালাও!’ দু’হাতে ধাক্কা দিল এডি, ঘোড়ার গতিপথ থেকে গ্রেসিকে সরিয়ে দিতে চাইল। ততক্ষণে ওদের ঘাড়ের কাছে চলে এসেছে ঘোড়সওয়ার। বেমক্কা ধাক্কা খেয়ে ছিটকে গিয়ে একপাশে পড়ল গ্রেসি। এবার নিজেকে বাঁচানোর আশুন নিয়ে খেলা-১

চেপ্টা করল এডি, দ্রুত একদিকে সরতে চাইল। ঘোড়ার রেকাব ঘষা দিল পেটে। চামড়া ছড়ে যাওয়ায় জ্বলে উঠল জায়গাটা। হোঁচট খেয়ে পড়তে গিয়েও সামলে নিল এডি, অবিশ্বাস্য কাণ্ড করল, পালাবার চেপ্টা না করে ধেয়ে গেল ছুটন্ত ঘোড়াটার দিকে।

অশ্বারোহী ভাবেনি তাকে কেউ তেড়ে এসে ধরতে চাইবে। কয়েক গজ যাওয়ার পর ঘোড়ার গতি কমাল সে, ডানদিকে চরকির মত ঘুরে ফের ধাওয়া দেবে। কিন্তু ঘুরেই দেখল তার ঘোড়ার পাশে হাজির হয়েছে লোকটা!

দু'হাতে ঘোড়ার রাশ জাপ্টে ধরল সাইসমিক ইঞ্জিনিয়ার, থুতনির নীচের দিকে ধরেছে, জোর হ্যাঁচকা টান দিয়ে বলল, 'এবার আমার পালা!'

মঙ্গোল যোদ্ধা বিহ্বল চোখে দেখছে। প্রশিক্ষিত ঘোড়াকে কাত করে ফেলে দিতে চায় এ লোক! ঘোড়ার নাক থেকে মেঘের মত বাষ্প ছিটকে পড়ছে পাগলটার মুখে।

'না! এডি! সরে যাও!' চেষ্টা করে উঠল গ্রেসি, এইমাত্র উঠে দাঁড়িয়েছে।

একবার ওর দিকে চাইল এডি, কোনও বিপদ ঘটেনি গ্রেসির। কানের কাছে ফিসফিস করল কী যেন, চোখের কোণে অস্পষ্ট কী যেন দেখল। হঠাৎ বুক আঁকড়ে ধরল কিছু। বুকের ভিতর আগুন জ্বলে উঠল। হঠাৎ বুঝল হাঁটু গেড়ে বসে আছে ও, হালকা লাগছে সব কিছু। মাথা যেন ফোলা কোনও বেলুন! জানল না মাটিতে পড়ে গেছে। চোখের সামনে গ্রেসিকে দেখল, বেচারি ওর কাঁধ ও মাথা কোলে তুলে নিয়েছে। ...কেন?

মঙ্গোল যোদ্ধার তীর এডির হৃৎপিণ্ড ফুটো করেনি, ঠিক পাশ দিয়ে ঢুকে ছিঁড়ে দিয়েছে পালমোনারি আর্টারি। ফলাফল প্রায় একই—ভিতরে ভয়ঙ্কর রক্তক্ষরণ শুরু হয়েছে, কয়েক মুহূর্ত পর স্তব্ধ হয়ে যাবে হৃৎপিণ্ড।

তীর যেখানে ঢুকেছে, সেখান থেকে ফিনকি দিয়ে রক্ত বেরিয়ে আসছে। দু'হাতে জায়গাটা ধরল গ্রেসি, যদি রক্তক্ষরণ থামে। কিন্তু অন্তর জানান দিল, কেউ আর কিছু করতে পারবে না। চোখের সামনে এডির মুখ ফ্যাকাসে হয়ে যাচ্ছে। বুক ভরে বাতাস টেনে নিতে চাইছে। ফুঁপিয়ে উঠল, তারপর শিথিল হলো। চোখ দুটো ক্ষণিকের জন্য উজ্জ্বল হলো। গ্রেসি ভাবল, এডি বাঁচবে। ওর দিকেই চেয়ে আছে, তিরতির করে নড়ে উঠল এডির ঠোঁট, অস্ফুট স্বরে বলল, 'নিজেকে বাঁচাও!'

চোখ বুজল এডি, একটু কঁপে উঠে স্থির হয়ে গেল।

উনিশ

মঙ্গোলিয়া। চেঙ্গিস খানের দেশ।

রাজধানী উলানবাটোর।

আকাশে এক ফোঁটা মেঘ নেই, বাইরে চেয়ে শহর ও চারপাশের নৈসর্গিক দৃশ্য দেখছে রানা। অনেক নীচে দেখা যাচ্ছে একের পর এক ক্রেন ও বুলডোজার সাজানো: বর্তমান দুনিয়ার সঙ্গে তাল মেলাতে ব্যস্ত হয়ে উঠেছে মঙ্গোলরা, দ্রুত বেড়ে উঠছে রাজধানী। ঝিরিঝিরি হাওয়ায় ভর করে নামছে অ্যারোফ্লট টি ইউ-১৫৪ প্যাসেঞ্জার জেট, ডানাদুটো ঠিক করে নিল, তারপর বুয়াস্ত উখা এয়ারপোর্টের প্রধান রানওয়ে স্পর্শ করল।

প্রথমে ইস্টার্ন ব্লকের উনিশ শ' পঞ্চাশ দশকের কোনও শহর মনে হয় উলানবাটোরকে। রাজধানীর জনসংখ্যা তেরো লাখ।

আগুন নিয়ে খেলা-১

বেশির ভাগ বাড়িঘর সোভিয়েত ডিজাইনে তৈরি, একেকটা যেন চারকোনা বাক্স। ধূসর-রঙা অ্যাপার্টমেন্ট ভবনগুলো যেন সাজা পাওয়া কয়েদীদের বসবাসের জন্য, সেখানে সভ্যতার ছোঁয়া কমই লেগেছে। কোনও সুস্থ মস্তিষ্কের টাউনপ্ল্যানার হলে এভাবে শহরের কেন্দ্রে সরকারী প্রকাণ্ড চৌকোনা ভবনগুলো তৈরির অনুমতি দিত না। কিছুদিন হলো গণতন্ত্র এসেছে মঙ্গোলিয়ায়, সঙ্গে এসেছে অর্থনৈতিক প্রবৃদ্ধি। উলানবাটোর ধীরে নড়ছে, আধুনিক হয়ে উঠছে। প্রচুর পণ্য নিয়ে দোকানগুলো এখন রংচঙা, প্রায় প্রতিদিনই খোলা হচ্ছে নতুন রেস্টুরেন্ট, নাইটক্লাব—সুন্দর শহর জেগে উঠছে একটু একটু করে।

ওখানে রয়েছে পুরানো ও নতুনের মিশেল। একই সঙ্গে রয়েছে নতুন অ্যাপার্টমেন্ট ভবন, হয়তো পাশেই পশম দিয়ে তৈরি তাঁবু—ওখানে পরিবার-পরিজন নিয়ে বাস করছে যাযাবর মঙ্গোল পশু-পালক। গোটা দেশের সত্যিকারের বড় শহরটি ঘিরে খোলা ময়দানে হাজারো ধূসর বা সাদা তাঁবু।

রাশা ও চিনের মাঝখানে এ এক পিছিয়ে পড়া দেশ। উত্তর এবং পশ্চিমে পার্বত্য অঞ্চল, দক্ষিণে গোবি মরুভূমি। প্রায় পুরো দেশ ঢেউ খেলানো; মরুভূমি ও পাহাড়-পর্বত বাদ দিলে অফুরন্ত ঘাসজমি। এ দেশে জন্মেছে চেঙ্গিস খানের মত অনেক পারঙ্গম অশ্বারোহী। তবে সেসব যোদ্ধা ও অভিযাত্রীরা এখন শুধু গৌরবময় অতীতকাহিনি। সোভিয়েত শাসনামলে মঙ্গোলিয়া হয়ে ওঠে অন্যতম বড় সমাজতান্ত্রিক দেশ, হারিয়ে যায় মানুষের কাজের স্পৃহা, থেমে যায় উন্নতি। গত কয়েক বছর হলো নতুন করে আবার জেগে উঠছে জনগণ, মুখ ফুটে সমস্যার কথা বলছে, নিজেদের দাবি আদায় করছে।

উলানবাটোরকে প্রায় ঘিরে রেখেছে পাহাড়গুলো। ওদিকে চেয়ে ভাবছে রানা, মঙ্গোলিয়ায় ছুটে আসা কি ঠিক হলো? রাশানদের জাহাজ দ্যানিয়া বৈকাল হ্রদে ডুবছিল, ওটার দায়িত্বে

ছিল না ও, ওটা নুমার কোনও জাহাজ না। শেষে অবশ্য ডোবেনি, কোনও ক্রু খুন হয়নি। অয়েল সার্ভে টিমেরও কেউ না ও। তবে অন্তরের গভীরে বুঝছে, মানুষগুলো নিরপরাধ ছিল। ওদের সঙ্গে জড়িয়ে রয়েছে রহস্যময় কিছু। ওদের কিডন্যাপ করা হলো কেন? ভয়ঙ্কর খারাপ কিছু ঘটতে চাইছে কেউ, এবং কেন করতে চাইছে সেটা ও জানতে চায়। এখানে আসবার আরেকটি কারণ প্রিয় বন্ধু ববি মুরল্যাণ্ড, ওর সঙ্গে আসতেই হতো ওর। খেপে ব্যোম হয়ে গেছে ববি, প্রতিজ্ঞা করেছে: প্রয়োজনে দুনিয়াটা লগুভণ্ড করে খুঁজে বের করবে থ্রেসি মুলারকে।

জেট বিমানের চাকা রানওয়ে ছুঁতেই পাশ ফিরল রানা, গভীর ঘুমে তলিয়ে রয়েছে ববি। উরকুতস্ক-এর আকাশে বিমান উঠতেই ঘুমিয়ে পড়েছে। সেই ঘুম আর ভাঙেনি, যখন রাশান সুন্দরী এয়ারহোস্টেস ওর জিসের উপর কফি ফেলল, তখনও না। ‘ওঠো খোকা বাবু,’ কানের কাছে ফিসফিস করল রানা।

চোখ খুলল ববি, ভারী পাতাদুটো পিটপিট করল, চাইল জানালার দিকে। কংক্রিটের টারমাক দেখে ধড়মড় করে সোজা হয়ে বসল, মুহূর্তে ঘুম উধাও।

‘আসার পথে কিছু মিস করিনি তো?’

‘তেমন কিছু না। পাহাড়-পর্বত, জঙ্গল, ঘেসো-জমি, ভেড়া, উট আর ঘোড়ার পাল, আর রেন্দোরভের কিছু ভয়ানক অশ্লীল কৌতুক—এই সব।’

‘ডার্টি জোকস্? হায়, হায়, শুনতে পেলাম না! যাক গে,’ বিরাট এক হাই তুলল ববি। চোখ পড়ল ডান উরুর উপর, থমকে গেল, চোখে সন্দেহ ফুটে উঠল। ‘আমার প্যাণ্টের এই অবস্থা হলো কী করে?’

‘এক সুন্দরী ওটাকে কফি খাইয়ে গেছে।’

‘তা-ই বলো।’ হাসল। ‘তা হলে ঠিক আছে।’

‘মঙ্গোলিয়ায় স্বাগতম, আমরা উলানবাটোর বা ‘লাল নায়ক’ শহরে হাজির হয়েছি,’ পিছনের সিট থেকে বুম করে উঠল ডক্টর রেদোরভের কণ্ঠ। ভদ্রলোক উঠে দাঁড়াতেই ঘাড় ফিরাল রানা-ববি। বিজ্ঞানীর সারা মুখেই এখানে-ওখানে ব্যাণ্ডেজ।

মানুষটা এত আমোদে আছেন কী করে, ভাবল ববি। পরমুহূর্তে বুঝল কারণটা। পেটমোটা এক ভোদকার বোতল ভ্যালিযের ভিতর পুরছেন রেদোরভ।

দশ মিনিট পর ইমিগ্রেশন পেরুল তিনজন, কাস্টমস-এ বেরিয়ে ব্যাগ খুঁজে নিল। আন্তর্জাতিক বিমানবন্দর হিসাবে বুয়ান্ত উখাকে খুদেই বলতে হবে। টার্মিনাল ভবন থেকে বেরিয়ে ক্যাবের জন্য অপেক্ষা করছে, এমন সময় লোকটাকে লক্ষ করল রানা। লাল শার্ট পরেছে সে, দেহের পেশিগুলো তারের মত প্যাঁচানো মনে হলো। রাস্তার ওপারে পিপড়ের মত এগিয়ে চলেছে মানুষ, কিন্তু জায়গা থেকে নড়ছে না সে। কয়েকবার চোখাচোখি হতেই মুখ ফিরিয়ে নিয়ে রওনা হলো, দ্রুতই হারিয়ে গেল ভিড়ের মধ্যে।

কিছুক্ষণ হাত নাড়বার পর ভাঙাচোরা এক ট্যাক্সি থামল ওদের পাশে, উঠে পড়ল রানা, ববি ও রেদোরভ। এয়ারপোর্ট থেকে সামান্য দূরে শহর।

‘উলানবাটোর, বলা উচিত গোটা মঙ্গোলিয়াই, গত কয়েক বছরে অনেক বদলে গেছে,’ বললেন রেদোরভ।

‘বদলে গেছে?’ এক পাশে চেয়ে রয়েছে ববি, রাস্তার ধারে অসংখ্য তাঁবু।

‘গত দুই শতকে অনেক পিছিয়ে পড়েছে মঙ্গোলরা,’ বললেন ডক্টর। ‘তবে একবিংশ শতকে এসে দ্রুত মেকাপ করে নেয়ার চেষ্টা করছে।’

‘আগেও এসেছেন?’ জানতে চাইল রানা।

‘মঙ্গোলিয়ান অ্যাকাডেমি অভ সায়েন্সের বেশ কয়েকটা

প্রজেক্টে কাজ করেছি লেক খোভসগোল-এ।’

প্রায় কুয়ার মত গভীর এক গর্ত পাশ কাটল ট্যাক্সি, ক্যাচকোঁচ আওয়াজে ব্রেক কমল কন্টিনেন্টাল হোটেলের সামনে। ভাড়া মিটিয়ে লবির ভিতর ঢুকল তিনজন, চেক-ইন করবে। মধ্যযুগীয় শিল্পের নকল দিয়ে প্রকাণ্ড লবিটা সাজানো। পাসপোর্ট নিয়ে খালখা ভাষায় লেখালেখির কাজ শেষ করল এক মুশকো রিসেপশনিস্ট, বেল টিপল। রেজিস্টার খাতায় সই করে দিল ওরা। এক মিনিট পেরিয়ে গেল, ব্যাগ নিতে এল না কেউ। লবির সামনে বড়সড় জানালা, ওটার দিকে চোখ পড়ল রানার, হোটেলের গেটের সামনে থেমেছে হলুদ এক লাদা। ওটা থেকে নেমে এল সেই লাল শার্ট পরা লোকটা!

চেয়ে রইল রানা, গাড়ির পাশ থেকে নড়ছে না সে। চেহারার বলছে ইউরোপিয়ান। তার মানে মঙ্গোলিয়ান পুলিশ বা ইমিগ্রেশন কর্তৃপক্ষের কেউ নয়। তবে হাবভাব বলছে এ এলাকা তার চেনা। মাঝে মাঝে হেসে ফেলছে। কেন, কে জানে! এক কান থেকে আরেক কান পর্যন্ত দাঁত! হাসলে সব কটা দাঁত বেরিয়ে পড়ে। মাপা ভঙ্গিতে দু’তিন পা হেঁটে আবার আগের জায়গায় ফিরছে, মনে হয় দেয়ালের উপর দিয়ে হাঁটছে কোনও বিড়াল। না, উঁহু, নর্তকও নয়। ওই তো একটু হোঁচট খেল! পিঠ যেখানে মিশেছে কোমরে, এক পাশে খানিক ফোলা। অর্থাৎ সঙ্গে অস্ত্র আছে।

‘চাবি দিয়ে দিন,’ রেরদোরভকে বলতে শুনল রানা। ডেস্কের উপর খটাখট আওয়াজ। ঘাড় ফেরাল রানা। চাবিগুলো তুলে নিয়েছেন রেরদোরভ, দুটো বাড়িয়ে দিলেন ববি আর ওর দিকে। ‘আমরা ফিফথ ফ্লোরে থাকছি, পাশাপাশি ঘর। ব্যাগ রেখেই হোটেলের ক্যাফেতে টুঁ দেব, লাঞ্ছের ফাঁকে প্ল্যান করা যাবে।’

‘ওই ক্যাফে যদি ঠাণ্ডা বিয়ার বিক্রি করে, ধরে নিন আমার আত্মাটা এখনই ওখানে চলে গেছে,’ বলল ববি।

আগুন নিয়ে খেলা-১

রিসেপশনিষ্ট এ নিয়ে পঞ্চমবার বেল টিপছে। এবার যেন আকাশ থেকে নামল দুই বেলবয়, প্রায় দৌড়ে এসে ব্যাগগুলো তুলে নিল, মুখে তেলতেলে হাসি। রিসেপশনিষ্ট বাঘের মত হুঙ্কার ছাড়ল, দাঁত খিঁচিয়ে কী যেন বলছে। ডুপ্লিকেট চাবিগুলো মেঝের উপর ছুড়ে দিল। ওগুলো কুড়িয়ে নিল দুই বেলবয়, ব্যাগ হাতে লিফটের দিকে ছুটল।

‘প্লেনে একটানা বসে থেকে হাত-পা আড়ষ্ট হয়ে গেছে,’ বলল রানা। ‘আমি একটু হাঁটাহাঁটি করে আসি। ববি, তোমরা গিয়ে বসে পোড়ো, আমার জন্য টিউনা স্যাণ্ডউইচ অর্ডার দিয়ো। দশ মিনিটেই ফিরছি।’

হোটেল ছেড়ে বেরিয়ে এল রানা। চট করে পিঠ ফেরাল লাল শার্ট, গাড়ির গায়ে হেলান দিয়ে হাতঘড়ি দেখল—অলস ভঙ্গি। পাকানো তার, তোর মতলবটা কী, ভাবল রানা। বামদিকের ফুটপাথে উঠল, কয়েকজন জাপানিজ ট্যুরিস্ট হোটেলের দিকে চলেছে, তাদের পাশ কাটিয়ে হনহন করে হাঁটতে লাগল। দেখতে দেখতে দুই ব্লক পেরিয়ে এল। বামে রাস্তা, বাঁক নিল রানা, আর না গিয়ে থমকে দাঁড়াল, কোনা থেকে উঁকি দিল। যা ভেবেছে, লাল শার্ট পরা প্যাচানো তারটা হাঁই-হাঁই করে আসছে, আধ ব্লক পিছনে রয়েছে এখন। আয় তুই, আমি এগোই—ঘুরে দাঁড়িয়ে রাস্তার পাশ ধরে হাঁটতে শুরু করল রানা। খানিকটা যেতেই বামে বিশ ফুট চওড়া রাস্তা—মোড় নিল ও। বামে পাঁচ ফুটি ফুটপাথ, কিন্তু সড়কের আরও খানিকটা জায়গা কেড়ে নিয়েছে বেশ কিছু দোকান। ওখানে হরেক জিনিস বেচা-বিক্রি চলছে। ওগুলো দেখবার সময় রানার নেই, দ্রুত পায়ে এগুলো, ন’টা দোকান পেরিয়ে পড়ল এক খবরের-কাগজের স্ট্যাণ্ড, ওটা পেরুতেই কাপড়ের দোকান। ওখানে চারদিকে দড়ি টাঙানো, অসংখ্য হ্যাঙারে ঝুলছে ভারী ভারী কোট। ওগুলোর ফাঁকে খানিকটা জায়গা রাখা হয়েছে ভিতরে ঢুকবার জন্য। দোকানে

ছুকে পড়ল রানা, ডানদিকের কোটগুলোর আড়াল নিল। ভাবছে, এবার এসো!

ছোট্ট এক ডেস্কের পিছনে বসে আছেন থুথুড়ে এক বৃদ্ধা, সামনে সাজানো রয়েছে কয়েক জোড়া শীতের ভারী বুটজুতো। চেয়ার ছেড়ে উঠে এলেন।

‘শশশ,’ ঠোটে আঙুল রেখে মিষ্টি করে হাসল রানা।

ঘোলা চোখে আগন্তুককে দেখলেন মহিলা, অবাক হয়েছেন।
বারকয়েক মাথা নাড়লেন, তারপর আবার ডেস্কের পিছনে গিয়ে
বসলেন।

গলির দিকে মনোযোগ দিল রানা। কান পেতে অপেক্ষা করছে।

চোখে উদ্বেগ নিয়ে হাঁটছে লোকটা। বড় দ্রুত।

পদধ্বনি কাছে চলে আসতে আরও সতর্ক হয়ে উঠল রানা। নিউজ-পেপারের দোকানটার সামনে থেমেছে লোকটা। বোধহয় ভিতরটা তাকিয়ে দেখছে। তারপর কংক্রিটের উপর পায়ের শব্দ আবারও শুরু হলো, পাথরের মূর্তি হয়ে গেল রানা।

যেখানে দরজা থাকতে পারত, সেখানে এসে দাঁড়াল
ধাওয়াকারী। এবার এই দোকানের ভিতরটা দেখবে। একফুট
মত ভিতরে ঢুকে পড়ল।

সেই লাল শার্ট, তাতে কোনও ভুল নেই—বিদ্যুৎবেগে সামনে বাড়ল রানা, ওর ডানহাতি ঘুসি নামল লোকটার বাম চোয়ালে। কড়-কড়াৎ করে ঘাড়ের কয়েকটা হাড় ফুটল, হুড়মুড় করে বামপাশের কোটগুলোর ভিতর সৈঁধিয়ে গেল। গায়ে দুটো কোট পৌঁচিয়ে নিয়ে নামল মাটিতে। ততক্ষণে পাশে চলে এসেছে রানা, কুঁজো হয়ে প্রায় বসে পড়বে পিঠে, কিন্তু দ্রুত পিছাতে হলো। ব্যাটা আসলে প্যাঁচানো তার নয়, পেরেকের মত শক্ত, এক লাফ দিয়ে উঠে দাঁড়িয়েছে। ঘুরেই সামনে বাড়ল, রানার বুক লক্ষ্য করে বামহাতে ঘুসি ছুঁড়ল। ওদিকে পিঠের নীচে আগুন নিয়ে খেলা-১

খাবলা দিল ডানহাত ।

প্রায় লাফ দিয়ে পিছল রানা, জ্র নাচাল । ‘এটা খুঁজছ?’ সারদাইউকোভ এসপিএস অটোমেটিক পিস্তলটা লোকটার বুকে তাক করেছে । বৃদ্ধা চিৎকার দেবার জন্য হাঁ করেছিলেন, কিন্তু পিস্তলটা দেখেই থপ করে বন্ধ করে ফেললেন মুখটা । বয়সটা বাতাস পেয়ে বাড়েনি, দীর্ঘদিন পাড়ি দিয়ে অনেক অভিজ্ঞতা অর্জন করেছেন—জানেন কখন কী করতে হয় না ।

শূন্য ডানহাত দেহের পাশে নামিয়ে নিল তারের কয়েল, চোখে বিহ্বল দৃষ্টি । তবে তা মুহূর্তের জন্য, হিম চোখে চাইল রানার দিকে, তারপর ফিরে এল তার হাসি ।

ব্যাটার দাঁত ওই বত্রিশটাই, তবে একেকটা দ্বিগুণ চওড়া, নইলে দাঁত ভরা হাসি দু’কান পর্যন্ত যায় কী করে, ভাবল রানা । গম্ভীর চেহারা করল, ‘কেউ আমার পিছনে লাগুক সেটা আমার পছন্দ নয় ।’

‘মিস্টার রানা, আপনি কিন্তু আমাকে ঠকিয়েছেন,’ বলল সে । ইংরেজি উচ্চারণে অতি সামান্য রাশান টান ।

‘ঠকিয়েছি?’

‘অবশ্যই । যাক গে সেসব, আমাকে নিয়ে দুশ্চিন্তা করবেন না । আমি আপনার শত্রু নই, বন্ধু । বুয়ুম ফ্রেণ্ডও বলতে পারেন । আমার কাজ আপনাকে সাহায্য এবং রক্ষা করা ।’

‘তা-ই নাকি?’

‘নিশ্চয়ই তা-ই!’

‘তা হলে দোকান থেকে বেরোও, সামনে সামনে ছাঁটতে থাকো । তোমাকে লাঞ্ছ খাওয়াব । আমার বন্ধুরাও নতুন এই বুয়ুম ফ্রেণ্ডের সঙ্গে পরিচিত হোক ।’

‘কণ্টিনেন্টাল হোটেলে তো?’ আবার গাল ভরা হাসি ফিরে এল । ‘চলুন যাই । খিদেও পেয়েছে ।’ কবাটহীন দরজা দিয়ে বেরিয়ে গেল সে । বৃদ্ধাকে আরও একটুকরো হাসি উপহার দিয়ে

লোকটার পিছু নিল রানা। জ্যাকেটের ডান পকেটে পিস্তল ভরেছে, তবে হাত বের করেনি। ভাবছে, ব্যাটা পাগল, না বুদ্ধ?

পালানোর চেষ্টা করল না রাশান, দৃষ্ট পায়ে হোটেলের ঢুকল, তারপর লবি পেরিয়ে রেস্টুরেন্টে। কোনওদিকে চাইল না, রানাকে অবাক করে দিয়ে সোজা গিয়ে ঢুকল এক বড় বুথে। ওখানে ভোদকা ও বিয়ার নিয়ে বসেছে রেন্দোরভ ও ববি।

‘পাভেল রেন্দোরভ, কেমন চলছে তোমার, বুড়ো ছাগল?’ স্মিত হাসছে লোকটা।

‘আরে, আন্দ্রে আভেতিসিয়ান! তোমাকে এখনও ঘাড় ধরে এ দেশ থেকে বের করল না যে?’ উঠে দাঁড়ালেন রেন্দোরভ, বন্ধুকে জড়িয়ে ধরলেন।

‘এ তো দেখছি বুকে পিষে মেরেই ফেলবে!’ তাড়াতাড়ি নিজেকে ছাড়িয়ে নিল আন্দ্রেই। ডক্টর রেন্দোরভের ব্যাণ্ডেজ ভরা মুখ ও প্লাস্টার করা কজি এক সেকেণ্ডে দেখল, কুঁচকে গেল ভ্রু। ‘চুরিটুরির ফল? গণ ধোলাই?’

‘না, তা নয়, তোমাকে তো ফোনে বলেছি, এ উপহার কয়েকটা মংগোলার কাছ থেকে।’ লাজুক হাসলেন ডক্টর, ‘দুঃখিত, বোধহয় সামান্য ভদ্রতাটুকুও ভুলছি। এই দুর্ধর্ষ যুবক মাসুদ রানা বাংলাদেশের কৃতি সন্তান, গুণের শেষ নেই, নুমারও স্পেশাল ডিরেক্টর। ওঁর আমেরিকান বন্ধুটিও নুমার সঙ্গে জড়িত, কেউ কারও চেয়ে কম নন—আর ইনি আন্দ্রেই আভেতিসিয়ান, উলানবাটোর রাশান এমব্যাসির স্পেশাল অ্যাটাশে। কয়েকবছর আগেও আন্দ্রেই আর আমি একই সঙ্গে কাজ করতাম। বরজিন অয়েল কনসোর্টিয়ামের বিষয়টি তদন্ত করতে আমাদের সাহায্য করবে আন্দ্রেই।’

‘এয়ারপোর্ট থেকে এ লোক আমাদের পিছু নিয়েছে,’ রেন্দোরভের চোখে চোখ রাখল রানা।

‘আপনারা আসছেন পাবলো আগেই আমাকে জানিয়েছে।
আগুন নিয়ে খেলা-১

আমি দেখতে যাই আর কেউ পিছু নিল কি না।’

‘আমার বোধহয় ক্ষমাপ্রার্থনা করা উচিত,’ বলল রানা, বাড়িয়ে দিল পিস্তলটা। ওটা নিয়ে কোমরে গুঁজল আন্দ্রেই। দু’জন করমর্দন করল।

‘আমি কিছু মনে করিনি,’ বলল আন্দ্রেই। ‘তবে খঁাতলানো নাকটা পছন্দ করবে না আমার স্ত্রী।’ একটা হ্যাটের র্যাকে নাক ঠুকেছে সে।

‘আগে যে চেহারা ছিল, সেটাই বা কীভাবে সহ্য করত তোমার বউ?’ হো-হো করে হেসে উঠলেন রেদোরভ।

টেবিল ঘিরে বসে পড়ল চারজন। লাঞ্ছের অর্ডার দেয়া হলো। আলাপের বিষয় ক্রমে গুরুগম্ভীর হয়ে উঠল।

ডক্টরের চেহারা ভরা ব্যাণ্ডেজগুলো আরেকবার দেখল আন্দ্রেই, বলল, ‘পাভেল, তুমি বলেছ দ্যানিয়া ডুবিয়ে দেয়ার চেষ্টা করা হয়, তেল-কর্মীদের কিডন্যাপ করা হয়, কিন্তু বলোনি তুমি গুরুতর আহত হয়েছ।’

‘আমার এই দুই বন্ধু ঠিক সময়ে হাজির না হলে সবচেয়ে খারাপটাই ঘটতে যাচ্ছিল, মরতে বসেছিলাম,’ ভোদকার গ্লাস দিয়ে রানা ও ববিকে দেখালেন রেদোরভ।

‘মাকরাতে ঠাণ্ডা পানিতে গোড়ালি ভিজ়েছে,’ বলল ববি। ‘বরজিন অয়েল কনসোর্টিয়ামের উপর খুশি থাকতে পারিনি।’

‘আপনাদের কেন মনে হচ্ছে বন্দিদের মঙ্গোলিয়ায় নিয়ে আসা হয়েছে?’

‘আমরা জানি ওই ফ্রেইটার লিয নেয় বরজিন অয়েল কনসোর্টিয়াম,’ বলল রানা। ‘চুক্তি অনুযায়ী তাদের হয়ে কাজ করছিল সার্ভে টিম। রিজিওনাল পুলিশ কর্তৃপক্ষ খুঁজে দেখেছে, সাইবেরিয়ায় ওই কোম্পানির কোনও স্থায়ী হোল্ডিং নেই। কাজেই ধরে নিই ওরা মঙ্গোলিয়ায় ফিরেছে। সীমান্ত কর্তৃপক্ষের কাছ থেকে জানা গেছে নাউশিকি বর্ডার পেরিয়েছে ট্রাকের একটা

বহর। তাদের বর্ণনা শুনে বোঝা গেছে ওগুলো সেই
লিস্ত্ভিয়াস্কার ট্রাকগুলোই।’

‘পুলিশ ও সীমান্ত-রক্ষীদের জানানো হয়েছে?’

‘হ্যাঁ, মঙ্গোলিয়ান ন্যাশনাল পুলিশকে আনুষ্ঠানিক ভাবে
জানানো হয়েছে। নীচের পর্যায়ের কর্মকর্তারা কাজে নেমেছে।
তবে ইরকুতস্ক পুলিশের কর্মকর্তারা জানিয়েছেন, মঙ্গোল
কর্তৃপক্ষ বেশিরভাগ সময় জরুরি কাজেও টিলামি করে।’

‘ঠিকই বলেছেন ওঁরা, সে আমল আর কই, রাশানদের দাপট
আর নেই,’ মাথা নেড়ে আফসোস করল আন্দ্রেই। ‘আগের
তুলনায় মানুষের নিরাপত্তা অনেক কমে গেছে। গণতান্ত্রিক বিধি
আর অর্থনৈতিক বিষয়গুলো রাষ্ট্রকে দুর্বল করে দিয়েছে,
অপরাধীদের কঠোর ভাবে দমন করতে পারছে না।’ রানা ও
ববির দিকে চেয়ে এক জুঁট করল সে।

‘স্বাধীনতা অর্জন করতে হলে বদলে অনেক ত্যাগ স্বীকার
করতে হয়,’ বলল ববি। ‘তবুও, বন্ধু, সে-স্বাধীনতা স্বর্গ পাওয়ার
মত।’

‘কমরেড মুরল্যাণ্ড, বিশ্বাস করুন, আমরা সবাই সে মুক্তি
উপভোগ করি। বিশেষ করে ব্যক্তি-স্বাধীনতা। কিন্তু ওটারই
কারণে কখনও কখনও আমার কাজ কঠিন হয়ে ওঠে।’

‘বলবেন কি আপনি রাশান এমবাসির কোন্ কাজে আছেন?’
নিরীহ ভঙ্গিতে জানতে চাইল রানা।

‘আমার কাজ স্পেশাল অ্যাটাশে হিসেবে, একইসঙ্গে তথ্য
ডেস্কের অ্যাসিস্ট্যান্ট ডিরেক্টর। আমি এ দেশের বিভিন্ন ঘটনা
বিশ্লেষণ করি, তথ্য সংগ্রহ করি—এইসব।’

পরস্পরকে একবার দেখল রানা ও ববি। চেহারা নির্বিকার।

‘আবারও বকবক শুরু করলে, আন্দ্রেই?’ হাসছেন
রেন্দোরভ। কিন্তু চোখে সতর্ক দৃষ্টি। ‘তোমার কথা বাদ দাও,
বরং শুনি বরজিন অয়েলের ব্যাপারে কী জেনেছ।’

চেয়ারে হেলান দিয়ে বসল আন্দ্রেই আভেতিসিয়ান, ওয়েইট্রেস ড্রিঙ্ক দিয়ে চলে যেতেই নিচু স্বরে শুরু করল, ‘বরজিন অয়েল কনসোর্টিয়াম। ওটা আজীব এক জন্তু।’

‘কোন দিক থেকে?’ জানতে চাইলেন রেরদোরভ।

‘শুরু থেকেই বলি। করপোরেট এনটিটি ধারণাটা মঙ্গোলিয়ায় প্রায় নতুন। কমিউনিস্টরা যখন এ দেশ শাসন করত, সব ছিল দেশের, কারও নিজের বলে কিছু ছিল না। কিন্তু গত দেড়-দুই দশকে মঙ্গোলিয়া বদলে গেছে, জন্ম নিয়েছে বেশ কিছু কোম্পানি। এরপর গত সাত-আট বছরে অনেক উদ্যোক্তা গড়ে তোলে ব্যবসা সংগঠন। সেসময় বেশ কিছু পাবলিক কোম্পানিও গঠিত হয়। আগেই বলেছি, একসময় কোম্পানিগুলো ছিল শুধু রাষ্ট্রের সঙ্গে অংশীদারিত্বে, বা বিদেশি করপোরেশনগুলোর অধীনে। এ কথা বিশেষ করে বলা যায় মাইনিং কোম্পানিগুলোর ব্যাপারে। স্থানীয়দের মূলধন ছিল না, জমিও ছিল শুধু রাষ্ট্রের। কিন্তু বরজিন অয়েল কনসোর্টিয়ামের বেলায় মোটেও তা বলা যায় না।’

‘তারা মঙ্গোলিয়ান সরকারের সঙ্গে অংশীদারিত্বে ছিল না?’ জানতে চাইল রানা।

‘না। রেজিস্ট্রি ঘেঁটে জেনেছি। ওটা পুরোপুরি এক-মালিকানা কারবার। আমার কৌতূহল আরও জাগিয়ে দেয় আরেকটা বিষয়—বরজিন অয়েল কনসোর্টিয়াম প্রথম দিকের কোম্পানি। উনিশ শ’ নব্বুই সালের দিকে নতুন সরকার ওটাকে ছাড়পত্র দেয়।’

‘কোনও তেল কোম্পানি কাজ শুরু করতে লাগে শুধু জমির লিখ নেয়া,’ বলল ববি। ‘ওরা হয়তো শুরু করেছে শুধু ওই দলিল আর একটা পিকআপ ট্রাক নিয়ে।’

‘হয়তো। আমি জানি না ওরা কী পরিমাণ মূলধন নিয়ে কাজ শুরু করে, কিন্তু ওদের বর্তমান মূলধন ওই পিকআপ ট্রাকের

চেয়ে হাজার কোটি গুণ বেশি।’

‘এদের অ্যাসেট সম্পর্কে কিছু বলতে পারবে?’ জানতে চাইল রেদোরভ।

‘উত্তরদিকে সাইবেরিয়া সীমান্তে এদের আছে একটা তেল-খনি, ওখান থেকে তেল তোলা চলছে। মেলে অবশ্য সামান্যই। ওদিকে গোবি মরুভূমিতে বেশ কিছু কুয়া খুঁড়েছে। বৈকাল হ্রদের চারপাশে বিশাল এলাকা খুঁজে দেখবার অনুমতিও পেয়েছে। তবে এদের সত্যিকারের সম্পদ বলতে এক অয়েল ফিল্ড সার্ভিস ইয়ার্ড। ওটা উলানবাটোরের দক্ষিণে, রেল ডিপোর কাছে। জায়গাটা ধরে রেখেছে এরা বহু বছর ধরে। কিছুদিন আগে ঘোষণা দিয়েছে তারা কারাকোরাম-এ ছোট এক তামার খনি পেয়েছে, কাজও শুরু করেছে।’

‘সব শুনে খুব ফাটাফাটি কিছু বলে মনে হয় না,’ বলল ববি।

‘তা ঠিক, তবে ওসব শুধু জনতাকে জানানো বরজিন অয়েল কনসোর্টিয়ামের বিত্ত। কিন্তু এদের সেরা রহস্যময় সম্পদ সম্বন্ধে আমি জানতে পাই মিনিস্ট্রি অভ এগ্রিকালচার অ্যাণ্ড ইণ্ডাস্ট্রির কাছ থেকে।’ সবার উপর চোখ বুলিয়ে নিল আন্দ্রেই। চিকচিক করছে চোখ। অন্য তিনজন বুঝে গেল এগ্রিকালচার অ্যাণ্ড ইণ্ডাস্ট্রি বিষয়ক মন্ত্রীও জানে না আন্দ্রেই কী পরিমাণ তথ্য খুঁড়ে বের করেছে তাঁর মন্ত্রণালয় থেকে।

‘চুক্তির ফলে বরজিন অয়েল কনসোর্টিয়াম দেশের বিশাল এলাকা জুড়ে তেল ও খনিজ সম্পদ আহরণ করতে পারবে। কী করে যেন এরা হাজার হাজার একর জমি কিনে নিয়েছে। মঙ্গোলিয়ার সরকার সাধারণত এ ধরনের সুযোগ কাউকে দেয় না। আমার সোর্সরা বলে, কনসোর্টিয়াম এসব জমি কিনবার জন্য মঙ্গোল সরকারকে বিপুল পরিমাণ অর্থ দিয়েছে। কিন্তু মূল বিষয় হচ্ছে, এদের এমন কোনও উৎস নেই যে এত টাকা পাবে। প্রশ্ন হচ্ছে: অত টাকা এল কোথা থেকে?’

‘হয়তো কোনও ব্যাঙ্ক থেকে ঋণ নিয়েছে,’ বলল রানা।
‘বাইরের দেশের কোনও মাইনিং কোম্পানি হয়তো ফাও
দিয়েছে।’

‘হ্যাঁ, তা হতে পারত। ওদিকটা খুঁজে দেখেছি, তেমন কিছু
ঘটেনি। মজার ব্যাপার হলো, এরা অনেক জমি কিনেছে,
যেখানে ভৌগলিক ভাবে তেল বা খনিজ পাওয়ার সম্ভাবনা প্রায়
শূন্য। যেমন বলা যায় তাদের জমির বিশাল একটা অংশে
রয়েছে শুধু গোবি মরুভূমি।’

বুদে ঢুকল ওয়েইট্রেস, হাতে বিরাট এক গোল ট্রে।
টেবিলের উপর নামিয়ে দিল। উটের আস্ত রানের কাবাব।
লোভনীয় সুবাস। ম-ম করছে বুদ।

মেয়েটি চলে যেতেই বাঘের মত ঝাঁপিয়ে পড়ল আন্দ্রেই,
দু’হাতে বিশাল এক টুকরো মাংস ছিঁড়ে নিল। ওটার বড় একটা
অংশ চলে গেল মুখের ভিতর।

যেমন প্রকাণ্ড হাঁ, তেমন দাঁতের জোর; স্বীকার করে নিল
রানা, খাওয়ার প্রতিযোগিতা করতে গেলে এর ধারে-কাছেও
টিকবে না ও।

উটের মাংস চিবুতে চিবুতে শুরু করল আন্দ্রেই, ‘আমি
আরও অবাক হয়েছি আরেকটা কারণে। এই কোম্পানির মালিক
রাজনীতি করে না, এমনও নয় যে তার উপর-মহলে খুব হাত
আছে। বরং বলা যায় মঙ্গোল কর্তৃপক্ষের বেশিরভাগ অফিসার
তাকে কখনও দেখেইনি। বরজিন অয়েল কোম্পানি সব নগদ
টাকায় কিনেছে। অত টাকা এল কোথা থেকে, সেটা আমার
কাছে এক রহস্য। এই কোম্পানির মালিক সানাদু-এ একাকী
বাস করে।’

‘সানাদু?’ জানতে চাইল রানা।

‘বরজিন কোম্পানির মালিক ওই বাড়ির নাম দিয়েছে সানাদু,
হেডকোয়ার্টারও ওখানে। জায়গাটা শ’ দেড়েক মাইল দক্ষিণ-

পুবে। আমি কখনও যাইনি, তবে কয়েক বছর আগে ইউকোস
অয়েলের এক এগযিকিউটিভকে ওখানে ব্যবসায়িক চুক্তির জন্য
আমন্ত্রণ করা হয়। সে লোক আমার পরিচিত। তার কাছে
গুনেছি, ওই জায়গাটা বড় অদ্ভুত সুন্দর, ত্রয়োদশ শতাব্দির
কোনও সম্রাটের খ্রীষ্টকালীন প্রাসাদের মত। ভিতরে নাকি
রয়েছে নানাধরনের অ্যান্টিক। খোঁজ নিয়ে জেনেছি, বাইরের
কোনও মঙ্গোল আজ পর্যন্ত ওখানে পা রাখেনি।’

‘তার কারণ বোধহয় এটা, লোকটা চায় না কেউ তার বিপুল
ঐশ্বর্য দেখুক,’ বললেন রেদোরভ। ‘তবে প্রশ্ন হচ্ছে আমাদের
বন্দিদের নিয়ে—তাদের কি শহরের বাইরে ইণ্ডাস্ট্রিয়াল সাইটে
নিয়ে গেছে, নাকি সেই সানাদু-তে?’

‘ভাল প্রশ্ন তুলেছেন আপনি,’ বলল রানা। ‘ওরা কোথায়,
সেটা খুঁজে বের করতে হবে। আমরা প্রথমে খুঁজব ইণ্ডাস্ট্রিয়াল
সাইটে।’ আন্দ্রেইর দিকে চাইল ও। ‘বলতে পারেন ওটার
ভিতরটা কেমন?’

‘নিশ্চয়ই পারি,’ অপমানিত চেহারা করল রাশান অ্যাটাশে।
তাকে আহত মনে হলো। ‘ওই ফ্যাসিলিটি আমি ঘুরে দেখে
এসেছি। নিরাপত্তা-রক্ষীরা ওটার দায়িত্বে থাকে। তবে, রেল
লাইনের ধার দিয়ে গেলে ভিতরে ঢোকা যায়।’

‘রাতের আঁধারে একটু ঘুরে এলে কোনও ক্ষতি নেই,’ বলল
ববি।

‘আমারও মনে হয়েছে আপনারা যেতে চাইবেন। সার্ভে টিম
ওখানে আছে কি না সেটা দেখবেন আপনারা, সত্যি যদি থাকে,
আমরা মঙ্গোল পুলিশকে কাজে লাগাব। চাক্ষুষ প্রমাণ জরুরি,
নইলে বলতে বলতে বুড়ো হয়ে মরে যাব, তবু গা নড়াবে না
ওরা। বিশ্বাস করুন, কখনও কখনও মঙ্গোলিয়ায় ঘড়ির কাঁটা
থমকে যায়।’

‘বলোঁর্মা নামের ওই ডাইনীরা ব্যাপারে কিছু জানেন?’ জানতে
আগুন নিয়ে খেলা-১

চাইল ববি।

‘দুঃখিত, কিছুই না। হতে পারে সে নকল কোনও নাম নিয়ে সাইবেরিয়ায় ঢোকে। জানেনই তো ইমিগ্রেশন কর্তৃপক্ষের ভুল হতে পারে। তবে সে যদি বরজিন অয়েলের কেউ হয়, আর মঙ্গোলিয়ায় থাকে, আমরা তাকে খুঁজে বের করতে পারব।’

কাবাব শেষ করেছে আন্দ্রেই, দ্বিতীয় চিনা বিয়ারটা খুলে চুমুক দিল। ‘আজ মাঝরাত। চলে? হোটেলের পিছনে আসবেন। আপনাদের ওই ফ্যাসিলিটি পর্যন্ত পৌঁছে দেব। সঙ্গে ভিতরে যেতাম, কিন্তু আমার যে চাকরি... নিজ দেশের বদনাম হবে এমন কাজ করতে পারব না। আপনাদেরই এগিয়ে যেতে হবে।’

‘খুনাখুনি থেকে দূরে থাকতে হবে আমারও,’ হতাশ হয়ে বললেন রেদোরভ, ‘ফাটা কজি আমাকে পঙ্গু করে দিয়েছে। কিন্তু অন্য কোনও ভাবে কাজে আসতে পারলে খুশি হবো।’

‘দুঃখ করবেন না, কমরেড,’ রেদোরভের কাঁধ চাপড়ে দিল ববি। ‘তিন দেশের সন্দেহজনক তিনজন লোক উল্টোপাল্টা করলে সেটা ভয়ানক খারাপ। আমরা ধরা পড়লে হৈ-চৈ শুরু হবে। একটা দেশ অন্তত নিরাপদে থাকুক!’

‘নিষিদ্ধ এলাকায় ফট করে ঢুকে পড়লে বিপদ হতে পারে, তবে খুব বেশি না,’ বললেন রেদোরভ।

আন্দ্রেইর হাসিখুশি মুখটা হঠাৎ গম্ভীর হয়ে উঠল। ‘একটা দুঃসংবাদ আছে। আমার উচিত আপনাদের সাবধান করে দেয়া। দু’দিন আগে রাশান লুকঅয়েল-এর এক অয়েল সার্ভে টিমকে অ্যামুশ করা হয়। বিনা দোষে মানুষগুলোকে নৃশংসভাবে খুন করে এক দল ঘোড়সওয়ার। এটা ঘটে উত্তরদিকের পাহাড়ি এলাকায়। সার্ভে টিমের সঙ্গে আরেকজন ছিল। সব দেখে সে, ওখান থেকে পালিয়ে যায়। পরদিন এর গ্রামের কাছে তাকে খুঁজে পায় এক মেসপালক। প্রায় মৃত তখন, জ্বরের ঘোরে প্রলাপ বকছিল। মেস-পালক যখন পুলিশ নিয়ে অকুস্থলে যায়, দেখা

যায় সেখানে কিছুই নেই। মৃতদেহ, ট্রাক, সার্ভে গিয়ার... সব উধাও। এমন কী গাড়ির চাকার দাগ পর্যন্ত মুছে ফেলা হয়েছে। আমাদের এমবাসির এক অফিসার ওই রাশানকে সাইবেরিয়ায় পৌঁছে দেয়। লুকঅয়েল-এর অফিসাররা নিশ্চিত করেছে সার্ভে টিম সত্যিই ওদিকে গিয়েছিল, এখন নিখোঁজ।’

‘তাদের হারিয়ে যাওয়ার সঙ্গে বরজিন অয়েলের সম্পর্ক থাকতে পারে?’ জানতে চাইল ববি।

‘প্রমাণ কই? আমাদের হাতে তো কিছুই নেই! তবে আমরা সন্দেহ করি তাদেরকেই।’

নীরবতা নামল টেবিল ঘিরে। কিছুক্ষণ পর রানা বলল, ‘আন্দ্রেই, আপনি কিন্তু বরজিন অয়েলের মালিক সম্বন্ধে কিছুই বলেননি। এ কোম্পানির পিছনে কাজ করছে কে?’

‘বলা উচিত কয়েকজন,’ বলল আন্দ্রেই। ‘জালাইর তেমুজিন নামের এক লোকের নামে কোম্পানিটা রেজিস্ট্রি করা হয়েছে। শুনেছি তার রয়েছে যমজ দুই ভাই-বোন, তবে নামগুলো আবিষ্কার করতে পারিনি। হতে পারে বলোমা নামের সেই মেয়ে তার ওই বোনটি। আমি আরও খোঁজ-খবর নেবার চেষ্টা করব। পাবলিক রেকর্ডে কিছুই নেই। এই পরিবারটিকে নামকরা কেউ চেনে না। স্টেট রেকর্ড অনুযায়ী জালাইর তেমুজিন লেখাপড়া করে খেনতি প্রদেশে। তার তরুণ বয়সে বাবা-মা মারা যায় প্লেন দুর্ঘটনায়। রাশার ইরকুস্ক-এর কাছে। আগেই বলেছি, এ পরিবার কখনও রাজনৈতিক ক্ষমতা বলয়ের ধারেকাছেও আসেনি, উলানবাটোরের উঁচু সমাজেও মেশেনি। শুধু এটুকু বলব, গুজব শুনেছি তারা নিজেদের সোনালী বংশের সন্তান বলে দাবি করে।’

‘তার মানে বলতে চায় তাদের অনেক টাকা?’ জানতে চাইল ববি।

মাথা নাড়ল আন্দ্রেই। ‘না। ওটার মানে অন্য। সোনালী আগুন নিয়ে খেলা-১

বংশের সঙ্গে টাকার কোনও সম্পর্ক নেই। নীল রক্তের সঙ্গে সম্পর্ক।’

‘যা নাম লোকটার... তেমুজিন?’ বললেন রেদোরভ। ‘বংশে কোনও এক সময়ে বিপুল ধনসম্পত্তি ছিল বোধহয়।’

‘নিশ্চয়ই ছিল,’ বলল রানা। ‘তার চেয়েও বেশি ছিল। পুরো এশিয়া তাদের ছিল।’

‘যাহ্, তুমি নিশ্চয়ই বলবে না...’ থেমে গেল ববি।

রানার দিকে চেয়ে আস্তে করে মাথা দোলাল আন্দ্রেই, চোখে কৌতূহল।

‘গোল্ডেন ক্ল্যান এসেছে সরাসরি চেঙ্গিসের কাছ থেকে,’ বলল রানা।

‘চেঙ্গিস?’ মুখ খুলে হপ্ করে আবার বন্ধ করল ববি।

‘দুনিয়ার সেরা ট্যাকটিশিয়ান, বহু দেশ বিজয়ী, সম্ভবত মধ্য যুগে দুনিয়ার সেরা নেতা,’ বলল রানা। ‘দুনিয়া জুড়ে যাকে আমরা চিনি চেঙ্গিস খান নামে।’

বিশ

রাত পৌনে বারোটা।

কালো শার্ট-প্যান্ট পরে লবিতে নেমে এল রানা ও ববি। উঁচু স্বরে রিসেপশন ডেস্কে জানতে চাইল, আশপাশে ভাল কোনও বার আছে কি না।

আছে।

লবির সোফাগুলোতে বেশ কয়েকজন ট্যুরিস্ট বসা, স্থানীয়

মঙ্গোলও আছে—টিভি দেখছে। মনে হলো না তারা কেউ চোখ রেখেছে। হোটেল থেকে বেরিয়ে এল রানা-ববি, আধ রক ঘুরে চলে এল হোটেলের পিছন দিকে। উল্টোপাশে এক ক্যাফে দেখে ঢুকল। ভিতরটা গমগম করছে। এক কোণে খালি টেবিল পাওয়া গেল। বিয়ার নিয়ে বসল ওরা, ঘড়ির দিকে খেয়াল রাখল। মাঝরাত হতে এখনও সাত মিনিট বাকি। চারপাশ দেখছে, জড়ানো স্বরে কথা বলছে মাতাল ব্যবসায়ীরা, কেউ কেউ গান গাইছে। লাল চুলওয়ালা এক বারমেইড ঠোং-ট্যাং-টুং শব্দে ইয়াত্তাক বাজিয়ে চলেছে। কিছুক্ষণ শুনে রানা বুঝল, ওই অদ্ভুত সুরের মর্ম বুঝবার সাধ্য ওর নেই।

ঠিক বারোটোর সময় বেরিয়ে এল দু'জন। রাস্তার ওপাশে এক লাল টয়োটা, আসতে দেরি করেনি আন্দ্রেই। গাড়িতে উঠতেই ছেড়ে দিল, গলি থেকে ছিটকে বেরিয়ে বামে মোড় নিল। ঘোরানো প্যাঁচানো পথে এগিয়ে চলেছে সে। কিছুক্ষণ পর পড়ল বিশাল এলাকা জুড়ে শুখবাজার স্কয়ার। উলানবাটোরে জনসভার স্থান বলতে এ জায়গাকেই বোঝায়। উনিশ শ' একুশ সালে এক বিপ্লবী নেতা চিনাদের যুদ্ধে হারিয়ে দেন, এখানে দাঁড়িয়ে মঙ্গোলিয়ার স্বাধীনতা ঘোষণা করেন। বেঁচে থাকলে হতাশ হতেন, স্কয়ারটি আজরাতে ব্যবহার করছে স্থানীয় এক রক ব্যাণ্ড। বক্তব্য তাদের কম, গিটার ও ড্রামের উপর পুরোপুরি নির্ভরশীল। কান ফাটিয়ে চলেছে। ভিড় পাশ কাটিয়ে এগোল আন্দ্রেই, কিছুক্ষণ পর দক্ষিণের রাস্তা ধরল। আবারও অন্ধকার সেকেণ্ডারি রোড ধরে একেবেঁকে এগিয়ে চলা।

‘পিছনের সিটে আপনাদের জন্য উপহার রেখেছি,’ বলল সে। রিয়ারভিউ মিররে তার চওড়া দাঁতগুলো দেখা গেল।

দু’সেকেণ্ড হাতড়ে পুরানো দুটো জ্যাকেট পেল ববি, ধূসর রঙ। রানা পেল শ্রমিকদের দুটো হলুদ তোবড়ানো হার্ড হ্যাট।

‘আপনাদের শীতও কমবে, আবার মনে হবে স্থানীয় কোনও আগুন নিয়ে খেলা-১

ফ্যাঙ্কির শ্রমিক।’

‘অথবা ভাববে ভবঘুরে ফাঁকিবাজ শ্রমিক,’ বলল ববি। একটা জ্যাকেট পরে নিল। ওটা আচ্ছামত কেটেছে পোকা। ওর কাঁধের পেশি যে-কোনও সময় জ্যাকেট ফেটে বেরিয়ে আসবে। রানার দিকে চেয়েই ফিক করে হেসে ফেলল। রানার জ্যাকেটের আস্তিন দুটো কনুই থেকে খানিকটা নেমেই শেষ।

‘সারারাত দোকান খোলা রাখে এমন কোনও দরজি পাব?’ ডানহাত তুলে দেখাল রানা।

‘হাসির বিষয় না,’ হেসে ফেলল আন্দ্রেই। একটু ঝুঁকল, সিটের নীচ থেকে বড় একটা খাম ও টর্চ বের করল, রানার দিকে বাড়িয়ে দিল। ‘খামে পাবেন আকাশ থেকে তোলা ছবি। এসেছে মিনিস্ট্রি অভ কনস্ট্রাকশন অ্যাণ্ড আর্বান ডেভেলপমেন্ট থেকে। বিস্তারিত না, তবে ফ্যাসিলিটির লেআউট মোটামুটি বুঝবেন।’

‘আজ বিকেল থেকে অনেক দৌড়াদৌড়ি করছেন মনে হচ্ছে?’ বলল রানা।

‘ঘরে আছে আমার বউ আর পাঁচ ছেলে-মেয়ে, আপনি কী করে আশা করেন আমি সহজে বাড়ি ফিরব?’ বলল আন্দ্রেই।

শহরের দক্ষিণ প্রান্তে পৌঁছে গেল টয়োটা, বাঁক নিয়ে পশ্চিমে রওনা হলো আন্দ্রেই। বামে রেল লাইন। কিছুক্ষণ পর ওরা উলানবাটোরের প্রধান রেল স্টেশন পাশ কাটাল। এরপর গাড়ির গতি কমাল রাশান। ফাঁকা রাস্তা, খানিক পর বাড়িঘর কমে এল, দু’পাশে মাঝে মাঝে পতিত জমি। টর্চের আলো ফেলে ফটোগুলো দেখল রানা ও ববি।

সাদা-কালো ঝাপসা ছবিগুলো আকাশ থেকেই তোলা, দুই বর্গ মাইল এলাকা দেখানো হয়েছে। তবে লাল কালি দিয়ে বরজিন ফ্যাসিলিটি দেখিয়েছে আন্দ্রেই। দেখবার মত তেমন কিছু নেই। ত্রিকোণ এলাকা, দু’পাশে প্রকাণ্ড দুটো ওয়ারহাউস।

মাঝখানে রয়েছে কয়েকটি নিচু ঘরবাড়ি। ইয়ার্ডের সামনের দিকে উঁচু দেয়াল, রাস্তা থেকে ভিতর দেখা যায় না। কমপাউণ্ডের পিছন ও দু'পাশে উঁচু কাঁটাতারের বেড়া। ওসব দিকে কোনও ছাউনি নেই, খোলা আকাশের নীচে রাখা হয়েছে শত শত পাইপ ও ইকুইপমেন্ট। পূর্বদিক দিয়ে ভিতরে ঢুকেছে রেল লাইনের স্পার, এলাকাটা পেরিয়ে শহরের দিকে গেছে।

হেডলাইট নিভিয়ে দিল আন্দ্রেই, খানিক এগিয়ে ফাঁকা এক জমির পাশে থামল। রাস্তা থেকে পঁচিশ ফুট দূরে এক দালান দেখা গেল। ছাত নেই, দেয়ালে কালি-ঝুলির ছোপ। বহু আগে ওটা বেকারি ছিল, আগুন ধরে সব পুড়ে যায়। দালানের কঙ্কালটা শুধু রয়েছে।

‘ওই বাড়ির পিছন দিয়ে গেলে সেই স্পার পাবেন,’ বলল আন্দ্রেই। ‘লাইন ধরে গেলে ইয়ার্ডে পৌঁছে যাবেন। ওখানে গেট আছে, ওদিক দিয়ে রেল ইঞ্জিন ভিতরে ঢোকে।’ রানার দিকে মাঝারি এক ওয়ায়ার-কাটার বাড়িয়ে দিল সে। ‘রাত তিনটে পর্যন্ত রেল-স্টেশনে থাকব, তারপর এখানে ফিরব সোয়া তিনটেয়। তার মধ্যে যদি ফিরতে না পারেন, নিজেদের ব্যবস্থা করে নেবেন।’

‘অনেক ধন্যবাদ, আন্দ্রেই,’ বলল রানা।

‘ঠিক সময়ে দেখবেন আমরা হাজির,’ বলল ববি।

‘তা হলে তো ভাল। তবে একটা কথা মনে রাখবেন,’ চওড়া হাসি ফিরে এল রাশানের ঠোঁটে। ‘খারাপ কিছু যদি ঘটে, ফোনে বাংলাদেশ বা আমেরিকান এম্বেসির সঙ্গে কথা বলবেন, রাশান এম্বেসির সঙ্গে নয়।’

ব্যাটা খুব বেরসিক, গুরুতেই কুফাও দিয়ে দিল, ভাবল ববি।

গাড়ি থেকে নেমে পোড়া বাড়ির কাছে চলে গেল ওরা, দেয়ালের ছায়ায় দাঁড়াল। রওনা হয়ে গেছে আন্দ্রেইর টয়োটা, আগুন নিয়ে খেলা-১

পাঁচ মিনিটের মধ্যে মিলিয়ে গেল টেইল-লাইট। দালানের পিছনে চলে এল রানা-ববি, ঢাল বেয়ে নামল, পেয়ে গেল রেল লাইন। উঁচু জমির দিকে গেছে।

চারদিকে গাঢ় আঁধার। ঝাঁঝি ডাকছে। হু-হু-হুউ করে ডাকল হুতোম পেঁচা। কয়েক মুহূর্ত পেরিয়ে গেল, তারপর ঝপাৎ করে একটা আওয়াজ হলো। চিঁচিঁ করে উঠল এক ভাগ্যহত ইঁদুর। তারপর সব স্তব্ধ। হাঁটতে শুরু করল দু'জন। অনেক দূরে বেশ কিছু বাতি, ওটাই বরজিন অয়েল ফিল্ড সার্ভিস ইয়ার্ড।

‘একটা কথা জানো, রানা, ওই জমজমাট ক্যাফের ভিতরে স্থানীয় ভোদকা টানলে এমন লাগত না,’ শিউরে উঠল ববি, ‘একেবারে হাড়ের ভিতরে গিয়ে বিঁধছে ঠাণ্ডা হাওয়া।’

‘লাল চুলওয়ালী বারমেইড বিবাহিতা ছিল,’ বলল রানা। ‘তোমার কোনও চান্স ছিল না, কথাই বলত না!’

‘কোনও বারে গিয়ে ড্রিন্ক করলে বারমেইডের সঙ্গে কথা হবেই। কখনও কখনও সময় তখন থমকে যায়।’

‘তারপর যখন বিল আসে?’

‘আঁ-হাম্!’ জোর খাঁকারি দিল ববি। ‘ওটা বেঁচে থাকার মাশুল! পা চালাও, রানা! চলো যাই গ্রেসিকে উদ্ধার করি গে!’

‘সত্যিই যদি ওদের পাই, তোমাকে এক বোতল স্টোলি ভোদকা আমি নিজে দেব।’

‘মিথ্যা বলছ না তো?’

‘তোমার ডান কান পাকড়ে ধরে শপথ করতে পারি।’

‘তার দরকার নেই,’ চট করে মাথাটা সরিয়ে নিল ববি। ‘আমি জানি তুমি মিথ্যে বলার লোকই নও!’

রেল লাইনের ডানে আরেকটা লাইন—বরজিনদের স্পার। ওটা ধরে ফ্যাসিলিটির দিকে পা বাড়াল ওরা। আন্দ্রেই ঠিকই বলেছে, সামনে পড়ল ঝুলন্ত চেইন লিঙ্কের বেড়া। এক পাশের লোহার খুঁটির সঙ্গে শেকল, ওটা থেকে ঝুলছে বিরাট এক

তাল। জ্যাকেটের পকেট থেকে ওয়ায়ার-কাটার বের করল রানা, বেড়ার বুকে দ্রুত হাতে দুটো L কাটল; একটা সোজা, অপরটা উল্টো। টুকরোগুলো সরিয়ে নিল ববি। চৌকো ফোকর দিয়ে ভিতরে ঢুকল রানা। ওর পর পর ববি।

ইয়ার্ডে জ্বলজ্বল করছে অসংখ্য বৈদ্যুতিক বাতি। যন্ত্রপাতির আওয়াজ। ইঞ্জিন চলছে। গভীর রাতেও ব্যস্ত কর্মীরা। যতটা পারা যায় ছায়ার আড়ালে থাকতে চাইছে রানা ও ববি, পুব দিকের দালানের দিকে চলেছে। ওয়ায়ারহাউসের প্রকাণ্ড স্লাইডিং দরজা ইয়ার্ডের মুখে খোলা। স্বাভাবিক গতিতে চলেছে ওরা। পঁয়তাল্লিশ ফুট পেরিয়ে কবাটের আড়ালে থামল।

সামনের পুরো ইয়ার্ড পরিষ্কার দেখা গেল। বামে রেল লাইনের উপর চারটে ফ্ল্যাটবেড রেলকার। ওখানে জড় হয়েছে বারোজন লোক। প্রথম কারের পিঠে চার ফুট ডায়ামিটারের পাইপ তুলছে বড় এক ক্রেন। আরেকটু দূরে অন্য তিন ফ্ল্যাট কারের উপর মাঝারি আকারের ড্রিল পাইপ ও কেসিং তুলছে হলুদ দুটো ফোর্কলিফট লোডার। লোকগুলোর কারও কারও পরনে ধূসর রঙা পুরানো জ্যাকেট, মাথায় হলুদ হার্ড হ্যাট। হঠাৎ করে ওদেরকে কেউ চিনে ফেলতে পারবে না, ভাবল রানা।

‘তেলের কুয়ার জন্য ড্রিল পাইপ, সেই তেল স্টোরেজে নিয়ে রাখবার জন্য পাইপ লাইন,’ নিচু স্বরে বলল রানা। ‘অস্বাভাবিক কিছু দেখছি না।’

‘আছে বাছা, ওখানে যে পরিমাণ ড্রিল দেখছ, সেগুলো দিয়ে জননী পৃথ্বীর মোটা পেট ফাঁসিয়ে দিতে পারবে,’ বিড়বিড় করে বলল ববি। ‘পেট-পিঠ ফুটো করে সোজা চাঁদে পৌঁছে যাবে পাইপ লাইন।’

ববির চোখ অনুসরণ করল রানা, আস্তে করে মাথা দোলাল। অন্তত তিন একর জমি দখল করেছে চল্লিশ ফুট পাইপ। আগুন নিয়ে খেলা-১

সবচেয়ে বড় ডায়ামিটারের সব। সারিসারি পাইপ দিয়ে তৈরি হয়েছে বিশ ফুট উঁচু পাহাড়। উপর থেকে দেখলে মনে হবে ওখানে রয়েছে হাজার হাজার ধাতব গাছের গুঁড়ি। ইয়ার্ডের আরেক দিকে ছোট ডায়ামিটারের ড্রিল পাইপ ও কেসিং—সংখ্যায় কয়েক হাজার।

খোলা ওয়্যারহাউসের দিকে মনোযোগ দিল রানা। মন্তুর পায়ে কোনা ঘুরল, দরজার বাইরের অংশ পেরিয়ে উঁকি দিল। উজ্জ্বল আলো জ্বলছে ভিতরে। কোনও নড়াচড়া চোখে পড়ল না। কেউ নেই। এক পাশের ছোট এক অফিস থেকে প্রাণপণে চৌঁচিয়ে চলেছে এক পোর্টেবল রেডিও। পপ গান। একটু আগেও ওখানে কেউ ছিল। জরুরি কাজে এসেছে এমন ভাব নিয়ে ভিতরে ঢুকে পড়ল রানা, পাশের দেয়াল ঘেঁষে চলেছে। খানিকটা গিয়ে এক পিকআপ ট্রাকের আড়াল নিল। দু'সেকেণ্ড পর উদয় হলো ববি।

ডানে দুটো ডাম্প ট্রাকের মাঝখানে পার্ক করা হয়েছে ছ'টা প্রকাণ্ড ফ্ল্যাটবেড ট্রাক। একপাশের দেয়াল ঘেঁষে কয়েকটা হিটাচি হেভি-কনস্ট্রাকশন এক্সকেভেটর ও বুলডোজার। ওয়্যারহাউসের পিছন দিক আলাদা করা হয়েছে, ওটা ম্যানুফ্যাকচারিং এরিয়া। গাদা করা হয়েছে ফেব্রিকেটেড ধাতব বাহু ও রোলার, সব নির্মাণাধীন। মাঝখানে একটা প্রায় তৈরি, দেখলে মনে হয় ওটা বাচ্চা ছেলেদের দোলনা ঘোড়া, তবে আকারটা দানবীয়।

‘তেলের কুয়ার পাম্প,’ বলল রানা। ছবিতো এ ধরনের জিনিস দেখেছে। তবে এটা অনেক পোক্ত। যে ক্রুড কুয়া দিয়ে ছিটকে তেল বেরোয় না, সেগুলোর জন্য এসব পাম্প ব্যবহার হয়।

‘দেখে মনে হয় একদল কামার মেরি-গো-রাউণ্ড তৈরি করছে,’ বলল ববি। হঠাৎ চোখের ইশারা করল। ডান কোণে

টেলিফোনে কথা বলছে এক লোক।

খানিকটা ডানে ফ্ল্যাটবেড ট্রাক। ওটার দিকে ছুটল রানা, পাশে ববি। আড়াল পেয়ে চারপাশ দেখল দু'জন। চোখে চোখে কথা হলো, স্লাইডিং দরজার দিকে এগোল। খানিক যেতেই ওদিক থেকে চড়া কণ্ঠস্বর শুনল, দরজার দিকে আসছে! ঘুরেই দৌড় দিল রানা-ববি, ট্রাকের পিছনে ফিরে হুইল ওয়েলের পাশে থামল। উঁকি দিয়ে দেখল, ওয়ারহাউসে ঢুকেছে দু'জন। কী নিয়ে যেন উত্তপ্ত আলাপ করতে করতে ট্রাকের ওপাশ দিয়ে গিয়ে পিছনের অফিসে ঢুকল। এখানে আর দেখবার মত কিছু নেই, দরজার দিকে ছুটল রানা ও ববি, ওয়ারহাউস ছেড়ে বেরিয়ে এল—ডানে খালি ক্রেটের বড়সড় এক স্তূপ, ওটার পিছনে থামল।

‘হতে পারে ফ্ল্যাটবেড ট্রাকগুলো বৈকাল হুদ থেকে এসেছে, কিন্তু ডকে যে কাভার্ড ট্রাক দেখেছি, সে জিনিস এখানে নেই,’ ফিসফিস করে বলল ববি।

‘ইয়ার্ডের ওদিকের ওয়ারহাউসটা দেখিনি আমরা,’ বলল রানা।

আস্তে করে মাথা দোলাল ববি।

পশ্চিম দিকের ওয়ারহাউসের চারপাশ প্রায় অন্ধকার। মনে হলো দরজাও বন্ধ। উত্তর দিকে কমপ্লেক্সের মেইন গেট।

ক্রেটের টিলা বামে রেখে এগোল রানা-ববি। তিরিশ ফুট পর শুরু হলো ছোট ছোট স্টোরেজ ছাউনি। উত্তর-পশ্চিমে হেঁটে চলেছে ওরা। ইয়ার্ডের মাঝে আরও কিছু ছাউনি পড়ল। মেইন গেটের পাশে গার্ডদের অফিস। ওদিকে লোকজন আছে। শেষ ছাউনির ভিতরে ঢুকল রানা-ববি। ভিতরে খিজ ও মরচে ধরা যন্ত্রপাতির গন্ধ। দ্বিতীয় ওয়ারহাউসের উপর চোখ রাখল ওরা।

দেখতে পুর্বদিকের ওয়ারহাউসের মত। সামনের দরজা বন্ধ। বামের দেয়ালে ছোট এক দরজা, ওটাও আটকানো। তবে আগুন নিয়ে খেলা-১

এ ওয়ারহাউস একদিক থেকে আলাদা, সামনে পায়চারি করছে সশস্ত্র এক দাড়িওয়ালা প্রহরী।

‘অয়েল ফিল্ড ডিপোর ভিতরে কী থাকতে পারে যে পাহারা দিতে হবে?’ জিজ্ঞেস করল ববি।

‘চলো যাই।’ একটা টুল্‌স্‌ বিনের পাশে থামল রানা, হাত ভরে দিল ভিতরে। কয়েক সেকেণ্ড পর একটা স্লেজহ্যামার বের করল সে, তুলে নিল কাঁধের উপর।

রানা সরতে সবুজ রঙের এক টুলবক্স তুলল ববি, মাটিতে রেখে ভিতরের যন্ত্রপাতি বের করল। টুলবক্সে রাখল শুধু একটা হ্যাকস্‌ ও মাস্কি রেঞ্চ। বিড়বিড় করে বলল, ‘চলুন, বস্‌, পানির কল মেরামত করতে হবে।’ রানার পিছু নিল ও।

শেড থেকে বেরিয়ে এল দু’জন, ভাবটা এমন, যেন ওরা ওয়ারহাউসের মালিক। ওদের দেখে প্রথমে গা করল না গার্ড। ময়লা জ্যাকেট ও তোবড়ানো হ্যাট পরা দুই শ্রমিক... এদের মত অনেকে কাজ করে এখানে। কিন্তু কয়েক সেকেণ্ড পর লোকটা রেগে গেল। সে দাঁড়িয়ে, আর দুই গাধা পাশের দরজার দিকে চলেছে! খালখা ভাষায় ধমকে উঠল গার্ড, ‘অ্যাই! যাওয়া হচ্ছে কোথায়!’

থামল ববি, জুতোর ফিতা বাঁধবার ভঙ্গি নিল। ওদিকে দরজার দিকে চলেছে রানা, যেন বন্ধ কালা।

‘দাঁড়াও!’ গর্জে উঠল মঙ্গোল, রানার পিছু নিল—হাত চলে গেছে হোলস্টারের উপর। এত্তোবড় সাহস—ক্যাটা থামছে না!

স্বাভাবিক গতিতে হাঁটছে রানা, তিন ফুট পিছনে পায়ের শব্দ। ঘাড়ের কাছে মঙ্গোল। থমকে ঘুরে দাঁড়াল রানা, ঠোঁটে খেলছে সরল হাসি। হতাশ ভঙ্গিতে কাঁধ ঝাঁকাল, পরিষ্কার বাংলায় বলল, ‘আমি কি তোমার ভাষা বুঝি, ভাইয়া?’

লোকটা ভালোমানুষ, কিন্তু মঙ্গোল না। হাসিমুখে কী যেন বলল? দ্বিধা-দ্বন্দ্বে পড়ে দাড়ি চুলকাল গার্ড। চোখের কোণে

দেখল কী যেন আসছে! নড়তে পারল না, তার আগেই মাথার পাশে আছড়ে পড়ল সবুজ টুলবক্স। জ্ঞান হারিয়ে ধূপ করে পড়ল সে।

‘আমার টুলবক্স বাঁকিয়ে দিয়েছে!’ নালিশের সুরে বলল ববি, তুবড়ে যাওয়া অংশে আঙুল বোলাল।

‘আরেকটা কিনে দেব, বাবু।’ অচেতন গার্ডকে দেখল রানা। ‘চলো দেখি ঘুমন্ত রাজকুমারীকে কোথায় লুকিয়ে রাখা যায়।’

‘তুমি ডাইনীর কুঁড়ের ভিতর ঢোকো, আমি মেয়েটাকে নিয়ে আসছি।’

দরজার সামনে চলে গেল রানা, হ্যাণ্ডেল নীচের দিকে নামিয়ে বুঝল, তালা লাগানো। এক পা পিছিয়ে মাথার উপর স্নেজহ্যামার তুলল, নামিয়ে আনল হ্যাণ্ডেলের উপর। লক সহ ঠকাস করে ছিটকে পড়ল হ্যাণ্ডেল। মাঝারি এক লাথি দিয়ে দরজা খুলল রানা, ভিতরে ঢুকল। তিন সেকেন্ড পর চৌকাঠ পেরুল ববি, দাড়িওয়ালা রাজকুমারীকে একহাতে জড়িয়ে ধরে তুলে এনেছে। দেয়ালের পাশে গুইয়ে দিল।

দরজা বন্ধ করল রানা। ভিতরে ঘুটঘুটে আঁধার। দরজার ডান-দেয়াল হাতড়াল, কয়েকটা সুইচ পেয়ে টিপল। উজ্জ্বল ফ্লুওরেসেন্ট বাতি জ্বলে উঠল। দেখা গেল, ওয়ারহাউসটা প্রায় ফাঁকা। মাঝখানে পাশাপাশি দুটো ফ্ল্যাটবেড ট্রাক। একটার পিঠ খালি, অন্যটার উপর কী যেন। জিনিসটা গুইয়ে রাখা ‘কোন্’ আইসক্রিমের মত, তবে এই কোনের সরু অংশের শেষে গোলাকার এক চাকা। রানার মনে পড়ল, এরকম একটা দেখেছে বৈকাল হ্রদে, কালো ফ্রেইটার থেকে নামানো হয়েছিল।

‘অত বড় আইসক্রিম কে চায়, আমরা গ্রেসিদের পেলেই খুশি,’ বলল ববি।

‘চলো দেখি জিনিসটা কী,’ ট্রাকের পাশে চলে গেল রানা। ববির দিকে হাত বাড়াল, ‘হ্যাকস’টা দাও দেখি।’

আগুন নিয়ে খেলা-১

টুলবক্স থেকে বের করে দিল ববি। ট্রাকের উপর উঠল রানা। জিনিসটা ক্যানভাসে মোড়ানো। দড়ি পেঁচিয়ে রেখেছে। হ্যাকস' দিয়ে দড়ি কাটল রানা, কয়েক টানে ক্যানভাস সরিয়ে দিল।

কোনও জটিল ধরনের যন্ত্র। গোলাকার। পা থেকে শুরু করে মাথা পর্যন্ত তিরিশ ফুট লম্বা, শেষের দিক সুচালো। তারপর আবার আট ফুট ডায়ামিটারের বড়সড় এক ধাতব চাকতি। নীচের মোটা অংশে একটা সিলিণ্ডার, ওটা থেকে বেরিয়েছে অসংখ্য পাইপ ও হাইড্রলিক লাইন। যন্ত্রের মাথার সামনে থামল রানা, চাকতির উপর ঢালু বেশ কিছু ডিস্ক। ওগুলো কোনও কিছু কাটে।

‘সুড়ঙ্গ খুঁড়বার যন্ত্র?’ আনমনে বলল রানা। ‘কাটার হেডগুলো ভোঁতা। অনেক ব্যবহার হয়েছে।’

‘আন্দ্রেই আভেতিসিয়ান বলেছে বরজিন কোম্পানি মাইনিং করে। আগেও শুনেছি মঙ্গোলিয়ায় প্রচুর তামা ও কয়লা পাওয়া গেছে।’ রানার দিকে চাইল ববি।

হঠাৎ ইয়ার্ড থেকে তীক্ষ্ণ হুইসল ভেসে এল। দরজার দিকে চাইল রানা ও ববি। অচেতন গার্ড ভেগেছে!

‘এবার?’ জ্ঞ নাচাল ববি।

‘এখানে আর কিছু নেই, চলো আঁধারে মিশে যাই।’

ঝেড়ে দৌড় দিল দু'জন, দরজার সামনে থামল। কবাট সামান্য ফাঁক করে বাইরে চাইল রানা। ইয়ার্ডের দক্ষিণ-পূব থেকে আসছে খোলা জিপ, পিছনে বসা সশস্ত্র তিন প্রহরী। তাদের পাশে বেঞ্চ সিটে বসে এক লোক মাথা ডলছে। তাকে চিনতে পারল রানা, টুলবক্সের ঘাই খাওয়া সেই দেড়েল রাজকুমারী।

এক টানে দরজা খুলল রানা, তীরের মত ছুটল দক্ষিণ-পশ্চিমে। পাশাপাশি ছুটছে ববি। পাইপের গোলক-ধাঁধার দিকে

উড়ে চলেছে। ওগুলো পেরুলে সামনে পড়বে বরজিনদের স্পার। পিছন থেকে গার্ডদের হৈ-চৈ ভেসে এল। প্রথম সারির পাইপগুলো পেয়ে অদৃশ্য হলো রানা-ববি।

খানিক দৌড়ে থামল ববি, 'সঙ্গে কুকুর না থাকলে বাঁচোয়া।' 'কোনও ঘেউ শুনিনি,' বলল রানা। পালানোর সময়ও সঙ্গে এনেছে স্নেজহ্যামার, ওটা তুলে দেখাল, প্রয়োজনে অস্ত্র হিসাবে ব্যবহার করবে। চারপাশ দেখল। 'পাইপের মিছিলগুলোর ভিতর দিয়ে চলে যাব রেল লাইন পর্যন্ত। যদি লোডিং প্ল্যাটফর্মে পৌঁছতে পারি, গেটও পেরুতে পারব। গার্ডরা আমাদের খুঁজবে এদিকে।'

'রানা তুমি এগিয়ে চলো, আমরা আছি তোমার পিছে,' নিচু স্বরে স্লোগান দিল ববি।

দ্রুত পায়ে এগোল দু'জন, পাইপের প্রকাণ্ড স্ট্যাকগুলোর ভিতর দিয়ে চলেছে। পিছনে গলার আওয়াজ, ছড়িয়ে পড়ছে গার্ডরা। চারদিকে বিশ ফুট উঁচু পাইপের পাপোশ, পা মুছবে যেন এক দল দানব। মাঝখানে তিন ফুট চওড়া গলি। যারা পিছু নিয়েছে, একসঙ্গে আসতে পারবে না।

মৌমাছি যেমন ফুলের দিকে ছোটে, সেইভাবে ছুটছে রানা-ববি। দক্ষিণ-পূবে রেল লাইন। কিছুক্ষণ দৌড়ে শেষ স্ট্যাক পেরিয়ে এল, সামনে পড়ল স্পার। ওটা পেরুলে খানিক দূরে কম্পাউন্ডের সীমানা, ওখানে বারো ফুট উঁচু দেয়াল।

'টপকানো যাবে না,' বলল রানা। 'রেল লাইন ধরে পূবে চলো।'

লোডিং র‍্যাম্পের দিকে চলল ওরা। মাঝারি কদমে হাঁটছে, মনে হয় না কেউ সন্দেহ করবে। সামনে চারটে ফ্ল্যাটকার, মালামাল তোলা চলছে। এদিকে কোনও গোলমাল নেই। একটু আগে অ্যালার্ম বেল বেজে উঠতে কাজ থামিয়েছে শ্রমিকরা, তখন দেখেছে জিপ নিয়ে পশ্চিম ওয়্যারহাউসের দিকে চলেছে

গার্ডরা। ওদিকে কিছু চোখে না পড়ায় আবারও মন দিয়েছে কাজে।

লোডিং ডকে পৌঁছে গেল রানা-ববি, পিছনের ফ্ল্যাটকারের পাশ দিয়ে চলেছে—প্রায় চোখের উপর নামিয়ে এনেছে শক্ত হ্যাট। পিছনের ফ্ল্যাটকার পেরুল ওরা। ববির দু'ফুট সামনে দ্বিতীয় কার। ওটার উপর থেকে লাফ দিয়ে নামল এক ফোরম্যান, ভারসাম্য রাখতে না পেরে হুমড়ি খেয়ে পড়ল ববির গায়ে—ওখান থেকে কংক্রিটের মেঝের উপর।

‘দুঃখিত,’ বিড়বিড় করল সে, মুখ তুলে চাইল। ববির মুখটা অপরিচিত মনে হওয়ায় বেসুরো গলায় বলল, ‘কে তুমি?’

লোকটার চকচকে চোখ সতর্ক হয়ে উঠছে। ‘তুমি আমাকে চিনলে না?’ ঝপ করে নিচু হলো ববি, ডানহাতি এক প্রচণ্ড ঘুসি বসিয়ে দিল ওর চিবুকের উপর। ধড়াস করে আবার মেঝেতে পড়ল ফোরম্যান, অজ্ঞান! সামনে থেকে জোরাল দুই কণ্ঠের চিৎকার শোনা গেল। তৃতীয় ফ্ল্যাটকারের পাশে দুই শ্রমিক, সবই দেখেছে। পশ্চিম ওয়্যারহাউসের দিক থেকে ফিরে আসছে সিকিউরিটি জিপ। ওটার দিকে হাত নাড়ল ওরা, আরও বিকট চিৎকার ছাড়ল।

‘আর লুকোচুরি করে লাভ নেই,’ বলল রানা।

পুবদিকে চাইল ও, ওদিকে রয়েছে ঝুলন্ত চেইন লিঙ্কের বেড়া। চৌকো ফোকর ওখানে। এখন যদি ঝেড়ে দৌড় দেয়া যায়, জিপ আসবার আগেই হয়তো পৌঁছে যাবে। কিন্তু ওদের লেজে আগুন দেবে ওইসব গার্ড।

‘আমাদের ডাইভারশান দরকার,’ বলল রানা। ‘জিপ-গাড়ির মনোযোগ কাড়ার চেষ্টা করো। আমি দেখি কোনও ট্র্যাসপোর্ট জোগাড় করতে পারি কি না।’

‘চিন্তা করো না, আমার এই সুন্দর চেহারা জিপের গার্ডদের চিত্ত আকর্ষণ করবে।’

রেলকারের নীচে ক্রল করে ঢুকল ওরা। বিপরীত পাশে বেরিয়ে এল ববি। ছায়ার ভিতর শুয়ে থাকল রানা, অপেক্ষা করছে। লাফ দিয়ে উঠে দাঁড়াল ববি, এক দৌড়ে ফ্ল্যাটকারগুলো ঘুরল—পাইপের গোলক-ধাঁধার দিকে ফিরছে। এক সেকেণ্ড পর ওর পিছনে দৌড়াতে লাগল ডকের শ্রমিকরা। রানার মুখের কাছে ধুলো ও নুড়ি-পাথর তুলছে বুট জুতোগুলো। বামে চাইল ও, তীক্ষ্ণ এক বাঁক নিয়েছে জিপ, হেডলাইট গিয়ে পড়ল ছুটন্ত ববির উপর।

ফ্ল্যাটবেডের তলা ছেড়ে বেরিয়ে এল রানা, তৃতীয় কারের দিকে ছুটল। রেল কারের পিঠে একগাদা পাইপ কেসিং তুলছে ফোর্কলিফট, এক দৌড়ে ওটার পাশে হাজির হলো রানা, জোর একটানে দরজা খুলল—লাফ দিয়ে ড্রাইভিং কম্পার্টমেন্টে উঠল। দু'হাতে স্নেজহ্যামার নামিয়ে আনল অপারেটরের ডান পায়ের আঙুলের উপর। লোকটা বিস্ফারিত চোখে দেখল রানাকে। দুটো আঙুল গেছে তার। মগজে পৌঁছে গেছে তীব্র ব্যথা। বিরাট হাঁ করে বলল, 'খাঁউ-কউ!' যেন কর্কশ ডাক ছাড়ল প্রকাণ্ড কোনও দাঁড়কাক!

নরম সুরে বলল রানা, 'দুঃখিত দোস্তো, তবে গাড়িটা আমার খুব দরকার যে!'

আধ সেকেণ্ড পর বুঝল অপারেটর, ওই লোক তো আবারও হাতুড়ি তুলছে! উল্টো দিকের দরজা খুলে উড়াল দিল সে, মুহূর্তে মিলিয়ে গেল আঁধারে। স্নেজহ্যামার রেখে সিটে বসে পড়ল রানা, ফোর্কলিফট এত দ্রুত রেল লাইন থেকে পিছিয়ে নিল যে, সামনের চাকাগুলো মাটি ছাড়ল। ওদুটো ধপ্ করে নামতেই যন্ত্রটা ঘুরিয়ে নিল। ববি যেদিকে গেছে, সেইদিকে চলেছে।

পাইপের গোলক-ধাঁধার দিকে ছুটছে ববি, কিন্তু হঠাৎ দেখল আগুন নিয়ে খেলা-১

ওদিক থেকে বেরিয়ে এসেছে এক সশস্ত্র প্রহরী। ইয়ার্ডের মাঝ দিয়ে আসছে জিপ, ওটার উপর দুই গার্ড। পিছন থেকে তেড়ে আসছে ডকের শ্রমিক, সংখ্যায় তিনজন। তবুও, এদের সঙ্গে লড়াই ঢের ভাল, অন্তত সঙ্গে অস্ত্র নেই এদের। থমকে দাঁড়াল ববি, ঘুরেই তেড়ে গেল লোকগুলোর দিকে।

মাত্র পাঁচ সেকেণ্ড পর সামনের জন হতভম্ব হয়ে দেখল, দেয়ালের মত চওড়া লোকটা উল্টো ঘুরে ঝাঁপিয়ে পড়ছে!

কাঁধ দিয়ে প্রচণ্ড এক গুঁতো দিল ববি তার পেটে। যেন ভেজা কাপড়ের পুতুল সে, বুক থেকে হউশ্ করে বেরুল বাতাস, ব্যথায় নীল হয়ে গেল মুখ, টলে পড়ল ববির কাঁধের উপর। এক ফোঁটা ভুল করেনি ববি, ওজনটা নিয়ে দ্বিতীয় শ্রমিকের উপর চড়াও হলো। প্রথমজনের মাত্র দু' ফুট পিছনে ছিল সে, থামতে পারল না—জোর সংঘর্ষে 'থ্যাপ' করে বিশ্রী আওয়াজ হলো। আহত শ্রমিককে কাঁধে রেখেছে ববি, ফলে দ্বিতীয়জনের তরফ থেকে জোর ধাক্কা এল না। হাত-পা পেঁচিয়ে মাটিতে পড়ল সবাই—ববি পড়ল উপরে।

প্রায় লাফিয়ে উঠে দাঁড়াল ও, পরেরজনের মুখোমুখি হবে। দু'জনের মাঝে মাত্র ছ'ফুট দূরত্ব। কিন্তু শেষ মুহূর্তে গোঁফওয়ালা বাঁক নিল, সঙ্গীদের পাশ কাটিয়েই থামল। চরকির মত ঘুরে ঝাঁপিয়ে পড়ল ববির পিঠের উপর—ডান কনুই ভাঁজ করে গলা পেঁচিয়ে ধরেছে।

একইসঙ্গে দুটো ঘটনা ঘটল—কড়া ব্রেক কষে পাশে থামল জিপ। পিছন থেকে ছুটে এসেছে সশস্ত্র গার্ড, এক পাশ থেকে পিস্তল তাক করল। একের পর এক নির্দেশ দিয়ে চলেছে। কী বলছে কে জানে!

স্থির হয়ে দাঁড়াল ববি, চারপাশ দেখল। হতাশ। এখন আর কোনও কৌশল ওকে মুক্ত করবে না। যে ধরনের ডাইভারশান চেয়েছে রানা, তা করা গেল না। জিপের উইণ্ডশিল্ডের দিকে

চাইল। বিজয়ীর চাহনি দিল ড্রাইভার, ব্যাটা যেন মস্ত এক ক্যারিবু হরিণ শিকার করেছে! এ বোধহয় গার্ডদের নেতা, জিপ থেকে নামতে গিয়েও থমকে গেল। বামে চেয়ে অদ্ভুত চেহারা করল, দু'চোখে দেখা দিয়েছে আতঙ্ক!

আঁধার চিরে ছুটে আসছে উজ্জ্বল দুটো হলুদ বাতি!

জিপ-গাড়িটা লেফট হুইলার, ড্রাইভিং সিটের দিকে ফোর্কলিফট তাক করল রানা, মেঝের সঙ্গে টিপে ধরল এক্সেলারেটর। ভয়ে চেষ্টা করে উঠল জিপের যাত্রীরা, লাফ দিয়ে নামতে চাইল, কিন্তু তার আগেই হাজির হয়েছে প্রতিপক্ষ। গার্ডদের নেতা সরতে পারল না, জিপ ফুটো করে ভিতরে ঢুকল ফোর্কলিফটের দুই দাঁড়া। মনে হলো গরম ছুরি দিয়ে নরম মাখন কাটছে। ড্রাইভিং সিটের সামনে ও পিছে ঢুকল ওগুলো। বডিতে প্রচণ্ড গুঁতো দিল লিফট, এক ধাক্কায় তিন ফুট ঠেলে নিয়ে গেল। উড়াল দিল জিপের আরোহীরা, ছিটকে গিয়ে পড়ল মাটিতে। জিপটাকে আরও দু'ফুট ছেঁচড়ে নিয়ে থামল ফোর্কলিফট, ব্যাক গিয়ার দিয়ে পিছিয়ে এল রানা।

সংঘর্ষের বিকট আওয়াজে থমকে গেছে সবাই। ববি টের পেল সামান্য ঢিল দিয়েছে গোঁফওয়ালা শ্রমিক। সুযোগ নিল ও, ধাক্কা দিয়ে লোকটার কজি উপরে ঠেলল, ডান কনুই চালাল ওর পাজরের উপর। তীক্ষ্ণ ব্যথা পেয়ে পিছাল লোকটা, গলা ছেড়ে দিয়েছে। ঘুরে দাঁড়াল ববি—শ্রমিক হাল ছাড়েনি, প্রায় পাশ ফিরে হাত ঘুরিয়ে ঘুসি ছুঁড়ল। কুঁজো হয়ে বাঁম হাতে কজিটা সরিয়ে দিল ববি, পরমুহূর্তে জ্যাব করল গুঁফোর বাঁমকানের নীচে। দু-হাঁটু গেড়ে বসে পড়ল লোকটা, চোখে ঘোলা দৃষ্টি।

আড়চোখে দেখল ববি, একটু দূরে সশস্ত্র সিকিউরিটি গার্ড। তবে ওর দিকে পিস্তল তাক করেনি, তার মনোযোগ কেড়ে নিয়েছে ফোর্কলিফট—সরাসরি তার দিকে ছুটেছে ওটা এখন! ভয় আগুন নিয়ে খেলা-১

পেয়ে ক্যাবের দিকে দুটো গুলি পাঠাল লোকটা, তারপর বিরাট এক লাফ দিয়ে গতিপথ থেকে সরে গেল।

আগেই মাথা নামিয়ে নিয়েছে রানা, গুলির আওয়াজ পেল। বুলেটগুলো শিস কেটে মাথার উপর দিয়ে গেল, ক্যাবের পিছন দেয়ালে ঠকঠক শব্দে গাঁথল। গার্ড পিছে পড়ে যেতেই স্টিয়ারিং হুইলে মোচড় দিল রানা, কুমোরের চাকার মত ঘুরল দ্রুতগতি লিফট—গার্ডের পিছনে ছুটল। একবার ঘাড় ফিরিয়ে দেখল গার্ড, আরও দ্রুত দৌড়াতে গিয়ে হোঁচট খেয়ে পড়ে গেল। সামনের দুই দাঁড়া নিচু করে নিল রানা, এবার ওর পালা!

গার্ডের উচিত ছিল গড়িয়ে সরে যাওয়া, কিন্তু উঠেই ছুটতে চাইল সে। ধড়মড় করে উঠবে, কিন্তু লিফটের একপাশের দাঁড়া ধাক্কা দিল ঘাড়ের পাশে, জ্যাকেটের ঘাড় ফুটো হলো। লিফট লিভার টানল রানা, দ্রুত উপরে উঠল দুই দাঁড়া। একটা থেকে ঝুলছে গার্ড, প্রাণপণে ছুঁড়ছে হাত-পা। পড়ে গেছে পিস্তল, দু'হাতে দাঁড়াটা ধরতে চাইল। নীচে পড়লে চাকার নীচে চেপ্টে মরবে। ফোর্কলিফট থামল রানা।

‘তুমি দেখি মানুষ মারবে!’ এইমাত্র লাফ দিয়ে ক্যাবে ঢুকেছে ববি, ছাতের রোল বার ধরে তাল সামলে নিল।

‘আগে জরুরি নিজেদের নিরাপত্তা, পরে অন্য কিছু।’ রেল লাইনের দিকে রওনা হলো রানা, মাঝারি গতিতে চলেছে ফোর্কলিফট। লোডিং ডক পেরনোর সময় কয়েক শ্রমিক তেড়ে এল। ফোর্কলিফটের সামনে মানুষ ঝুলতে দেখেছে। সাহায্য পাওয়ার জন্য চেঁচামেচি শুরু করল গার্ড।

ডানদিকে খানিকটা দূরে কিছু ড্রাম দেখেছে রানা, ফোর্কলিফট ওদিকে নিয়ে চলল। ববিকে বলল, ‘আমাদের বিমানের ফার্স্ট-ক্লাস প্যাসেঞ্জার ওখানে নামবেন।’

ড্রামের দেয়ালের দিকে ছুটল ফোর্কলিফট, দু'ফুট বাকি থাকতে কড়া ব্রেক কষল রানা। চাকাগুলো পিছলে গেছে, নীচের

ড্রামগুলোর সঙ্গে ধাক্কা খেয়ে থামল ফোর্কলিফট। গতি স্তব্ধ হওয়ায় দাঁড়া ছেড়ে উড়াল দিল গার্ড, দ্বিতীয় সারির ড্রামগুলোর উপর গিয়ে আছড়ে পড়ল। ফোর্কলিফট পিছিয়ে নিয়ে পুবে রওনা হলো রানা। কানে এল বিকৃত কণ্ঠস্বর, ড্রামের উপর থেকে সমানে ভয়ঙ্কর সব গালাগালি দিচ্ছে গার্ড।

তেলের ড্রাম পেরিয়ে রেল লাইন ধরে এগোল রানা, গ্যাস পেডাল টিপে ধরেছে মেঝের সঙ্গে। বিধ্বস্ত জিপের কাছ থেকে হইচই-এর শব্দ এল। জানালা দিয়ে দেখল রানা, দুই গার্ড পিছু নিয়েছে। গুলি করছে তারা। চারপাশে ছড়িয়ে পড়ছে প্রতিধ্বনি। ফোর্কলিফটের পিছনে ঠকাঠক বিঁধল কয়েকটা বুলেট। লিফটের ইলেকট্রিক মোটর গুঞ্জন তুলছে, ধাওয়াকারীদের পিছনে রেখে ছুটছে।

একটু দূরে চেইন লিঙ্কের চওড়া দরজা। রেল লাইনের পাশে সরল রানা, ফোর্কলিফটের চাকাগুলো রেইলে তুলে দিল। কয়েক সেকেন্ড পর ডান চাকা দুটো নামিয়ে আনল মাটিতে। বাম চাকাগুলো কাঠের টাই-গুলোর উপর দিয়ে লাফিয়ে চলেছে।

‘গুঁতো দেবে?’ রানাকে দেখল ববি, রোল বার দু’হাতে শক্ত করে ধরল।

গেটের ডানদিকে সরল রানা, আঁকড়ে ধরেছে স্টিয়ারিং হুইল। ফোর্কলিফটের ডান দাঁড়াটা গেটের স্টিলের খুঁটিকে ধাক্কা দিল, খসে পড়ল গেটের নীচের কজা। বেড়া ছিঁড়ে বেরিয়ে গেল বামদিকের দাঁড়া। এরপর চড়াও হলো ফোর্কলিফট, খুঁটি-দরজা উপড়ে নিয়ে বেরিয়ে এল বেড়ার বাইরে। এক পাশে ছিটকে পড়ল জালের দরজা, কাত হয়ে পড়তে গিয়েও সামলে নিল ফোর্কলিফট।

স্পার থেকে দু’পাশে নেমে গেছে নিচু জমি। কাত হয়ে ছুটছে ফোর্কলিফট। ইয়ার্ড থেকে বেরিয়ে আসবার আগে হেডলাইট নিভিয়ে দিয়েছে রানা। স্টিয়ারিং ঘুরিয়ে লাইনের আগুন নিয়ে খেলা-১

উপর উঠে এল, ফিরে চলেছে বেকারির দিকে।

ববি বলল, ‘আন্দ্রেই এখন এলে হয়, এটা নিয়ে বেশি দূরে যাওয়া যাবে না।’

জানালা দিয়ে চাইল রানা। ছেঁড়া গেটের দিকে ছুটে আসছে দুটো হেডলাইট। যারা আসছে, তাদের কাছে অস্ত্র থাকবে। সামনের রেল লাইনের উপর মনোযোগ দিল ও, খানিক পর বাঁক নিল। বামে সড়ক। দূরে সেই পোড়া দালান। খানিক পর ব্রেক কষে থামল রানা, স্টিয়ারিং হুইল ডানে এক মোচড় দিয়ে বলল, ‘বাকি পথ হাঁটব।’

ঢালু জমিতে নামল ওরা।

ঝুঁকে কী যেন খুঁজছে রানা, পছন্দ মত জিনিস পেয়ে আবার লাইনের উপর উঠল। লিফটের এক্সেলারেটরের উপর চাপিয়ে দিল চ্যাপ্টা পাথর, দ্রুত পিছিয়ে এল। হলুদ যন্ত্র নিঃশব্দে রেল লাইন পেরুল, পাথরের ঢাল বেয়ে আঁধারে মিলিয়ে গেল।

‘কাজের জিনিস ছিল,’ বিড়বিড় করে বলল ববি।

‘গোবি মরুভূমি পর্যন্ত যাক, কোনও উট-পালক পাবে—তুমি ফক্কা।’ পা বাড়াল রানা।

ঢাল বেয়ে উঠল ওরা, কালি-ঝুলি মাখা দেয়ালের পাশ দিয়ে উঁকি দিল—পার্কিং লট ফাঁকা। আসেনি আন্দ্রেই আভেতিসিয়ান।

‘একবার সভ্য জগতে ফিরি, দেখবে রাশানদের কী রকম গালি দিই,’ বলল ববি।

আধ মাইল দূরে দুটো হেডলাইট দেখা গেল, দ্রুত এগিয়ে আসছে।

‘আন্দ্রেই বোধহয়,’ বলল রানা।

অপেক্ষা করল ওরা। খানিক পর নুড়ি পাথরের উপর চিড়বিড় আওয়াজ তুলল গাড়ির চাকা, বাঁক নিয়ে পার্কিং লটে ঢুকল। লাল রঙের গাড়ি।

আড়াল থেকে বেরিয়ে এল রানা-ববি, পিছনের দরজা খুলে

উঠে পড়ল। আন্দ্রেই বলে উঠল, ‘গুড মর্নিং। কেমন ঘুরে এলেন?’ মুখ থেকে ভকভক করে গন্ধ আসছে ভোদকার।

‘ভাল,’ বলল রানা। ‘কিন্তু আমরা যাদের মেহমান ছিলাম, তারাও আমাদের সঙ্গে বাড়ি ফিরতে চায়।’

রেল লাইনের উপর দুটো হেড-লাইট, নাচতে নাচতে আসছে। গাড়ি দ্রুত ঘুরিয়ে নিল আন্দ্রেই, ছুটল শহরের দিকে। কিছুক্ষণ পর অসংখ্য গলি-ঘুঁচির ভিতর ঢুকল। আধ ঘণ্টা পর থামল হোটেলের পিছনে।

‘গুড নাইট,’ জড়ানো স্বরে বলল আন্দ্রেই। ‘ঘরে ফিরে এখন ঘুমিয়ে পড়ুন, কাল শুনব কী দেখলেন।’

‘অনেক ধন্যবাদ, আন্দ্রেই,’ বলল রানা।

নেমে পড়ল ওরা।

দরজাটা বন্ধ করে বলল ববি, ‘সাবধানে চালাবেন।’

‘তা তো বটেই!’ তীব্র গতিতে ছুটল গাড়ি, রাবার পুড়িয়ে মোড় নিল। এবার সত্যিই বাড়ি ফিরছে রাশান।

একুশ

স্টাডিতে বসে সাইসমিক রিপোর্টের দিকে চেয়ে রয়েছে গ্রেসি, দৃষ্টি যেন চলে গেছে হাজার মাইল দূরে। স্লান-বিমর্ষ চেহারা, তাতে মিশেছে খানিকটা জেদ ও রাগ। এডির মৃত্যু ভীষণ ঝাঁকি দিয়েছে ওকে, তবে মাথা ঠাণ্ডা হয়ে আসছে এখন। ছোট ভাইয়ের মত ছিল এডি, অমন মৃত্যু মেনে নেয়া খুব কঠিন। আরও অসহ্য লেগেছিল বলোম্যা মেয়েটি গতরাতে যখন উঠানে আগুন নিয়ে খেলা-১

বেরিয়ে এসে হিসহিস করে বলেছিল, ‘এখন থেকে কথা মত চলবে, নইলে মরবে তুমিও!’ আগুন জ্বলছিল তার চোখে।

এডিকে খুন করেছে যে প্রহরী, তাকে ইঙ্গিত দিতেই নিষ্ঠুর লোকটা ওকে টেনে-হিঁচড়ে ফিরিয়ে নিয়ে এসেছে ওর ঘরে, দরজা বন্ধ করে দিয়ে গেছে।

তারপর পিস্তল হাতে এক লোক পাহারা দিয়েছে উইলসন আর ওকে। সর্বক্ষণ নজর বন্দি করে রেখেছে। আড়চোখে চাইল গ্রেসি, স্টাডির দরজায় দাঁড়িয়ে রয়েছে পাথর-মুখো দুই প্রহরী। সিক্কের রঙিন টিউনিকের কারণে মনে হয় তারা সাধারণ বেয়ারা, তবে গতরাতে ও দেখেছে, আসলে লোকগুলো প্রশিক্ষণ-প্রাপ্ত নিষ্ঠুর খুন।

পাশেই বসেছেন উইলসন, আহত পা সামনের এক চেয়ারে রেখে জিওলজিকাল রিপোর্ট দেখছেন। এডির মৃত্যু তাঁকে হতভম্ব করেছে, তবে নিজেকে দ্রুতই সামলে নিয়েছেন। খুব সম্ভব কাজে ডুবে গিয়ে আবেগ সামলে রাখছেন, ভাবল গ্রেসি।

‘ওরা যা চাইছে সে-কাজ করাই ভাল,’ মৃদু স্বরে বললেন উইলসন। ‘একমাত্র কাজই পারে আমাদের বাঁচিয়ে রাখতে।’

উনি হয়তো ঠিকই বলেছেন, ভাবল গ্রেসি। রিপোর্টে চোখ রাখল। না জানা কোনও সমভূমির জিওলজিকাল অ্যাসেসমেন্ট। বিস্তৃত বেসিনে স্যাণ্ডস্টোন ও লাইমস্টোনের ফাটল, তার উপর মাটি ও নুড়িপাথর বিছিয়ে রয়েছে। যে ধরনের স্ট্রিটিগ্রাফি তাতে মনে হয় মাটির নীচে পেট্রোলিয়ামের রিজার্ভ থাকবে।

উইলসনকে বলল গ্রেসি, ‘দেখে তো মনে হয় প্রচুর ত্রুড় আছে, জায়গাটা যেখানেই হোক।’

মোড়ানো প্রিন্টআউট টেবিলের উপর বিছালেন উইলসন, ‘এটা দেখো।’ মাটির বেশ কয়েকটা স্তরের সেডিমেন্ট ওখানে দেখানো হয়েছে। এ চার্ট তৈরি করেছে কোনও সাইসমিক সার্ভে টিম, মাটিতে আঘাত করবার ফলে সাউণ্ড রিফ্লেকশন পেয়ে

রেকর্ড করেছে। ভাল ভাবে চাট দেখবার জন্য উঠে দাঁড়াল গ্রেসি, চোখে ফুটে উঠেছে আগ্রহ। আগে কখনও এ ধরনের সাইসমিক ইমেজ দেখেনি। ওর দেখা বেশিরভাগ সাবসার্ফেস প্রোফাইলগুলো ছিল ওপেক ও নোংরা মত, যেন বৃষ্টি-ঝড়ের পানিতে ধুয়ে চলেছে কালির ছোপ। কিন্তু এই ইমেজ কেমন যেন ভাঙা ভাঙা, সাব-সার্ফেসের স্তরগুলো চাকা চাকা।

‘অদ্ভুত তো,’ বলল গ্রেসি। ‘বোধহয় ব্যবহার করা হয়েছে নতুন কোনও টেকনোলজি। আগে কখনও এত নিখুঁত ভাবে মাটি কাটতে দেখিনি।’

‘কোনও সন্দেহ নেই, এ ধরনের যন্ত্র আজ পর্যন্ত আমরা কোনও ফিল্ডে পাইনি। কিন্তু এটা দেখো...’ পৃষ্ঠার নীচের এক কোণে বালবের মত কী যেন দেখালেন উইলসন।

ঝুঁকে পড়ল গ্রেসি। ‘দেখে মনে হয় চমৎকার ক্লাসিক অ্যাণ্টিক্লিনাল ট্র্যাপ।’ জিনিসটা সেডিমেন্টের স্তর দিয়ে তৈরি, উল্টো গম্বুজের মত। জিওফিসিস্টরা এমন জিনিসই খোঁজেন। বেশিরভাগ সময় ওখানে পাওয়া যায় পেট্রোলিয়ামের ডিপোজিট।

‘পরিবেশ বলছে ওখানে ক্রুড পাওয়া যাবে, তা-ই না?’ বললেন উইলসন।

‘ড্রিল ভেজার আগে কিছুই বলা যায় না, তবে ইমেজ তো বলছে সম্ভাবনা খুবই বেশি।’

‘ওটার মত ইমেজ এখানে রয়েছে আরও ছ’টা। এগুলোর ভিতর থাকতে পারে বিপুল রিজার্ভ।’

‘কমপক্ষে ছ’টা বালব। সমস্ত রিপোর্ট এখনও দেখিনি, তাতেই ঘুরছে মাথা। যদি পাওয়া যায়, শুধু একটাতেই রয়েছে কমপক্ষে দুই বিলিয়ন ব্যারেল। অন্য ছয় ট্র্যাপে আরও বারো বিলিয়ন। এটা তো মাত্র একটা তেল-ক্ষেত্র। পুরো এলাকা জুড়ে কত হাজার কোটি ব্যারেল রয়েছে কে জানে!’

‘সত্যিই অবিশ্বাস্য। কিন্তু ক্ষেত্রটা কোথায়?’

আগুন নিয়ে খেলা-১

‘জানার উপায় নেই,’ কাঁধ ঝাঁকাল গ্রেসি। ‘জিওগ্রাফিকাল রেফারেন্সগুলো মুছে দিয়েছে ডেটা থেকে। শুধু বলতে পারি এলাকাটা মাটির নীচে, টপোগ্রাফি বলছে সমতল ভূমি, উপরের অংশে স্যাণ্ডস্টোন।’

‘বলতে চাইছ এটা নর্থ সি হলেও অবাক হওয়ার কিছু নেই?’

‘বলছি: আমরা জানি না এটা কোথায়।’

চায়ে চুমুক দিলেন বিশালদেহী রেরদোরভ। ‘গভীর রাতে ফোর্ক-লিফট নিয়ে তেড়ে চলেছেন আপনারা, ফোর্কের নাকে ঝুলছে বরজিন কোম্পানির সিকিউরিটি গার্ড?’ হেসে ফেললেন। ‘দারুণ দেখিয়েছেন কিন্তু!’

‘চুপি-চুপি ঢুকে বেরিয়ে আসতে চেয়েছি, কিন্তু গাড়ি যখন পেলাম, ছাড়িনি,’ ক্যাফে টেবিলের অপর প্রান্ত থেকে বলল ববি। ‘রানা অবশ্য সিটে বসতে দেয়নি আমাকে।’

‘ক্যাবে যে এঁটেছেন এ-ই তো বেশি!’ বললেন রেরদোরভ।

কড়া চোখে রাশানকে দেখল ববি, তবে তর্কে গেল না। ‘ওদের ব্যবস্থাপনা বোধহয় মাথা চুলকে ভাবছে ফ্যাসিলিটির ভিতর দুই বিদেশি কেন ঢুকল। আমাদের কপাল খারাপ সার্ভে টিমের ব্যাপারে কোনও প্রমাণ যোগাড় করতে পারিনি।’

‘সন্দেহজনক জিনিস বলতে পেয়েছেন সুড়ঙ্গ খুঁড়বার এক যন্ত্র,’ বললেন রেরদোরভ, রানার দিকে চাইলেন। ‘বৈকাল হুদেও একটা দেখেছেন আপনারা।’

‘মেশিনটা হয়তো চোরাই, গোপনে এ দেশে নিয়ে এসেছে,’ বলল ববি। ‘শুনেছি মঙ্গোলিয়ায় হাই টেকনোলজি আসে না। বোধহয় কোম্পানি চায়নি সরকার তাদের যন্ত্রটা দেখুক।’

‘হতে পারে,’ বলল রানা।

‘রেরদোরভ, কিডন্যাপের ব্যাপারে কিছু জানা গেল?’ জানতে চাইল ববি। বাটার রোলে কামড় বসাল।

চোখ তুলে আন্দ্রেইকে দেখতে পেলেন রেরদোরভ, হোটেলের রেস্টুরেন্টে ঢুকছে। দ্রুত পায়ে এসে চতুর্থ চেয়ারটি দখল করল সে, ঠোঁটে চওড়া হাসি। বন্ধুর দিকে চাইলেন রেরদোরভ, ‘আমাদের স্থানীয় এক্সপার্ট বোধহয় কিছু বলতে পারবে।’

‘গতরাতে ভাল ঘুমিয়েছেন নিশ্চয়ই?’ রানা ও ববির দিকে চাইল আন্দ্রেই।

আস্তু করে মাথা ঝাঁকাল রানা-ববি।

‘আমরা এই মাত্র কিডন্যাপ তদন্ত নিয়ে কথা বলছিলাম, বললেন রেরদোরভ। ‘পুলিশ কিছু জানাল?’

‘না।’ গম্ভীর হয়ে গেল আন্দ্রেই। ‘জাতীয় পুলিশকে এখনও কেসটা দেয়া হয়নি। তদন্তের অনুরোধ করা ফাইল আটকে আছে এখন জাস্টিস মিনিস্ট্রিতে। দুঃখিত, আমি বলেছিলাম বরজিন অয়েলের কোনও হাত নেই সরকারের ভিতর। কিন্তু আমরা এখন জানি কর্তৃপক্ষকে কোনও এক পর্যায়ে বিশাল অঙ্কের ঘুষ দেয়া হয়েছে।’

‘এদিকে মস্ত বিপদে রয়েছে গ্রেসি আর অন্যরা,’ বলল ববি।

‘আমাদের এমব্যাসি সব ধরনের অফিশিয়াল চ্যানেলগুলো কাজে লাগিয়েছে,’ বলল আন্দ্রেই। ‘এ ছাড়াও কিছু আন-অফিশিয়াল পথেও কাজ করছি। চিন্তা করবেন না। আমরা ওদের খুঁজে বের করব।’

চা শেষে কাপ নামিয়ে রাখল রেরদোরভ। ‘বুঝতে পারছি কিছু করার নেই আপাতত। মঙ্গোল কর্তৃপক্ষ নিজেদের নিয়ম মত চলে। এমব্যাসি বারবার তাগাদা দিলে শেষ পর্যন্ত তদন্তে নামবে, ঘুষ যা-ই দেয়া হোক না কেন। আমলা-তন্ত্রের কাজ শেষ হওয়া পর্যন্ত আমাদের চুপচাপ অপেক্ষা করা উচিত। এদিকে দেশে ফিরতে হবে আমাকে, ইরকুতস্কে গিয়ে দ্যানিয়া জাহাজের ক্ষতি সম্বন্ধে রিপোর্ট না দিলেই নয়। আমাদের প্লেনের টিকেটও কেটে ফেলেছি।’

আগুন নিয়ে খেলা-১

আন্দ্রেইর দিকে চাইল রানা-ববি, তারপর রেদোরভকে দেখল।

‘আমরা অন্য পথে ফিরব, রেদোরভ,’ বলল রানা।

‘আমেরিকা বা বাংলাদেশে ফিরছেন? ভেবেছিলাম আপনারা সাইবেরিয়া থেকে কার্ককে নিয়ে ফিরবেন।’

‘আপাতত মঙ্গোলিয়া ছাড়ছি না।’

‘আপনার কথা ঠিক বুঝলাম না। তা হলে কোথায় যাবেন?’

রানার কুচকুচে মণিদুটো নিবদ্ধ হলো রেদোরভের চোখে।

‘খুব সুন্দর এক এলাকা, নাম সানাদু।’

বাইশ

আন্দ্রেইর ইন্টেলিজেন্স নেটওয়ার্ক আবারও কাজে এল। মঙ্গোলিয়ায় গণতন্ত্র এসেছে, কিন্তু সরকারে সমাজতন্ত্রে বিশ্বাসী বহু লোক রয়ে গেছে। মিনিস্ট্রি অভ ফরেইন অ্যাফেয়ার্স-এর এক নিচু পদস্থ অফিসার আন্দ্রেইকে জানাল, চায়নিজ ডেলিগেশন আসছে।

উলানবাটোরের সীমানায় নতুন এক সোলার এনার্জি প্লান্ট পরিদর্শন ও উদ্বোধন করবেন চায়নিজ বাণিজ্য মন্ত্রী। তাঁর এখানে আসবার আরেকটি জরুরি কারণ, বরজিন অয়েল কনসোর্টিয়ামের প্রেসিডেন্টের সঙ্গে দেখা করবেন। দু পক্ষের সাক্ষাৎ হবে সানাদু-তে, কোম্পানি-প্রধানের বাসভবনে।

‘চায়নিজ গাড়ি-বহরে জায়গা করে নেবেন, সহজেই জালাইর তেয়ুজিনের কম্পাউণ্ডে ঢুকে পড়বেন,’ বলল আন্দ্রেই। ‘এর পর

কী করবেন আপনারাই জানেন।’

‘আপনার কথা ঠিক বুঝলাম না,’ বলল ববি। ‘আমরা চায়নিজ ডেলিগেশনের সঙ্গে মিশি কী করে? আমি শ্বেতাঙ্গ, রানা বাঙালি।’

‘মিশতে হবে না আপনাদের, মঙ্গোল রাষ্ট্রীয় এস্কাটের সঙ্গে ঢুকে পড়বেন।’

এক জ্র উঁচু করল ববি। ব্যাখ্যা আশা করছে।

আজই আসছেন মন্ত্রী, জানাল আন্দ্রেই। বিকেলে ফরেইন অ্যাফেয়ার্স মিনিষ্ট্রির মন্ত্রী ও তাবৎ অফিসার আনুষ্ঠানিক ভাবে তাঁকে অভ্যর্থনা দেবেন। কিন্তু আগামী কাল সকালে সোলার এনার্জি প্লান্ট উদ্বোধন হয়ে গেলেই ডেলিগেশন রওনা হবে বরজিন হেডকোয়ার্টারের উদ্দেশে। তারা অনুরোধ করায় সঙ্গে যাবে মঙ্গোলিয়ান সিক্রেট সার্ভিসের একটা টিম।

‘অর্থাৎ আমরা মঙ্গোলিয়ান সিক্রেট সার্ভিসের লোক?’ জানতে চাইল রানা।

‘এ কাজ ন্যাশনাল পুলিশের। তাদের দু’জন কিছু টাকা পেয়ে বিশ্রাম করবে, সে-জায়গা নেবেন আপনারা। আসল লোক দুজন সোলার এনার্জি প্লান্ট থেকে বাড়ি ফিরবে। সবার সঙ্গে রওনা হবেন আপনারা। ...একটা কথা বলে রাখি, ওখানে আমাদের নিজেদের লোক পাঠাতে পারি। আপনারা ঝুঁকি না নিলেও চলে।’

‘না, আমরা যেতে চাই,’ বলল রানা। ‘এখন থেকে বাকি কাজ আমাদের। অনেক কষ্ট করেছেন, ধন্যবাদ।’

‘কেউ যদি বলে এসব করে বেড়াই, কখনও স্বীকার করব না, আশা করি সোর্সের কথা আপনারাও ফাঁস করবেন না,’ চওড়া হাসি ফিরে এল আন্দ্রেইর চোঁটে।

‘আমাদের উপর নিশ্চিন্তে বিশ্বাস রাখতে পারেন,’ বলল ববি।

‘তা হলে তো খুবই ভাল। মনে রাখবেন আপনারা সাধারণ পুলিশ, নিজেদের জাহির করবেন না। ওখানে যদি কিডন্যাপড মানুষগুলোকে দেখেন, বা বরজিন সংগঠনের বিরুদ্ধে কোনও প্রমাণ পান, আমরা মঙ্গোল কর্তৃপক্ষের সাহায্য নেব।’

‘বেশ।’ আন্দ্রেইর দিকে চাইল রানা। ‘ঘুষ হিসেবে কত দিয়েছেন, বলুন। ওটা আমাদের দেয়া উচিত।’

‘ঘুষ? এ বড় বিশী শব্দ। বাজে। খুবই বাজে।’ দুঃখিত চেহারা করল আন্দ্রেই, তবে দু’চোখে হাসি চকচক করছে। ‘আমি তথ্য ব্যবসা করে বেঁচে আছি। আপনারা যদি বরজিন অয়েল কনসোর্টিয়াম, জালাইর তেমুজিন ও তার সঙ্গীদের ব্যাপারে জরুরি তথ্য পান, শেয়ার করেন আমার সঙ্গে, তাতেই চিরকৃতজ্ঞ থাকব। পুলিশ দুজন খুশি, আপনারা খুশি, আমিও খুশি—একে বলে জীবনের আনন্দ। ...আশাকরি আগামী রাতে ফিরছেন আপনারা।’

‘আপনার জন্য ঢের তথ্য নিয়ে,’ বিড়বিড় কুরল ববি।

‘কিছু বললেন?’ একটু ঝুঁকে এল আন্দ্রেই, ববি মাথা নাড়তেই বলল, ‘আরেকটা ব্যাপার, একটু খেয়াল রাখবেন, যেন চিনা মন্ত্রী বেঁচে থাকেন।’

ট্যাক্সি ক্যাব নিয়ে সোলার এনার্জি ফ্যাসিলিটিতে হাজির হলো রানা-ববি। এক ঘণ্টা পর পৌঁছবেন চিনা মন্ত্রী। গেটে প্রায় ঘুমন্ত এক গার্ডকে পাওয়া গেল। দৈনিক পত্রিকার দুটো নকল পরিচয়-পত্র দিয়েছে আন্দ্রেই, ওগুলো দেখিয়ে ভিতরে ঢুকে পড়ল ওরা। একটা পাওয়ার কোম্পানি এক্সপেরিমেন্টের জন্য দশ একর জমিতে তৈরি করেছে বৈদ্যুতিক প্লান্ট। কয়েক ডজন কালো রঙের সোলার প্যানেল ওখানে কাজ করছে। পাশেই কয়লা চালিত পাওয়ার প্লান্ট, একদিন ওটার জায়গা নেবে সোলার প্যানেলের ফ্যাসিলিটি—আপাতত ছোটখাটো কোনও

স্টেডিয়ামের বাতি জ্বলবে। মঙ্গোলিয়ায় বছরে গড়ে দু'শ' ষাট দিন সূর্য পাওয়া যায়। সূর্য না হয় পেল, কিন্তু সোলার টেকনোলজি কিনে ব্যবহার করবে ক'জন? বিদ্যুৎ কেনার সাধ্য সাধারণ মানুষের নেই।

তাড়াহুড়ো করে ফ্যাসিলিটির মাঝখানে দাঁড় করানো হয়েছে মঞ্চ। ওখানে বাণিজ্য মন্ত্রী, বেশ কয়েকজন সরকারী কর্মকর্তা ও পাওয়ার প্লান্টের একযিকিউটিভরা অপেক্ষা করছেন, সবাই নার্ভাস—এই বুঝি এলেন চিনা বাণিজ্যমন্ত্রী। ভুলেও ওদিকে গেল না রানা-ববি, গেটের কাছে এক উঁচু প্যানেলের আড়ালে থামল। মঞ্চ থেকে দূরে দাঁড়িয়ে দেখছে সব সিকিউরিটি গার্ড, তাদের মতই চিনা স্পোর্টস কোট পরেছে রানা-ববি, চোখে কালো সানগ্লাস, মাথার উপর উলের বেরেট হ্যাট। বেশিক্ষণ অপেক্ষা করতে হলো না, গেট পেরিয়ে ভিতরে ঢুকল গাড়ি-বহর, মঞ্চের সামনে গিয়ে থামল।

একদম পিছনের গাড়িটা দেখল রানা-ববি। ওদের কপালে জুটবে ওই ঝরঝরে সবুজ রাশান জিপটা। বহরের সামনে ও পিছনে দুই গাড়িতে সিক্রেট সার্ভিসের লোক রয়েছে। মাঝখানে নতুন টয়োটা ল্যাণ্ডক্রুজার। ওটা থেকে নামলেন মন্ত্রী ও তাঁর সহযোগীরা। সঙ্গে সঙ্গে সিক্রেট সার্ভিসের একটা দল ঘিরে ফেলল তাঁদের, মঞ্চের দিকে নিয়ে চলল।

প্রাচীন গাড়ির উপর থেকে চোখ সরাল রানা। একটা দীর্ঘশ্বাস ছেড়ে বলল, 'ওটা আমাদের।'

'স্যাটালাইট রেডিও বা ন্যাভ সিস্টেম আশা করিনি, কিন্তু... চাকাগুলো কি এ শতাব্দীর বলে মনে হয়?' বিড়বিড় করে বলল ববি, মাথা নাড়ছে।

গাড়ির দিকে মনোযোগ দিল রানা। ওটা থেকে নেমে পড়েছে দু'জন, আনমনে হাঁটতে শুরু করল। আধ মিনিট পেরুনের আগেই হারিয়ে গেল সোলার প্যানেলের জঙ্গলে।

এদিকে অভ্যর্থনা দেয়া চলছে চায়নিজ মন্ত্রীকে। সবার মনোযোগ এখন ওদিকে। আড়াল ছেড়ে বেরিয়ে এল রানা ও ববি, অলস পায়ে গিয়ে উঠল জিপ-গাড়ির সামনের দুই সিটে।

ড্যাশবোর্ডে মোচড়ানো এক ম্যাপ পেয়ে ববির কোলে ফেলল রানা। ‘এই যে তোমার ন্যাভ সিস্টেম।’

‘রেডিও কই? যোগাযোগের মাধ্যম না-ই বা থাকল, একটা সাধারণ রেডিও তো থাকবে? আমি গান গাইলে কি সহজে পারবে?’ ম্যাপের উপর চোখ রাখল ববি।

খানিক দূরে মঞ্চে অভ্যর্থনা কমিটির সঙ্গে পরিচিত হচ্ছেন মন্ত্রী ব্যাং কুইজিয়ন। সবার সঙ্গে করমর্দন শেষে তাঁকে নিয়ে যাওয়া হলো সোলার প্যানেলগুলোর দিকে। মাত্র দশ মিনিটে পরিদর্শন শেষ হলো, সবাইকে ধন্যবাদ দিয়ে গাড়িতে উঠে পড়লেন কুইজিয়ন।

‘এত তাড়াতাড়ি দেখা শেষ?’ ড্র কুঁচকে ফেলল ববি। ‘পিঁপড়ের কামড় লাগল বিচিত্রে?’

‘সানাদু যেতে ব্যস্ত। এসব দেখার চেয়ে অনেক জরুরি ওখানে যাওয়া।’

‘কেন কে জানে!’

মাথা নিচু করে সিটে বসল ওরা, গাড়ি-বহর রওনা হতেই পিছনে চলল। ফ্যাসিলিটির ভিতর এক পাক ঘুরে বেরিয়ে এল সদর সড়কে। বায়ানবুর্খ নুরু পাহাড়ের বাঁক ঘুরে পুবে চলল। এই পাহাড়ের চারটে চূড়ার মাঝখানে উপত্যকা জুড়ে উলানবাটোর শহর। বিখ্যাত চার চূড়া যেন সতর্ক দৃষ্টি রেখেছে চারদিকে। কিছুক্ষণ পর শহর পিছনে পড়ল। পাহাড়ি এলাকা। অজস্র পাইন ও বোপঝাড়। চারপাশে গাছপালার সবুজ ও পাথুরে পাহাড়ের ধূসর। তারপর পাহাড়ি পথ শেষ হলো, শুরু হলো ঢেউ খেলানো তৃণ-ভূমি। পুরো মঙ্গোলিয়ার মাঝ দিয়ে এই সবুজের কোমর-বন্ধ, যতদূর চোখ যায় একটি গাছও নেই। শুধু

চারণ-ভূমি। শেষ গ্রীষ্মের হাওয়া ঘন সবুজ ঘাস দুলিয়ে দেয়, মনে হয় কোনও শান্ত সাগরে ঢেউ খেলছে।

গাড়ি-বহর হাঁটের রাস্তার উপর দিয়ে চলেছে। কিছুক্ষণ পর সেটাও থাকল না, শুকনো মাটির পথ শুরু হলো। তারপর ঘাসজমির উপর রইল শুধু দুটো গভীর ক্ষতচিহ্ন। হ-হ হাওয়ায় সামনের গাড়িগুলো একগাদা শুকনো ধুলো তুলছে। পিছনের গাড়ি ড্রাইভ করছে রানা, সামনের দিক ভাল করে দেখবে, সে উপায় নেই।

একের পর এক ঢেউ খেলানো টিলা, তার উপর বিছিয়ে রয়েছে কচি ঘাসের সবুজ চাদর। ওগুলো মাড়িয়ে দক্ষিণ-পূবে চলেছে গাড়ি-বহর। তিন ঘণ্টা চলবার পর উপরে উঠতে লাগল পথ, সামনে এক গুচ্ছ পাহাড়। তার মাঝ দিয়ে গেছে সরু পথ। কিছুক্ষণ পর শুরু হলো এক গিরিখাত। ওখানে অতি সাধারণ এক উঁচু ইম্পাতের দরজা, খোলা। দু'পাশে ছাঁটা ঝোপঝাড়ের সারি, তার ভিতর দিয়ে এঁকে-বেঁকে গেছে পথ। মাইল দুয়েক চলবার পর সামনে পড়ল এক স্রোতস্বিনী নদী। উপরে কংক্রিটের সেতু। ওটা পেরুনোর পর তীক্ষ্ণ বাঁক নিতে হলো। সামনে সুউচ্চ এক প্রাচীর। পিচ ঢালা পথের শেষে প্রকাণ্ড লৌহ-কপাট খোলা, দু'পাশে দু'জন করে প্রহরী। কোর্তা পরা পাথরের মূর্তি যেন। হাতে রাশান এ.কে ফোর্টিসেভেন।

ডেলিগেশনের গাড়িগুলো থামতেই দু'জন এগিয়ে এল দু'পাশ থেকে।

‘আমরা নিশ্চয়ই মন্ত্রী পিছু নেব না?’ জানতে চাইল ববি।

‘ভুলেও না!’ তাগাদা দিল রানা, ‘নামো জলদি। একটা চাকার হাওয়া...’

‘ঠিক আমার মনের কথা,’ লাফ দিয়ে নামল ববি, পিছনের বাম চাকার পাশে থামল, বাঁকে পড়ে খুলে ফেলল ভালভ স্টেম ক্যাপ—আরেক হাতে ম্যাচের কাঠি। ওটা দিয়ে স্টেমের ভিতর আগুন নিয়ে খেলা-১

গুঁতো দিতেই হুঁশ শব্দে বেরুতে লাগল বাতাস। দশ সেকেণ্ডেই বসে গেল চাকা। ক্যাপটা জায়গা মত বসিয়ে আবার প্যাসেঞ্জার সিটে এসে উঠল ববি। ততক্ষণে গেট খুলে গেছে।

কম্পাউণ্ডে ঢুকে পড়ল গাড়িগুলো, কিন্তু গেট পেরিয়ে থামল রানা। এগিয়ে এল এক প্রহরী, চোখে প্রশ্ন। বুড়ো আঙুল দিয়ে পিছন দেখাল রানা। লেপ্টে যাওয়া চাকা এক মুহূর্ত দেখল লোকটা, তারপর মাথা দোলাল। আরেক প্রহরীকে কী যেন বলছে। সে লোক হাত তুলে কম্পাউণ্ডের আরেকদিক দেখাল। চারপাশ দেখবার ফাঁকে এগোল রানা।

হাজার বছর আগের সেই অদ্ভুত সুন্দর সানাদু কেমন ছিল, জানে না রানা। তবে বামে মার্বেলের প্রাসাদ ও ফুলের বাগিচা দেখে মুগ্ধ হলো। প্রাসাদের দিকে চলেছে চিনা মন্ত্রীরা গাড়ি, দু'পাশে ধবধবে সাদা দুটো ঘোড়া নিয়ে দুই সওয়ারী। পোর্টিকো পেরুল তারা। সাদা রঙ করা কাঠের খুঁটিতে চিনের পতাকা, টানা হাওয়া পেয়ে পতপত করে উড়ছে। দু'পাশে ন'টা খুঁটিতে ঝুলছে পতাকার বদলে কিছু। যেন সাদা কোনও শেয়ালের লেজ। ভবনের সামনে গিয়ে থামল ডেলিগেশন। অভ্যর্থনা দেয়ার জন্য বারান্দায় দাঁড়িয়েছে কয়েকজন। জালাইর তেমুজিন কোনজন হতে পারে, ভাবল রানা। এত দূর থেকে কাউকে চেনা অসম্ভব।

‘বলোমার্মা ওখানে থাকতে পারে,’ বলল ববি।

‘পারে। পুরুষদের মাঝে একটা মেয়েকেও দেখছি।’

ডানে বাঁক নিয়েছে পথ, বামে খানিক দূরে বিরাট এক এলাকা নিয়ে লাল ইঁটের দুই তলা দালান। এক প্রান্তে স্টিল দিয়ে তৈরি বিশাল গেট, গ্যারাজের। ওটার ভিতর ঢুকে পড়ল রানা, সিমেন্টের মেঝের উপর থ্যাভড়-থাভড় আওয়াজ করছে জিপ-গাড়ির চেস্টে যাওয়া টায়ার। গাড়ি নিয়ে টুলস্ চেস্টের পাশে রাখল রানা। প্রায় দৌড়ে এল গ্রিজ মাথা এক মেকানিক,

দু'হাত নেড়ে কী যেন বলছে চোঁচিয়ে ।

পাত্তা দিল না রানা, ঠোঁটে ঝুলছে লাজুক হাসি ।

বড় করে শ্বাস নিয়ে বলল ববি, 'ফুস্‌স্‌স্‌!' দেখাল চ্যাপ্টা চাকার দিকে ।

কয়েক পা সরে দেখল মেকানিক, তারপর মাথা দুলিয়ে রওনা হলো টুল চেস্টের দিকে । ফিরে এল ফ্লোর জ্যাক নিয়ে ।

'চলো, চারপাশ ঘুরে দেখি,' গাড়ি থেকে নেমে পড়ল রানা ।

পিছু নিল ববি, রানার পাশে হাঁটতে শুরু করল । গ্যারাজের দরজার সামনে গিয়ে থামল দু'জন । এমন ভঙ্গি নিল, চাকা পাল্টানোর ফাঁকে চারপাশটা দেখছে । মেকানিকের উপর চোখ নেই ওদের, খেয়াল করছে গ্যারাজের ভিতরটা । সামনের দিকে প্রায় নতুন কয়েকটা ফোর-হুইল-ড্রাইভ, এ ছাড়া প্রকাণ্ড ঘরে বিরাট সব ট্রাক আর এক্সকেভেশন ইকুইপমেন্ট । একটা মেইনটেনেন্স কার্টের উপর ডান পা রাখল ববি, চেয়ে রইল ধুলোভরা বাদামি রঙের এক প্যানেল ট্রাকের দিকে । 'ওই কাভার্ড ট্রাক,' নিচু স্বরে বলল, 'বৈকাল হুদে ওরকম একটা দেখেছি ।'

'আমিও । ওদিকে দেখো । ওই ফ্ল্যাট বেড ট্রাকটা চেনা চেনা লাগছে?' একটু দূরের বিরাট ট্রাক দেখাল রানা ।

ওটায় কোনও মালামাল নেই, কিন্তু পিঠের উপর পড়ে রয়েছে বড় এক ক্যানভাস ও কিছু দড়ি ।

'ওটাই কি সেটা?' বিড়বিড় করল ববি ।

'বোধহয় ।' বাইরে চাইল রানা । পাশের দালানের দিকে ইশারা করল । 'আমরা আপাতত নিরাপদ । চলো যাই ওদিক থেকে ঘুরে আসি ।'

চারপাশের সবই চেনা, এমন ভাব নিয়ে রওনা হলো দু'জন, দ্রুত পায়ে চলল দালানের দিকে । বড় এক লোডিং ডক পেরিয়ে সামনে পড়ল কাঁচের এক দরজা । ভেবেছিল সামনে অফিসের

আগুন নিয়ে খেলা-১

রিসেপশন থাকবে। তা নেই। পড়ে আছে প্রকাণ্ড এক ওঅর্ক
বে। চারপাশে কেউ নেই। ওটা পেরিয়ে ঢুকে পড়ল ওরা একটা
ডকে। বেশ কিছু ওঅর্ক বেঞ্চের উপর টেস্ট ইকুইপমেন্ট মেশিন
ও ইলেকট্রনিক সার্কিট বোর্ড। সাদা ল্যাব কোট পরা দু'জন
লোক নিজ কাছে ব্যস্ত। তাদের একজন আড়চোখে চাইল,
ওয়ায়্যার-রিম্‌ড চশমা নাকের উপর তুলে উঠে দাঁড়াল, চোখে
ঘোর সন্দেহ।

‘এত সন্দেহ কীসের... আমি তোঁর বোনকে ভাগিয়ে নেব
রে, ব্যাটা?’ বিড়বিড় করল ববি।

‘স্ক্রালাতে?’ নরম করে জানতে চাইল রানা।

এক মুহূর্ত রানাকে নিরীক করল চশমা, তারপর মাথা কাত
করে একটা দরজা দেখাল। রাশান ভাষায় বলল, ‘ওই করিডোর
দিয়ে চলে যান।’ দ্বিতীয়বার চাইল না, বেঞ্চে বসে নিজের কাজে
ডুবে গেল।

দুই মঙ্গোলকে পাশ কাটিয়ে দরজা দিয়ে ঢুকে পড়ল রানা-
ববি। ‘নানান ভাষা শেখা উচিত আমার,’ বলল ববি।

বিশ ফুট চওড়া দীর্ঘ করিডোর। দু’পাশের দেয়ালে খয়েরি
টাইল। ছাত অনেক উঁচু। ভারী কোনও যন্ত্র ছেঁচড়ে নিয়ে
যাওয়ার দাগ মেঝের উপর। হলওয়ার ভিতর ঢুকে পড়ল রানা-
ববি। দু’পাশে কাঁচ দিয়ে তৈরি বড় বড় জানালা। ঘরের ভিতর
দেখা যায়। বিশাল সব ল্যাব, ওখানে নানান পর্যায়ে তৈরি চলছে
ইলেকট্রনিক ইকুইপমেন্ট। এ ল্যাবগুলো দালানের বেশিরভাগ
জায়গা নিয়েছে। মাঝে মাঝে একটা দুটো অফিস, আসবাবপত্র
অতি সাদামাটা। দালানের ভিতরটা বেশ শীতল। থমথম করছে
চারপাশ। দুয়েকজনকে দেখা গেল, নিজ নিজ অফিসে ব্যস্ত।

‘করোঁটা কী এখনে?’ নিচু স্বরে বলল ববি। ‘একটাতেও কেউ
নেই। শুধু মাটিই খুঁড়ে চলেছে, তা হতে পারে না। অন্য কিছু
করছে। তা-ই যদি হয়, খ্রিস্টদের এখানে ধরে আনেনি।’

টয়লেট পাশ কাটাল ওরা, করিডোর ধরে এগিয়ে চলল। শেষ মাথায় ছাত পর্যন্ত ধাতব এক প্রকাণ্ড দরজা। চারপাশ দেখে নিল দু'জন, কেউ নেই। ভারী দরজার হ্যাণ্ডলে মোচড় দিল রানা। তালা নেই। ঠেলা দিতে ভিতরের দিকে খুলতে লাগল কপাট। এক পাল্লা পুরো হাঁ হতে দেখা গেল গুহার মত প্রকাণ্ড এক ঘর। এ দালানের পিছন দিকের সমস্ত জায়গা নিয়েছে। ছাতটা তিরিশ ফুট উঁচু। তিন দিকের দেয়াল ফুঁড়ে বেরিয়েছে কাঁটাওয়ালা স্পাইক। ওগুলো যেন মধ্যযুগের কোনও অস্ত্র, আর এ ঘরটা যেন কোনও নির্যাতনাগার। একটা কোনের নাকে হাত বোলাল রানা। জিনিসটা ফোম ও রাবার দিয়ে মোড়া। 'এ ঘরে প্রতিধ্বনি হবে না,' বলল ববিকে।

'বোধহয় রেডিও ফ্রিকোয়েন্সি ইলেকট্রোম্যাগনেটিক ওয়েভও হজম করে,' বলল ববি। 'এ জিনিস ব্যবহার করে ডিফেন্সের কন্ট্রোলররা, সফিস্টিকেটেড ইলেকট্রনিক্স টেস্ট করতে।'

'ওই যে তোমার সফিস্টিকেটেড ইলেকট্রনিক্স,' বলল রানা। তর্জনী তাক করেছে ঘরের মাঝখানে। ওখানে ফোম দিয়ে ঢাকা মেঝে। মস্ত এক ট্রিলির উপর বিরাট এক প্ল্যাটফর্ম। ওটার সঙ্গে গেঁথে দেয়া হয়েছে বারোটা ধাতব কেবিনেট। পাশেই র্যাক ভরা কম্পিউটার ইকুইপমেন্ট। প্ল্যাটফর্মের মাঝে গ্যান্ট্রি থেকে বুলছে টর্পেডোর মত দেখতে কিছু। দরজার সামনে থেকে শুরু হয়েছে ক্যাটওয়াক। ওটার উপর উঠল রানা-ববি, চলে গেল প্ল্যাটফর্মের উপর।

'মাটি খুঁড়বার সেই জিনিস না,' বলল রানা।

'টর্পেডোও না,' মাথা নাড়ল ববি।

কেবিনেট ও র্যাকের উপর অন্তত পঞ্চাশটা কম্পিউটার মোটা কালো কেবল দিয়ে একটার সঙ্গে আরেকটা সংযুক্ত। প্রতিটি র্যাকের সঙ্গে খুদে লেড ডিসপ্লে ও পাওয়ার মিটার। এক ধারে বড় একটি বাক্সের সঙ্গে ডায়াল। লেখা: Erweiterung আগুন নিয়ে খেলা-১

ও Frequenz। পাশে মনিটর ও কি-বোর্ড।

‘জার্মান ভাষা,’ বলল রানা। ‘ফ্রিকোয়েন্সি নিয়ে কিছু।’

‘জার্মান? ...আর আমি ভেবেছি রাশান বা অন্য কিছু।’

‘নিশ্চয়ই ম্যানুয়াল পেলে সবই বুঝবে?’

‘জীবনেও না! স্কুলে শিখেছি স্প্যানিশ ভাষা, তাও ফাঁকি দিয়ে পাশ। তবে বুঝতে পারছি, মেশিনগুলো জার্মানির। ট্রান্সমিটারের সঙ্গে সম্পর্ক। কেবিনেটে সিকিউয়েন্স অনুযায়ী বসানো তারগুলো। আর ওই বড় কেবিনেট কমার্শিয়াল-গ্রেড রেডিও ট্রান্সমিটার। ...ওই র্যাক ভরা কম্পিউটার প্রোসেস করে ডেটা। কিন্তু ওই ঝলন্ত ট্রাইপড কী করে, কে জানে!’

ডিভাইসটার দিকে পাশ ফিরল রানা। দশ ফুট উঁচু তিনটি টিউব একসঙ্গে জুড়ে দেয়া হয়েছে। মেঝের কাছে ঝুলছে জিনিসটার লেজ, পুরু কোনও ধাতু দিয়ে জড়ানো। উপরের দিকে চাইল রানা। তিন টিউবের মাথার কাছে অজস্র মোটা তার পেঁচানো। সব গেছে কম্পিউটারের র্যাকগুলোর ভিতর।

‘কোনও ধরনের অ্যামপ্লিফাইড ট্রান্সডিউসার, তবে এত বড় আগে কখনও দেখিনি,’ বলল রানা।

‘ওটা বোধহয় সাইসমিক ইমেজিং সিস্টেম, ড্রুড অয়েল খোঁজে,’ বলল ববি। ‘অতি জটিল কিছু।’

পাশের র্যাকে কয়েকটা ম্যানুয়াল ও নোটবুক। ওগুলো তুলে নিল রানা, ঘাঁটতে শুরু করল। জার্মান ভাষায় লেখা হয়নি। বোধহয় খালখা ভাষা, তবে মাঝে মাঝে জার্মান শব্দ ব্যবহার করেছে। একটা বই নেড়ে মনে হলো ওটা মূল ম্যানুয়াল। প্রথম দিকের কিছু পৃষ্ঠা ছিঁড়ে নিল রানা, পাতাগুলো ভাঁজ করে প্যাণ্টের পকেটে রাখল।

ববি জিজ্ঞেস করল, ‘হোটেলে ফেরার পথে পড়বে?’

‘না। মঙ্গোলদের ভাষা। কাউকে দিয়ে পড়াব।’ র্যাকে ম্যানুয়াল রেখে দিল রানা। ক্যাটওয়ে বেয়ে দরজার সামনে চলে

এল দু'জন। ঠিক তখনই হৈ-চৈ শোনা গেল। ল্যাবগুলোর দিক থেকে আসছে!

‘ওয়ায়্যার-রিম্‌ড্‌ ছুঁচোট্টা বোধহয় একদল গার্ড পাঠিয়ে দিয়েছে!’ বলল ববি।

‘তা-ই তো মনে হয়,’ দরজা সামান্য ফাঁক করে দেখল রানা, ‘ওদের ফাঁকি দিয়ে বেরোতে হবে।’

এদিকের করিডোরে কেউ নেই। তবে শীঘ্র আসবে। বেরিয়ে এল ওরা, পাশের ল্যাবের দিকে এগোল। ওটার দরজা ভিড়ানো। ঢুকে পড়ল। পিছনে দরজা আটকে দিল রানা। পাশেই সুইচ বোর্ড, পটাপট সুইচ টিপল, নিভিয়ে দিল বাতি। জানালা থেকে দূরে, আঁধারে দাঁড়াল ওরা। করিডোর থেকে দেখবে না কেউ। নাক কুঁচকে গেল ওদের। কোনও কেমিক্যালের দুর্গন্ধ। ঘরে আবছা আলো। ক’ মুহূর্ত চোখ সইয়ে নিল রানা। একটু দূরে এক টেবিল, উপরে ছোট ছোট ব্রাশ ও ডেন্টাল পিক। এক পাশে কয়েকটা স্টেইনলেস স্টিলের ভ্যাট।

‘কেউ আসুক না, দেখিয়ে দেব,’ ফিসফিস করে বলল ববি।

কয়েকটা পায়ের আওয়াজ হলওয়ে ধরে আসছে। তারপর ল্যাব পেরিয়ে গেল। জানালার কোনা থেকে উঁকি দিল ববি। সিক্স টিউনিক পরা দু’জন লোক ওই মন্ত ঘরের দিকে চলেছে।

‘লাঠির মত কিছু খোঁজো তো, রানা!’ নিচু স্বরে বলল ববি। পরমুহূর্তে দরজা খুলে ছিটকে বেরিয়ে গেল। করিডোর দিয়ে বেরুতে চায় না, উল্টো ছুটছে দুই গার্ডের দিকে—নিঃশব্দে! পাশাপাশি দাঁড়িয়ে প্রকাণ্ড ঘরের দরজা খুলছে লোকদুজন, এরপর কিছুই দেখল না, পিঠে প্রচণ্ড ধাক্কা খেয়ে ছিটকে গিয়ে ছড়মুড় করে পড়ল ভিতরে। লাফ দিয়ে উঠে দাঁড়াল ববি, দু’হাতে দড়াম করে দরজা বন্ধ করল। তিন সেকেন্ড পর পৌছল রানা, বাথরুমের মেঝে পরিষ্কারের লাঠিওয়ালা মপ বাড়িয়ে দিল। প্রায় কেড়ে নিল ববি, ঠেসে দিল দুই পাল্লার হ্যাণ্ডেলের আগুন নিয়ে খেলা-১

ভিতর। ঘুরে দাঁড়িয়ে ডান কাঁধ ডলবার ফাঁকে বলল, ‘এবার চলো ভাগি!’

ভিতর থেকে হাউমাউ করছিল দুই মঙ্গোল, কিন্তু দরজাটা লাগিয়ে দিতেই বন্ধ হয়ে গেল আওয়াজ। রানার মনে পড়ল, এ ঘরে প্রতিধ্বনি হয় না। দরজা আটকানো, ফলে রেকর্ডিং স্টুডিওর এফেক্ট পাওয়া যাচ্ছে। দ্রুত পায়ে রওনা হলো ওরা। যে ল্যাবে লুকিয়েছিল, সেটার সামনে থামল রানা। ‘একটা জিনিস দেখব,’ বলে ঢুকে পড়ল ঘরে, বাতি জ্বেলে দিল।

কানের কাছে ববি বলল, ‘দেরি করলে কিন্তু ধরা পড়বে!’

স্টিলের ভ্যাটগুলোর কাছে চলে গেল রানা, একটার ঢাকনি খুলল। ভিতরে স্বচ্ছ তরল। গন্ধটা ফর্মালাডিহাইড-এর মত। ওটার ভিতর চুবিয়ে রাখা একটা ট্রে। তার উপর চকচকে কী যেন! পাশে রাখা চিমটা দিয়ে ট্রে-র জিনিসটা তুলে নিল রানা। টেবিলে তোয়ালে দেখে জিনিসটা মুছল।

কাটা হীরার মত আকৃতি রূপালি লকেটের। মাঝখানে ঝিকঝিক করছে রক্ত রাঙা এক মণি। উপর দিকে একটা বাজ পাখি, মাথা তার দুটো। লকেটের নীচের অংশে ছোট করে লেখা আরবী হরফ। রানার মনে হলো, জিনিসটা প্রাচীন ও রাজকীয়। কোনও রাজ পরিবারের। প্রিয় মহিলাকে দেয়া উপহার।

‘আর্টিফ্যাক্ট সংরক্ষণ ল্যাব, সঙ্গে ইলেকট্রনিক্স ইঞ্জিনিয়ারিং ফ্যাসিলিটি?’ আশ্তে করে মাথা দোলাল রানা। ‘দুটো ঠিক মেলে না।’

‘হয়তো কয়েন সংগ্রহ করে,’ বলল ববি। ‘বাদ দাও, চলো বেরিয়ে যাই। লোকগুলোর কাছে পিস্তল আছে, দেরি করলে আমরা শেষ!’

বুক পকেটে লকেট রেখে দিল রানা, বাতি নিভিয়ে বেরিয়ে এল, ববির পিছনে দ্রুত পায়ে হাঁটতে লাগল। করিডোরের পর হনহন করে বে পেরল দু’জন। দরজা দিয়ে বেরিয়ে যাওয়ার

আগে রাশান ভাষায় বলল রানা, ‘খুব উপকার করলে, হালকা হওয়ার বদলে ভারী হয়ে ফিরছি।’

সাদা কোট পরা দুই ইঞ্জিনিয়ার বিস্মিত চোখে চেয়ে রইল।

বাইরে হাওয়ার বেগ বেড়েছে। মাটিতে ঝাপ্টা দিয়ে ছুটছে, সঙ্গে নিয়ে চলেছে ধুলোর পুরু চাদর। গ্যারাজে গিয়ে ঢুকল রানা-ববি।

একবার মুখ তুলে দেখল মেকানিক, চাকার একটা নাট ঝামেলা করছে, খুলতে পারেনি এখনও—আবারও কাজে মন দিল। দরজা থেকে শ্বেত-প্রাসাদের দিকে চাইল রানা। অনেক দূরে বারান্দায় দুই মঙ্গোল, চিনা বাণিজ্যমন্ত্রীকে এস্কের্ট দিয়েছে এরা। দরজার দু’ পাশে দুই গ্রহরী।

‘মঙ্গোল এস্কের্ট যখন ঢুকতে পারেনি, আমাদের ঢুকতে দেবে কেন?’ বলল ববি।

‘অন্য কোনও পথ খুঁজতে হবে,’ বাগান ও প্রাসাদ দেখছে রানা।

‘থাকলে ওই বাড়ির ভিতরে থাকবে গ্রেসিরা,’ বলল ববি। ‘সময় নেই যে ওদিকে যাব!’

‘হাঁটবে কে?’ জানতে চাইল রানা। মাথা কাত করে গ্রাউণ্ড মেইনটেনেন্স কার্ট দেখাল। আগেই জানে, ওটার ইগনিশনে চাবি ঝুলছে।

অলস পায়ে কার্টের পাশে হাজির হলো দু’জন। মেকানিকরা যার যার কাজে ব্যস্ত। স্টিয়ারিং হুইল ধরে কার্ট ঘুরিয়ে নিল ববি, প্রায় কোলে তুলে নিয়ে চলল। খোলা দরজার দিয়ে বেরিয়ে এল দু’জন, পাশে দেয়াল পাবার পর থামল। গ্যারাজ থেকে দেখা এবার অসম্ভব। কার্টের মেঝের উপর উঠল রানা, চাবি মুচড়ে দিতেই নিঃশব্দে চালু হলো গ্যাসের ইঞ্জিন।

গলফ কোর্স পরিচর্যার জন্য তৈরি হয়েছে ওটা। ছোট্ট এক পাটাতন, সামনে পাশাপাশি দুটো সিট। এক্সেলারেইটার মেঝের আগুন নিয়ে খেলা-১

উপর দাবিয়ে দিল রানা, ছুটতে শুরু করল কার্ট। পিছনের চাকাগুলো নুড়ি পাথরে পিছলে সরছে। আস্তাবল পাশ কাটাল ওরা, সামনে চওড়া রাস্তা। একবার পিছনে চাইল রানা, আস্তাবল থেকে বেরিয়েছে দুই অশ্বারোহী। জোর হাওয়া উড়িয়ে নিল মিহি ধুলো, ঘন পর্দার ওপাশে হারিয়ে গেল লোকদুজন। স্টিয়ারিং হুইল বামে ঘোরাল রানা, কম্পাউণ্ডের অন্যদিকে যেতে চাইছে।

মেইন গেট পাশ কাটাল কার্ট। প্রহরীরা দেখল, তবে বাড়তি মনোযোগ দিল না। সুউচ্চ দেয়াল পাশে রেখে ছুটছে কার্ট। সামনে ছোট্ট এক সেতু। নীচ দিয়ে বইছে সরু এক খাল। ওটা থেকে নানাদিকে গেছে মার্বেল পাথরে তৈরি গভীর ড্রেন। ওগুলো পানি সরবরাহ করছে কম্পাউণ্ডে।

‘সেচের ভাল ব্যবস্থা,’ বলল ববি।

সেতুর উপর থামল রানা, বামে মস্ত দুটো পাইপ দেখল। পাইপ দুটো দেয়ালের ওপাশ থেকে এসেছে, পানি ঢালছে খালে। সেতু পেরিয়ে দেয়াল ঘেঁষে চলল রানা, খানিক যাওয়ার পর ডানে দেখা গেল শ্বেত প্রাসাদ। ওদিকে কোনও দরজা নেই। পোর্টিকোর সামনে রয়েছে দুই এস্কেট ও দুই প্রহরী। ওখান দিয়ে সুবিধা হবে না।

খানিক যেতে দেয়াল নিচু হতে লাগল। তারপর একেবারেই মিলিয়ে গেল। এক দেবদারু গাছের নীচে কার্ট থামল রানা। জমিন সামনে ঢালু হয়ে নেমেছে গভীর এক গিরিখাতে। মানুষের তৈরি ছোট জল-প্রপাত ঝরঝর করে নামছে ওখানে, পাহাড় ভিজিয়ে ফিরছে নদীর দিকে। হেঁটে খাতের কিনারায় চলে গেল রানা। এদিকে ছোট-বড় অসংখ্য পাথর, তার উপর খাড়া ঢাল। এ পথে নামানো যাবে না কার্ট। আঁকাবাঁকা এক সরু পথ অনেক নেমে আবারও উঠেছে ওপাশের এক অধিত্যকায়। ওটার পর পুরো আধ মাইল নীচে গেছে ঢাল। এতই খাড়া, ওদিক দিয়ে কেউ উঠবে, তা হওয়ার নয়। ওখানে দেয়ালের প্রয়োজন না

থাকারই কথা।

‘আমরা কি বাড়ির পিছন-দরজা দিয়ে ঢুকব?’ পাশ থেকে জানতে চাইল ববি।

‘হুঁ, হয় সামনের দরজা দিয়ে, নয়তো পিছন দিয়ে। যেটা পছন্দ তোমার।’

ঢাল বেয়ে ফিরতি পথ ধরল দু’জন। দক্ষিণ থেকে জোরাল বাতাসের ঝাপ্টা আসছে। জল-প্রপাত থেকে কুয়াশার মত শিশির-কণা ছিটকে উঠছে, শীতল। হিম ঠাণ্ডায় শিউরে উঠল রানা-ববি। ফিরে এল কার্টের কাছে। চারপাশে ঘোড়ার ক্ষুরের দাগ। নিয়মিত পাহারা দেয়া হয় এই এলাকা। প্রাসাদের পিছন দিক লক্ষ্য করে এগোল ওরা। ওই ভবন খানিকটা উঁচু জমিতে। আড়াই শ’ ফুট দূরত্ব রেখে অর্ধ-চন্দ্রের মত বুক সমান এক পাথরের দেয়াল।

দেয়াল ঘেঁষে চলেছে ওরা। প্রাসাদের জানালা দিয়ে চোখে পড়বে না। কিছুক্ষণ পর হঠাৎ দমকা হাওয়া ছাড়ল। হ্যাটের ব্রিম কপালের উপর নামাল দু’জন। ধুলো ছিটকে লাগছে চোখে। আড়াল থেকে উঁকি দিল। অনেকটা দূরে উঠান থেকে বেরুনোর দরজা। তবে কোনও লাভ নেই। লোহার গেটের দুই পাশে দুই সশস্ত্র প্রহরী!

‘তুমি রাশান বললে কোনও লাভ হবে?’ জানতে চাইল ববি।

‘মনে হয় না।’

প্রাসাদে সবার অলক্ষে ঢুকতে চাইছে রানা। হেসিরা এখানে রয়েছে এমন কোনও প্রমাণ ওদের হাতে নেই। তবে এটাও ঠিক, ওরা দুই মঙ্গোলকে আটকে রেখে এসেছে ল্যাবে, ক্ষতি যা হওয়ার হয়ে গেছে। লোকগুলো বেরিয়ে এলে সবাই মিলে খুঁজবে ওদের। তার আগেই জেনে নিতে হবে অয়েল সার্ভে টিম এখানে আছে কি না।

‘ওই যে ঝোপ দেখছ, দেয়াল টপকে ওখানে থামা যায়, আগুন নিয়ে খেলা-১

বলল রানা। ‘একটু পর পর ঝোপঝাড়। ওই যে বামে
প্যাগোডার মত বাড়ি দেখছ, ওই পর্যন্ত সহজে যেতে পারব।’

‘গার্ড থাকতে পারে।’

‘কাবু করতে পারলে ঢোকা যাবে ভিতরে।’

আস্তে করে মাথা দোলাল ববি, প্রাসাদ দেখে নিয়ে
প্যাগোডার দিকে চাইল। ভাবছে, আগে ছোট বাড়ির কাছে যাই,
পরে উঠান পেরিয়ে তাজমহলে ঢুকব।

অপেক্ষা করল ওরা। পরের বার জোর হাওয়া আসতেই
ধুলো পাক খেল—চারপাশ আবছা হয়ে উঠল। সেই সুযোগে
দেয়াল টপকে নামল ওরা, তীরের মত ছুটল ঝোপঝাড়ের
দিকে। বিশ ফুট পেরোতেই প্রথম সারির ঝোপগুলো পেল।
উঠানের ইস্পাতের দরজার দিকে চাইল, লোকগুলোকে দেখা
গেল না। আশপাশে কেউ নেই।

অন্তত, তা-ই ধারণা ওদের।

তেইশ

বাণিজ্যমন্ত্রী ব্যাং কুইজিয়ন ভাল করেই জানেন, মঙ্গোলিয়ায়
ক্রুড অয়েল নেই। তারপরও পাক্কা চার ঘণ্টা এই অনুর্বর পাহাড়ি
এলাকার চড়াই-উতরাই ভেঙে ছুটে আসতে বাধ্য হয়েছেন। প্রতি
মুহূর্তে ভেবেছেন, খামোকা ছুটছেন আলেয়ার পিছে। পথে
খেয়াল করেছেন, কোথাও কোনও তেল-কূপ নেই। কিন্তু
বাস্তবতা মানতে রাজি নন প্রেসিডেন্ট হু জিনতাও। তিনি মনে
করেন, চেষ্টা করে দেখায় ক্ষতি নেই—চিঠিটা ভিত্তিহীন না-ও

হতে পারে। তাই আসতেই হলো তাঁকে। রাগ সামলে রেখেছেন তিনি, বারবার মন বলছে, আর খানিকদূর যাওয়ার পর কোনও তাঁবুর সামনে থামবে ড্রাইভার—বরজিন অয়েল কনসোর্টিয়ামের প্রেসিডেন্টকে পাওয়া যাবে তাঁবুর কাছেই, খোঁড়া কোনও ঘোড়া থেকে লাফ দিয়ে নেমে আসবে সে-লোক।

তবে পাহাড়ের উপর ওই ইম্পাতের দরজা পেরুনের পর মনোভাব কিছুটা বদলে গেল তাঁর। একদিকে রাজকীয় বাগিচা, মর্মর প্রাসাদ, আরেকদিকে বিশাল আধুনিক ইণ্ডাস্ট্রিয়াল পার্ক—সব বলছে, এখানে বিশ্বের ছোঁয়া লেগেছে। এ মরা দেশে কিছুই নেই, কিন্তু এখানেই কেউ গড়ে তুলেছে এক বিস্ময়কর স্বর্গ—সত্যিই আশ্চর্য! বিশাল বাড়ির সামনে গিয়ে থামল কারাভাঁ। বাণিজ্যমন্ত্রী ব্যাং কুইজিয়ন মনে মনে বললেন, বরজিন অয়েল কনসোর্টিয়ামের প্রেসিডেন্ট জালাইর তেমুজিন আর যা-ই হোক, মেষপালক নয়!

চমৎকার একটা দামি ইউরোপিয়ান সুট পরেছে এই অদ্ভুত সুন্দর ভবনের মালিক। ব্যাং কুইজিয়ন গাড়ি থেকে নামতেই মাথা নিচু করে বাউ করল। দু-চার কথায় অতিথিকে স্বাগত জানাল। পাশে দাঁড়ানো দোভাষী, কথাগুলো ম্যাগারিন ভাষায় বলল সে।

‘স্বাগতম, মিনিস্টার কুইজিয়ন। আসতে নিশ্চয়ই কষ্ট হয়নি?’

কূটনৈতিক ভাবধারা থেকে সরলেন না কুইজিয়ন, ‘না, তা হয়নি। মঙ্গোলিয়ার অপূর্ব সুন্দর প্রকৃতি দেখতে দেখতে চলে এসেছি।’ চোখ ডলে ধুলো সরাতে চাইলেন।

‘পরিচয় করিয়ে দিই, ও আমার বোন বলোর্মার,’ বলল জালাইর তেমুজিন। ‘ও-ই আমাদের ফিল্ড অপারেশন্স ডিরেক্টর।’

স্মিত হেসে বাউ করল বলোর্মার।

কুইজিয়ন দেখলেন এ মেয়ে তার ভাইয়ের মতই দামি সুট মাগুন নিয়ে খেলা-১

পরেছে। উষ্ণ হাসলেন তিনি। সবার সঙ্গে ঘুরে দেখলেন বাগান, দু'পাশে দাঁড়ানো ঘোড়াগুলোও। প্রাচীন রণ-পোশাক পরেছে আরোহীরা, যেন যুদ্ধে রওনা হবে এখনই।

‘মঙ্গোল ঘোড়ার অনেক নাম শুনেছি,’ বললেন কুইজিয়ন। ‘আপনি ঘোড়া ব্রিড করেন, মিস্টার তেমুজিন?’

‘তেমন নয়। শুধু গার্ডদের জন্য কিছু ব্রিড করা হয়। আমার গার্ডদের দক্ষ ঘোড়সওয়ারী হওয়া জরুরি। তীর-ধনুকে লক্ষ্যভেদী হওয়াও আবশ্যিক।’

‘অতীতে এ ছিল বাধ্যতামূলক, নইলে মরতে হতো,’ বললেন কুইজিয়ন।

‘তীর-ধনুক এখনও একই কাজে ব্যবহার হয়, আর মঙ্গোল ঘোড়া ছাড়া অনেক জায়গায় যাওয়া যায় না। যুদ্ধের কিছু দক্ষতা কখনও ফেলনা যায় না। আধুনিক টেকনোলজি ভাল, কিন্তু আমাদের পূর্বপুরুষরা অর্ধেক পৃথিবী জয় করেছিলেন ঘোড়া ও তীর-ধনুক দিয়ে। এই দুই অস্ত্র এখনও আমার কাজে লাগছে। ...হাওয়ার বেগ আরও বাড়ছে। মাননীয় মিনিস্টার, চলুন আমরা বাড়ির ভিতরে যাই।’ হাতের ইশারায় দরজা দেখাল তেমুজিন। সবাইকে নিয়ে হলওয়েতে চলে এল সে। ওখান থেকে হেঁটে হাজির হলো ভবনের পিছন দিকের এক বিরাট হলঘরে।

করিডোর ধরে আসবার পথে নানা ধরনের অ্যান্টিক দেখেছেন কুইজিয়ন। ঘরে ঢুকেই থমকে গেলেন, ওপাশের দেয়ালের কাছে মস্ত এক মূর্তি। মেঝের সবুজ টাইল যেন সবুজ ঘাস, তার উপর ছুটছে তেজস্বী এক রূপালি ঘোড়া।

‘অপূর্ব স্কাল্‌পচার,’ ডিজাইনটা চায়নিজ দেখে বললেন কুইজিয়ন, ‘ওয়াইউয়ান ডাইন্যাস্টির?’

‘না, আরও কিছুদিন আগের, সং ডাইন্যাস্টির,’ বলল জালাইর তেমুজিন। খেয়াল করেছে মন্ত্রী চোখে প্রশংসা। ‘এ বাড়ির বেশিরভাগ অ্যান্টিক তেরো শতাব্দীর প্রথম দিকের। সে

যুগটা ছিল মঙ্গোলদের বিজয়ের যুগ। টাইলের মোজাইক তৈরি হয়েছে সমরখন্দে। ঘোড়া ও স্টেজ তৈরি হয়েছে ইণ্ডিয়ায়, বারো শতাব্দীর দিকে। ...আপনি কি সংগ্রাহক, কুইজিয়ন?’

‘নট অফিশিয়ালি,’ হাসলেন কুইজিয়ন। ‘আমার সংগ্রহে রয়েছে কয়েকটা পোর্সেইলিন, ওয়াইউয়ান ও মিং ডাইন্যাস্টির। এ পর্যন্তই। আপনার সংগ্রহ দেখে মুগ্ধ না হয়ে পারলাম না। সে আমলের জিনিস এখন বাজারে কমই মেলে।’

‘হংকঙে অ্যান্টিকুইউটির এক ডিলার আমার পরিচিত,’ স্বাভাবিক স্বরে বলল তেমুজিন, তবে নিস্পৃহ চোখ বলছে, এ নিয়ে আর কোনও আলাপ হোক, তা চাইছে না।

ঘরের ছাত ছোঁয়া জানালাগুলো খোলা। পাহাড়ের মাথা থেকে বিস্তৃত উঠান পেরিয়ে চোখ চলে যায় বহুদূর। তবে এখন জোর বাতাসে উড়ছে ধুলো, কখনও পলকের জন্য চোখে পড়ে ঢেউ খেলানো জমি। ছ’ সেট সোফা পাশ কাটাল জালাইর তেমুজিন, মন্ত্রী ও তাঁর সহকারীদের নিয়ে বার-এর সামনে চলে এল। বিরাট এক মেহগনি টেবিল ঘিরে সেগুন কাঠের গদিমোড়া চেয়ার। সবাইকে বসতে অনুরোধ করল সে। নিজে চেয়ার টেনে বসল টেবিলের এক মাথায়, পিঠ থাকল দেয়ালের দিকে। তার ঠিক পিছনে বিরাট উঁচু তাক ভরা মধ্য-যুগের অস্ত্র। নীচের অর্ধেক তাকে রেখেছে প্রাচীন সব বর্শা ও তলোয়ার। উপরের দিকে তীর-ধনুক, হেলমেট, বর্ম ইত্যাদি। মাটির তৈরি কিছু হ্যাণ্ড গ্রেনেড রয়েছে, প্রাচীন কালে যুদ্ধে লাগত। শেলফের উপর দেয়ালে বিরাট এক স্টাফ করা বাজপাখি, মনে হয় আকাশ থেকে ছুটে নেমে আসছে। ছোঁ মারার ঠিক আগ মুহূর্তে মাথা উঁচু করে ঠোট ফাঁক করেছে, যেন একবার তীক্ষ্ণ চিৎকার দিয়েই ঝাঁপিয়ে পড়বে হতভাগ্য শিকারের উপর।

অস্ত্র ও বাজপাখি দেখলেন কুইজিয়ন, তারপর চোখ রাখলেন ওগুলোর মালিকের উপর, কেন যেন ভিতরে একটা শিহরণের

অনুভূতি হলো। ওই বাজপাখির মতই হিংস্র লাগছে অয়েল এগযিকিউটিভকে। শীতল চোখ দুটো কীসের যেন প্রলোভন লুকিয়ে রেখেছে। এ লোক যদি হঠাৎ কোনও কারণে বর্শা তুলে কাউকে বিদ্ধ করে, অবাক হওয়ার কিছু নেই, মনে মনে বললেন কুইজিয়ন। তাঁর সামনে রাখা হলো চায়ের কাপ। চুমুক দিলেন তিনি, কাজের কথা শুরু করতে চান।

‘আমার সরকার আপনার প্রস্তাব পেয়েছে। আপনারা প্রচুর পরিমাণ ত্রুড অয়েল যোগান দিতে পারবেন বলে জানিয়েছেন। সাহায্যে আসতে চেয়েছেন বলে আমাদের পার্টির সর্বোচ্চ নেতারা কৃতজ্ঞ। এ প্রস্তাব নানা ভাবে আমাদের কৌতূহল জাগিয়েছে। বিষয়টি আইনানুগ কি না, তা জানতে আমাকে পাঠানো হয়েছে। ত্রুডের জন্য কী পরিমাণ অর্থ ব্যয় হবে, এবং চুক্তি কেমন হবে, জানতে এসেছি আমি।’

চেয়ারে এলিয়ে বসল তেমুজিন, হাসছে। ‘এ নিয়ে আলাপ তো হবেই, মিস্টার কুইজিয়ন! হাজার বছর ধরে যে চিনের সঙ্গে মঙ্গোলিয়ার শত্রুতা, সেই মঙ্গোলরা হঠাৎ চিনকে সাহায্য করতে চাইছে কেন? ধূলিময় এ প্রান্তে বালি ও ঘাস ছাড়া কী-ই বা আছে? এই নোংরা পশু-পালকরা হঠাৎ প্রাকৃতিক সম্পদ পেল কী করে? সবই খুলে বলব আপনাকে। আপনারা আমাদেরকে নিজ দেশে বন্দি করে রেখেছেন। দশকের পর দশক রাশা ও চিন আমাদের দুনিয়ার অন্য দেশের কাছ থেকে বিচ্ছিন্ন করে রেখেছে। আমরা নির্জন এক নিষ্ফলা, অনুন্নত, অভাগা দেশে পরিণত হয়েছি। তবে ধরে নিতে পারেন, সে দিন এবার শেষ, মিস্টার কুইজিয়ন। আপনারা জানেন না, মঙ্গোলিয়া একদিক থেকে নয়, নানানদিক থেকে সম্পদশালী। আপনাদের সময় ছিল না যে ত্রুড অয়েল বা অন্যান্য খনিজ সম্পদ খুঁজবেন, পরে সে-সুযোগ আপনারা পেয়েও পায়ে ঠেলেছেন। মাত্র কিছুদিন হলো পশ্চিমা বিভিন্ন কোম্পানি ছুটে এসেছে আমাদের খনিগুলো নিয়ে

কাজ করতে। আমাদের বিশাল অরণ্য থেকে টিমবার সংগ্রহ করছে। কিন্তু তারা সবাই একটা জিনিস খেয়াল করেনি, তারা ক্রুড অয়েল নিয়ে ভাবেনি। যখন কেউ এ দেশের মাটিতে প্রসপেক্টিং করছে না, ভাবছেও না, আমরা নিজেরাই কাজে নেমেছি। কাজেই সন্দেহ কী, এ পুরস্কার আমরা ঘরে তুলছি নিজেরাই।’

বলোমার দিকে মাথা কাত করল জালাইর তেমুজিন। ব্যুরো থেকে একটা মানচিত্র নিল বলোমা, বিছিয়ে দিল চিনা বাণিজ্যমন্ত্রী সামনে। মুড়িয়ে গেল ওটা। টেবিল থেকে জেড পাথরের দুটো কার্ভিং নিয়ে পেপার ওয়েইট হিসাবে ব্যবহার করল মেয়েটি।

মঙ্গোলিয়ার মানচিত্র। দক্ষিণ-পূর্ব সীমান্তের কাছে লাল কালিতে ছোট এক গোলক তৈরি করা হয়েছে। মানচিত্রের এই অংশের দৈর্ঘ্য পঞ্চাশ মাইলের বেশি। নীচের অংশ প্রায় চায়নিজ ইনার মঙ্গোলিয়া ছুঁই-ছুঁই করছে।

‘বরজিন তেমুজিন ফিল্ড। প্রাকৃতিক এই বেসিন দেখলে মনে হবে আপনাদের দাকিং ফিল্ড বড় জোর চিলুমচি।’ চিনের সব চেয়ে বড় তৈল-ক্ষেত্রের কথা তুলে খোঁচা দিল তেমুজিন। ওই ক্ষেত্র থেকে তেল পাওয়া দ্রুত কমে আসছে। ‘আমাদের টেস্ট অয়েলগুলো থেকে জানা গেছে তেমুজিন ফিল্ডে পাওয়া যাবে চল্লিশ বিলিয়ন ব্যারেল ক্রুড অয়েল। ওখানে পঞ্চাশ ট্রিলিয়ান কিউবিক ফিট প্রাকৃতিক গ্যাসও মজুদ রয়েছে। আমরা প্রতিদিন দশ লাখ ব্যারেল ক্রুড অয়েল দিতে পারি। অবশ্য, আপনারা যদি কিনতে চান তবেই।’

‘এই আবিষ্কার কেন জনগণকে জানানো হয়নি?’ খানিকটা সন্দেহ নিয়ে জানতে চাইলেন কুইজিয়ন। ‘আমাদের সীমান্তের এত কাছে তেল-খনি, অথচ আমরা জানতে পারলাম না!’

হাসল জালাইর তেমুজিন, হাঙরের দাঁতের মত চোখা আগুন নিয়ে খেলা-১

দাঁতগুলো বেরিয়ে এল। ‘এ ঘরে যারা উপস্থিত তাদের বাইরে শুধু দু’চারজন জানে। আমাদের সরকারও এ রিজার্ভের ব্যাপারে কিছুই জানে না। যদি জানত, ওই পুরো এলাকা আমার কাছে বিক্রি করত না। মঙ্গোলিয়ায় অনেকদিন ধরে তেল খোঁজা চলছে, কিছু পাওয়াও গেছে। তবে কেউ আসল জায়গা খুঁজে দেখেনি। আমাদের নিজস্ব এক প্রোপ্রাইটরি টেকনোলজির কারণে হঠাৎ জানা যায় এ তেল-ক্ষেত্র ওখানে রয়েছে।’ হাসি চলে এল তার ঠোঁটে। ‘আমরা ভাগ্যবান যে, গভীর রিজার্ভ এটা, যে কারণে অতীতে কেউ খুঁজে দেখেনি। বিস্তারিত শুনিয়ে আপনাকে বিরক্ত করতে চাই না। এ-টুকু বলাই যথেষ্ট যে বেশ কিছু টেস্ট কূপ খুঁড়ে আমরা নিশ্চিত হয়েছি, ওখানে ওই পরিমাণ রিজার্ভ রয়েছে।’

চুপচাপ বসে রইলেন কুইজিয়ন, রক্ত নেমে গেল চেহারা ছেড়ে। কোনও ব্যাখ্যা চাইলেন না, বাধ্য হয়ে মেনে নিলেন সত্যি ওখানে তেলের বিপুল ক্ষেত্র পাওয়া গেছে। মানসিক ভাবে নিজেকে পঙ্গু মনে হলো তাঁর। এই মাথা-গরম লোকটা ঠিক-বেঠিক নিয়ে ভাবে না, অ্যান্টিক সংগ্রহের নামে ডাকাতি করছে। তার চেয়েও বড় কথা, ওই বিশাল তেলের খনি এ লোকের মুঠোর ভিতর! দুর্বল তাস হাতে, শান্ত স্বরে জানতে চাইলেন মন্ত্রী, ‘মানলাম, মাটির নীচে তেল আছে। কিন্তু সেটা তো তুলতে হবে। আপনারা জানিয়েছেন নব্বুই দিনের মধ্যে ক্রুড অয়েল সরবরাহ করবেন। আমরা ধারণা করছি, সেটা অসম্ভব।’

‘তেল পেতে হলে আপনাদের পক্ষ থেকে কিছু কাজ করতে হবে,’ বলল জালাইর তেমুজিন। ‘নির্দিষ্ট সময়ে সরবরাহ আমি করব, এ নিয়ে বিন্দুমাত্র দুষ্টিতা করবেন না।’ বলোমার দিকে চাইল সে। আরেকটা মানচিত্র বিছিয়ে দিল মেয়েটি। এটা উত্তর চীন ও মঙ্গোলিয়ার। চিনের অংশে লাল লাইনগুলো মাকড়সার ঝুলের মত, নানা দিকে গেছে।

‘এখানে দেখছেন চিনির বর্তমান তেলের পাইপ-লাইন, বলল তেমুজিন। উত্তর-পূর্বের দিকে তাকান, এই নতুন লাইন গেছে দাকিং থেকে বেইজিং। এখানে এক স্পার গেছে সমুদ্র বন্দর কিনহুয়াংদাও-এ।’

মানচিত্র দেখলেন বাণিজ্যমন্ত্রী, এক জায়গায় এক্স চিহ্ন দেয়া হয়েছে। ওখান থেকে রওনা হয়ে ইনার মঙ্গোলিয়া পেরিয়ে মঙ্গোলিয়ায় ঢুকছে পাইপ-লাইন।

‘এক্স চিহ্ন দেয়া অংশটি মঙ্গোলিয়ান সীমান্ত থেকে ত্রিশ কিলোমিটার। আমাদের দিকের চল্লিশ কিলোমিটার পাইপ-লাইন প্রায় তৈরি। আমরা সীমান্তে পৌঁছে দেব তেল। আপনারা শুধু আমাদের টার্মিনাল থেকে পাইপ-লাইন নিলেই দাকিং লাইনে জুড় যাবে।’

‘চল্লিশ কিলোমিটার টানতে হবে পাইপ-লাইন? নব্বুই দিনের মধ্যে এ কাজ সম্ভব নয়।’

উঠে দাঁড়াল জালাইর তেমুজিন, টেবিলটা কয়েকবার ঘুরে থামল। ‘পারবেন। আমেরিকা পারলে আপনারা পারবেন না কেন? পড়েছি আঠারো শ’ ষাট-এর দিকে ট্রান্সকন্টিনেন্টাল রেল রোড তৈরি করেছে ওরা প্রতি দিন দশ মাইল করে। আপনার জন্য আরও সুসংবাদ, আপনাদের রুট কোনদিক দিয়ে আসবে, সেটা নিজে আমি দেখে এসেছি। যে পরিমাণ পাইপ লাগবে তা-ও জোগাড় করে দেব এক সাপ্লাইয়ারের কাছ থেকে। ইচ্ছা করলে আপনারা কিছুদিনের জন্য ধার হিসাবে আমার কাছ থেকেও এক্সকেভেশন ইকুইপমেন্ট নিতে পারেন। যে দেশ খ্রি গর্জ ড্যাম তৈরি করেছে, তার কাছে এ তো ছেলেখেলা।’

‘আপনারা দেখছি প্রয়োজন অনুযায়ী আমাদের সবই জোগান দিতে সক্ষম,’ বললেন কুইজিয়ন। ভিতর ভিতর তেতে উঠেছেন।

‘যে-কোনও ব্যবসায়িক অংশীদার এটুকু করবে,’ হাঙরের আগুন নিয়ে খেলা-১

হাসি হাসল বরজিন অয়েল কনসোর্টিয়ামের প্রেসিডেন্ট। ‘আর এর বদলে আমি সামান্যই চেয়েছি। আপনারা প্রতি ব্যারেলে এক লাখ আশি হাজার তগরোগ দেবেন। মঙ্গোলিয়ার দক্ষিণে যে অঞ্চল আমাদের ছিল, সেটা, অর্থাৎ ইনার মঙ্গোলিয়া আমাদের ফিরিয়ে দেবেন। আরেকটা ব্যাপার, আপনারা আমাকে সরাসরি একটা এক্সক্লুসিভ পাইপ-লাইন দেবেন কিনহুয়াংদাও পর্যন্ত। আমরা যেন ওই বন্দরের ফ্যাসিলিটি ব্যবহার করে রপ্তানী চালাতে পারি, সেজন্য চুক্তি হবে।’

এত ধরনের দাবি শুনে হাঁ হয়ে গেছেন চিনা বাণিজ্যমন্ত্রী।

তাঁর দিকে খেয়াল নেই বরজিন অয়েল কনসোর্টিয়ামের প্রেসিডেন্টের, জানালা দিয়ে কী যেন দেখছে সে। বিরাট উঠানে ধুলো তুলছে পাগলা হাওয়া। আরেকটা কী যেন চোখের কোণে... কালো সুট পরা দু’জন লোক উঠান পেরিয়ে ছুটছে। এক ঝোপ থেকে আরেক ঝোপে গিয়ে ঢুকল। দশ সেকেন্ড পর মন্দিরের কাছে গিয়ে হাজির হলো... কী করে ওখানে!

গলার রগ দপদপ করে লাফিয়ে উঠল জালাইর তেমুজিনের, বাণিজ্যমন্ত্রীর দিকে তপ্ত চোখে চাইল। তারপর চাপা স্বরে বলল, ‘দুঃখিত, মিস্টার মিনিস্টার, কিছুক্ষণের জন্য অন্য কাজে যেতে হবে আমার।’ বাড়তি একটা কথাও বলল না সে, বেরিয়ে গেল ঘর ছেড়ে।

চব্বিশ

আপাতত থেমে গেছে হাওয়া। এক ঝোপের ভিতর থেমেছে রানা ও ববি। কালো প্যাগোডা থেকে বেরিয়ে আসা গুহার মত অংশটা সামান্য দূরে। ডুবতে চলেছে সূর্য। ধীরে নেমে আসছে আঁধার।

ববি ভাবছে, দরজা বন্ধ কি না কে জানে! ভিতরে কী আছে? বুদ্ধের কোনও মূর্তি? পাথরের প্যাগোডা দেখলে মনে হয় প্রাচীন আমলের। নতুন করে সংস্কার করা হয়েছে। দেয়ালে পাথরের ফাঁকে ফাঁকে সিমেন্টের প্রলেপ দেয়া হয়েছে।

উঠানের চারপাশ দেখছে রানা। এই প্যাগোডা পেরিয়ে খানিকটা গেলে আবার বাগান, তারপর চওড়া রাস্তা—ওপাশে বিশাল ল্যাব বা যা-ই হোক। বাধ্য না হলে ওদিকে যাবে না, ভাবল রানা। প্রথম কাজ শ্বেত পাথরের বাড়িতে ঢোকা। সেজন্য উঠান পেরুতে হবে। ওদিকে অনেকখানি জায়গা ফাঁকা, আড়াল নেই।

‘বুদ্ধের প্যাগোডা, রানা?’ জানতে চাইল ববি, ভিতর থেকে বারান্দায় পড়ছে কাঁপা কাঁপা লাল আলো।

‘হতে পারে,’ বলল রানা। মঙ্গোলিয়ানদের বেশির ভাগই বৌদ্ধ।

অপেক্ষা করল ওরা, আবার হাওয়া শুরু হতেই এক দৌড়ে উঠল চওড়া বারান্দায়। সেখান থেকে গুহার মত অংশে ঢুকল। বিশ আঙুন নিয়ে খেলা-১

ফুট ভিতরে প্রধান কক্ষ।

চারদিকে মশাল ও মোমবাতি জ্বলছে। পরস্পরকে দেখল দু'জন, বিস্মিত। এটা কোনও মন্দির বা প্যাগোডা নয়, কোনও সমাধিস্থল! একদিকের দেয়ালে সাদা-কালো মার্বেল দিয়ে তৈরি মাঝারি এক বেদি, কারুকার্য-খচিত। ওটার সামনে বিরাট দুটো কবর। ডান দিকেরটা কালো মার্বেল দিয়ে তৈরি, বামেরটা শ্বেত-মর্মর দিয়ে। একটা কবরের পাশে থামল ওরা, পাথরের স্ল্যাবের উপর কী যেন লেখা। পড়তে চাইল রানা, বুঝল না কিছুই। এ ভাষা অচেনা। আন্দাজ করল, কবরদুটো জালাইর তেমুজিনের পূর্ব পুরুষদের কারও।

একই কথা ভাবছে ববি—এখানে ঘুমিয়ে আছে কারা?

সমাধির চার-দেয়াল দেখল ওরা। নানান অক্ষর ও জন্তু-জানোয়ারের ছবি আঁকা। কোনও কোনওটার রং এখনও বোঝা যায়। প্রচুর ঘোড়া আঁকা হয়েছে। কবরদুটোর মাথার কাছে ন'টা তামার খুঁটি, তাতে পশমী লেজের মত ঝুলছে সাদা কিছু। এ কম্পাউণ্ডে এই জিনিস আগেও দেখেছে ওরা।

চারপাশ আরেকবার দেখল ববি। 'পরকালে রওনা হওয়ার আগে শখ করে বানিয়েছে।'

'মিস্টার তেমুজিনের ধারণা তার ধমনিতে নীল-রক্ত বইছে,' বলল রানা।

কবরের উপর থেকে চোখ সরে গেল ববির, পিছন দিকের বেদির নীচে কী যেন শুইয়ে রাখা। বুঝতে দেরি হলো না। ওদিকে মাথা কাত করল ও, শুকনো স্বরে বলল, 'আমার মনে হয় ওদের আরেকটা কবর খুঁড়তে হবে।'

বেষ্টির দিকে চাইল রানা, চমকে উঠল। লাশটা ওদের চেনা। এডি গ্রিন! পাতলা কম্বল দিয়ে পেট পর্যন্ত ঢাকা। বুকে গেঁথে রয়েছে কয়েকটা তীর।

'এডির মত একই পরিণতি হলো গ্রেসি বা উইলসনের?'

বলল ববি। ‘নাকি বন্দি ওরা?’

থমথম করছে চারপাশ।

বেদির কাছে গিয়ে থামল রানা, কমল টেনে লাশের মুখ ঢেকে দিল। ভাবছে, আসতে দেরি হয়ে গেল?

আওয়াজ

পাথরের মেঝের উপর বুটের আওয়াজ দ্রুত এগিয়ে আসছে! কয়েক সেকেণ্ড পর সমাধিস্থলে ঢুকল দু’জন লোক। একটু আগে উঠানের গেট পাহারা দিচ্ছিল এরা। সঙ্গে আগ্নেয়াস্ত্র নেই। বদলে কাঠের লম্বা লাঠি, মাথার কাছে সুচের মত চোখা। কোমরে ঝুলছে মাঝারি আকৃতির খাপ, ভিতরে ছোরা। ডান কাঁধে ঝুলছে ছোট ধনুক। পিঠে তুণ। অতীতে এসব ব্যবহার করেছে মঙ্গোল যোদ্ধারা, ঘোড়ার উপর থেকে। রাইফেল বা পিস্তল নয়, কিন্তু অস্ত্র হিসাবে ভয়ঙ্কর।

ভিতরে ঢুকেই রানা ও ববিকে বেদির কাছে দেখল তারা, দ্রুত পায়ে ছুটে এল বল্লম বাগিয়ে। রানা-ববির কপাল ভাল, দূর থেকে বল্লম ছোঁড়েনি।

আগে নড়ে উঠল ববি, বেদির পাশ থেকে টুল তুলেই ছুঁড়ে মারল লোকদুটোর পা লক্ষ্য করে। সামনের জনের শিন বোনে লাগল টুল, হুমড়ি খেয়ে পড়ল সে। হাত থেকে গড়িয়ে সরে গেল বল্লম।

দ্বিতীয়জন লাফিয়ে টুল এড়াল, কবরের পাশ কাটিয়ে ছুটল রানার দিকে।

ইতিমধ্যে সামনে বেড়ে মূর্তি হয়ে গেছে রানা, অপেক্ষা করছে। আঠার মত আটকে আছে চোখ বল্লমের উপর। ভাবটা এমন, ভাল ভাবে গাঁথবার সুযোগ দিতে চায়।

ব্যাটা ভয়ে জমে গেছে, ভাবল গার্ড। ছুটে গিয়ে বুকে বিঁধিয়ে দেবে সে এবার বল্লমটা। শত্রুর ছয় ফুটের মধ্যে পৌঁছে গেল। দু’ বাহু আড়ষ্ট হয়ে উঠেছে, কাঁপ দিল সে সামনে, ফচ্ আঙুন নিয়ে খেলা-১

করে বুকের ভিতর ঢুকিয়ে দেবে এবার বল্লম গায়ের জোরে ।

কিন্তু শেষ মুহূর্তে বিদ্যুৎবেগে ডানদিকে সরল রানা, বাম হাতে সরিয়ে দিল বল্লমের গতিপথ । থামতে পারল না গার্ড, কয়েক কদম এগিয়ে এল রানার দিকে । ফাঁকা বাতাস কাটছে বল্লম ! গার্ড সঠিক দিকে তাক করতে চাইল সড়কি । কিন্তু শত্রুর দেহ পেরিয়ে গেছে ওটা ।

লাঠির অংশ ধরতে গিয়েও পারল না রানা, ওটা সরিয়ে নিয়েছে লোকটা, ব্রেক কষে ঘুরতে শুরু করেছে । চরকির মত ঘুরল রানা । লোকটাও ঘুরেছে, লাঠির মত বল্লম চালাল রানার কাঁধের উপর । টানটান পেশির উপর পড়ে লাফিয়ে উঠল সড়কি, হাত পিছলে গেল গার্ডের ।

সরতে গিয়ে দু'জনই ভারসাম্য হারিয়েছে । হোঁচট খেয়ে বসে পড়ল গার্ড । কবরের পাশে পিছলে পড়ল রানা, গড়িয়ে সরে উঠে দাঁড়াল, পিছিয়ে চলেছে । সামলে নিয়েছে মঙ্গোল গার্ড । এক মুহূর্ত পরস্পরকে দেখল দু'জন । দু'হাতে শক্ত করে বল্লম ধরল গার্ড, ঠোঁট বেঁকে গেল হাসির ভঙ্গিতে । বড় করে শ্বাস নিয়ে ধেয়ে এল আবার । চোখ দুটো নিবদ্ধ শত্রুর বুকে ।

কোনও অস্ত্র খুঁজছে রানা । চোখের কোণে দেখল, প্রথম গার্ডের উপর চড়াও হয়েছে ববি । কোনও সাহায্যে আসবে না ও । তামার খুঁটিগুলোর উপর চোখ পড়ল, দু'হাতে জাপ্টে ধরল—জোর টান দিল উপরে । নীচের অংশ মার্বেলের চৌকো স্ট্যাণ্ডে গাঁথা, হ্যাঁচকা টানে উঠে এল ।

গার্ড দেখল, কিন্তু পান্ডা দিল না, শত্রুর বুক লক্ষ্য করে বল্লমের ডগা তাক করেছে । ছুটছে । ততক্ষণে খুঁটি বাগিয়ে ধরেছে রানা, ডগাটা তাক করল গার্ডের পেটে । ওটার দৈর্ঘ্য বল্লমের চেয়ে কিছুটা বেশি । গার্ডের চোখে আতঙ্ক দেখল রানা, থামতে চাইছে সে । সামনে বাড়ছে রানা, জোর এক গুঁতো লাগিয়ে দিল গার্ডের পেটে । থমকে গেল লোকটা । পেট থেকে

ভুস্ করে বেরোল বাতাস। হাঁটু মুড়ে বসে পড়ল। শ্বাস আটকে গেছে। মেঝের উপর খসে পড়ল বল্লম। রানার দিকে দ্বিতীয়বার চাইল না, ব্যস্ত হয়ে অস্ত্র তুলতে চাইছে। জানে না মাথার পাশে নেমে আসছে তামার খুঁটিটা! কিছু বুঝবার আগেই ধড়াস্ করে পড়ল লোকটা, অজ্ঞান!

মেঝের উপর ভোঁতা আওয়াজ তুলল তামার স্ট্যাণ্ড।

‘মানুষের জিনিস যত্নে রাখতে হয়,’ বন্ধ ঘরে গমগম করে উঠল ববির কণ্ঠস্বর। কবরের সামনে উঠে দাঁড়িয়েছে সে, ডানমুঠো ডলছে। প্রথম গার্ড ওর পায়ের কাছে এক ঘণ্টার জন্য শিথিলায়ন করছে।

‘তোমারটার কী হাল?’ জানতে চাইল রানা।

‘ওর বন্ধুর চেয়ে অনেক ভাল। চলো, রাজকীয় সমাধি ছেড়ে ভাগি, আবারও কেউ বর্শা নিয়ে এলে...’

‘আমার মনের কথা।’

বল্লমটা তুলে নিল রানা, হাঁটতে শুরু করল।

গুহার প্রবেশদ্বারের কাছে থামল দু’জন, উঁকি দিল বাইরে। টানা হাওয়া বইছে। ধারে-কাছে কেউ নেই। তবে আনন্দের কোনও কারণও নেই! প্রাসাদের পিছনদিকে বাড়তি এক অংশে দরজা, সেখানে হেলমেট ও টিউনিক পরা দুই গার্ড ঘোড়ার উপর আসীন! পলাতক রানা-ববিকে উঠানের দিকে খুঁজছে আরেক ঘোড়সওয়ার! চোখে চোখে কথা হলো রানা-ববির, টের পেয়ে গেছে কী করে যেন। তার মানে প্রাসাদে ঢোকা এখন অসম্ভব, কাজেই এখানে ঘুর ঘুর করে লাভ নেই। জোর হাওয়া ছাড়লেই সমাধিস্থলের ওপাশে ছুটবে। ওখানে জঞ্জালের ভিতর লুকাবে। আধ মিনিট পর ধুলো উড়িয়ে জোরাল হাওয়া এল, চারপাশ আঁধার হলো। সেই সুযোগে বেরিয়ে এল ওরা, এক দৌড়ে বারান্দা পেরিয়ে বামে মোড় নিল। তার আগেই দেখেছে, প্রাসাদের ডানদিকে বারোজন অশ্বারোহী ওদের খুঁজছে! অন্য আগুন নিয়ে খেলা-১

গার্ডদের মতই পোশাক, তবে স্লিং থেকে কাঁধে ঝুলছে রাইফেল।

সমাধি পিছনে রেখে ঝেড়ে দৌড় দিল দুইবন্ধু। সামনে বড় এক করাল। কোমর সমান কাঠের বেড়া দিয়ে ঘেরা। নীচের এক ফুট ফাঁকা। কাঠের বেড়া লাফিয়ে উপকাল রানা, নীচ দিয়ে এল ববি। সামনে ঘোড়া-টানা কয়েকটি ওয়্যাগন। চারপাশে নানাধরনের বাস্র। করালের আরেক পাশে একটা রোলস রয়েস গাড়ি। অ্যান্টিক, ধূলি-ধূসরিত। দুটো চাকার টায়ার নেই, একটু বাঁকা হয়ে দাঁড়িয়ে আছে রিমের উপর। জঞ্জালের ভিতর হাঁটতে শুরু করল ওরা, করালের পিছন দিক দিয়ে বেরোবে। একবার দেয়াল উপকাতে পারলে চিন্তা করবে কী করা যায়। কানের পাশে শ্শ্শ্শ্ আওয়াজ পেল রানা, পিছনে ‘তুঙ্ক’ করে উঠল কী যেন! চোখ পড়তে দেখল ডানে কাঠের বাস্কে গেঁথেছে তীর! আরেকটা গেল ববির কান ছুঁয়ে!

‘তীর! জলদি, ববি!’ ঝপ্ করে বসে পড়ল রানা।

বসে পড়েছে ববিও, হামাগুড়ি দিয়ে এক পিপের আড়ালে থামল। চারপাশের বাস্কে বিঁধল কয়েকটা তীর। পিপের পিছন থেকে উঁকি গিল ববি, চাপা স্বরে বলল, ‘ওরা চারজন!’

উঁচু দুটো বাস্কের আড়াল থেকে দেখল রানা। ওদিকে হেজ ঝাড়ের পাশে থেমেছে এক ঘোড়সওয়ার, তীর জুড়েছে ধনুকে। কানের কাছে ছিল নেয়ার আগেই এক লাফে পাশের ঠেলা-গাড়ির পিছনে চলে গেল রানা। আধ সেকেণ্ড পর ঠক্ করে চাকার উপর লাগল তীর। লোকটা আবারও তুণে হাত দিয়েছে, সরু পথে বেরিয়ে এল রানা, কয়েক পা ছুটে বল্লম ছুঁড়ল।

ঘোড়সওয়ার আন্দাজ চল্লিশ ফুট দূরে, তবে ঠিক পথে চলেছে বল্লম। পাঁজরে গিয়ে বিঁধত, কিন্তু ঘোড়া নিয়ে পিছাতে চাইল লোকটা, ফলে বল্লমের ডগা গাঁথল তার ডানবাহুর পেশিতে। আগেই পড়ে গেছে ধনুক, বাম হাতে চেপে ধরল ক্ষত। ফিনকি

দিয়ে রক্ত বেরোচ্ছে।

ততক্ষণে আরও তিন ঘোড়সওয়ার হাজির হয়েছে, বৃষ্টির মত
তীর ছুঁড়ছে! আবার ঠেলা-গাড়ির পিছনে আড়াল নিয়েছে রানা,
ববিকে হাতের ইশারা করেই ছুটল একটা ওয়্যাগনের দিকে।
কিছুক্ষণ হলো শৌ-শৌ বইছে হাওয়া, সে শব্দ ছাপিয়ে আসছে
ছুটন্ত ঘোড়ার ক্ষুরধ্বনি! প্রহরীদের সঙ্গে যোগ দিতে আসছে
আরও গার্ড! পাকা তীরন্দাজ মঙ্গোলরা, আধ মিনিটও পেরুল না,
তার আগেই রানা-ববির দিকে অসংখ্য তীর ছুটে এল! চারপাশের
কাঠের বাঞ্চে বিঁধছে, লাগছে ওয়্যাগনের চাকা ও পাটাতনে!
ওয়্যাগনের ছাউনি ফস্ করে ফুটো করে আরেকদিক দিয়ে বেরিয়ে
যাচ্ছে! এক ওয়্যাগন থেকে অন্য ওয়্যাগনে থামছে রানা-ববি,
আড়াল নিয়ে ছুটছে। ওদের সাহায্য করছে দমকা হাওয়া, নইলে
পিঠে এক গাদা তীর নিয়ে পড়ে থাকত মুখ খুবড়ে! সাঁই-সাঁই
হাওয়া উড়িয়ে নিয়ে চলেছে অজস্র ধুলো-বালির কণা, পরিষ্কার
দেখতে পাচ্ছে না মঙ্গোলরা, লক্ষ্য-ভেদও করছে না তীর। রানা-
ববি প্রাণপণে ছুটছে, কেউ দেখলে ভাববে, ওদের লেজে আগুন
দিয়েছে কেউ! একমাত্র ইচ্ছা এখন ওদের, শত্রুদের কাছ থেকে
দূরে থাকা। একটা ওয়্যাগনের পিছনে থামল ওরা। পাটাতনের
উপর অসংখ্য ফর্কপিক, মাথার দিকে দুটো করে তীক্ষ্ণ দাঁত। খড়
তুলতে ব্যবহার হয়।

রানার দিকে চেয়ে হাসল ববি। যা চেয়েছে, পেয়ে গেছে।
এবার পাল্টা হামলা। মৃদু হাসল রানাও। একটা করে ভারী পিক
তুলল ববি, হাতল ধরে আড়াল থেকে বেরিয়ে দু'পা ছুটে ছুঁড়ল
নতুন বর্শা! তৃতীয় বল্লমটা এক গার্ডের উরু ফুটো করল! পঞ্চম
বল্লম আড়াআড়ি লাগল একজনের চিবুকে, নিঃশব্দে ঘোড়া থেকে
খসে পড়ল সে! ঘোড়সওয়ারীরা সতর্ক হলো, ধারে কাছে এল না
আর। তবে তারা জানে, লোকদুটোকে মুঠোর মধ্যে পেয়ে গেছে।
পালাবার পথ নেই!

আগুন নিয়ে খেলা-১

ধুলোভরা হাওয়া থমকে থমকে বইছে, চারপাশ ভাল দেখা যায় না। তীরন্দাজদের এতে ভারি অসুবিধা। কিন্তু হঠাৎ পড়ে গেল বাতাস। ভাসতে ভাসতে নীচে নামছে ধুলো। পরস্পরকে দেখল রানা-ববি, এবার তীর আসবে! পিক ফেলে ওয়্যাগনের আড়ালে ঝাঁপিয়ে পড়ল ববি। চারপাশের বাস্র ও ওয়্যাগনে অসংখ্য তীর খটাখট লাগল! ওই ওয়্যাগন থেকে ক্রল করে পরের ওয়্যাগনের পিছনে চলে গেল ওরা, মস্ত এক চাকার আড়াল নিল। ওটার কারণে খানিকটা নিরাপত্তা পাওয়া গেল। ওদের মাথার খানিকটা উপরে ওয়্যাগনের পাশে একের পর এক তীর বিঁধছে। করালের ডানদিক থেকে আগ্নেয়াস্ত্রের আওয়াজ এল! তীরন্দাজদের উপর ভরসা নেই, এবার রাইফেল চালাচ্ছে আরেক দল!

কাঠের একটা চন্টা ববির খুতনি কেটে দিল। রানার দিকে চেয়ে হাসল ও। ‘তোমার কি মনে হয়, সাদা রুমাল দেখালে মানবে ওরা?’

‘না,’ বলল রানা, ‘মানবে না।’ এড়ির কথা মনে পড়েছে ওর। মাথার কাছে বিঁধল একটা তীর। অজান্তে গড়ান দিয়ে সরতে চাইল। তবে অর্ধেক পথে থমকে গেল। পাশের জিনিসটা পরিচিত। ওয়্যাগনের নোংরা তারপুলিন দিয়ে ঢাকা!

‘পরেরবার বাতাস শুরু হলে দৌড় শুরু করি, কী বলো?’ শুকনো স্বরে বলল ববি। ‘এখান থেকে বেরুতে হবে। তুমি একটা ঘোড়ার রাশ ধরবে, সেই সুযোগে লোকটাকে পিঠ থেকে টেনে নামাব আমি। ব্যস্, নিজেদের ঘোড়া পেয়ে গেলাম! তাই না?’

‘অনেক বেশি ঝুঁকি,’ বলল রানা। ‘অবশ্য কিছু করারও নেই।’

করালের সামনের দিক দেখছে ববি, ঘাড় ফিরিয়ে দেখল চকচক করছে রানার চোখ। ‘কী ব্যাপার, রানা? অন্য কোনও বুদ্ধি?’

‘না, তোমার প্ল্যানই থাক,’ বলল রানা। ‘তবে লাল ঘোড়া দাবড়াব আমরা!’

boiRboi.net

পঁচিশ

দেয়ালের সঙ্গে গাঁথা রেডিও, কয়েকবার সিগনাল দিল। এরপর স্ট্যাটিকের আওয়াজ। শৌ-শৌ করছে। মনে হলো ঝড় বইছে। ভেসে এল অস্পষ্ট স্বর, ‘ওদের কোণঠাসা করেছি। চায়নিজ ডেলিগেশনের সঙ্গে এসেছে। মঙ্গোলিয়ান স্টেট সিকিউরিটি এস্কাউট, তবে নকল। টেস্ট চেম্বারে আটকা পড়া আমাদের দুই লোক বলছে, এরা চায়নিজ নয়। সম্ভবত রাশান।’

হ্যাণ্ডসেটে বিরক্ত স্বরে বলল জালাইর, ‘আচ্ছা। সরকারী এজেন্ট হতে পারে। তবে বোধহয় রাশান অয়েল কোম্পানি থেকে পাঠিয়েছে। কম্পাউণ্ড ছেড়ে যেন জীবিত বেরুতে না পারে। ডেলিগেশন যাওয়ার আগ পর্যন্ত গোলাগুলি বন্ধ রাখো। সবার উপর কেন চোখ রাখা হলো না, তার বিস্তারিত রিপোর্ট চাই।’

চেরিউড কেবিনেটের ভিতর হ্যাণ্ডসেট রেখে দিল জালাইর, পাল্লা দুটো আটকে বেয়িয়ে এল অ্যান্টিরুম ছেড়ে। কনফারেন্স রুমে ফিরে দেখল চায়নিজ মন্ত্রী জানালার সামনে, ধূলি-ঝড় দেখছেন। বোধহয় মনের ভিতর অমন ঝড়ই বইছে। ‘মিটিঙে বাধা পড়েছে বলে আমি দুঃখিত,’ নিজ চেয়ারে গিয়ে বসল তেমুজিন। তিন্ত হাসল। ‘আপনার সঙ্গে আসা দু’জন এস্কাউট ঝামেলা করেছে। দুঃখের কথা, এরা আপনার সঙ্গে ফিরবে না। তবে চিন্তা করবেন না, আপনি চাইলে এস্কাউট হিসাবে আমার আগুন নিয়ে খেলা-১

দু'জন সঙ্গে যাবে।’

মৃদু নড করলেন কুইজিয়ন। ‘বাইরে গুলির আওয়াজ পেলাম।’

‘আমার সিকিউরিটি গার্ডের ক’জন ট্রেনিং নিচ্ছে। এ নিয়ে দুশ্চিন্তা করবেন না, প্লিজ।’

জানালা দিয়ে চেয়ে রয়েছেন মন্ত্রী, ফাঁকা দৃষ্টি। মন অন্য কোথাও। হঠাৎ যেন বুড়ো হয়ে গেছেন, ধীর পায়ে এসে চেয়ারে বসলেন। রাগ প্রকাশ পেল তাঁর কণ্ঠে, ‘আপনার প্রস্তাবটা ব্ল্যাকমেইলিং করার মত। যা চাইছেন তা দেয়া অসম্ভব।’

‘সম্ভব, সম্ভব,’ ধীরে বলল তেমুজিন। ‘ক্রুড অয়েল না পেলে যে দেশ অর্থনৈতিক ভাবে বিধ্বস্ত হয়ে যাবে, তার কাছে বেশি চাইনি। ...আমি যে প্রস্তাব দিয়েছি, তার বাইরে চুক্তি হবে না।’

কুইজিয়ন রাগী চোখে চেয়ে রইলেন। প্রথম সাক্ষাতে তাঁর অসহ্য লেগেছে এই লোককে। মহাচিনের প্রতি কোনও শ্রদ্ধা নেই এর। এমন ভাব দেখিয়েছে, যেন পৃথিবীর সামান্য কোনও দেশ চিন! এ লোকের প্রস্তাব নিয়ে ভাবতে মন চাইছে না তাঁর। কিন্তু পার্টির নেতারা অপেক্ষা করছেন। বিশেষ করে প্রেসিডেন্ট। সবাই আশা করছেন ক্রুড অয়েল মিলবে। মন খচখচ করছে তাঁর, নেতারা বোধহয় মেনে নেবেন এ প্রস্তাব। ভিন্ন পথ কোথায়?

‘মিনিস্টার, এ প্রস্তাব দু’পাক্ষিক দিক দিয়ে ভাল, এটা ভেবে দেখুন,’ বলল তেমুজিন। শান্ত সমাহিত চেহারা তার। ‘প্রয়োজনীয় তেল পেয়ে অর্থনৈতিক উন্নতি করবে চিন, সরবরাহকারী প্রতিষ্ঠান হিসাবে দীর্ঘকালীন চুক্তি পাব আমরা; এদিকে যা ছিল মঙ্গোলিয়ার, ফিরে পাবে এ দেশ।’

‘নিজেদের জমি ছেড়ে দেয়াকে হালকা ভাবে নেয়া যায় না।’

‘ওই এলাকা এত মূল্যবান নয় যে চিনের মহা কোনও ক্ষতি হবে। আমার মত আপনিও জানেন ওটা ধুলোভরা একটা গামলা। ওখানে জমির মালিক মঙ্গোল পশু-পালকরা। আমাদের কাছে

সাংস্কৃতিক দিক থেকে ওই এলাকা গুরুত্বপূর্ণ। মঙ্গোল জনগণের ইচ্ছে আবারও ওটা অধীন হোক এ দেশের। একসময় যা আমাদের ছিল, তা আবারও আমাদের হোক।’

‘আপনি বোধহয় ঠিকই বলছেন, ওখানে মূল্যবান কিছু নেই। তবে ভিনদেশের এক প্রাইভেট কোম্পানি আরেক দেশের প্রদেশ চাইবে, এটা খুবই অবাস্তব এবং অস্বাভাবিক।’

‘মিথ্যে বলেননি। আমরা কী চাইছি আমাদের সরকার এখনও জানে না। রাজনৈতিক ভাবে আচমকা উপহারটা পাবে তারা। মঙ্গোলিয়ার জনগণ খুব খুশি হবে।’

‘এবং এর ফলে আপনারা বাড়তি কোনও সুযোগ পাবেন।’

‘তা বলতে পারেন। আমার কোম্পানি কিছু সুযোগ তো পাবেই।’ পাশ থেকে চামড়া মোড়া বাইগার তুলল তেমুজিন, মন্ত্রীর দিকে বাড়িয়ে দিল। ‘চুক্তির সব পাবেন এতে। দু’ দেশের কর্তৃপক্ষ সই করলেই লেনদেন শুরু হবে। আপনাদের কাছ থেকে চুক্তি গ্রহণ-পত্র পেলে কাজে নামব আমরা।’

‘আগামীকাল বিকেলে জেনারেল সেক্রেটারির কাউন্সিল-এ বক্তব্য রাখব আমি। এরপর হ্যাঁ বা না সিদ্ধান্ত নেয়া হবে। নিজ অবস্থান থেকে নড়ছেন না আপনি। বলে রাখি, এর ফলে আপনার প্রস্তাব “না” ভোটে বাতিল হতে পারে।’

‘তা যদি হয়, তা-ই হোক,’ বলল জালাইর। ‘যা চাই আমি জানিয়েছি।’ উঠে দাঁড়াল সে, মসৃণ ভাবে বাউ করল। মনে হলো ঠাট্টা করছে। ‘আমি আশা করি দীর্ঘস্থায়ী সম্পর্ক, মিনিস্টার কুইজিয়ন।’

উঠে দাঁড়ালেন বাণিজ্যমন্ত্রী, আড়ষ্ট ভঙ্গিতে পাল্টা বাউ করলেন। সঙ্গীদের নিয়ে ফিরতি পথ ধরলেন। ডেলিগেশনের সঙ্গে রইল জালাইর তেমুজিন ও বলোমা, দরজা পর্যন্ত এগিয়ে দিল।

বাইরে ধূলি-ঝড় বইছে। টলতে টলতে যার যার গাড়িতে

গিয়ে উঠলেন ডেলিগেশনের সবাই। গাড়ি-বহর রওনা হতে দরজা বন্ধ করল জালাইর, বোনের দিকে চাইল। ‘আমরা পেড়ে নিলে আঙুর আমাদের।’ করিডোর ধরে ফিরছে সে।

‘মনে হয়, তবে বড় ঝুঁকিও থাকল। এরা ইনার মঙ্গোলিয়ার জমি ছাড়তে চাইবে না। সন্দেহ করে বসতে পারে।’

‘ভুল। চায়নিজরা জানে ইনার মঙ্গোলিয়ার সাংস্কৃতিক মূল্য আমাদের কাছে কতটা। ওখানকার জনগণ মঙ্গোলিয়ার সঙ্গে মিশে যেতে চায়। আমি যা বলেছি, মিথ্যে বলিনি। বক্তব্যে কোনও খুঁত পাবে না। মজার ব্যাপার, ওরা যে জমি দেবে আমাদের, আমরা সেটা থেকে তেল তুলব, বিক্রি করব ওদেরই কাছে।’

‘যখন আসল ঘটনা বুঝবে, খেপে যাবে। চুক্তি বাতিল করতে পারে ওরা। তার চেয়েও খারাপ কিছু হলে? ওই এলাকা আবার কেড়ে নিলে?’

‘আন্তর্জাতিক আইন মেনে চলতে হবে ওদের। ফুঁসবে, কিন্তু পথ থাকবে না। অন্যান্য ক্ষমতামালী দেশ, বিশেষ করে আমেরিকা, বাধা দেবে।’

‘যদি বাজার মূল্যের চেয়ে কম দিতে চায়?’

‘ওরা অসহায়। যে অস্ত্র আমাদের হাতে, কী করবে! নতুন এ টেকনোলজি আবিষ্কার হওয়ায় যা-খুশি করতে পারব। বছরের পর বছর বাজার অস্ত্র রাখা যাবে। পারস্য উপসাগরে যা ঘটল, দরকার পড়লে আবারও তা-ই করা যাবে।’

কনফারেন্স রুমে পৌঁছে গেছে দু’জন। বারের সামনে থামল, শেলফ থেকে স্ফচ লুইস্কির বোতল তুলে নিল জালাইর, দুটো গ্লাসে ঢালল। ‘প্রিয় সিস্, আমরা এরইমধ্যে জিতে গেছি। একবার ক্রুড অয়েল দিতে শুরু করি, তারপর দেখবে কেমন চিনাদের গলা টিপে ধরি। চাইলেও প্রতিশোধ নিতে পারবে না। যদি তেড়িবেড়ি করে, আমাদের তেল পাইপ-লাইন যাবে সাইবেরিয়ায়, নাখোদকা লাইনে। তাতে আমাদের ক্ষতি নেই, জাপান তো খুশিতে নাচবে,

দুনিয়ার আর সব দেশ চিনের দিকে চেয়ে মুচকি মুচকি হাসবে।’

‘সব সম্ভব হচ্ছে আমাদের ভাইটির জন্য,’ আন্তরিক হাসল বলোমার্মা। ‘তুমি ঠিকই বলেছিলে, নিংবো বন্দর দুর্ঘটনা চিনাদের একেবারে অসহায় করে দিয়েছে। তোমার প্রস্তাবে রাজি না হয়ে আর কোনও উপায় নেই ওদের।’

‘সত্যিই, ওখানে জাদু দেখিয়েছে আমাদের তেমুর।’

‘তবে আরেকটু হলে বৈকাল হুদে মেরে ফেলেছিল আমাকে,’ অস্বস্তি নিয়ে বলল বলোমার্মা।

নরম স্বরে বলল জালাইর, ‘তেমুর আমাদের আপন ভাই না? ও আসলে বোঝেনি যে অত বড় ঢেউ উঠবে। ওরকমটা ঘটবে জানলে নিশ্চয়ই ও বোনকে বিপদে ফেলত না। এ নিয়ে মনে কষ্ট রেখো না, বলোমার্মা। বড় কথা এখন তুমি নিরাপদ।’ মৃদু হাসল। ‘স্বীকার করতেই হবে, দারুণ দেখিয়েছে তেমুর। সাইবেরিয়ান পাইপ-লাইন ধ্বংস, চায়নিজ বন্দরে আগুন—চমৎকার! ওই বন্দরের ধারেকাছে সাইসমিক ফল্ট ছিল না। বড় নেতা হবে ও। পারস্য উপসাগরে যে দলকে কাজে লাগিয়েছে, তারাও ভুল করেনি। এর পর আরও যা ঘটতে চলেছে মিডল-ইস্টে, চিনারা চিবুক ঘষবে আমাদের পায়ে।’

‘তারপর প্রশান্ত মহাসাগর পেরিয়ে উত্তর আমেরিকা?’

‘হ্যাঁ, তেমুর ওখানে শেষ আঘাত হানবে। দু’দিন আগেই সিউলে পৌঁচেছে বৈকাল হুদের ইকুইপমেন্ট। রওনা হয়ে গেছে ওরা। রাশান সার্ভে টিম নিয়ে যে দুর্ঘটনা হলো, এরপর কাজ থামাতে হয়েছে। খেনতি এক্সকেভেশন দলকে তেমুরের সঙ্গে দিয়েছি।’

‘ওরা তো খেনতি এক্সকেভেশন থেকে কিছুই পেল না। সমাধির ভিতর কবরটা পর্যন্ত নেই। কুবলাই খানের সোনাদানা গেল কোথায়?’

‘আছে কোথাও। ঠিকই খুঁজে বের করব। তবে টাকার চিন্তা আগুন নিয়ে খেলা-১

নেই, যথেষ্ট টাকা দেবে চায়নিজরা। আরও দেড়-দুই সপ্তাহ লাগবে, তারপর আরেকটা ঝাঁকি খাবে তেলের বাজার।’ হাঙরের হাসি হাসছে তেমুজিন। ‘এরপর দেখবে সবাই দেখা করতে চাইছে আমাদের সঙ্গে।’

কনফারেন্স রুম সংলগ্ন সিঁড়ির দিকে চলেছে সে, পিছু নিল বলোমা। অর্ধেক তলা নেমে বিশাল পোরট্রেইট, ওটার দিকে চাইল তেমুজিন। মঙ্গোল যোদ্ধার উদ্দেশে মদের গ্লাস উঁচু করল। ‘আমাদের প্রথম পদক্ষেপ নেয়া শেষ। গোল্ডেন ক্ল্যানের বিজয়ের দিন নতুন করে শুরু হলো।’

‘আমাদের দাদা খুব খুশি হতেন,’ বলল বলোমা। ‘এ সম্ভব হলো শুধু তাঁরই জন্যে।’

‘তাঁর এবং চেঙ্গিস খানের প্রতি শুভ-কামনা,’ সোনালী তরল ঢক করে গিলল জালাইর তেমুজিন। ‘আমাদের জয় হবেই।’

ছাব্বিশ

প্রাসাদের পিছন দিক। সিকিউরিটি গার্ডদের নেতা গ্যানবোল্ড রেডিওটা ঝুলিয়ে দিল বেলেট। এইমাত্র খবর এসেছে, চায়নিজ ডেলিগেশন ফিরতি পথ ধরেছে। দুই বদমাশ বেঁচে থাকলে এবার রাইফেল দিয়ে শিকার করা চলবে।

করালের ভিতর ঘুরপাক খাচ্ছে ধুলো, সব ঝাপসা। খানিক আগে ওখানে বৃষ্টির মত বুলেট ও তীর বর্ষণ হয়েছে। লোকদুটো বেঁচে রয়েছে, সে-সম্ভাবনা ক্ষীণ। গ্রহরীদের নিয়ে করাল ঘিরে রেখেছে গ্যানবোল্ড। কিছুক্ষণ হলো ফর্কপিক আর ছুঁড়ছে না

কেউ। লোকদুটোকে আর দেখাও যায়নি। এতক্ষণে লাশ, ভাবল সে। তবুও নিশ্চিত হওয়া দরকার। গার্ডদের নির্দেশ দিল। করালের মাঝখানে বুলেট বর্ষণ হলো তিন দফা, তারপর নামল থমথমে পরিবেশ।

কোমরের খাপ থেকে খাটো তলোয়ারটা বের করল গ্যানবোল্ড, ঘোড়ার পিঠ থেকে নামল। দেখাদেখি নেমেছে আরও তিন প্রহরী। ছিন্নভিন্ন লাশ দেখতে চলেছে। কাঠের বেড়ার দশ ফুট দূরে থমকে গেল সবাই। করালের ভিতর আওয়াজ কীসের! কাঠের ক্রেট ভেঙেছে কেউ, তা হলে কি বেঁচে আছে? কাঠ ভাঙবার আওয়াজ থামতেই শোনা গেল আরেকটা আওয়াজ! ধাতব কিছু। খিরখির-খিরখির করছে। কয়েক মুহূর্ত পর থামল। বেড়ার দিকে পা বাড়াল গ্যানবোল্ড, কয়েক পা এগিয়ে আবারও থামল। খিরখির-খিরখির আওয়াজটা শুরু হলো আবারও। বড় ওয়্যাগনটার পাশ থেকে আসছে!

‘ওদিকে!’ ধমকে উঠল সে। হাত তাক করল ওয়্যাগনের দিকে। ‘ওদিকে গুলি করো!’

কারবাইন কাঁধে ঠেকিয়েছে তিন প্রহরী, কিন্তু হঠাৎ বিকট আওয়াজে কেঁপে উঠল করাল! ওয়্যাগনের দিকে অস্ত্র তাক করছে তারা, কিন্তু ওটার পাশ থেকে বিস্ফোরিত হলো এক গাদা বাক্স! পরমুহূর্তে বেড়ার একটা অংশ বিধ্বস্ত হলো! নিচু একটা জিনিস বিট-বিট আওয়াজ করে অতি দ্রুত ছুটে আসছে তাদের দিকে!

গ্যানবোল্ডের চোখদুটো বিস্ফারিত হলো, ফ্যাকাসে লাল রঙা জিনিসটা তারই দিকে আসছে! মোটর সাইকেলের সিটে বড়সড় একটা বাক্স! সাইডকারের উপর আরেকটা! হঠাৎ গ্যানবোল্ড বুঝল চোখ ভুল দেখেছে, কেউ চালাচ্ছে না, তা নয়! নিজেই বাঁচাতে তুলল তলোয়ার, কিন্তু দেরি হয়ে গেল!

তাকে ঘেঁষে গেল মোটর সাইকেল, ঠিক তখনই বাক্সের ভিতর থেকে উঁচু হলো ববি। দু’হাতে ভারী কোদাল, জোরে আগুন নিয়ে খেলা-১

চালাল গ্যানবোল্ডের মুখ লক্ষ্য করে। বাম চোয়ালে খট্টাস্ করে লাগল। ধপ্ করে বসে পড়ল লোকটা, চোখে-মুখে মুগ্ধ একটা বিহ্বল চাহনি।

গার্ডদের নেতাকে পাশ কাটিয়ে সামনে পড়ল তিন প্রহরী। যদিকে পারে ছিটকে সরতে চাইল তারা, গুলি ছুঁড়তে ভুলে গেছে। ডানপাশের জন পিছলে মাটিতে পড়ল, পায়ের উপর দিয়ে গেল সাইডকারের চাকা। দ্বিতীয়জন বামে ডাইভ দিয়ে সরল নিরাপদে। তবে তৃতীয়জনের মাথার উপর নেমে এল কোদাল, মুখ খুবড়ে পড়ল সে।

বাক্সের ভিতর বুক পর্যন্ত লুকিয়ে রয়েছে রানা, পুরো খুলে দিল থ্রটল—রাইফেলধারী ঘোড়সওয়ারদের এড়াতে চাইছে, ছুটছে তীরন্দাজদের দিকে। ওরা খানিকটা ছড়িয়ে ছিটিয়ে। ওরই ভিতর দিয়ে পালাতে হবে।

‘মাথা নিচু, ববি!’ চেষ্টাচাল রানা।

‘মাথা হেঁট হয়ে গেল আমার!’ বলল ববি। বাক্সের ভিতর লুকিয়ে পড়েছে।

আধ সেকেণ্ড পর এল একগাদা তীর, ঠং-ঠনাৎ শব্দে সাইডকারে লাগল। কয়েকটা বিঁধল রানা-ববির কাঠের বর্মতে। হঠাৎ রানা টের পেল মাথার ভিতর আগুন জ্বলে উঠেছে। বাম উরু ছিলে দিয়ে গেছে তীর। ওদিকে চাইল না, ব্যুহ ভেদ করতে হবে। অতিরিক্ত তেল গিলছে কারবুরেটার, সাইলেন্সার দিয়ে বেরিয়ে আসছে ঘন ধোঁয়া। রাইফেলঅলাদের কাছ থেকে ওদের খানিকটা আড়াল দেবে ওই মেঘ, ভাবল রানা। তা ছাড়া, গুলি ছুঁড়লে তীরন্দাজদের গায়ে লাগতে পারে। কিন্তু তীরন্দাজদের টার্গেট প্র্যাকটিস করতে অসুবিধা নেই—রানার মনে হলো শত শত তীর আসছে! বাঁচতে হলে উল্টো আক্রমণ করতে হবে। একটা ঘোড়ার দিকে মোটর সাইকেল তাক করল রানা, ছুটল ওদিকে। বিদ্যুটে আওয়াজ করা যন্ত্র তেড়ে আসছে দেখে সরতে চাইল ঘোড়া,

আকাশে ছুঁড়ল পিছনের দু' পা। মাথার কাছ দিয়ে পিছলে পড়তে গেল আরোহী, দু'হাতে জড়িয়ে ধরল ঘোড়ার ঘাড়। নাকের কাছে একটা বর্শা দেখল রানা, মুখের সামনে দিয়ে বামদিকের উঠানে গাঁথল। তীরন্দাজদের নিমেষে পেরিয়ে গেল মোটর সাইকেল, উঠানের ডানদিক দিয়ে বেরিয়ে এল, গতি তীব্র। মুহূর্তে সমাধিস্তূল পিছনে পড়ল।

বাক্সের ভিতর থেকে মাথা উঁচু করল ববি, পিছন দিকে চাইল। আবার একাট্টা হয়েছে ঘোড়সওয়ারীরা, মোটর সাইকেলকে তাড়া করে ধরতে চাইছে। 'পিছনে আসছে!' চেষ্টা করে জানাল ববি। 'আমি পাল্টা পাটকেল ছুঁড়ব! যখন উড়াল দেবে, তার আগে বোলো!'

'এসে পড়েছি প্রায়!' জানাল রানা।

সাইডকারে উঠবার আগে ওয়্যাগনের মেঝের উপর জিনিসটা পেয়েছে ববি। মাঝারি এক ব্যাগ ভরা অজস্র ঘোড়ার নাল। সাইডকারে তুলেছে ব্যাগ। এবার বনমানুষের মত লম্বা হাতদুটো কাজে লাগল। ছুঁড়তে লাগল ঘোড়সওয়ারীদের দিকে। বাক্সের ভিতর লুকিয়ে থাকছে, সুযোগ মত ভড়কে দিতে চাইছে ধাওয়াকারীদের। খুব একটা লাভ হচ্ছে না। মুঠোর মধ্যে নাল রেখে ছোঁড়া কঠিন। তবে হঠাৎ এ জিনিসের এয়ারোডাইনামিক প্রপারটির কথা মাথায় খেলল ববির। এ তো খুদে বুমেরাং! লোহার ভারী নাল, মিসাইলের মত ছুটবে। আত্মবিশ্বাস বড় কিছু, বুমেরাঙের ভঙ্গিতে পরপর তিনটে নাল ছুঁড়ল ববি। সামনের দুই ঘোড়সওয়ারীর বুকে-পেটে লাগল দুটো, তৃতীয়টা ফস্কে গেল। কিন্তু ওই দু'জনের কারণে তীর ছুঁড়তে পারল না পিছনের লোকগুলো। সবাই খানিকটা পিছিয়ে পড়ল। অর্ধ-চন্দ্রাকৃতির দেয়াল পিছিয়ে পড়ছে। খানিক দূরে খাদ, ওদিকে কোনও প্রাচীর নেই।

উঠান প্রায় পেরিয়ে এসেছে রানা, থ্রটল খুলে গতি তুলতে আগুন নিয়ে খেলা-১

চাইছে। যখন করালে পঞ্চাশ দশকের চেকোস্লোভাকিয়ান মোটর সাইকেল দেখেছিল, ভেবেছিল শুধু কঙ্কালটা থাকবে। কিন্তু তা নয়, পরীক্ষা করতে গিয়ে দেখা গেল জাওয়া ৫০০ ওএইচসি'র দুই চাকায় বাতাস রয়েছে। টাঙ্কির ভিতর কয়েক গ্যালন অকটেন! ন'বার কিক দেয়ার পর ম্যানুয়াল স্টার্টার কাজ করল। টুইন সিলিণ্ডার ইঞ্জিন চালু হতেই বোঝা গেল, যান্ত্রিক কোনও সমস্যা নেই ওটায়।

তখনই মুক্তি পাবার ক্ষীণ সম্ভাবনা তৈরি হলো।

ঘোড়ার নাল ছুঁড়ে ববি, সে-কারণে পিছিয়ে পড়ছে অশ্বারোহীরা। অনেক এগিয়ে গেছে রানা। হঠাৎ ডানে বাঁক নিতে শুরু করল, চোঁচিয়ে বলল, 'সিটবেল্ট বেঁধে নাও, ববি; আমরা উড়াল দেব!'

ববি যেন সাইডকারের ভিতর ঢুকে পড়তে চাইছে। একহাতে ধরেছে সামনের হ্যাণ্ড রেল, অপর হাতে এখনও একটা নাল। ওটা ফেলল না, সাইডকারের কাউলিঙে ছেড়ে দিয়ে বলল, 'তোরা গুণে কপাল ভাল হোক আমাদের!'

সামনে প্রাচীর নেই। গভীর খাদের দিকে নেমে গেছে জমিন। বুঝতে পারছে রানা, আত্মহত্যার ঝুঁকি নিচ্ছে। তবে এ ছাড়া কোনও পথও নেই। জমির কিনারা পলকে হাজির হলো। শেষ মুহূর্তে ব্রেক কষল রানা, হ্যাণ্ডেলবার ঠিক করে নিল। ততক্ষণে যান্ত্রিক ঘোড়া উড়াল দিয়েছে পজ্জিরাজের মত!

উপর দিকে উঠে আসতে চাইছে পেটের নাড়িভুঁড়ি। পায়ের নীচে জমিন নেই! দ্রুত পতনের অনুভূতি! যেন এয়ার পকেটে পড়েছে প্লেন। খাদের প্রথম তিরিশ ফুট প্রায় খাড়া দেয়াল, তারপর অপেক্ষাকৃত ঢালু জমিন। রানার মনে হলো ওর দিকে দ্রুত উঠে আসছে জমি! মুহূর্ত পর মোটর সাইকেলের সামনের চাকা মাটি স্পর্শ করল। পরক্ষণে পিছনের অংশ জোরালো ঝাঁকি খেয়ে নামল। রানা ও ববির অসংখ্য তীর বেঁধা বর্মদুটো ছিটকে

একপাশে গিয়ে পড়ল। এতে সুবিধা হলো। ভারসাম্য রাখতে পারল রানা, মন দিল চালনার দিকে।

সাইডকার পাশে থাকায় মোটর সাইকেল কাত হয়ে পড়ল না। মুঠোর মধ্যে শক্ত করে হ্যাণ্ডেলবার ধরে হড়-হড়িয়ে নেমে চলেছে রানা! সাইডকার ও পিছনের চাকা সারাক্ষণ নাচছে! এ ধরনের পরিস্থিতিতে ব্রেক কষতে মন চায়, কিন্তু রানা জানে, সেটা ঘনিয়ে আনবে মৃত্যু! দ্রুতগতি বাইককে খানিকটা ভারসাম্য দিচ্ছে সাইডকার। তবে কতক্ষণ? গতি থামাবার চেষ্টা না করেই পাহাড় বেয়ে নেমে চলেছে রানা, পুরো খেয়াল সামনের চাকার উপর। এক শ' মাইলের বেশি গতি তুলে নেমে চলেছে বাইক। ববির ঘোড়ার নাল কাজে লাগছে কি না, কে জানে! তবে এখনও বড় কোনও পাথরের মুখোমুখি হয়নি ওরা। সামনে গভীর কোনও গর্তও নেই। নুড়ি পাথর ভরা একটা এলাকা পড়ল। খানিক দূরে নুড়ি ছিটকে উঠছে দেখে চমকে গেল রানা। উপর থেকে গুলি করছে লোকগুলো! মোটর সাইকেলের ইঞ্জিনের আওয়াজ, সামনে থেকে জোরাল হাওয়া, ফলে আগ্নেয়াস্ত্রের গর্জন আগে শোনা যায়নি। দক্ষিণ-পূব থেকে আসছে বাতাস, সঙ্গে রয়েছে ধুলোর ঘন চাদর। লক্ষ্যভেদ করতে পারছে না লোকগুলো। তবে ওই ধুলোর কারণে প্রায় অন্ধ হয়ে গেছে রানাও, হ্যাণ্ডেলবার ধরে বসে থাকল—বড় কোনও পাথর বা গাছের কাছে মনে মনে অনুরোধ করছে, তোরা একটু সরে থাক, ভাইয়েরা আমার! ধাক্কা খেলে নির্ঘাত মারা পড়ব!

খাদের কিনারে এসে দাঁড়িয়েছে গার্ডরা, মোটর সাইকেল লক্ষ্য করে গুলি ছুঁড়ছে। কিন্তু হঠাৎ খেপা হাওয়া উড়িয়ে দিল ধুলোর সামিয়ানা, মুহূর্তে হারিয়ে গেল পলাতকরা। ছ'জন গার্ড হাল ছাড়েনি, ঘোড়া থেকে নামল, রাশ ধরে আঁকাবাঁকা পথে নামতে লাগল। সময় নিয়ে খাদের মেঝেতে নেমে এল ঘোড়াগুলো। আবার রওনা হলো ওরা। গতি তুলছে।

আগুন নিয়ে খেলা-১

মোটর সাইকেলের সিটে পাথরের মত জমে রইল রানা-ববি। এরইমধ্যে হালকা ভাবে পিছনের ব্রেক কষছে রানা। পাহাড় বেয়ে নেমে চলেছে বাইক আশি মাইল গতিতে। যে-কোনও সময় মৃত্যু ঘটতে পারে। তবে খাড়া ঢাল ধীরে ধীরে কমে আসছে, ওদের মন বলছে পাতালে গিয়ে পড়ছে না ওরা। সামনে ঝোপ ও পাথর দেখলে হ্যাণ্ডেলবার সামান্য নাড়তে শুরু করল রানা। পাহাড়ি ঢালে একটু হলেও ভারসাম্য ফিরছে। খানিক দূরে সরু পাহাড়ি এক পথ শুরু হয়েছে। ওটার মুখের কাছে পৌঁছতে প্রকাণ্ড লাফ দিল মোটর সাইকেল, সিট ছেড়ে শূন্যে উঠে গেল রানা-ববি। সাইডকার নিয়ে বামদিকে কাত হতে গেল মোটর সাইকেল, কিন্তু শেষ মুহূর্তে মত পাল্টে সোজাই রইল। হ্যাণ্ডেলবার শক্ত করে ধরল রানা আবার। একটু দূরে সিঁড়ির ধাপের মত আরেকটা! ঝাঁকি দিয়ে ওখানে নামল মোটর সাইকেল। এরপর শুরু হলো একের পর এক সিঁড়ির ধাপ! নাচতে নাচতে চলেছে মোটর সাইকেল, স্প্রিংগুলো কোনোই কাজে আসছে না, চামড়ার সিট যেন কাঠ দিয়ে তৈরি! মনে হলো জোর ঝাঁকিতে খসে পড়বে কল্লাটা!

কাত হতে গিয়েও বারবার সামলে নিল মোটর সাইকেল। প্রতিবার সামনের চাকা সঠিক দিকে তাক করছে রানা। ভারসাম্য রাখতে সাহায্য করছে ববি দেহটা এদিক-ওদিক সরিয়ে। সাইডকারের চাকার তলে পড়ছে ছোট বোল্ডার। ওগুলো কারের মসৃণ নাকটা ভচকে দিয়েছে। যেন স্নেজহামার দিয়ে পিটিয়েছে কেউ।

আরও খানিক নামবার পর পাথর ও ঝোপঝাড় মিলিয়ে গেল, এদিক-ওদিক দু' একটা গাছ। তারপর ঢালু জমিতে শুরু হলো শুকনো ঘাসের রাজত্ব। সামনে ঢেউ খেলানো জমি। মোটর সাইকেলের স্পিড কমে এসেছে, আবার গতি তুলতে শুরু করল রানা। দক্ষিণ থেকে হাওয়া ছেড়েছে, মুখে খাবড়া দিয়ে পিছিয়ে

যাচ্ছে। বাতাসে ঘন ধুলো।

‘এখনও পিছনে আসছে?’ চেষ্টা করে জানতে চাইল রানা।

‘হ্যাঁ!’ একটু পর পর পিছন দেখছে ববি, কিন্তু চোখে পড়ছে না কিছুই। ঘোড়া নিয়ে খাদ বেয়ে নামতে দেখেছে গার্ডদের। নিশ্চয়ই ধাওয়া শুরু করেছে!

রানা জানে প্রাচীন মোটর সাইকেল যতক্ষণ চলবে, ঘোড়সওয়ারীদের পিছনে ফেলতে পারবে। তবে কতক্ষণ এড়াতে পারবে? আশা করছে, ধূলি-ঝড় চাকার চিহ্ন মুছে দেবে। তারপর টাঙ্কি খালি হলে? তখন হেঁটে পালাতে হবে!

এক পলক জাওয়া মোটর সাইকেলটা নিয়ে ভাবল রানা। এই কোম্পানি দ্বিতীয় বিশ্বযুদ্ধের আগে থেনেড ও অন্যান্য সামরিক অস্ত্র তৈরি করত। বেশ নাম করে হালকা ইঞ্জিন নির্মাণে। যুদ্ধের পর নির্ভরযোগ্য দ্রুতগতি মোটর সাইকেল নিয়ে বাজারে আসে। ওগুলোর টেকনোলজি নানা দিক থেকে উন্নত ছিল। এটা তারই একটা। বাসী অকটেন-এ চলছে ইঞ্জিন, তবে আওয়াজ প্রায় নেই বললেই চলে!

‘কোনদিকে চলেছি?’ জানতে চাইল ববি।

‘যেদিকে দু’চোখ যায়,’ উদাস স্বরে বলল রানা। ‘আপাতত কয়েক ফুট দেখতে পাচ্ছি সামনে।’

‘ঠাট্টা নয়, রানা। ম্যাপ বা কমপাস নেই। বুঝব কী করে গ্রাম বা শহর কোথায়!’

‘ও নিয়ে ভেবো পরে, আগে জানটা তো বাঁচুক।’ গ্রহরীদের কাছ থেকে দূরত্ব বাড়তে চাইছে রানা।

ধুলো উড়িয়ে চলেছে জোরাল টানা হাওয়া। বিশ ফুট দেখা যায় না! থ্রটল মুচড়ে ধরল রানা। নিচু গর্জন ছাড়ল মোটর সাইকেল, বিট-বিট আওয়াজ তুলে ছুটল ধুলোর প্রাচীর ভেদ করে।

(দ্বিতীয় খণ্ডে সমাপ্য)

মাসুদ রানা সিরিজের আগামী বই

আগুন নিয়ে খেলা

দ্বিতীয় খণ্ড

কাজী আনোয়ার হোসেন

পালানোর উপায় কোথায় রানা-ববির?

গোবি মরণভূমি। চারদিকে ধু-ধু প্রান্তর, পাহাড়-টিলা,
গিরি-সংকট, বালির উঁচু স্তূপ বা গভীর খাদ। খেয়ালী
প্রকৃতিকে নিয়ে যেন খেলছে কেউ।

বড় বাড় বেড়েছে ওই জালাইর তেমুজিনের।

আগুন নিয়ে খেলছে ও!

স্তব্ধ হয়ে এল মধ্য-প্রাচ্যের ক্রুড অয়েল রপ্তানি! হোঁচট

খেল গোটা বিশ্বের অর্থনীতি! পাগল হয়ে উঠলেন

তাবৎ রাজনীতিবিদ! মহাচিনকে পায়ের কাছে হাঁটু মুড়ে

বসাতে চায় তেমুজিন। তার সামনে কোন্ সাহসে

মাথা সোজা রাখছে মাসুদ রানা?

সোহেল ও ববিকে নিয়ে আবার ঢুকল ও চেন্সিস খানের

কমপাউণ্ডে। এমনি সময়ে খেপে উঠল প্রকৃতি।

পড়ছে একের পর এক লাশ! শেষে সমাধির ভিতর

জালাইর তেমুজিনের মুখোমুখি হলো রানা।



সেবা বই

প্রিয় বই

অবসরের সঙ্গী

সেবা প্রকাশনী

২৪/৪ কাজী মোতাহার হোসেন সড়ক, সেগুনবাগিচা, ঢাকা-১০০০

সেবা শো-রুম: ৩৬/১০ বাংলাবাজার, ঢাকা-১১০০

প্রজাপতি শো-রুম: ৩৮/২ক বাংলাবাজার, ঢাকা-১১০০